


Ch.
Ficht



17
8
45







2.
FR. VINCENTII
FASANELLI

A S. LAURENTIO ORD. MINOR. OBSERV.
CITERIORIS PROV. CALABRIÆ L. J.
ET IN CONSENTINO LYCÆO
STUDIOR. PRÆFECTI

A R S.
INQUIRENDÆ VERITATIS

*In usum studiosæ Juventutis nova methodo,
novoque ordine tradita.*

L I B R I IV.

*Hic volum. p.
pertinet
Carmeli*



*Caroli a S. S. S. S.
ad Convent. S. M. g.
J. Antimi*

NEAPOLI MDCCLXXXVII.

EX TYPOGRAPHIA URSINIANA

PUBLICA FACULTAS



Qua eundum , non qua itur .

Fere (a) Seneca cap. I. de Vit. beat.

(a) *Fere*, inquam . Nam locus acerbissimæ reprehensionis plenus adversus eos , qui in philosophando pecudum more ducuntur , est : *Pergentes , non qua eundum , sed qua itur* . Quare non quod expresse , sed quod tacite implicateque monet Seneca , id nos commodius opportuniisque expressimus in *Lemma* .



A. R. P.

FR. SALVATORI VENETIANO

A CAMERATA, ORD. MIN. OBS. PANOR-
MIT. PROV. L. J. JAM MINISTRO PRO-
VINCIALI, ATQUE S. OLIM OFFICII PER
UNIVERSAM SICILIAM CONSULTORI,
ET QUALIFICATORI &c. &c.

MECÆNATI SUO AMANTISSIMO.

FR. VINCENTIUS FASANELLIUS E. O.

F.



*Ici tandem, Vir clarissime,
ipsomet adprobante, ac per epi-
stolas suas fere me incitante ge-
nerali Ministro, potentissimos renisus tuos;
quos emollire paulatim, Teque in arden-
tis.*

tissima animi mei vota pertrahere, res ardua nimis videbatur, ac difficultatis plena. Vici, inquam: quandoquidem Opella, ad studiosam iuventutem curatius, ac utilius instituendam ordinata, atque Ars inquirendæ veritatis ob id a nobis inscripta, publica nedum luce perfruituro, sed & illustri quoque nomine tuo exultat letabunda, ac validissimo patrocinio communitur. Renuebas Tu autem fortiter, maximaque cum cordis animique mei tristitia ac mœrore haud adquiescendum putabas, veritus, ne ea occasione eximie virtutes, doctesque illæ tuæ in publicum prodirent; ac ita incomparabilis modestia tua, cujus scrupulosissimus zelator existis, gravissimas offensiones pateretur. Sed procul, quaeso, vanæ trepidationes! procul impertunæ formidines! procul timores panici! . . . Quid enim dicere de Te unquam orando potero, quod omnium in oculos jampridem non incurrerit? quod omnium non excitavit admirationem? quodque omnium plausus, ac præconia longe lateque non meruerit?

Prin-

Principio illustres Disciplinarum cathedrae, quas docte, sapienterque regebas olim, ac moderabaris, cuique notae. Tum ad totius provinciae Praefecturam omnium plausu & acclamatione quum evehereris, ab excell. Domino Marco Antonio Columna, Stiliani Principe, Siciliaeque Proregè, totaque Panormitana Civitate magna currum pompa & apparatu splendidissimos Tibi collatos fuisse honores, felix rumor circumquaque exinde diffusus nondum plane conticescit. In eo autem munere obeundo quanto cum zelo, quantaque cum prudentia, ac dexteritate regularem disciplinam vel florentem firmaveris, vel collapsam restitueris, hinc alliciendo dociles, illinc compescendo superbos, ubique honestos viros premiis ac laudibus cumulando, nulli prorsus ignotum. In sacris quoque Missionibus per Panormum, civitates, & oppida contermina longo annorum ductu ineundis, domos ubique reliquisse incolas sine habitatore, ut ignita eloquia Dei ex ore tuo inaudirent,

atque, spretis sæculi illecebris, ad pœnitentiam converterentur, circumvolitans undique fama adhuc mirabunda concelebrat. Quanta item cum sapientia, ac nominis tui gloria Consultoris, & Qualificatoris S. Officii munia per universam olim Siciliam expleveris; adeo ut Collegis tuis ceteris, iisque sapientissimis, maximæ admirationi esses, & exemplo; sicula natio tua omnis etiamnum læta proclamat: Adsertam per Te insuper, acerrimeque vindicatam ordinariam generali Ministro jurisdictionem, soluta provincialium Comitiorum vincula, multaque alia apud regiam Majestatem in pace composita; præterquamquod ipsemet generalis Administer in autographis epistolis suis ad Te datis grato, sinceroque animo profiretur; recentissima quoque ea res est, ac omnium in ore, & laude adhuc constituta. Sicularum præterea Principum, Procerumque neapolitanorum, necnon summorum Ecclesiæ Præsulum, aliorumque virorum præstantissimorum domesticam tecum

con-

*consuetudinem ac familiaritatem, nedum de-
mirati quotidie omnes, sed & in dies demi-
rantur. Quid plura? Nulli prorsus imper-
vium, graviores curas tuas in id maxime esse
intentas, ut in timore Domini, in politiorē
eruditione, in doctrina sana ubique insti-
tuantur juvenes: ut perpoliantur literæ:
ut seraphici Instituti honor ac decus au-
geatur: ut arceantur undique mala, ac bō-
na in eo cuncta florescant: ut arctissimo
caritatis vinculo inhaereant Capiti membra,
ab eoque opportune foveantur: utque Dei
honor & gloria, quam sive cogitando, si-
ve loquendo, sive quidvis agendo præci-
pue spectas, longē, lateque prolateantur. Eo
namque confluunt frequentissima, ad ju-
ventutem præsertim, sanctitatis monita. Eo
præclara virtutum exempla. Eo in pravos,
devotosque mores odium implacabile. Eo me-
morandi sermones illi, incredibili cum ani-
mi zelo ac fortitudine ad summum ponti-
ficem Pium VI. coram ipsomet admirante,
ac stupente generali Ministro bis, ter,*

quaterque fusi . Eo ad clementissimum regem nostrum Ferdinandum , quem Pater misericordiarum, & Deus totius consolationis ad populorum felicitatem diu sospitem servet , non absimiles , nec dispari cum constantia , animique zelo plures habitæ orationes : ut suprema nimirum auctoritate coercita falsorum quorundam fratrum audacia , qui Ordinis probro ac dedecori nati , sanctissimas Majorum leges & instituta pervertere , ac deturbare conabantur ; nulla in iis immutatio fieret , eademque in posterum diu jam inducta persisteret disciplina . Atque eodem postremo nonnullorum evulgatio spectat asceticorum Opusculorum , in primis vero eximii illius , quod a doctissimo auctore P. Flaminio a Latera conscriptum , ac per te typis viterbiensibus denuo recusum inscribitur . Difesa dell' antico metodo della Via Crucis , e censura del nuovo : tum alterius , cui titulus : Il celeste segreto per ottenere ogni bene dal grande Iddio delle onnipotenze , scoperto dall' ine-

D E D I C A T O R I A 21

inesplicabile valore della limosina a beneficio de' ricchi , *quod in editione neapolitana nova Præfatione* , plurimisque eruditissimis additamentis exornasti , ac locupletasti. Mirto excelsi animi tui immortalia monumenta cetera : quibus quum jamdudum publice plaudatur ubique , ac festiue ab omnibus concinatur , non est , amantissime Parens , cur ipsa Opellæ hujus nostræ nuncupatione delicatiori modestiæ tuæ vim ullam inferendam pertimescas . Multo minus ea vis pertimescenda ex Majorum splendore , ac præstantia tuorum , nobilissimæ in primis Suteranæ familiæ , ad quam materno stipite spectas , de Arnone : tum magni illius Traini , avunculi tui , & Episcopi Agrigentini ; ex cujus nepte , excell. Duci Palmæ , ac Principi Lampadusæ sacro connubii vinculo copulata , prodire eximia illa sanctitatis lumina , cardinalis Thomasius , & soror Maria Crucifixa , de quorum Apotheosi felici cum successu Romæ agitur apud S. Sedem . Nam
& pu-

Et publica ea quoque generis tui ornamenta sunt ; Et non tam tua , quam extranea , Et aliunde mutuata reputanda . Illud vero , quod aliquot ab hinc mensibus , quibus Superum favore dulci heic tecum contubernio fruor , in memet tacitus sum expertus , ne eidem modestiæ tuæ offendiculo esse videar , æternum secreto mihi erit in vulgus numquam immittendum : me scilicet humanitatis , Et comitatis , necnon ceterarum virtutum tuarum fulgore , velut fascino quodam Et magico incantamine adeo fuisse captum , ut ne momento quidem , si fieri posset , abs Te abesse ullibi optarem . Cui simile aliud in arcanis animi mei votis eadem de causâ alte reconditum ; ut nedum scilicet cœnobiis , ac provinciis singulis , sed Et Familiæ maxime universæ toridem præfici vellem
SALVATORES : ratus , sub tam faustissimo nomine (quod non sine sapientissimo Dei consilio Tibi impositum reputandum) , subque tua pervigili cura , prudentique gubernio Ordinem ipsum , sublatis navis
omni-

omnibus ac deliquis, quæ sæculorum diuturnitate, aliisque infaustis de causis subire alicubi coactus est, in pristinam sanctimoniam ac majestatem brevi esse rediturum. Quæ quum ita sint, eadem, quæ cetera soles, humanitate & comitate, abruptisque insuper ac propulsatis molestis illis & importunis cunctationibus omnibus tanto Viro indignis, excipe jam, Parens amantissime, munusculum, quod animo eximiis beneficiis tuis æquali, nec veneratione & obsequio illustribus promeritis minori exhibendum Tibi censui, dicandum, consecrandum. Exiguum Tibi fortasse videbitur foliorum numero: verumtamen satis magnum, ut spero, reputabis argumentorum præstantia, gravitate, & utilitate. Ceterum id etiam Tibi satis abundeque compertum, Vir præstantissime, qui benefactori videlicet, ac Mecoenati suo, quantumlibet inclyto & illustri, ex animo sacrat quodcumque potest, eum proculdubio sacrare nimium, sacrare omnia. Quo in loco memorandum mulierculæ hebrææ exemplum,

plum, de quo in Evangelio. Ea quamquam nonnisi dragmam in Templi thesaurum voti causa injecisset; nihilominus perexiguus hujusmodi nummulus, famelico ipsius ori jejunoque ventri subtractus, multo gratior, Servatore teste, & acceptior Deo fuit, quam ponderosique nummi aurei & argentei, quos prædivites eodem inferebant, & epulones. Quod reliquum est, id alta mente reponas, velim, Parens amantissime, me, etiamsi fractus illabatur orbis, ab humili, sinceroque obsequio ac veneratiane Tui ne latum quidem unguem fore ulibi recessurum. Vive interim, ac vale: atque Deus O. M. ad majorem nominis sui gloriam, ad universæ Familiæ decus, ad virtutum incrementa, atque ad dulce, suavissimumque animi mei solamen et gaudium diu servet incolumem.

Dabam Neapoli ex sacris S. Mariæ Novæ Ædibus Kal. Octobris 1786.

STUDIOSÆ JUVENTUTI CONSENTINÆ

FR. VINCENTIUS FASANELLIUS

S,



I. E. Ecce secundo ad vos , con-
terranei Juvenes amantif-
simi, quamquam sero for-
tasse nimis, ac multo post quam pollicita-
tiones alibi meæ (a), vestraeque justæ ex-
pe-

(a) Promissiones de edendis *Institutionibus philo-
sophicis* factæ a nobis fuere Tom. II. alterius Opu-
sculi nostri, cui titulus: *Veritas resurrectionis J. C.*
&c. , an. 1771. typis Simonianis in lucem editi .
Sed proh ! quam incauti , imprudentesque sumus ,
quum velut futurorum domini arbitrique hæc facturos
nos esse jactamus , illa omisuros ! Nam ea plerum-
que humanorum ingeniorum arrogantia , ut pervia
ac facilia velut erubescencia , in invia , inaccessa ,
tetraque caligine obducta pertinacius ingredi , ac pe-
netrare contendant . Quare fit , ut in insuperabiles
scopulos , aggeresque illisa , non sine humiliante , morti-
ficanteque verecundia aut *stationaria* prorsus plerumque
reddantur , aut etiam , quod probrosum , *retrograda* .

pectationes ferre posse videantur. Verum quum morborum hæmorrhoidalium meorum, quibus acerbissime diuque vexatus, vosmet fueritis oculati testes, ac spectatores persæpe moerentes; ea de causa supervacaneum prorsus fuerit longævæ moræ hujus rationem vobis reddere, ac molestam de ea historiam enarrare. Diu itaque infauis his de causis mihi silendum fuit: paratus nihilominus æternum adhuc flere in posterum, atque ad amicos dolores meos complectendos, ac deosculandos denuo redire, si ita quidem Domino placuerit, cujus nomen benedictum in sæcula. Equidem plurium annorum experimento jam didici, corporis afflictationes quo acerbiores fuerint ac diuturniores, eo validius, & invincibilis propriæ nos miseriæ & imbecillitatis revincere; ac devios inde ab honestate mores in *pietatis, justitiæ, ac sobrietatis* semitas, aliarumque virtutum exercitia sollicitius commigrare. Quo spectat memorandum regii Psalmodographi illud; *Bonum mihi, quia humiliasti me; ut discam justificationes tuas,*

II. In horum interim malorum induciis, quæ inconstantia ac variabilitate sua
pe-

nescio , quousque sint duraturæ , *Artem* inquirendæ veritatis furtim pene vobis sisto , tamquam illam , quæ ad vestram in primis utilitatem & commodum magna ex parte aucta fuerit , perpolita , in lucem edita : ut si docere fortasse verum , bonumque de more proponere non amplius possim ; quemadmodum scrutari illa in scientiarum studiis , & assequi debeatis , adcuratorem saltem methodum , & ordinem exactiorem vobis aperiam . Excipite ergo illam lubenter , gratoque animo ; sicut pari erga vos dilectione , invandique zelo ac voluntate vobis offero . Illudque alta mente reponite , quousque per huiusmodi malorum inducias & interstitia meorum eniti poterò , vestris in sapientiæ studiis progressibus & commodis amplificandis , ac perficiendis me semper intentum esse , atque paratum . Adeo nempe *Patriæ* , qua nihil carius , amor , ac nobilissimorum ingeniorum vestrorum selectior , præstantiorque cultura mihi maxime insident cordi!...

III. Sed argumenti jam ipsius, Opusculique geratim natura paullulum evolvenda (b).
Prin-

(b) Paullulum, inquam. Nam eo plerumque animo

Principio igitur continent illud partes omnino quatuor, quos *Libros* adpello: ac Libri singuli Capita plura, quæ uno oculi ductu subsequens *Indiculus* exhibet, quem e vestigio adponendum putavi. Prior in Logicæ natura per essentiam constituenda haud ceterarum *proprie compars* est, sed earumdem potius *Apparatus*. Enimvero jampridem ea mihi scribendi ratio placuit, ut quæ sunt generaliora, parare in antecessum enitar; tum ædificii constructionem, ac formam paullatim commoliri adgrediar. Priori igitur, ut oportet, jam parata, sequitur pars secunda, in qua artem distincte evolvimus pervestigandi *veritates physicas per externorum sensuum experientiam*. Inde pars tertia, qua *veritates metaphysicas* inquirendi artem tradidi.

mo Lectores constituti sunt, ut lustrare quidem plura avide, lubenterque velint; verum in *Operum* corpore, non in *præfationibus*, quas breviulculas amant. Contra tamen ac ego optandum putarem. Nam instrui plane antea, & erudiri in itinere ineundo quod sit *præfationibus*, vellem, quam in incertum & obscurum progrediundo vestigia anceps, dubiusque immittere. Adeo verum illud: *Velle suum cuique est, nec vobis vivitur uno!*

dimus per *mentis rationem* . Ac demum pars quarta , qua artem quoque subnectimus pervestigandi *veritates historicas* per *auctoritatem* ad *Criticæ* leges exactam . Hæc per summa capita interna constitutio argumenti propositi, hic partium ordo, hæc natura : de quibus fuscæ ad calcem Libri i. tamquam in loco omnibus commodiore, & opportuniore.

IV. Scio, quæ ad aures hæc mihi immerenda velleis , Juvenum sollertissimi : eam scilicet Logicæ partitionem, eamque lucubrandi methodum ceteras , quæ hucusque prodire , pessumdare prorsus , atque tamquam extraneas , & commentitias rejicere , ac reprobare. Sit ita porro. Numquid propterea abjicienda vera , genuina, atque a natura ipsa Logicæ non vi quadam extorta, sed ultro, sed semet, sed propria sponte erumpentia , quod veteribus, ac vulgo receptis adversentur? Equidem retinenda verera ; sed quousque recentia non suppetant meliora. His substitutis, abjicienda prorsus, & antiquanda , Namne & herbis , & glandibus , & pomis adhuc vascendum agrestibus , quod vetustioribus illis cibi hi essent sapidior.

XVIII **STUDIOSÆ JUVENTUTI**
res, & delicatiores? *Qua* porro *vi.* *eun-*
dum, eadem viros maxime philosophos
incedere oportet, *non pecudum more qua*
vulgo itur. Quod præclarum Senecæ mo-
nitum in superiori, ut vocant, *Lemmate*
seorsum adponendum putavi.

V. Sed diducamus ista paullulum, atque
quam recte, quamque julte & adcurate,
ea a nobis proposita fuerint & adopta-
ta, cursim, ac velut aliud agendo de-
monstremus. Itaque si primum *Ars inqui-*
rendæ veritatis Logica est, nemine diffi-
tente: Si veritas deinde omnium quoque
judicio vel *physica est*, sive sepsibilium,
vel *metaphysica*, sive intelligibilium, vel
demum *historica*, sive præteritarum rerum
gestarum: Ac si media postremo inqui-
rendi *veritates physicas* sensuum experien-
tia sunt, *metaphysicas* mentis ratio, *hi-*
storicas auctoritas ad *Criticæ* leges exa-
cta; ecquis aperte non videat, non alias
esse germanas Logicæ partes, quam tri-
plicem id genus veritates pervestigandi
artem, *physicas* nimirum per *sensuum ex-*
perientiam, *metaphysicas* per *mentis ra-*
tionem, & *historicas* per *auctoritatem* ad
Criticæ leges exactam: nec alium consequen-
ter

ter lucubrandi ordinem adhibendum, quam quem tradidimus? Ac si ita se res habet, eccur spuris, ac nothis ceteris haud ille præferendus? Numquid ex invia in semitam regiam, unde diu jam abscessimus omnes, numquam remigrandum? Numquid eadem crambes ad nauseam usque coquenda semper, ac recoquenda? Numquid exsucca illa, ipsida, atque sterilia numquam generose recidenda; nec per utiliora longe, ac jucundiora scientiæ aliquando locupletandæ ac perpoliendæ, earumque fines ulterius prolatandi?

VI. Quæ quum ita sint, satagite, oro vos, obtestorque, Juvenes ingenui, ut ea via, quam vestræ utilitati & commodo *diurnæ meditationis ope* aperiendam, ac muniendam curavi, constanter incedatis: atque ad nobiliora, ac præstantiora continuo anhelantes, eadem via generosi ac lætabundi, quemadmodum eximia nostratum ingenia maxime decet, contendatis. Satagite, quæso, vobis repetam; propterea quod, ne obscuri aliquid & involuti remorari vos ullibi posset, neglecta laboriosissima illa & intricatissima, quam *Volsianam* adpellant, methodum quoque

adhi-

adhibuimus aliam ubique planam , facillimam , atque ultroneo naturæ fluxui , rerumque agendarum ordini , internoque nexui ac seriei valde aptatam . Eademque de causa sempiternos de more, & interminabiles *regularum, canonumque catalogos* vitandos curavimus , tamquam illos , qui multiplicitate ac variete sua memoriæ opprimendæ, atque seipsis mutuo perque vices delendis & obliterandis unice comparati nobis videbantur : quorumque loco uno eodemque calami ductu selectiora præcepta subjecimus, quæ utilia magis, magisque ad rem facientia visa sunt . Atque ne feracissima, æque ac Consentinum solum ipsum, ingenia vestra *sterili littus versarent aratro;* non damnavimus, uti fit, solum, sed & generose præcidimus etiam vana omnia, & supervacanea, quæ ex veteri schola deducta ad otia tantummodo, atque ad germanæ sapientiæ gustum retundendum comparata erant , & ordinata . Sic enim a natura constituti sumus , ut quæ æquo judicio abjicienda putamus, abjiciamus reipsa, atque in Democriti puteum sempiterna oblivione, & anathemate immergamus. Damna-
re namque quidquam ut supervacaneum
& ina-

& inane, simulque utramque postea paginam eodem implere, bicalami proculdubio hominis est, ac probantis simul idem facto ipso, tum verbis improbantis. Quo quidnam turpius, ac nativa Philosophi constantia & gravitate indignius?

VII. Neque his tantum limitibus pro utilitate vestra & commodo intentissimæ curæ nostræ ac diligentæ circumscribuntur, Nam ulterius prætergressi, ac *miscendo utile dulci*, stylum data opera attemperavimus ita, ut & esset in demonstrando robustus, & in alliciendo decorus: ut ita & hinc vos docendo graviter, & illinc oblectando argute, ad germanæ sapientiæ apicem promptius ac felicius pertingendam nobilissimis ingeniis vestris latiore ubique viam sterneremus. Sane in micanti, venustoque scribendi stylo nescio quid magici incantaminis cubare videtur, quod lectores proculdubio & ad legendum avidiores reddit, & ad meditandum inclinatiores ac procliviores. Scilicet veritas stylo cultiori evoluta velut adamas spectari potest in elaboratissimis auri foliis pulcherrime intextus, qui fulgore suo cunctorum ad se oculos, & admirationem tra-

hit . Contra vero tamquam aurum in sterquilinio , quod ad nauseam & contemptum fere incitare solet, si rudi, humili, ac barbaro, uti fit, stylo exposita fuerit .

VIII. Atque sunt ista quidem magnis ingeniis vestris, optimæ spei Jüvenes, ad nobilissimarum scientiarum brevi faciendum compendium calcaria, & incitamenta potentissima. Quod si nova, & ab egregiis Majorum nostrorum exemplis deducta mihi fortasse addenda putetis: recolite, quæso, quanta sapientiæ laude, quantaque nominis gloria, ac splendore virutum refloreat conterranei Scriptores nostri consentini, in primis vero Bernardinus Thylesius, novæ per Italiam Philosophiæ parens, ac veteris peripateticæ præfector acerrimus: tum illustris ipsius avunculus Antonius Thylesius: inde Cajetanus Argenti S. R. C. Præses, atque Carolo VI., summoque pontifici Benedicto XIII. tantopere carus: P. Franciscus Antonius Pirus, Ordinis Minimorum summum decus & ornamentum, nostrique olim amicissimus: atque ut innumeros alios prætermittam, quorum catalogum do-

docte , eruditeque contextuit cl. Marchio Salvator Spiriti in Opere , cui titulus : *Memorie degli Scrittori Cosentini*, D. Joannes Poteſtio in hoc conſentino archiepiſcopali Seminario ſub illuſtribus archiepriſulibus Capicio Galeota , & de Affliſto olim in *Hiſtoria eccleſiaſtica* cathedra auditor meus ac diſcipulus amantiſſimus, nunc doctiſſimus magiſter, ac præceptor honorificentiſſimus . Ut nihil dicam de ceteris viris-illuſtribus , quorum alii vel ſplendore ſanguinis, vel amplitudine doctrinæ, vel utroque ſimul ex omni cœtu ordineque florētiſſimam Civitatem ipſam etiamnum magna copia exornant ; alii ejuſdem Provinciæ civitates alias, oppida, pagos colluſtrarunt , præcipue vero de magno illo omnis literaturæ parente Vincentio Gravina, quem nomināſſe tantum, ſatis laudaſſe erit .

IX. Horum itaque, egregia pubes, doctiſſimorum concivium illuſtria vobis exempla ſpectanda. Horum æmulanda gloria. Horum tuta veſtigia perſequenda . O ſi eximios adeo viros tamquam nobiliſſimum ſtudiorum veſtrorum exemplar vobis propoſueritis ! O ſi in divinas huma-

nasque Disciplinas ardentissimum illum , quem habuere ipsi , amorem veraci vos quoque in vobis animo excitaveritis ! O si ineptissimis relaxationibus abjectis , intensissimo , quo iidem æstuabant , ardore scientias ipsas , earumque studia percolueritis ! Haud jurare , si opus , vel minimum hæsitavero , brevi vos ad virtutum ac germanæ sapientiæ culmen ingenti cum gloria evehendos , ac sublimandos . Brevi selectioris simul eruditionis , ac omnigenæ doctrinæ peritissimos evasuros . Brevi vobis felices , Patriæ utiles , Deoque caros omnium plausu & admiratione reddendos . Absint itaque cunctationes omnes . Absint fluctuationes . Absint importunæ moræ . Sint , quæso , studiorum initia vestrorum jam parata . Sit constantes , nec unquam in illis interrupti progressus vestri . Sintque postremo fructus capiendi uberes , sint jucundi , sint veraces . Atque quum fausta hæc omnia , secunda , prospera , quemadmodum beneficentissimum bonorum omnium Largitorem enixe precor , vobis contigerint ; nihil mihi præterea exoptandum erit ultra . Expleta jam large erunt ardentissima vota mea . Felix , lætus , planeque beatus ero. X. Va-

X. Valetis interim , dilectissimi , *gaudium meum* , & *corona mea* ; Deumque pro me orate , ut superni luminis radio collustratus in mente , ac divini amoris flamma incensus in voluntate , & sciam , quæ sibi , quæ mihi met , quæ aliis pro opportunitate debeam ; & eadem , ut oportet , opere perficiam . Id est enim omnis homo . Id veræ felicitatis , ad quam tendimus , & sine qua omnia vana , adsequendæ medium . Id omnia . Valetis denuo , carissimi , Deumque (quod sapientiæ initium) timete , diligite super omnia , summeque percolite . Ab eo , tamquam rerum omnium principio , faustissima initia ducant studia vestra . In eundem , ceu rerum pariter omnium finem , ubique contendant . Nec memorandum illud de quo in divinis Eloquiis , ullibi excidat memoria vestra : *In malevolam* (peccatricem generatim intellige) *animam non introibit sapientia* : vera scilicet , humilis , foecunda , benefica , divina ; sed falsa , sed turgida , sed vana , sed insidiosa , sed terrena , & quam multo melius numquam prorsus inaudivisse fuerit , quam didicisse : quippe quæ corruptrix morum , so-

xxvi STUDIOSÆ JUVENTUTI
cietatis perturbatrix, religionisque hostis
& inimica. Quod reliquum est, quodque
simul tandem vehementer cupio: *Vosmet
quoque rebus servate secundis.*

I N D E X

LIBRORUM, ET CAPITUM.

E *Pistola dedicatoria.* pag. III.

*Studiosæ Juventuti consentinæ allocutio,
Operisque Præfatio.* pag. XIII.

ARTIS INQUIRENDÆ VERITATIS

L I B E R I.

P R Æ L I M I N A R I S

*De prævio ad veritatis inquirendæ ar-
tem Apparatu.* §. I.

C A P U T I.

*De Philosophiæ natura, partibus, deque Logicæ
præstantia, origine italica, ac variis,
quæ de ea prostrant, operibus in lucem
editis.* §. II.

C A P U T II.

*De triplici animi statu, ignorantia, scien-
tiæ,*

XXVIII INDEX LIBRORUM

tia, errorum: ac de vero, & falso generatim. §. XII.

C A P U T III.

De necessitate exuendi mentem ab ignorantia, & errorum debonestamentis, atque in veri decus, ac lumen apta gradatione deducendi. §. XX.

C A P U T IV.

De internis animi obstaculis pro veri inquisitione avertendis. §. XXVIII.

C A P U T V.

De repellendis in eundem finem obstaculis externis. §. XXXIX.

C A P U T VI.

De tollendo præjudicio quodam pagano, Calabrae juventuti nostræ summopere noxio. §. XLV.

C A P U T VII.

De optimorum Præceptorum delectu, deque mutuis eos inter ac tirones officiis. §. LIV.

C A P U T VIII.

De Scientiarum in inquisitione veri sibi mutuo succedentium ordine: & quomodo. §. LXIV.

C A P U T IX.

De scopo, quem in veri inquisitione, Disci-

scipularumque studiis tirones sibi proponere debent. §. LXXVII.

CAPUT X.

De recta definiendi, dividendi, & in ordinem disponendi arte, in inquisitione veri adeo frequenti, delicatiori, ac necessaria. §. LXXXVIII.

CAPUT XI.

De viribus intellectus humani ad verum investigandum, & assequendum idoneis. §. XCVII.

CAPUT XII.

De triplici veritatis genere, physica, metaphysica, historica, earumque certitudine. §. CVI.

CAPUT XIII.

De physica, metaphysica, & historica veritatis indiciis, quibus a falso secerantur. §. CXVII.

CAPUT XIV.

De physica, metaphysica, & historica veritatis inquirenda mediis, sensuum experientia, mentis ratione, & auctoritate ad Criticæ leges exacta; deque nova Logicæ partitione, novoque, ac genuino lucubrandi ordine. §. CXXVII.

ARTIS INQUIRENDÆ VERITATIS

L I B E R II.

De arte inquirendi veritates physicas per sensuum externorum experientiam. §. I.

C A P U T I.

De sensibus externis, eorumque ministerio in delitescantium veritatum physicarum investigatione. §. II.

C A P U T II.

De necessitate ipsum naturæ codicem, sive adspectabilia Dei opera per sensuum experientiam consulendi, quo veritates physicae certius, ac promptius detegantur. §. XIV.

C A P U T III.

De Inquisitionis hujus veritatum physicarum utilitate uberrima: deque delectu in ea faciendo. §. XXII.

C A P U T IV.

De præcipuis quibusdam animadversionibus, quibus physicarum veritatum inquisitio regenda. §. XXVIII.

CA-

CAPUT V.

De observationum, & experimentorum natura, discrimine, ac generibus variis.

§. XLII.

CAPUT VI.

De observationibus rite instituendis, earumque usu in detegendis veritatibus physicis.

§. L.

CAPUT VII.

De ineundis experimentis, rectoque machinarum usu ad physicas veritates in lucem eruendas.

§. LXII.

CAPUT VIII.

De usu Matheſeos in evolvendis naturæ phaenomenis, per observationes, & experimenta detectis.

§. LXXIV.

ARTIS INQUIRENDÆ VERITATIS

LIBER III.

De arte inquirendi veritates metaphysicas per mentis rationem.

§. I.

CAPUT I.

De humana ratione, ejusque præstantia,
ac

XXII INDEX LIBRORUM

ac muneribus variis . §. II.

C A P U T II.

*De ideis , tamquam primordialibus ratiocini-
nii elementis , earumque objectis , ac si-
gnis .* §. X.

C A P U T III.

*De judiciis , tamquam proximioribus ratio-
ciniis membris .* §. XXVI.

C A P U T IV.

*De quibusdam enunciationum generibus ,
Geometrarum usu in demonstrando pro-
batis .* §. XXXVIII.

C A P U T V.

De ratiocinii natura generatim . §. XLVII.

C A P U T VI.

*De variis ratiociniorum generibus , in pri-
mis de Syllogismo .* §. LVIII.

C A P U T VII.

*De inquisitionis veritatum Metaphysicarum
necessitate , utilitate , delectu .* §. LXXII.

C A P U T VIII.

*De generalioribus quibusdam animadversio-
nibus , quibus humana ratio in meta-
physicarum veritatum investigatione re-
genda .* §. LXXIX.

C A P U T IX.

*De usu rationis in Metaphysicarum veri-
ta-*

tatum inquisitione per ratiocinia. §.XCI.

CAPUT X.

De usu rationis in metaphysicarum veritatum inquisitione per analysim. §.XCIX.

CAPUT XI.

De usu rationis in metaphysicarum veritatum inquisitione per synthefim. §.CVIII.

CAPUT XII.

De usu rationis in metaphysicarum veritatum inquisitione per analogiam. §.CXIV.

CAPUT XIII.

De usu rationis in metaphysicarum veritatum inquisitione per antilogiam. §. CXXIII.

CAPUT XIV.

De usu rationis in metaphysicarum veritatum inquisitione per librorum dogmaticorum lectionem: ubi de arte hermeneutica. §. CXXXI.

CAPUT XV.

De usu rationis in metaphysicarum veritatum inquisitione per disputationem. Ubi de scientiarum, bonarumque artium Academiis frequentandis. §.CXLIII.

CAPUT XVI.

De usu rationis in metaphysicarum veritatum inquisitione per meditationem. §.CL.
AR.

ARTIS INQUIRENDÆ VERITATIS

LIBER IV.

*De arte inquirendi veritates historicas per
auctoritatem ad Criticæ leges exactam.*

§. I.

CAPUT I.

*De auctoritate humana, ejusque principiis
generatim.*

§. II.

CAPUT II.

*De utilitate inquirendi, ac perdiscendi ve-
ritates historicas, & delectu, ac præcau-
tionibus, necnon de mediis in eo studio
adhibendis.*

§. XI.

CAPUT III.

*De artis Criticæ natura, deque illius ne-
cessitate, ac moderamine in investiga-
tione veritatum historicarum ope aucto-
ritatis humane.*

§. XVII.

CAPUT IV.

*De Criticæ artis usu in secernendis genui-
nis Scriptorum operibus a spuris, ac
notis.*

§. XXV.

CA.

CAPUT V.

De artis Criticæ usu in historicarum veritatum inquisitione , pro varia testimoniorum ætate , numero , sagacitate , probitate , doctrina , narrandi modo , silentio , ac rerum , quas narrant , admirabilitate .

§. XXXVII.

CAPUT VI.

De Critica sacra in veritatibus ad Religionem pertinentibus , atque per Scriptores divinitus inspiratos nobis traditis.

§. XLVI.

F I N I S.





ARTIS INQUIRENDÆ VERITATIS

LIBER I.

PRÆLIMINARIS.

*De prævio ad veritatis inquirendæ
artem Apparatu.*

§. I.

P

Riorem Librum hunc *præliminarem* adpello, non quod ipse per se se interna quædam, aut essentialis Logicæ *compars* sit; quum per tres subsequentes natura & essentia ejus integra constituatur: sed quatenus generaliora principia quædam, ac notiones universaliores, instar cu-

A

jus-

jusdam *Apparatus* suppeditat, quibus germanæ partes ejus, corpusque integrum & construuntur facilius, & uberius collustrantur. Sit itaque ad laudem in primis, & gloriam ejus, a quo est omne bonum; tum in vestram, solertissimi Juvenes conterranei, aliorumque utilitatem & commodum.

C A P U T I.

*De Philosophiæ natura, partibus, deque
Logicæ præstantia, origine italica,
ac variis, quæ de ea prostrant,
Operibus in lucem editis.*

§. II. **P**hilosophia, cujus prior ac nobilissima pars Logica, non ipsa Græcorum *sapientia*, naturalium videlicet Disciplinarum congeries, est, sed studium, amor sapientiæ. Quemadmodum nec arrogans, superbusque eorundem *sapiens* ipse est vir philosophus, sed sapientiæ amator, ac peruestigator: quamquam promiscue ea accipiantur in scholis longævo usu.

§. III. Sapientia autem, definiente Tullio, est rerum divinarum, & humanarum, causarumque, quibus hæ res continentur, cognitio. Quæ definitio merito probata omnibus, & in scholis recepta. Vellem autem, ut rerum istiusmodi divinarum & humanarum naturam,
at-

attributa, & causas non peruestigasse se tantum, uti fit, & intellexisse contentus esset Philosophus; sed ut illarum maxime *fines*, & *usus* pro sui, aliorumque utilitate & commodo sedulo inquireret, detegeret diligenter, ac fideliter communicaret. Quæ namque inquisitio nullum nobis, nostrisque similibus sive pro *vi-
ta physica & animali*, sive pro *civili*, ac præcipue pro *moralis* emolumentum confert, vana est, & otii plena.

§. IV. Sed evolvamus ejus definitionis membra singula, atque ex eadem, tamquam ex uberrimo fonte, principales Philosophiæ partes omnes semet fluere commonstremus. Itaque *rerum divinarum* appellatione non Dei ipsius existentia tantum, unitas, ac perfectiones ceteræ heic intelligendæ; sed & res etiam ab ipsomet conditæ, quum intelligibiles ac spirituales, tum sensibiles & corporeæ. Item *rerum humanarum* nomine tam ipsa hominum inventa, artes puta, leges, civitates, similia, accipienda sunt, quam eorundem præcipue mores ratione turpitudinis, & honestatis. Quum denique subdit Cicero, *sapientiam cognitionem præterea complecti causarum, quibus res divina & humana continentur*, eo additamento scite nos monet, virum philosophum, quo a rudi popello secernatur, divina & humana non *historice* tantum, ac *simplici notitia facti*, sed maxime per suas causas, sive per rationes sufficientes, cur sint potius quam non sint, hoc

A 2

potius

4. ARS INQUIR. VERIT.

potius modo quam alio, nosse oportere. Quæ de re subsequenti capite III.

§. V. His itaque in hunc modum evolutis, nullo nunc negotio intelligent tirones nostri, ex Tullianæ definitionis hujus (§. 3.) fonte tres majores Philosophiæ partes, *Metaphysicam*, *Physicam*, *Ethicam* suapte sponte manare; quarum prior Deum ipsum, ac spiritualia ipsius opera; secunda corporea ac sensibilia; postrema tandem moralia, ac hominum præcipue mores, quatenus legibus naturæ moralibus conformes fuerint vel diffformes, boni vel mali, pœna vel præmio digni, contemplatur. Quibus accedit & major quoque ipsiusmet pars altera *Logica*; quæ quum præcepta tradat priores illas ordine disponendi, lucubrandi, ac delitescentes in eisdem veritates pervestigandi, & assequendi; earumdem *animam*, *spiritum*, ac *vitam* non immerito appellaremus. Sunt itaque Philosophiæ totius partes omnino quatuor, *Logica*, *Metaphysica*, *Physica*, *Eibica*, quæ in minores postmodum partes alias pro opportunitate subdividuntur.

§. VI. Est autem *Logica*, de qua heic sermo, *Ars inquirendæ veritatis*. Scio, viris doctis eam multipliciter definitam, & appellatam, in primis vero *philosophiam mentis*, *artem philosophandi*, pluribus modis aliis: qui ceteroquin eodem recidunt, ut patet. Quod autem nonnullis recentioribus additum, *Logicam* nedum *inquirendæ*, sed & *tradendæ*, ac *docendæ veritatis artem* esse; id supervacaneæ,
præ-

præterque necessitatem ab illis factum . Nil quippe vetat , quominus eadem via ac methodo *in docendo* ducamus tirones , quam nosmet pressimus *inquirendo* . Qua de re suo loco . Jam vero quum *ars* omnis datis quibusdam legibus , sive regulis , sine quibus nihil fit pulcri , nihil concinni , nihil ordinati , exerceatur ; hinc *ars Logica* præcepta menti philosophanti suppeditat ad delitescentes veritates apta methodo , naturali ordine , perpetuoque nexu perscrutandas , & assequendas .

§. VII. Atque ex his quidem pro aliarum studio , & assécutione Disciplinarum *Logicæ* utilitas , atque præstantia patet quamlatissime . Quod quum sedulo adnotassent viri docti , illustribus eam nominibus decorandam putarunt . Ac in primis Aristoteles , qui *organum* , sive *instrumentum sciendi* : tum Cicero , qui *facultatem* , quæ per omnes Sapientiæ partes manat , ac funditur : inde , ceteris silentio prætermisissis , Augustinus , qui *disciplinarum omnium disciplinam* communi calculo appellarunt .

§. VIII. Quid heic vero dicam de origine ejus , & antiquitate ? Scilicet est *Logica* recto , ordinatoque philosophandi studio coarvæ ; quamquam ipsius præcepta seorsum , & pro opportunitate hinc inde fusa , ac disseminata prius traderentur ; donèc Zeno Eleatenfis diligenter ea simul ex Disciplinis omnibus colligeret , atque in ordinatum *Scientiæ* corpus omnium primus conferret , & concinnaret ; quo usus primum Socrates , tum Plato , inde Ari-

6. ARS INQUIR. VERIT.

Stoteles, postremo alii . Quæ quum omnium sint iudicio sensuque probata ; intelligimus , Logicæ originem non *Græcis* , quemadmodum oscitanter scripto proditum nonnullis , sed *Italæ* nostris , ac distincte quidem huic nostræ *magnæ Græciæ* , ad quam Elea Zenonis patria olim pertinebat , esse adscribendam . Qua de re post Corsinium , D. Ladvocat *Dictionarii portatilis* auctorem , aliosque bene multos , legendus germanus Philosophus , isque præclarus , Heinnecius *Elem. hist. philos.* §. 84. ubi : *Sequitur secta Eleatica* , inquit , *quæ ab Elea , vel Velia magnæ Græciæ , vel Italia urbe nomen repetit . Inde enim prodire Zeno Eleates , præceptorum logicarum inventor* (collectorem intellige) *Parmenides , Leucippus* , quos Pythagoræ in Secta italica successores fuisse , scribit etiam Laertius in *Proemio* . Quum autem *Sinus policastrænsis . eleatensis sinus* olim diceretur ; inde merito conjicimus , *Eleam* Zenonis nostri patriam ad oras ejusdem sinus fuisse sitam .

§. IX. Zenonis Logica quousque in Socratis , ac Platonis , qui eam magni faciebant , manibus permanfit , nullum deliquium passa est , sed primitivum illud auctoris sui decus , & ornamentum perpetuo retinuit . Ubi vero in Sophistarum , & Epicuræorum scholas sequioribus inde temporibus pertransiit , multifariam corrupta fuit , ac deformata . Quo spectat Gassendi primum *apologia* in Logicam Epicuri , tum Recentiorum labores , ac diligentiz in per-

perpolienda, & corrigenda Logica Scholaſtico-
rum; quarum illa foeditatibus, ut fertur, in-
numeris, hæc inanium rerum farragine ſcate-
bant.

§. X. Itaque Recentiorum opera, ut Disci-
plinæ ceteræ mirum in modum auctæ, ac per-
politæ, ita & in longe meliorem, ac præſtan-
tiorẽ formam deducta Logica, ac volumina
de ea plurima conſcripta, & in lucem edita.
Horum præſtantiora paſſim cenſentur, quæ Ver-
nejus, Arnaldus, Brixienſis, itemque Genuen-
ſis, aliique viri docti evulgarunt. Placet mi-
hi Logica Heinneccii, placeretque multo ma-
gis, ſi ſterilibus illis, ac vanis ſcholarum nu-
gis, quibus ſcatet, eſſet deſœcata. Quo in lo-
co illud adnotatione dignam, in tanta logico-
rum voluminum copia paſſim minus nos co-
gitare recte, minusque recte philoſophari.
Numquid huc forſitan ſpectare dixerimus Bu-
ridiani aſini argutam illam, lepidamque fabel-
lam, qui, quaſnam prius ſpicas depaſceret,
ignarus, intactas reliquit omnes, ac ita, quem-
admodum eſt *in fabulis*, inter ſegetes fame pe-
riit? An vero id ideo fit, quia in ea ſæculi
pravitate, & calliditate vivimus, in qua *ars*
prædiligitur *vera* potius *occultandi*, præſertim
ab iis, a quibus ratione muneris, quò in Ci-
vitate funguntur, meridiana in luce ponenda
ea foret, ac denudato gladio protegenda?

§. XI. Novam denique *Logicæ* hujus no-
ſtræ partitionem prioris Libri hujus proponam
Capite poſtremo; quum conſectarium ea ſit

subsequentium Caputū . Cetera , quæ eandem spectant , libero cordatorum virorum iudicio committo : paratus emendare potius omnia , quam in pravitate sententiæ perseverare . Vera enim inquirō , vera sequor , vera amo , non mea , nisi quum & ipsa quoque fuerint vera :

C A P U T II.

De triplici animi statu , ignorantia , scientia , errorum . Ubi de vero , ac falso generatim.

§. XII. **S**I cum divinis , humanisque Scientiis animus conferatur , triplici is quidem in statu reperiri posse intelligitur , *ignorantia , scientia , errorum* . Quamquam non semper eo sibi ordine succedant ; quum ab ignorantia statu in scientiæ lumen , ac in errorum tenebras æque animus immergi possit . Quemadmodum vicaria successione ab errore in scientiam , & a scientia in errorem , atque ab errore non minus , quam a scientia in pristinam ignorantiam lethæa oblivione passim transire solet .

§. XIII. Est autem ignorantia pura putæque *cognitionis privatio* . Ea , quum primum in lucem edimur , est maxima : quæ paullatim postea imminuitur , prout rerum notiones adulescente ætate *reciprocè* augentur . Quinimmo quum divinæ , humanæque res , quæ sciri ab homi-

homine possunt, sint infinitæ; imminui ob id ea quoque ignorantia potest, scientia aucta, in infinitum; si quidem ingenio ad id idoneo studium addiderimus patientissimum, & ordinatissimum. Interim plura ex his intelligimus adnotatione digna, ac in primis neminem esse adeo doctum, ut non multo majora ignoret, quam sciat. Ideoque omnibus, ne exceptis quidem qui sapientissimi habentur, adnitendum, ut nova semper in dies pro sua, aliorumque utilitate & commodo inquirent, & in lucem proferant. Deinde nemini de ea, quæcumque polleat, doctrina, ac scientia in tanta ipsius exilitate superbiendum. Quamquam vana isthæc & ridicula *sciendi præsumptio* sciorum, ac inflatorum, ut ita loquar, folium dementiæ sit, non sapientum, atque doctorum. Nam vacuæ, ac steriles tantummodo spicæ sursum, superbeque eriguntur in agrò, non fecundæ, maturique frumenti plenæ, quæ humilitatem quodammodo æmulatæ, deorsum inclinantur. Cujus ratio manifestissima. Quia vera, ac germana sapientia propriam hominibus imbecillitatem, ac insita naturæ officia commonstrando, eos reddit humiliores, & humaniores. Quare eximiam Pythagoræ modestiam imitati, non *sophi*, idest sapientes, sed *philosophi*, sapientiæ nimirum amatores dici, haberique malent.

§. XIV. Quod si ignorantæ status cum rebus nunc conferatur, quæ nesciuntur, duo proculdubio comperiemus, quæ non sunt heic prætereunda silentio. Ac primum quidem, ca-
rum

rum aliquas scitu esse utiles , ac necessarias . Alterum , plurimas esse , quæ magis profunt ignoratæ , quam scitæ . Ad priorem classem spectant , quarum cognitio ad *pietatis* , *justitiæ* , ac *sobrietatis officia* omnino necessaria est ; adeout illarum inscitia nedum damnabilis , atque probrosa , sed & maxime quoque nobis exitialis sit ac noxia . Ad posteriorem , quæ scitæ vel nullam nobis utilitatem adferunt , vel impediunt majorem , vel etiam aut cupiditatem extimulant , aut concitant affectus , aut nova nos in vitia præcipites trahunt . Quo spectat gravissimum Taciti illud de rudi Germanorum populo *sanctius* , ut ipse loquitur , *apud oceanum vitam agente* , quam Romæ fiebat in tanta illa flagitiorum scientia , crebrisque exemplis . Quod & in colonis quoque nostris cernere licet , qui , quanto minus civitatem frequentant , tanto civibus sunt simpliciores , & honestiores .

§. XV. Quo autem *sapientiæ* , & *errorum status* evolvamus , quæ *vera* , quæ *falsa* *judicia* sint , prius expendendum . Principio *veritas* generatim in conformitate sita est , sicut vicissim *falsitas* in difformitate . Quocirca *vera* dicuntur *judicia* , quæ rebus conformia sunt , de quibus feruntur . *Falsa* vicissim , si eisdem fuerint difformia . Ita verum *judicium* isthuc : *Deus super omnia diligendus* ; quia enti summo summum debetur obsequium . Falsum contra hoc aliud : *Deus est peccati auctor* ; quia cum infinita ipsius bonitate , & sanctitate pugnat .

gnat. Ceterum ea veritas ac falsitas, quæ ex collatione judiciorum cum objectis desumitur. *logica* adpellari consuevit. Vocatur ea etiam *composita*; quia cum adfirmatione, & negatione, quæ compositionis quædam species sunt, conjuncta. Secus proinde ac est illa idearum, quæ ob id dicitur *simplex*, quatenus in puris ideis nulla adfirmatio subest, nullaue negatio. Scio, eam idearum veritatem ac falsitatem quibusdam denegatam viris doctis. Sed cur non dicendæ *veræ* ideæ, quæ rebus conformes fuerint, quarum sunt imagines? Cur non *falsæ*, quæ eisdem fuerint diffformes? Cur, inquam, *falsa* non erit idea turris, quæ eminus inspecta cylindrica videtur, quum sit quadrata? Nec erit *vera*, quæ, distantia imminuta, eandem exhibet quadratam, qualis est reipsa?

§. XVI. His in hunc modum evolutis, ambo duo reliqui status illi (§. 12.), *scientiæ* & *erroris*, erunt explicatu facillimi. Scilicet quum mens vera de rebus judicia fert, eaque vera putat, *in statu* esse dicitur *scientiæ*. Contra *in statu errorum*, si judicia vera pro falsis habeat, aut falsa pro veris. *Error* enim in judiciis falsis, quæ putantur vera, & in veris, quæ falsa censentur, sedem ac domicilium habet. Qui namque falsa judicat, scitque se judicare falsa, ab errore immunis est; licet alios pertrahat in errorem.

§. XVII. Sed monendi heic opportune tirones, ne *logicam* judiciorum *veritatem* cum *ethica veracitate*, neve *falsitatem* quoque *logicam*

tam cum mendacitate pariter morali promiscue accipiant. Veritas namque ac falsitas spectatur in judiciis ex eorum relatione ad objecta, de quibus feruntur. Veracitas contra ac mendacitas ex eorumdem relatione ad mentem, a qua externis vocibus proferuntur. Hinc quemadmodum logice vera dicuntur, quæ objectis consentanea sunt, de quibus efformantur (§.15.); ita & ethice sive moraliter veracia adpellantur, quæ internis animi sensibus ad amussim correspondent. Vicissim ratiocinare de falsitate, ac mendacitate. Hinc veriloqui, & veraces, qui, quæ in corde, eadem & in ore habent: contra falsiloqui, & mendaces. Quo in loco perinde est, sive vocibus, sive quibuslibet signis aliis, ac nutibus utantur. Nam sunt & maniiloqui, & pediloqui, & qui iudiciis aliis delectantur. Sed ea ars versipellium, ac subdolorum propria est, ac illorum præterea omnium, qui oderunt lucem, ne prava ipsorum opera arguantur: nisi joco id fortasse fiat, & ad honestam animi relaxationem tantummodo.

§. XVIII. Illud etiam diligenter animadvertant iidem tirones, non omnia iudicia logice subesse posse falsitati; sed ea tantum, quorum objecta ab ideis sunt distincta atque diversa; quæque occultari propterea menti possunt, ac falso consequenter iudicio, aliter nimirum ac in se sunt, reputari. Ea autem, quorum objecta ipsæmet sunt humanæ mentis ideæ, nulla unquam falsitate infici, vitiarique possunt; quia ideæ ipsæ, de quibus feruntur, eidem

eidem menti sunt immediate præsentēs ; nec fieri potest, ut non videamus, quæ jam videmus . Quo in loco perinde est, siue ideæ ipsiusmet mentis molimina sint, & ab ea habeant totum id, quod habent ; ut ideæ puncti e. g. lineæ, anguli, & cujusvis figuræ geometricæ tam planæ, quam solidæ ; siue undecumque ad eam devenerint . Ita si de idea solis ad mentem via sensuum appulsa, ac solem ipsum palmarem exhibente dicam : *Idea solis in tam enormi distantia illum exhibet palmarem* : erit iudicium verum . Quemadmodum & hoc aliud, cuius objectum idea est ab ipsamet mente efformata : *Circuli radii a centro ad peripheriam ducti sunt omnes æquales* . Huiusmodi namque circuli ideam mens sibi cudit .

§. XIX. Sed conferamus nunc tandem ignorantiam, falsasque rerum ideas cum iudiciorum erroribus, illudque pervestigemus, sint ne eorum causæ, & quales : ut adhiberi suo loco remedia possint, quibus, quoad fieri possit, impediuntur . Ac ignorantiam primam esse errorum nostrorum causam, nulli dubium . Quippe qui, si omniscii, ab omni quoque errandi periculo immunes essemus . Nec aliter censendum *de ideis falsis* ; quibus si careremus, nullum prorsus in errorem dilaberemur . Quum enim ad earum normam de rebus iudicia feramus ; vera procul dubio semper essent illa, si hæ forent constanter veræ . Ceterum quum ignorantia, tum falsæ rerum ideæ errorum nostrorum non sunt nisi causæ tantum occasionales .

Effe-

Effectrix enim censenda potius *judicandi intemperantia*, in quam, æque ac radii circuli in centrum, errores omnes dilabuntur. Qua de re infra: nam nunc generatim innuisse tantum sufficiat.

C A P U T III.

De necessitate exuendi mentem ab ignorantia, & errorum debonestamentis, atque in veri decus ac lumen apta gradatione deducendi.

§. XX. Superioribus *ignorantia*, *scientia*, *errorumque* notionibus generatim evolutis Capite præcedenti, examini paullo nunc adcuratius subjiciendum, quæ horum naturam hominis rationalem deceant, quæ illi probrosa, ac noxia sint; ut ita promovere, ac perficere priora, tum posterioribus idonea adferre remedia valeamus.

§. XXI. Ac *ignorantie* quidem *statum* homini quammaxime probrosum esse, & indecorum, adeo certum & exploratum, ut nihil magis. Principio enim summa Dei munificencia collata illi *ratio* fuit, ut mentem excoleret, ac veris rerum ideis informaret. Tum proposita eidem tot tamque pulcherrima, ac nobilissima ad pervestigandum objecta, quot rerum

rerum quum spiritualium tum corporearum constituunt universitatem ! Deinde insita quoque ad ignorantiam excutiendam naturalis pro- pensio , ac fatalis , prope dixerim , inclinatio , quam cernimus & in pueris , qui perpetuo irrequieti , donec res per suas causas norint . Quid plura ? Media tandem plurima ipsimet parata , quibus in *sapientia* cognitionem , & affecutionem deveniret . Nec prætereundum , ipsammet ignorantiam nescio quid pudoris , ac verecundia homini ingerere , quo illum de stupiditate , & inscitia puniat . Scilicet quum propriis facultatibus abutimur adversus sapientissimos , ac beneficos *fines* Conditoris , ipsemet abusus prima pœna est , quæ nos angit , tamquam legum naturæ moralium desertores , & contemptores . Ac iis ea quidem pœna molestior in primis , atque probosior esse oportet , qui splendore sanguinis , ac rerum opulentia ignorantiam excutere commodius quum possent , tum deberent . Nam eo in sæculo vivimus , in quo *thesauri* ac *stemma* arctissimo interdum conjuncta videntur cum *ignorantia* vinculo . Adeo verum , ut quæ meliora nobis ac decentiora , negligamus ; sequamurque deteriora , minusque decentia !

§. XXII. Sed est etiam exitialis , ac noxia , si ea quidem ignoret , quæ scitu illi necessaria sunt , quæ ignorare non debet . Ac illa quidem , quæ ignorari nulla ratione possunt , relationes omnino spectant , quas ad Deum nostri conditorem , ac beneficentissimum provisorum , tum ad nos ipsos , postremo ad alios homi-

homines habemus. His quippe ignoratis, quomodo adversus nos ipsos *sobrie*, *iuste* adversus alios, atque adversus Deum *pie* vivere sciverimus, atque poterimus? Quod si ea officia explere nequiverimus; ubinam, quæso, gentium vitæ æquilibras? Ubinam malorum fuga? Ubinam felicitas, ad quam sati, & creati sumus? Neque enim ad beatitudinem assequendam alia nobis via parata, præterquam *officiorum*, atque *virtutum*.

§, XXIII. Quod si *ignorantiæ status* indecorus simul est homini, ac perniciosus, quanto magis *status errorum* ac *falsitatis*? Enimvero ignorantiam nobiscum deferimus natiuitate ipsa: aut errores aut superbia, aut oscitantia ingerimus ipsi, propriaque culpa contrahimus. Quin si animum rerum sciendarum imperitum cum animo contulerimus erroribus obruto, erit ille nudæ tabulæ; in qua nihil delineatum sit, simillimus; hic vero tabulæ larvis, monstris, fœdisque picturis aliis deformatæ. Quid enim errores sunt, nisi voluntariæ labe? Nisi vitia sponte adscita? Nisi naturæ rationalis dehonestamenta, ac sordes? Magnum quidem intellectus humani infortunium, quod specula illi defint, in quibus proprias errorum fœditates, ac turpitudines intueatur! Alioquin semetipsum exhorrens, & expavescens, eas, ut sordes corporis, depurgeret attentius, &, ne novis deformaretur in posterum, impense precaveret. Ad hæc quum mores, vivendique rationem ex conce-

ptis opinionibus, ac judiciis instituere soleamus; pessum quoque eant *officia*, necesse est, si adversus nostri, aliorum, Deique jura erraverimus. Ac ita eadem ingruentia mala, eadem perturbatio morum, eadem infelicitas, eadem miseria. Quid enim Dei, nostri, aliorum jurium læsio; quid *pietatis*, *justitiæ*, ac *sobrietatis* contemptus adferre nobis possunt, præter Dei odium ac vindictam, præter societatis bellum, præterque naturæ ægritudines, præterque languorem?

§. XXIV. Quinimmo quum ea de re mecum ipse tacitus cogitare soleo, *errorum status* simillimus mihi semper videtur *statui belli* cum universo, ipsaque Divinitate. Unde enim bellum, si quidem juste geratur, nisi ex aliorum juribus non jure læsis? Ita qui falsa de rebus judicia fovet, atque ex præconceptis erroribus istis vitam moresque instituit, ipsarum jura lædendo, pœnas tamquam justo bello a rebus ipsis illatas luit, morbos, dolores, ægritudines, infamiam, ultionem, internos conscientiae morsus, mala cetera. Quamobrem si *ignorantia*, multo magis *errorum status* homini probrosus simul, & exitialis reputandus.

§. XXV. Ceterum haud ideo putaverim, sapientiæ cultoribus, virisque doctis nulla inesse vitia. Quin insunt quandoque majora, ac foediora, aut imbecillitate scilicet naturæ, aut tumultuantium affectuum æstu. Tantum dico, virum doctum, officiorumque suorum bene conscium atque peritum, improbum quidem, si velit, esse

posse, indeque miserum, & infelicem; ast rerum sciendarum rudem & indoctum, maxime adversus eas aberrantem, velis nolit, irresistibili quodam fato hujusmodi *esse oportere*. Mores enim ex ignorantia, erroribusque profecti, ut dissidere a natura rerum necessario debent; ita erranti, & ignaro mala plurima nequeunt non adferre.

§. XXVI. Quæ quum ita sint, plane intelligimus, fugatis *ignorantiae* tenebris, ac propulsatis *errorum dehoneſtamenti* & sordibus, quantum intersit in veri investigatione versari, ac *scientiae statum* æmulari avidius, ut & naturæ decus servari possit ubique, & per officiorum, ac virtutum semitas ad felicitatis portum deveniri. Sed ea in investigatione, disciplinarumque studio apta gradatio servanda est, ut animus ad *historicam* primum, tum ad *philosophicam*, tandemque ad *mathematicam* rerum *cognitionem* deducatur. Est autem *cognitio historica*, qua rem esse, nude tantum simpliciterque cognoscimus. *Philosophica*, sive *scientifica*, qua rationem præterea illius sufficientem, cur sit potius quam non sit, hoc potius modo quam alio intelligimus. *Mathematica*, quæ dimetiri quoque illam multipliciter valemus. Quarum prior popelli propria est, & rudium hominum; secunda Philosophorum, ad quos spectat rem per causam nosse; quod est proprie *scire*; postrema Mathematicorum, qui rerum præterea quantitates, vires, distantias metiuntur. Ita in lunari e. g. eclipsi nuda ipsius deliquii cognitio vocatur *historica*, quasi solius cognitio facti. *Cognitio cau-*

causæ, unde oboritur; puta interpositionis telluris lunam inter & solem, dicitur *philosophica*. Cognitio demum initii ecclipsis, totalis obscurationis, initii emersionis, finis, digitorum eclipticorum borealium vel australium, aliarumque rerum similium, *mathematica* appellatur.

§. XXVII. Velim autem, præter hanc gradationem, juvenes nostri ulterius progrediantur; atque in id, quod rei caput est & summa, animum præcipue intendant, ac generose constanterque assurgant. Loquor de *cognitione æconomica*, ut ego quidem appello: de cognitione, inquam, *finium*, *usuumque rerum* in propriam, aliorumque utilitatem & commodum, sive pro *vita physica & animali*, sive pro *civili*, sive tandem, ac imo potissime pro *ethica* atque *moralis*. Hanc enim omnium præstantissimam, ac saluberrimam rerum cognitionem ut, fato nescio quo, passim video neglectam, ac vulgo prætermisam; ita ego quidem ceteris longe præferendam existimo. Adeo ut *historicam* cognitionem, tum *philosophicam*, ac *mathematicam*, & si quæ sunt aliæ, in vanis prorsus, ac frustraneis habeam sine ista *æconomica*. Ita quippe animo constitutus sum, ut quæ in communem utilitatem & commodum nullatenus referuntur, nec sterilitate sua referri possunt, otia putem, & puerorum ludos. Scilicet aut propria, alienis immotis, aut communia bona viro sollerti, utilique civi spectanda semper, summoque studio undique conquirenda, ac procuranda.

C A P U T IV.

*De internis animi obstaculis pro veri
inquisitione avertendis.*

§. XXXVIII. **Q**ualia animi dedecora, qualif-
que scatebra malorum sint
ignorantia, & *error*; quamque propterea ne-
cesse sit disciplinarum studiis incumbere, ac in
veri investigatione versari, dictum capite præ-
cedenti. Sed quemadmodum sæpe alias, ita ea
potissimum in re multa tironibus objici solent,
quæ in antecessum aut amovenda prorsus, aut,
quoad fieri potest, salubri, opportunoque re-
medio imminuenda & corrigenda. Absit nam-
que, ut scientiis propterea terga vertant, at-
que in ignorantia, ac errorum cœno miserrime,
turpiterque tabescant. Nam nec montes,
valles, flumina, nemora, loca latronibus
infesta, viarum incommoda, obstacula similia,
a præconcepto nos itinere ineundo retraherent,
si quidem magna nobis proposita ex eo essent
bona, maximaque cum gloria nominis, famæ-
que splendore conjuncta. Ea autem obstacula
in duas classes conjicio, ut alia esse dicam
interna, ac animo inhærentia, alia *externa*, &
ab externis causis objecta. Nunc de *internis*.

§. XXIX. Ad internorum obstaculorum
classem spectant, 1. mentis imbecillitas, 2. par-
tium studium, 3. indoles minus aptata, 4. me-
moria labilis & contumax, 5. vis imaginatrix
nimis calida, 6. nimia in voluptates propen-
sio,

lio, 7. affectus effrænes & concitati, 8. præcipitatio mentis, judicandique intemperantia. Hæc potiora: quibus aut amoris prorsus, aut imminutis, facillimum inde fuerit cetera aut convellere funditus, aut moderari. Evolvamus singula, singulisque idonea remedia aptemus.

§. XXX. Principio *imbecillitatis* mentis humanæ unusquisque in semetipso testis est locupletissimus. Sed non eadem in omnibus. Quamobrem si eo usque illa excreverit, ut adolescentum ingenia fere (quod tamen rarissimum) plumbea sint; literarum studiis vale dicant, solique *Religionis*, ac *naturæ catechismo* perdiscendo incumbant. Alioquin qui prohibi christiani, honestique cives fuerint? Sin secus; quamquam ingenio, acumineque non admodum præpollentes, tamen die noctuque, quoad fieri potest, enitantur. Quid enim imbecillius aquæ gutta? Ea nihilominus vel durissima quæque saxa temporis diuturnitate, idest *non bis sed sæpe cadendo*, excavat. Enitantur, repetam. Nam assiduo patientissimoque studio, maxime cum addiscendi amore conjuncto, miravis inest ad immensos in sapientia progressus faciendos. Non ignota loquor.

§. XXXI. Adeamus nunc *partium studium*. Vitium istuc in eo constitutum, ut quorundam auctoritati nimium tribuamus; adeo ut fieri non posse credamus, ut vel ipsi aliquando erraverint, vel nos eorum errores detegere acutius, ac salubrius emendare valeamus. Quæ de causa fit, ut eorum errata pleno pectore

hauriamus, ac in tanta delicatiorum ciborum copia glandibus vescamur, & herbis. Quo quidnam stultius, ac scientiarum progressibus infensus? Late hoc vitium etiamnum grassatur in quibusdam claustris: latius fortasse extra claustra. Undenam alias illi *Cartbesiani*, *Newtoniani*, *Leibnitiani*, *Frankliniani*?... Extant in idem vitium & illustrium virorum querelæ, Tullii, Senecæ, Lactantii, Melchioris Cani, sexcentorum. Nec immerito. Enimvero non minus quempiam philosophantem ab erroribus, eximere velle, ridiculum; quam aliis corrigendi jus adimere, iniquum. Scilicet ut non errandi nemini jus a natura tributum; ita nec emendandi alicui denegatum. Juvenes igitur nostri viros magnos magna in existimatione & obsequio habeant, eorumque labores ceteris præferendos putent. Sic tamen eorum in studio, & lectione exerceantur, ut errata plura, ac falsa cum veris immixta eorum in operibus esse non dubitent; ideoque ut aurum a sterquilinio nimis caute secernant.

§. XXXII. Inde *indolem minus aptatam*.

Ut unus idemque cibus non eundem saporis sensum in omnibus excitat; ita nec idem gustus in juvenibus omnibus unius ejusdemque disciplinæ. Quo fit, ut alii ad eam perdiscendam promptissimi, valdeque idonei sint, ac ingentes, eximiosque in ea progressus brevi efficiant; alii contra tametsi ingenio præstantes, discendique avidissimi, operam in ea perdant & oleum. Puto, non sine occulta, sapien-

pietissimaque id Dei providentia fieri; ne scilicet si una esset eademque omnium indoles atque propensio, major disciplinarum artiumque pars sine cultoribus conticesceret, non sine magno societatis detrimento. Juvenes igitur nostri si delibare quidem id genus disciplinas velint, ad quas perdiscendas minus sunt natura idonei; ne scilicet plane hospites ac peregrini in iis videantur; non repugnabo. Verum studium omne, attentionemque suam in illas serio convertant, in quas natura videntur procliviores, magisque aptati. Auctor scilicet iis fuerim, ut sequantur Ciceronis ad filium scribentis in libris *de Officiis* monitum, *ne quidquam unquam aggrediatur invita minerva, reluctante ingenio*. Quod & ipsemet vir summus opere complevit, dum *musis* omnibus in quibus excolendis minus erat a natura paratus, vale dicens, totum se *minervæ* dicavit. Ciceronis carmen vulgo notum: *O fortunatam natam me Consule Romam!* Juvenalis non minus, quam Martialis velut ineptissimum irrisere.

§. XXXIII. Tum *memoriam aut labilem, aut contumacem*. Animi vis illa, qua-præteritarum rerum ideas retinemus, revocamus pro lubitu; revocatas recognoscimus, *memoria* appellatur. Ea in quibusdam adeo felix ac prompta, ut simplex oculorum excursus satis sit iis retinendis, revocandis, ac recognoscendis, quæ leguntur. Contra in aliis infelicissima, & contumax; adeo ut vel nihil, etiamsi centies repetatur, excipiat, vel magno labore excepta

statim obliteret. Quod quantum & tironibus tædio, & scientiis ipsis detrimento esse soleat, nemo ignorat. *Tantum enim scimus, quantum memoria retinemus*; quod est sapienter Aristoteli adnotatum, si recte memini. Medebuntur autem huic malo juvenes exercitatione assidua. Est enim *memoria habitus*. Quum autem omnis *habitus* assidua exercitatione contrahatur, augeatur in dies, tandemque perficiatur; ita & *memoria*. Saltem id omnino frequens exercitatio efficiet, ut sin minus verba, verborum saltem sensum retineamus: quæ haud parva compensatio, & ad eosdem progressus faciendos valde utilis, ac fortasse utilior atque commodior; quemadmodum ego quidem haud certe errando putarem. Non enim verbis docti efficiuntur, sed verborum sensu, sed sententiis, sed rebus.

§. XXXIV. Et vim imaginatricem, sive phantasticam. Hac animi vi absentia corpora tamquam præsentia, & immaterialia velut corporea imaginibus quibusdam nobis repræsentamus. Magnum ea sane Dei donum, si intra rationis limites coerceatur: quippe quum ab ea proficiantur artes omnes, in primis *architectura, sculptura, pictura, poësis, mechanica* universa, tum *systemata physica, machine* omnes, & *instrumenta artium*; ex quibus incredibilis utilitas & commodum in societatem promanant. Contra si nimium incaleseat, ut in delirantibus, mentecaptis, phanaticis, similibus. Quo in casu tetra adeo caligine rationem obnubilat, ut in veri a falso discriminare omnem ei aditum præ-

præcludat, nubemque sæpe ostendat pro Junone. Quod quantum scientiis obesse soleat, nemo ignorat. Salubrius autem adversus *phantasiæ* illusiones remedium fuerit, si sub rationis imperium illam coerceamus: atque tunc solum ejusdem representationibus adhibeamus fidem, quum earum conformitas cum natura rerum clare, distincteque ostensa fuerit.

§. XXXV. Media autem *phantasiam* sub rationis imperium coercendi multiplicia sunt, Potiora, quæ sequuntur; si nimirum 1. fervidum corporis temperamentum arte medica refrænaverimus: si 2. devitaverimus spectacula, quibus abortimter incendi ea solet, ac perturbari: si 3. a comædiarum, ac trægædiarum, necnon a romanensium fabularum lectione nimis assidua, atque a phanaticorum hominum consuetudine abstinuerimus. A quibus tanto lubentius ac sollicitius abstinendum, quanto ipsa per se se etiam gustum germanæ sapientiæ intercludunt, quum modum excesserint.

§. XXXVI. *Et nimiam in voluptates propensionem*. Hoc vitium sive a molli educatione inductum, sive a temperamento profectum, sive a pravis exemplis mutuatum, late grassatur in juvenibus; eosque ut laboris reddit impatientes, ita & a seriis disciplinarum studiis avertit. Eos autem heic monitos volo, ut serio apud se recogitent, voluptatem, quàm cultoribus suis virtus ac doctrina parit, longe jucundiorē esse ac præstantiorē quibulvis rela-

xationibus, oblectamentis, & illecebris undecumque profectis; homineque præterea gravi, honesto, a liberali dignissimam. O si scirent, *quam dulce sit dicier: HIC EST, digitoque monstrari!* Quod de viris doctis scite est a Juvenale adnotatum (1). Scripto etiam proditum de Pythagora; ex novæ veritatis inventione, *de æqualitate scilicet quadrati super hypotenusam trianguli rectanguli cum quadratis aliorum laterum*; talem ac tantam voluptatem, tam suave, tamque dulce oblectamentum animo concepisse, ut *hecatombem* propterea diis immolarit.

§. XXXVII. Et *affectus effrænes, nimiumque concitatos*. Sunt *affectus* quædam animi commotiones ex repræsentationibus bonorum, malorumque excitatæ, atque cum præternaturalibus quibusdam motibus corporis, irritationeque telæ nervosæ conjunctæ. Hos ex ea tantum facie heic spectamus, qua magnam cum disciplinarum studiis relationem habent; quatenus vel promovere ea possunt, ac imò solent, vel retardare; ut *amor, odium, admiratio*, ceteri, qui ex horum temperatione varia oboriuntur. Hi igitur, si rationi pareant, spectari veluti totidem *vectes, & elastra* possunt disciplinarum studiis magno cum fructu, ac feliciori cum successu promovendis ac perdiscendis. Quorsum enim operam studiis navamus, nisi *ex scientiarum, earumque cultorum admiratione, ex amore veritatis, ex odio errorum?* Hinc Philosophia

amor

(1) Prælegantur heic, quæ in subjecta adnotatione diximus ad subsequentem §. XLIV.

amor sapientiæ, proindeque & insipientiæ odium, dicta. Quod si rationem, uti sæpe fit, subegerint; turbabuntur omnia, atque ea tantum vera putabimus, quæ nobis, nostrisque placuerint; ac ceteros insanire arbitrabimur, quacumque nitantur ratione. Ita omnis veræ, germanæque sapientiæ spes evanesceat. Ergo juvenes scientiarum studiosi veri quidem sciendi cupidine, ac falsi refugiendi odio incalescant: nullius autem tenacius complectantur, aut refugiant opinionem, nisi ejus veritas, aut falsitas certo fuerit, evidenterque demonstrata.

§. XXXVIII. Et denique præcipationem mentis, & judicandi intemperantiam, qua sine maturo examine judicia ferimus. Incredibile dicta est, quam vitium istuc veri inquisitioni, ac disciplinarum studiis adversetur: propterea quod non alia via ex ignorantie, errorumque tenebris in veritatis lumen transire valeamus, præterquam prævio eorum examine rite, matureque instituto. Tum maximum quoque de honestamentum est naturæ humanæ; quum evidens argumentum ea judicandi intemperantia sit superbiæ, aut levitatis ejusdem. Opportunum autem, illudque facillimum remedium fuerit, si ex perpetua methodo judicia suspendimus, quousque veritas pleno in lumine constituta fuerit. Quo spectat aureum Tullii monitum in priori de Officiis: *Quod vitium, inquit, effugere qui volet (omnes autem velle debent) adhibebit ad considerandas res & tempus, & diligentiam. Sed de internis scientiarum obstaculis huc usque. Nunc de externis.* CA

C A P U T V.

*De repellendis in eundem finem obſtaculis
externis .*

§. XXXIX. **A**. B *internis* progredimur ad ſcientiarum obſtacula *externa*, quorum potiora ſunt, 1. infantię præjudicia, 2. avaritia parentum, 3. rectorum oſcitantia, 4. compendiorum lectio, 5. præmiorum deſperatio. Nam de præceptoribus dicam inferius capite peculiari. Exordiamur a præjudiciis.

§. XL. Horum cauſæ præcipuæ ſunt, nutrices, parentes, populus, ludimagiſtri, atque ſi Tullio fides in *Tuſculanis*, poetæ. Quum enim ea in ætate examen de rebus inſtituere ipſi nequeamus, horum opiniones velut oracula ſpectamus, excipimusque. Ea tam altas poſtea in animo radices temporis diuturnitate figere ſolent, ut fere in naturam tranſeant; magnoque propterea ad ſcientiarum adquiſitionem contententibus impedimento ſint. Plura a viris doctis ad ea deponenda, & eradicanda propoſita media. Opportunius, mea quidem ſententia, longeque facilius fuerit, ſi ad optimorum Præceptorum lucubrationes accedant prudentes, ſollertefque juvenes quadam animi æquilibrata, & indifferentia: tum quæ in rationum pondus, quibus oppoſitæ iis veritates ſenſim ſenſimque philoſophando demonſtrabuntur, mentis aciem, attentionemque ſedulo, acutiufque intendant. Ita quippe fiet, ut veritate per ſolidas demonſtrationes per-

perspicue cognita , præjudicia ipsa tamquam falsa , & commentitia semet corruant , & collabantur.

§. XLI. Ad hæc quum parentum avaritiam scientiarum studiis obesse dico , non de iis parentibus loquor , qui ob nimiam egestatem ac miseriam liberorum sub optimis Præceptoribus institutionem prætermittere coguntur. Eo enim in casu summi Imperantis est malo huic per publica Collegia occurrere ; ne id genus juvenes ; quos velut reip. semina spectare , ac revereri debemus , sibi inutiles , aliis onerosi adoleseant. Loquor autem de illis ; qui damnabili avaritia eam liberorum institutionem negligunt ; eosque auro potius , tamquam si muta juventa forent , onustos , quam sapientia exornatos relinquere malunt. Velim autem præclarum Poetæ monitum ii animo recogitent :

Gratum est , quod patriæ civem , populoque dedisti ,

Si facis , ut patriæ sit idoneus , utilis agris ,
Utilis & bellorum , & pacis rebus agendis.

Plurimum enim intererit , quibus artibus ,
& quibus hunc tu

Moribus instituas

Ut præteream , opes , etiam si Cresci thesauri fuerint , sub prava liberorum institutione statim perituras ; quemadmodum contra liberi bene instituti vel eas brevi comparant , si pauperes ; vel , si divites , in immensum adaugent. Quod in hac civitate nostra sæpe factum , ac nostris etiam sub oculis quotidie fieri læti observamus.

§. XLII. Præterea nec minora obstacula sunt ,
quæ

quæ ab iis, qui parentum loco existunt, quandoque obijciuntur. Tædet autem, in eum locum inscio fere calamo me incidisse, qui odibilis mihi semper visus est, & invidiæ plenus. Ceterum dicam liberrime, quod sentio: quippe

Non ego ventosæ plebis suffragia venor.

Itaque videmus sæpissime juvenes nostros & generosos, & ingenio præstantes, & perspicacissimos nunc viltioribus, ac morosioribus cœnobiorum ministeriis destinatos: nunc stupidorum quorundam præceptorum curæ in parvis conventibus traditos: ubique fere sine studiorum adjumentis cruda, & inhumana Rectorum barbarie derelictos: adeo ut & charta quoque sæpe careant, & oleo, & plerumque calamo! Quo fit, ut qui Ordinis decori & ornamento, ac reip. præterea bono, & scientiarum incrementis nati erant, eorum, qui præsumunt, sive malitia, sive oscitantia & incuria, cum florentissimi alias Instituti ipsius probro ac detrimento marcescant; atque ex illorum genere adolescant, de quibus Poeta:

Nos numerus sumus, & fruges consumere nati.

Est ne detestabilius, ac perniciosius malum aliud, quod sollicitiori Majorum cura, zeloque ardentiore coercendum sit, ac severe puniendum? Sed

Quid obseratis auribus fundis preces?

Non saxa nudis surdiora navitis

Neptunus alto tundit hybernus salo...

§. XLIII. Rursus bibliothecæ portatiles, dictionaria, scientiarum compendia dubitari nequit, quin viris doctis magno adjumento sint; dum

dum parvis indiciis, quæ longa meditatione didicerunt, in memoriam ea illis revocant. Verum longe majora detrimenta sunt, quæ studiosæ juventuti adferunt. Principio enim defides illos, ac laborum impatientes reddunt. Tum a magnorum Operum lectione, ac fontium originarium consultatione avocant. Postremo illud efficiunt, ut superficiali rerum notitia imbuti, nil quærant amplius. Quare fit, ut non solidæ, germanæque doctrinæ cultores adolescant, sed centones tantum, scioli, indiculorum doctores, fuci. Quod quantum ipsis, ac scientiarum incrementis detrimento sit, quis pro merito dixerit? Ergo Juvenes nostri, si quidem *viri docti*, non *doctorum larvæ* esse velint (velle autem debent), quousque in disciplinarum studiis non fuerint valde attriti, easque ordinata methodo, seriisque meditationibus per propria respectiva principia plane non didicerint, id genus *compendia*, atque disciplinarum artiumque *transumpta* canepesque refugiant, & angue. Hoc unicum, illudque idoneum tanto malo, tamque longe lateque grassanti occurrendi remedium.

§. XLIV. Tandem sua quoque, eaque satis valida, scientiarum studiis impedimenta opponit *præmiorum defectus*, ac *desperatio*. Nam ea nunc Italiæ præsertim hujus nostræ lacrymabilis conditio est, ut præstantissima ceteroquin illius ingenia ad scientias promovendas, ac perficiendas nullis præmiis, nulla præmiorum spe alliciantur, etiamsi *summos* adeant Me-

Mecrenates Extant ea de re frequentissimæ eruditorum querelæ, in primis Muratorii. Malum istuc si per sæculares cœtus, maxime per Instituta regularia grassari videtur, in quibus literæ potentissima plerumque obstacula sunt dignitatibus nanciscendis; adeo ut viri docti, qui in illis magna sæpe copia efflorescunt, aptare sibi merito possint Juvenalis illud *Sat. VII.*

*Nos tamen hoc agimus; Tenui in pulvere
sulcos*

Ducimus, & littus sterili versamus aratro. Qua de causa fit, ut heic languescant scientiarum studia: illic eruditorum MSS. araneorum telis, pulvereque tabescant: ubique fere Instituta ipsa administrantur præpostere. Nam quod est sapienter a Platone adnotatum, *tunc resp. regitur melius, & gubernatur, quum aut Philosophi imperant, aut Imperantes philosophantur.* Ceterum non sunt propterea literarum studia abjicienda. Referantur in Dei gloriam, in societatis commodum, in privatam utilitatem. Quæ magna præmia, nec ullis unquam cum id genus dignitatibus, honoribusque comparanda (1). Quippe quæ tot curis implicatæ

(1) Illustre viri sapientis elogium apud Salomonem *Sap. VIII.* heic omnino exieribendum: quippe quod ad gloriam, voluptatem, & utilitatem ex *vera sapientia* proficiscentem ceteris undecumque obvenientibus præferendam, valde idoneum, & aptatum. *Habebo, inquit, propter hanc (sapientiam) claritatem ad turbas, & honores apud seniores juvenis, & acutus inveniar in judicio, & in conspectu potentium*

citæ , non tam præmia sunt , quam pœnæ .
 Præmia tu ne dixeris , quæ corpori labores ,
 menti ægritudines , conscientiæ pericula pluri-
 maque , stimulosque perpetuos adferunt?
 Quam scite illud dictum : *Sicubi quies , sicubi
 felicitas , in vita tantum acta private!*

C

CA.

tium admirabilis ero , & facies principum mirabun-
 tur me : tacentem me sustinebunt , & loquentem me
 respicient , & sermocinante me plura , manus ori
 suo imponent . Propterea habebo per hanc immortali-
 tatem ; & memoriam æternam his , qui post me fu-
 turi sunt , relinquam . Intrans in domum meam con-
 quiescam cum illa : non enim habet amaritudinem
 conversatio illius , nec tedium convictus illius , sed
 lætitiā , & gaudium . Estne quidpiam quod cum
 ea sapientiæ gloria , decore , & ornamento confer-
 ri possit ? Haud tamen dissimulandum , de eo sa-
 pientiæ genere Salomoni heic esse sermonem , quæ;
 ut ibidem scribit , *contubernium habens Dei , do-
 ctrix est discipline Dei , & electrix operum illius* .
 Quæ ut nativā , vera , ac germana sapientia , ita
 in tanto Religionis neglectu , aut etiam contemptu
 nimis rara . Quippe in quo contubernium passim
 prædiligitur hujus mundi , diffeminatur disciplina car-
 nis , & opera exercentur diaboli . Quæ singula veræ
 sapientiæ adversa .

C A P U T VI.

*De tollendo præjudicio quodam pagano, calabræ
juventuti nostræ summopere noxio.*

§. XLV. **V**Entum ad Disciplinarum impedimentum postremum, quod quum non aliarum fortasse nationum, sed *calabræ* tantum hujus nostræ juvenes, scientiarum candidos spectet, peculiari ob id capite evolvendum, ac, si fieri quidem potest, eradicandum putamus. Nam sive *patriæ* amor, qua nihil carius; sive beneficiorum vis, quæ bruta etiam animantia ad gratitudinem provocare solet; sive intimioris amicitiae leges; aut sublimiorum denique præstantia, ac nobilitas ingeniorum ad officium istuc nos alliciat; præterire omnino illud, ac posterorum memoriæ detrahere, & occultare nec possumus, nec debemus.

§. XLVI. Consentia citerioris Calabriae urbs est in gradu 34. min. 28. *longitudinis septentrionalis*, *latitudinis* vero gradu 39. min. 26. ad orientem Mediterranei 16. circiter milliaribus sita. Est rerum ad victum præcipue spectantium feracissima. Tum Magistratus, Sedisque Archiepiscopalis honore clara; necnon nobilium virorum cœtu, atque eruditorum, doctorumque copia illustris. Hinc duabus Academiis, *Constantium* scilicet, & *Cratyllidorum*,

ac

ac regia scientiarum Universitate conspicua. Ex oppidis præcipue, pagisque conterminis in eam confluunt juvenes fere omnes studiorum causa, de quorum tollendo præjudicio heic sermo.

§. XLVII. Horum itaque præjudicium *paganum* appellamus, propterea quod ad *pagorum* præcipue juvenes spectet, per Urbis hujus nostræ territorium prodigiosissima multitudo in montibus, collibusque circumfusorum. Est autem in eo constitutum, ut per solam hyemem, vixque dimidiam anni partem Disciplinarum ii studiis in Civitate incumbant; tum vix labente Majo, aut Junio ineunte, nescio quo, panico per æstatem ægrotandi timore ad pagos, studiis omissis, turmatim revertantur, in Urbem non redituri; nisi post nives, ac mense Decembri.

§. XLVIII. Porro hæc tam longæva studiorum interruptio quantum eorum progressibus noxia sit, vix, ac ne vix quidem dici potest. In primis enim quum in pagis optimis præceptoribus destituantur; libris, eorumque lectioni vale dicunt: ac ita domesticis curis, & relaxationibus dumtaxat intenti, eorum etiam, quæ per anni dimidium in Civitate didicerant, obliviscuntur. Scilicet scientiæ acquisitio, & subsequens ejusdem oblivio quum quotannis se se mutuo perimant, vel etiam clavorum instar quodammodo ejicient; fit, ut iidem juvenes, licet ingenio de more acutissimi, ac præstantissimi, eodem fere in ignorantiae statu perseverent, tanto cum proprio, ac reip. damno,

tantoque cum Disciplinarum , bonarumque artium detrimento .

XLIX. Quod si aliquibus in pagis optimis præceptoribus fortasse muniantur , atque sub eorum disciplina scientiarum studia persequantur ; valde paucorum ea fors est ; nec simul integra . Nam quantum obfit scientiarum progressibus frequens præceptorum permutatio , nemo ignorat ; eaque de re longiori fortasse calamo mox differemus capite sequenti . Tum congressus Academicos , publicas concertationes , domesticam cum tot viris doctis consuetudinem , tot etiam juvenum scientiarum studia persequentium æmulationem , pleraque demum alia addiscendi media , quæ Civitas hæc nostra florentissima suppeditare illis de more posset , qua , quæso , ratione compensabunt in desertis pagis juvenes pagani ? Quin nullis studia persequendi stimulis excitati , nullis aliorum exemplis incensi , nullisque plaufibus illecti , in quidvis aliud animum attentionemque intendent , puta in venationem , ludos , relaxationes , cetera .

§. L. Quæ istæ tantum mala sunt eorum progressibus in literarum , bonarumque artium studiis adversa . Nam semestri otio expleto , nivibusque sufficienti copia ad refrigerandum , purgandumque aerem circumquaque per montium saltem cacumina lapsis , Civitatem quidem remeant studia resumpturi ; verum tunc nova illis malorum genera superioribus fortasse pejora . Enimvero conscedentibus illis ad pagos labente Majo , eorum præceptores scientia-

tia-

tiarum in Civitate curriculum juvenibus aliis indigenis ad autumnales usque ferias persequuntur. Quare fit, ut resumere illa cogantur per saltum, perque fragmenta; ac illas Disciplinarum partes, quæ per æstatem, mensæque Novembri, ac Decembri explicatæ fuerunt, ac traditæ, omnino præterire. Ita eorum studia abrupta omnia, hiantia, perturbata. Fingi ne nunc aliud obstaculum potest eorum progressibus, ac Disciplinarum incrementis magis noxium, & adversum?

§. LI. Adeamus nunc in civitate *per æstatem ægrotandi timorem ipsum*, ex quo tot mala in scientias, earumque cultores paganos oboriuntur. Principio diuturna jam experientia compertum, quousque calor constans, & æqualis perseverat; morbos Consentia prorsus conticescere, nec incipere illos, nisi circa autumnii initia, mensæque Septembri. Deinde illud etiam sæpissime observatum, morbos per hæc tempora acutiores esse, magisque exitiales per pagos, quam in Civitate, ubi mitiores longe observantur, ac placidiores. Quocirca per æstatem ægrotandi timor iste vere *panicus* est; ideoque paganæ juventuti generose in posterum excutiendus; nec amplius e Civitate illi abscedendum, nec disciplinarum studia interrompenda, præterquam communibus autumnalibus feriis, ac labente Augusto; tum resumenda statim illa ineunte Novembri circa solemnia S. Caroli Borromæi, quo tempore sat refrigeratus aer, sat de more defœcatus.

§. LII. Nec quidquam est, quod his repo-

nant juvenes nostri pagani; quinimmo plurima eaque invictissima, ac vulgo nota exempla habeo, quibus idem ipsorum ægotandi timor puerilis levitatis magis magisque revincitur, ac vanitatis. In primis vero id genus locupletissima exempla sunt. Archiepiscoporum, Vicariorum generalium, regique Magistratus: tum tot Monachorum, tot Jurisconsultorum, aliorumque virorum doctorum, totque archiepiscopalis Seminarii alumnorum: tot præterea scribarum, tot mercatorum, tot militum, totque, tantorumque aliorum alienigenarum, qui per æstatem e Civitate hac nostra minime abscedunt, quin propterea in morbos incidunt, nisi aliquando forte fortuna. Id quod & in pagis quoque accidit, & sub quovis vel placidissimo climate, ac sub quavis vel perfectissima aeris temperie.

§. LIII. Quæ quum ita sint; juvenes hos nostros, quorum nobilissima adeo, ac perspicacissima ingenia, & quibus hæc pagorum consentinorum regio plusquam Italiæ, ac Europæ fortasse totius alia circumquaque abundat, enixe præcor, obtestorque, ut excusso *panico* hoc ægotandi timore; propulsoque tam puerili præjudicio, lacrymabiles hujusmodi studiorum jacturas non amplius patiantur. Morentur heic, quæso, Consentinæ usque ad communes autumnales ferias, atque scientiarum curriculum perpetuo nexu, & imperturbato ordine cum ceteris candidatis persequantur. Pudeat, inquam, cum Achille muliebri veste vilescere in pagis, interea dum ceteri

teri

teri commilitones cum Ulyſſe acerrime præliantur in Civitate! . . .

C A P U T VII.

De optimorum Præceptorum delectu ; deque multis eos inter ac tirones officiis.

§. LIV. **U**T ſcribendi , ita & docendi ca-
coethes multos extimulare ſo-
let hoc potiffimum ævo noſtro , in quo ſæpe
cathedras moderari , docendique munus exerce-
re videas nonnullos, qui diſciplina adhuc egent
præceptoris . Quo nihil funeſtius ſtudioſæ
juventuti accidere ſolet, nihil luſtuoſius. Nam
quod ipſiuſmet divini Magiſtri ore prolatum
in Evangelio : *Si cæcus cæcum ducit , ambo
in foveam cadunt* . Nolo rem hanc diduce-
re , ne cuiquam data opera invidiam conſiſſe
videar . Sat parentes monuiſſe ſit , ut pro re-
cta in literarum ſtudiis liberorum ſuorum in-
ſtitutione, Præceptores illis eligant quamopti-
mos, omnique exceptione majores ; ſi quidem
prudentes rei familiari æconomos, utiles patriæ
cives, ac pios Religioni cultores, prout oportet,
dare voluerint. Erunt autem quamoptimi
Præceptores, ſi his potiffimum dotibus clarue-
rint, quarum 1. eſt doctrina, 2. ars commen-
tandi, 3. deligendi judicium, 4. gravitas, 5.
morum probitas. 6. religionis amor, 7. do-
cen-

cendi diligentia, 8. tandem identitas, ac perpetuitas unius ejusdemque Præceptoris. Evolvamus singula.

§. LV. Principio tironum Præceptores, quo suo muneri plane satisfaciant, Disciplinarum, quas illis lucubraturū sunt, & explanaturi, debent esse callentissimi, ac peritissimi. Alioquin quomodo aliorum Magistri esse poterunt, egentes ipsi præceptore? Erunt autem hujusmodi, si nedum proxima, & peculiaria, sed & remota etiam, & universalia illarum principia probe noverint. Si nexum sciverint horum principiorum cum suis respective consecrariis. Si partium ordinem, ac relationes mutuas quum internas, tum externas cum scientiis ceteris minime ignoraverint. Si præ oculis rationes, ac fundamenta habuerint veritatum omnium, quæ in eisdem demonstrantur. Si harum veritatum *usus* ac *finis* pro hominum utilitate & commodo eos minime latuerint. Siquè, ut cetera mittam, falsas in oppositum opiniones, & errores omnes nedum internoscere, sed & perspicua, solidaque solutione refellere potuerint. Quibus & discriminis quoque cognitio addenda earum rerum, quæ *certaine* & *incommutabiles*, quæ *probabiles* tantum ac *verisimiles*, quæque demum *dubie* fuerint. Qui talia noverint, viri docti, & ad docendum idonei censi possunt.

§. LVI. Deinde *artem* quoque callere debent scientias commentandi, & evolvendi. Quare esse debent *in confexendo ordinati*; adeo ut probe sciant, quæ ad veritates demonstrandas ac
sta-

stabiliendas necessaria sunt, quæ supervacanea; quæ lucem aliis adferre possunt, quæ secus; quæ idcirco præmittenda, quæ debent subsequi. Tum *in demonstrando solidi, ac nervosi*: inconcussa nimirum, atque perspicua adhibendo principia, certas instituendo adplicationes, legitimasque illationes deducendo. Inde *in explicando dilucidi*: quod sit proprietate verborum, clara evolutione nexus, & ordinis eorum, quæ enucleantur; atque exemplorum usu, quæ ad rem faciunt. Præterea *in scribendo, dicendoque culti, elegantes, ornati*; ut quum docent, delectare etiam possint. Ad hæc *in judicando cauti*: opiniones scilicet ad Criticæ leges exigendo, atque pro rationum, quibus innituntur, pondere de iis judicia ferendo. Tandem ii sint, oportet, ubique *breves*; non ea quidem brevitate, quæ obscuritatem inducit, sed quæ res involutas ipsa in lumine collocat. Scilicet vitanda æque illis nimia brevitatis, ac nimia prolixitas: ambæ obscuritatis fons, & scaturigo. Nec prætereundum, rem studiosæ juventuti utilissimam se facturos Præceptores, si Disciplinas *italico idiomate* jam ditissimo, & venustissimo, & elegantissimo edocerent. Ita quippe & eas adsequeretur illa promptius, ac facilius; & multo quoque citius, quam damnabili ludimagistrorum ignorantia, incuria, aut malitia modo fiat, earumdem studia adgrederetur. Atque ea quidem de causa in his conscribendis *elementis* diu ancipites fuimus, quoniam *idiomate, italico ne an latino*, melius, &

& opportunius uteremur. Sed prævaluit tandem *latinum* ; ut italæ non minus , quam exteræ juventuti consuleremus (a).

§. LVII. Rursus *deligendi iudicio* optimi Præceptores ponere debent plurimo . *Multa* , inquam , *prudentia* præditi sint , oportet , ut ea tantum tironibus evolvenda , ac propinanda seligant , quæ quum eorum privatæ , tum publicæ utilitati conducere videbuntur . Quocirca summo studio , summaque diligentia caveant , necesse est , ne delicatioribus , ac salubrioribus cibus per inscitiam , aut oscitantiam neglectis , glundibus eos alant , & herbis . Atque prudens qui-

(a) Quæ de scientiis *italico idiomate* in posterum tradendis hæc diximus , ludimagistrorum tantum culpa , & ut malis ex eorum malicia , aut incuria studiosæ juventuti obvenientibus opportuna interim remedia adhibeantur , dicta volumus . Alioquin damandæ , dirisque devovendæ ineptissimæ declamationes omnes , quæ adversus *idioma latinum* hisce nostris temporibus passim fieri inaudiuntur . Pendens siquidem in primis ex illius imperitia , addiscendique inertia , atque segnitie . Tum ex deturpatis sæculi ideis , novisque superinductis præjudiciis ; quamquam *illuminatum* illud , & *literarum* , si Superis placet , jactitemus ! Nam cur abjicienda lingua , in qua viginti circiter sæculorum intervallo , ductuque continuo & constructa affabre Disciplinarum molimina sunt , & tanto cum religionis , ac societatis emolumento evoluta ? Cujus concentus supra modum dulcis , ac suavis ? Cujus pulcritudo & elegantia incomparabilis ? Cujus vis & energia tantopere actuosior , ac penetrantior ? Cujus feracitas , &

quidem, ac necessaria cautio isthæc optimis Præceptoribus cordi semper esse debet, siue proprios ipsorum labores, ac MSS. tironibus enucleent, siue aliorum Opera typis data. Nec umquam ferre debent, ut studiorum curriculum in illis operibus instituant, quæ tirones ipsi seligenda proponunt; sed quæ ipsimet Præceptores utiliora, ac præstantiora judicabunt. Juvenes enim rerum imprudentes & inexperti, sæpeque indoctorum præjudiciis detenti, nubem complecti solent pro Junone. Hinc quærenti tironi philosophicarum Disciplinarum commentationem in operibus c. g. Poncii, Mastrii, Gau-

& amplitudo fere incircumscripta? Cujusque gravitas, ac majestas admirabilis, nullique secunda? Quid quod ea lingua in desuetudinem posita, desuescere quoque, & in oblivionem abire oporteat tot illustria Patrum, aliorumque nobilissimorum Scriptorum volumina *latine* hucusque conscripta? Qua etiam ratione scientiarum commercia servari poterunt per orbis nationes, si, abjecta communi lingua, quisque vulgaturus sit illas, & commentaturus lingua patria? Tantumdem quippe id fieri poterit, ac si, neglecto auri argentique *pretio eminenti*, rerum commercia agitari vellent. Cæci nam ea in re valde, ac stupidissimi Itali nostri, qui tantum *Latii*, totiusque Italiae decus, & ornamentum a Francorum sic vafricie sibi præripere, ut *gallicum* illi *idioma* substituunt, non animadvertunt! . . . Quid igitur? Ecce. Quæ humaniores literas sapiunt, & oblectare, ac instruere indiscriminatim lectores omnes possunt, evulgentur, ut libet, ut lubet, *lingua patria*. Cetera scientificis ingeniis, præsertim theologicis commissa, *latino* idiomatici reserventur.

Gaudini, aliorumque similium; ne præbeant aures; sed ad salubria pascua in amoenis campis manu eos quodammodo ducant. Imitentur boni pastoris partes, ducendo illos *quandam*, non *qua* itur; ubi pinguescere, non ubi macrescere possint.

§. LVIII. Ad hæc sunt etiam tironum Præceptores *viri graves, serii, maturi*; alioquin numquam illos in officio continebunt. Scilicet ea esse solet petulans juvenum indoles atque natura, ut nisi Præceptorum gravitate, ac majestate coerceatur, lycæum facile vertant in theatrum; nec literarum studiis serio incumbant. Quum autem ea morum gravitas ex proventa jam ætate proficiatur; hinc juniores non satis idonei tironum Præceptores esse videntur. Sed ea annorum maturitas, ætasque provectior alio quoque ex capite, ac urgentiori fortasse de causa in Præceptoribus necessaria est. Jam enim paullo superius (§§. 55. seqq.) a nobis observatum, qua scientiarum comprehensione, qua commentandi arte, & quo deligendi judicio præditi ii esse debent, ut suo muneri plane satisfaciant cum tironum utilitate, & emolumento. At ea plena scientiarum comprehensio, ea difficillima commentandi ars, hoc non adeo facile deligendi judicium, uti *studiorum tantummodo passivorum*, ut voeant, factus esse non possunt, sed ex annosa meditatione proficisci debent; ita maturam, provectamque in Præceptoribus exigere videntur ætatem. Ceterum si qui juvenes sunt, qui & ob
fin.

singularem ingenii præstantiam has dotes jam præferant; & ob peculiarem indolem morum gravitatem æmulentur; cujusmodi esse nonnullos exploratum est; Scientiarum hi magisterium exercere poterunt. Sed quam hi pauci, & quam multis præterea tentaminibus probandi?

§. LIX. Præterea *morum probitas*, atque *honestas* adeo in Præceptoribus necessaria, ut nihil magis. Quum enim ob eximiam eorum doctrinam & gravitatem, ac ipsum præterea docendi munus magna apud juvenes auditores suos auctoritate polleant; spectari ab illis summo obsequio, ac venerationes solent velut *prototypi*, *normæ*, *oracula* nedum sciendarum; sed & rerum quoque agendarum. Quocirca in id summo studio incumbunt tirones, ut nedum opiniones, sed & mores etiam opinionibus, ac moribus Præceptorum ad amissim conforment. Ita nisi morum hi probitate, & honestate refulgeant; quæ malorum scatebra Juvenibus inde non aperiatur? Præterea si tam valida, tamque efficax exemplorum vis est, & energia, ut generatim verissimum sit Davidicum illud: *Cum sancto sanctus eris, et cum perverso perverteris*; quod & quotidiana etiam experientia satis moerentes observamus; quam validior, & efficacior erit illa Præceptorum, quos *boni*, *verique duces* tirones habent, ac reverentur? Quæ adeo vera sunt, ut minus noxiam, minusque perniciosam tironibus putaverim Præceptorum ignorantiam, quam morum improbitatem. Quippe quum illa ignaros eos

re-

relinquit & imperitos ; hæc scelestos facit et iniquos. Quod equidem longe funestius , ac perniciosius : ut patet.

§. LX. Item nec minus in Præceptoribus necessarius *Religionis amor, atque eidem adhaesio*. In primis enim nemo umquam fuerit vir probus , nemo honestus , nisi in Deum pius , nisi Religionis cultor . Est quippe in Deum pietas virtutum omnium basis ac fundamentum ; qua proinde sublata , probitas omnis , morumque honestas cum ceterarum virtutum choro pessum eant, necesse est. Tu ne in homines *iustum ac beneficum* , in seipsum *sobrium ac temperantem* quempiam esse posse putaveris, qui Deo creatori , ac beneficentissimo provisorio suo , & a quo est totum id quod est , *pietatis officia* aut negat prorsus , aut pervertit ? Nec *vera doctrina* , nec *vera sapientia* ea etiam fuerit , quæ impiis adversus Deum , ac Religionem erroribus implicatur ; sed *falsa* , sed *fucata* , sed *apparens*. Quamobrem si *docti* (§. 55.), si *viri probi, & honesti* (§. 56.) tironum Præceptores esse debent ; Religionis quoque obsequio , amore , ac veneratione flagrent , necessum est . Equidem si concipi vix potest , quantum tirones a pietatis operibus avocare soleant joci quidam ac venenati sales, quos adversus Religionem eructare non pudet sciorum quorundam , & garrulorum audaciam ; quanto magis , si Præceptorum auctoritas , ac fides accedat ? Quo in loco quum de Religionis amore , obsequio , ac veneratione loquor ,

non

non *naturalem* tantum, sed & *revelatam*, sed & *catholicam*, sed & *romanam* intelligo. Nam æqua certitudine utraque constat, pari utraque evidentiâ demonstratur. Quod ego quidem pluribus ostendere possem, si locus ferret.

§. LXI. Rursus optimi Præceptores summam in docendo adhibere debent diligentiam. Scilicet meminisse debent, in partem paternæ educationis eos esse vocatos; ideoque nullum lapidem immotum relinquere debere, ut tirones, quoad fieri potest, in scientiis evadant doctiores, ac peritiores. Quamobrem ubi quotidianas lectiones ipsis evolvunt, stylum, dicendique rationem eorum intelligentiæ attemperent; nec explicandi; & commentandi finem faciant, nisi in plenam rerum comprehensionem eos devenisse noverint. Deinde subsequenti die ad collationem (italice *conferenza*) ejusdem lectionis omnino adigant, nedum scilicet per summa capita, & quoad sensum, sed & verbatim etiam, quoad per auditorum memoriam fieri poterit, faciendam. Prior enim conferendi modus intellectum exercet, adauget, perficit; posterior memoriam. Ac ita etiam Præceptorum scribendi, dicendique stylum facilius contrahent tirones; atque in rerum addiscendarum, ipsarumque tandem Disciplinarum acquisitionem longe pleniorē, ac uberiorē devenient. Neque his tantum contenti sint diligentes, sollicitique Præceptores; sed opportunis quoque interrogationibus, & examine illos exerceant; mutuis etiam inter ipsosmet tirones concertation-

tiam.

tiunculis haud omiffis, quibus ad æmulationem magis incedantur. Scio, in publicis Collegiis, in quibus magna juvenum frequentia, talem, tantamque docendi diligentiam cum fingulis adhiberi non poffe. Adhibeatur faltem per vi- ces cum aliquibus; ut ita ad collationes parati omnes exiftant. Ac fi ne id quidem fieri po- teft; ea faltem non omittatur in ftudiis, au- ditoriisque privatis. Nam quod privatorum Præceptorum nonnulli faciunt, ut lectionibus explicatis, nil quærant amplius; ita ut five eas comprehenderint tirones, five non, nulla eorum interfit; ut exitiale id, ac noxium tironibus eft, ita iniquum ac damnabile in Præcepto- ribus videtur. Quamquam ecquis tamquam op- timos Præceptores hujusmodi habuerit ftudiofæ juventuti præficiendos?

§. LXII. Tandem in toto ftudiorum curri- culo unus femper idemque, quod fieri poteft, fit Præceptor. In primis enim juvat plurimum, tirones effe fuorum Præceptorum amantiffimos, ac ftudiofiffimos. Ita quippe & fcientias ipfas ardentius perfequentur, ac impenfius colent, & nobiliores lubinde progressus in illis effi- cient. Hic autem amor, hæc prædilectio ut fa- cillime erga unum eundemque Præceptorem in tirone concipitur, intenfiorque in dies eva- dit; ita languet plurimum, ac imo extin- guitur prorfus, ubi frequens illi fuerit Præ- ptorum commutatio. Deinde necesse eft, ut tirones in efformando fibi uniformi, politiori- que ftvlo paulatim affuefcant. Id autem quan-

to facillimum est sub unius, ejusdemque Præceptoris disciplina; tantumdem difficillimum, ubi Præceptores sæpe permutantur. Ut enim quisque peculiarem scribendi, dicendique stylum habet; ita alius alium perturbet, necesse est. Tandem quum Præceptores varii in varias sæpe, diversasque abeant opiniones, ac unusquisque suam propugnare, aliorumque refellere adnitatur; in magnam ob id tirones, tot Præceptores permutando, idearum incident confusionem. Atque his de causis factum esse putaverim, ut Aristoteles nonnisi post novendecim annos e Platonis schola abscesserit; ac Cicero filio suo jusserit, ut studiorum curriculum Athenis, sub eodem præceptore Cratypo constanter persequeretur (a).

§. LXIII. Atque hi optimorum Præceptorum præcipui characteres sunt, sub quorum disciplina eximios in studiis literarum progressus facturi erunt tirones, si quidem serio illis incubuerint. Addamus nunc aliqua ad mutua eorum quum *justitiæ*, tum *urbanitatis* officia spectantia. Ergo Præceptores primum nullum lapidem intentatum relinquant, ut tirones magis

D

ma-

(a) Quæ integro hoc Capite de optimorum Præceptorum delectu, & characteribus nobis hucusque adnotata sunt, quum parentes potius, ac Præceptores ipsos maximè spectent; præteriri ob id tironibus docendo, & commentando poterunt; atque a superiori §. 54. ad proxime insequentem §. 63. per saltum statim ii poterunt, commodeque deduci.

magisque in studiis, verique inquisitione quotidie proficiant. Sedulam adhibeant sollicitamque diligentiam paullo superius (§. 61.) a nobis descriptam. Id iustitia exigit, id honos. Tum studiosam juventutem sibi a parentibus commissam paterna diligant caritate, ac liberaliter cum ea, urbaniterque agant. Sint illi sapientiæ exemplar, sint norma virtutum, sint ad veram felicitatem validissimum, ac perenne incitamentum. Tirones vicissim generosa stipendia, & assidua munera, sive donaria Præceptoribus elargiantur. Meminerint quippe, scientificos Præceptorum labores, & eximia, quæ inde obventura ipsis erunt, bona nulla umquam mercede, nullis umquam donariis satis compensari posse. Nec obliviscantur, viros doctos, *tenui plerumque in pulvere ducere sulcos, & sterili litto versare aratro*. . . Postac magno illos obsequio, ac veneratione prosequantur. Nihil mœroris inferant, nihil tædii. In paternæ educationis partem admissos, spectent, ac revereantur ut parentes. Monita ultro excipiant cum gratiarum actione. Sint illis perpetuo gaudium, decus, ornamentum, atque corona.

C A P U T VIII.

*De scientiarum in inquisitione veri sibi mutuo
succedentium ordine rite instituendo : &
quomodo .*

§. LXIV. **Q**Uavis in arte rite instituta præstat plurimum internosse , quæ ex parte ejus opera incipienda , quo persequenda ordine , & quemadmodum perficienda . Alioquin confusa erunt omnia , perplexa , involuta . Est autem Logica *ars inquirendæ veritatis* (§. 6.), ac inquirendi præcipue illam per singulas Philosophiæ partes , per integrum corpus philosophicarum , naturaliumque Disciplinarum . Logicæ igitur munus erit ingens corpus istuc , hoc magnum ædificiûm eo evolvere ordine , eaque lege partes ejus omnes disponere , & ordinare , ut ea veri inquisitio filum sequatur , ac nexum veritatum ipsarum . Nam (quod alta mente reponendum) nexus iste non ex hominum arbitrio pendet , sed est rebus ipsis inhærens , ac veluti corda , qua res ipsæ ex earum natura , Deique sapientia , ac voluntate vinciuntur . Quod & acute Tullio observatum lib. I. *de natura Deorum* , ubi : *Omnes Philosophiæ partes , inquit , tunc facillime noscuntur , cum totæ quæstiones scribendo explicantur . Est enim admirabilis quedam*

continuatio seriesque rerum, ut alia ex alia nexa, & omnes inter se aptæ, colligataque videantur.

§. LXV. Interest autem plurimum hujusmodi nexum, naturalem hunc rerum ordinem detexisse, & qua serie sibi succedant Philosophiæ partes quum majores, tum minores, initio prævidisse. Ita quippe ambagibus omnibus ac diverticulis declinatis, veri inquisitio, Disciplinarumque studia recta progredientur, viaque regia. Quod quantum ea reddat breviora, facilliora, ac utiliora, nemo non videt. Sed quibusnam mediis, inquiet fortasse aliquis, ordinis hujus ac seriei initia, progressum, ac finem detexerimus? Quæ præcepta eam in rem Logica tradit? Ecce: 1. *Ut a clarioribus, ac facilioribus ducamus initia, tum ad minus clara, minusque facilia sensim sensimque constanter progrediamur.* 2. *Ut quæ rebus aliis facem præbent, ac veluti fundamenta iis inserviunt, præeant; quæ lumen recipiunt, ac superstruuntur, perpetuo subsequantur.* Hæc eam in rem aurea Logicæ monita, juxta quæ si veri investigatio diligenter inita fuerit, rerum nexum, ordinem, atque seriem constanter insectabimur, nullibi ad dexteram declinaturi, nullibi ad sinistram. His porro in hunc modum observatis, utroque præcepto isto comite ac duce naturalem eam rerum seriem, quoad fieri potest, perscrutemur.

§. LXVI. Ac primo omnium loco tironibus proponendam, & enucleandam putamus *Logicam*; nedum quia Disciplinæ ceteris clarior, & evi-

& evidentior, tamquam in solis *præceptis* constituta ; sed maxime quia hæc eadem Logicæ præcepta lucem præbent , quemadmodum universa *inquisitio veri* regenda sit , ac Disciplinæ omnes evolvendæ. Est enim Logica *ars philosophandi , ars veritates detegendi , disciplina , quæ per omnes sapientiæ partes manat , & funditur , instrumentumque sciendi* (§. 6.7.). Deinde quomodo iniri , qua ratione regi scientiarum studia possunt sine recto , adcuratoque ratiocinio? Recta autem ratiocinia format Logica. Hæc igitur scientiis omnibus præmittenda. Scilicet cujusvis artis, præceptorumque ejus comprehensio ac studium opera quævis ejusdem artis præire oportet ; ut discamus primum , quemadmodum quidpiam agendum sit , tum arte illud , & consilio, non casu a fortuito agamus. Ita perdiscenda in primis *philosophandi ars , ars inquirendæ veritatis*, deinde incipienda inquisitio ipsa. Scio , quæ his objici possent , præcipuum nempe inquisitionis hujus medium, scilicet *ratiocinium*, duobus Ontologiæ axiomatibus , de quibus Parte III. superstrui , ab eisque suam , quantamcumque habet , firmitudinem recipere , ac robur : ideoque juxta præcepta mox (§. 65.) tradita Ontologiam Logicæ præmittendam fore, ab eaque studiorum omnium ducenda initia . Quin ea insuper ratio tantopere adblandita mihi aliquando fuit , ut fere in eam sententiam descenderem , atque descendissem reipsa , si Ontologia *solius intuitionis pure* axiomata ac veritates , non simul & *theoremata* plura demon-

strabilia complecteretur ; quæ proinde ut adcurato egent ratiocinio , ita & præviā ratiocinandi artem , scilicet Logicam , ut omne errandi periculum devitetur , expostulant . Ea de causa opportunius , atque commodius putavimus , anticipatione quadam ea bina axiomata ab Ontologia mutuari , quam ab eadem studiorum præscribere initia , eamque Logicæ præferre .

§. LXVII. Expleta Logica , quæ veri inquirendi magisterium præfert , incipienda veri inquisitio ipsa , & quidem ab ea Disciplina , quæ fundamenta prima , ac generaliora principia continet ceterarum ; quæque proinde ceteris clarior , ac facilior est , eisdemque lucem adfert . Quocirca post *Logicam* statim subjicienda *Ontologia* , ad quam primarum veritatum , ac generalium principiorum , & axiomatum communium lucubratio pertinet . Ob id enim *prima Philosophia* , *prima scientiarum semina* , *præfatio* , ac *prolegomena scientiarum omnium* ea passim nuncupata . Sane a Logica ad quamlibet facultatem aliam , *Ontologia* prætermissa , gradum facere , studiorum in primis per saltum institutio foret ; tum ædificiorum sine præjactis in antecessum fundamentis præpostera constructio , & commolitio . Quo quidnam absurdius , ac rerum naturæ , ipsorumque tironum progressibus magis adversum ? Scilicet sunt Disciplinæ omnes philosophicæ instar cujusdam magni ædificii , cujusdam ingentis machinæ , quorum fundamenta prima , primas scilicet veritates , & axiomata communia , quibus superstruuntur , ipsa
sup.

suppeditat Ontologia . Omnis autem ædificii , aut machinæ constructio a fundamentis proculdubio sua ducere debet initia ; ut patet .

§. LXVIII. Ontologiam scholarum more excipere solet *Psychologia* . Verum id præpostere factum . *Psychologiæ* enim omnino præmittenda *Physica* , uti mox explicabo . Quum autem *Physicæ* præire omnino debeat *Mathesis* ; hinc post *Ontologiam* statim subjicienda *Mathesis* , atque *Aritmetica* primum , tum *Algebra* , postremo *Geometria* quum *plana* , tum *solida* . *Aritmetica* enim , & *Algebra* *Geometriæ* inserviunt ; *Geometria* autem communibus *Ontologiæ* axiomatibus superstruitur , atque ab illis omnem fere lucem mutuatur , ac certitudinem ; uti cuique notum . *Ontologiam* ea igitur statim subsequatur , necesse est ; nisi ædificia primum construere velimus , tum eorum jacere fundamenta ; quod ridiculum , atque omnino contra alterum *Logicæ* præceptum (§. 65.) , sensumque hominum communem .

§. LXIX. Sed & multo magis ab iis præpostere factum , qui ipsimet quoque *Logicæ Mathesim* præmittendam arbitrantur . Quasi quod prius inquirendæ veritates , æque sublimiores & obscuriores a tironibus sint ; postmodum illis inquirendi ars , ac præcepta tradenda , atque perdiscenda ! Quasi quod a difficilioribus , & obscurioribus , cujusmodi mathematica theoremata ac problemata sunt , ea veri inquisitio incipienda , tum ad faciliora progrediendum , & clariora ; cujusmodi sunt præcepta *Logicæ* !

Quasi quod exercenda primum ratiocinandi vis sit, ac postea perpolienda, ac munienda! Sed *paralogismi*, in quos Mathematici haud raro dilabuntur, clare demonstrant, quam omnino necesse sit *Logicam*, rationis formatricem, ac errorum expultricem, mathematicis Disciplinis præmittere, & explicare.

§. LXX. Post *Mathesim* e vestigio subnectenda *Physica*, *generalis* primum, quæ generalium materiei proprietatum theoriam exhibet; tum *particularis*, quæ corporum proprietates evolvit peculiare. *Mathesis* enim se sola, idest *pura*, in sola mentis abstractione sita est; ideoque semet sterilis, si recte conjicio, ac vana, nec ulli hominum bono & commodo, nisi torquendo fortassis eorum ingenio, idonea. *Physicis* autem disciplinis aptata, idest *mixta*, ingentes, uberrimasque utilitates humano generi adfert. Quare *Mathesis* data opera inventa, inductaque videtur propter *Physicam*, ad intricatiora naturæ phænomena evolvenda, ac demonstranda; quemadmodum peculiari capite dicam Libro sequenti. Atque idcirco post *Mathesim* statim subjicienda *Physica*, propter quam illa inventa.

§. LXXI. *Physicis* studiis absolutis, fumen-
da *psychologica*. Et ideo post *Physicam* evol-
venda *Psychologia*, cui illa ingentem lucem
suppeditat ad suas veritates demonstrandas. Sa-
ne integrum *Psychologiæ* magisterium in vin-
dicanda humanarum mentium *spiritualitate* non
minus, quam *libertate*, nec non illustrioribus
do-

dotibus aliis , situm in constituenda *antitbesi* inter notas materiei proprietates & mentis , atque inter utriusque agendi modum . Tum evolutio phænomenorum *phantasiæ* , *memoriæ* , *conjunctionis* animæ cum corpore , aliorumque sexcentorum , magna ex parte pendet ex *Anatomia* . Horum autem intelligentia a *Physica* derivatur ; ut patet : cui proinde *Psychologia* subiicienda .

§. LXXII. A *Psychologia* progrediundum ad *Theologiam naturalem* , quæ plurimam ab ipsa *Psychologia* non minus , quam a *Physica* lucem mutuatur ; adeo ut utraque basi illi sit ac fundamento . Ac *Physica* quidem tot existentia , sapientiæ , ac providentiæ Dei , aliorumque attributorum divinorum *Theologiæ naturali* argumenta suppeditat , ut merito dici possit , res omnes adspectabiles atque corporeas ordine , harmonia , ac pulchritudine sua , necnon beneficis *usibus* , & commodis pro vita humana , totidem esse veluti linguas , quæ suum clament sapientissimum , ac potentissimum Creatorem . Nec dissimilia argumenta eidem præstat *Psychologia* quum ipsa creatione animorum ex nihilo , tum nobilissimis eorundem dotibus , intelligentia in primis , memoria , arbitrii libertate , ceteris . *Theologia igitur naturalis* omnino tradenda tironibus & evolvenda post *Psychologiam* non minus , quam post *Physicam* .

§. LXXIII. Tandem post *Theologiam naturalem* , ac postremo omnium loco enucleanda , ac pertractanda *Ethica* , quæ eidem æque , ac
Psy.

Psychologia superstruitur, & solidatur. Nam *inclinationes* quas *Ethica* refrænat, *affectus* quos coercet, & actiones *electiles*, *liberæ*, *humanæ*, quas per virtutum semitam ad æternæ felicitatis portum dirigit, aliaque similia, omnia *psychologica* sunt, & ad humanam mentem spectantia. Tum *naturalis legislatio*, *pœna*, ac *præmia* naturæ legibus moralibus affixa, religio naturalis, *pietatis* officia, innumera id genus plurima, uti Deum O. M. ejusque infinitas perfectiones spectant, ita vel sunt ea quidem *theologico-naturalia*, vel ex *naturali Theologia* in *Ethicam* derivantur. Verbo, si quæ *Psychologia*, ac *Theologia naturalis* plurima, ac uberrima fundamenta suppeditant, ab *Ethica* submoveas, nihil, fere dixerim, supererit reliqui: adeo duarum harumce facultatum argumenta vel fundamenta *Ethicæ* sunt, vel demonstrandi media, vel objecta, vel denique finis, ac scopus!

§. LXXIV. Sed vela tandem contrahamus, atque philosophicarum Disciplinarum catalogum eo, quo sibi mutuo succedunt, nexu, ordine, ac serie, & quemadmodum tironibus eæ tradendæ. & evolvendæ, subjiciamus. Is autem nostro quidem judicio, atque ex hæctenus demonstratis est hujusmodi: *Logica*, *Ontologia*, *Mathesis*, *Physica*, *Psychologia*, *Theologia naturalis*, *Ethica*. Hic naturalis harum Disciplinarum nexus, hæc series, hic ordo. Subjiciendus nunc & nexus alius æque naturalis foret singulorum argumentorum, quæ eadem Disci-

sciplinæ complectuntur . Sed *elementorum* angustia , statique fines id minime permittunt . Scio , catalogum hunc non omnibus esse probandum viris doctis . Verum , quod est sapienter Juvenali adnotatum Sat. I.

*Quid refert , dictis ignoscat Mutius ,
an non ?*

Sat nobis , ac imo abunde erit , eo duxisse calamum , quò rerum natura ducébat . Ceterum haud dubitaverim , eos omnes , qui in oppositas opiniones hætenus abiire , nobiscum esse ultro consensuros , si productas a nobis rationes absque ullo *partium studio* , soloque veritatis amore examini subjecerint .

§. LXXV. Sed quæret heic fortasse aliquis . Quin Disciplinarum series diu a viris doctis probata , atque in Scholis ubique recepta immutetur , ecurr non potius a *physicis Disciplinis* ea omnia extrahantur , atque in *Ontologiæ* corpus inferantur , quæ theorematibus *de mente humana* , atque *de Deo* vel probandis , vel collustrandis inserviunt ? Respondo in primis , tunc *Ontologiam* abire statim in monstrum biceps ; nec facile determinari inde posse , an ob *universales abstractasque veritates Metaphysicæ* pars dicenda sit ; an vero pars *Physicæ* ob additas *veritates particulares* , atque *sensibiles* . Deinde quæ theorematibus *de mente humana* , ac potissimum *de Deo* vel probandis , vel collustrandis inserviunt , a *Physica* in *Ontologiam* transferre velle , perinde est , ac *Physicam* integram convellere , & eradicare . Adeo nempe
cer-

certum , planeque persuasum nobis est , cælos ,
 terram , maria , plantas , animalia , elementa
 omnia , ac quemvis vel minimulum abjectum-
 que vermiculum digito velut nobis ostendere
 sapientissimum eorum , ac beneficentissimum
 Condito rem . Nonne igitur longe melius , at-
 que laudabilius fuerit , si , quemadmodum in
 superiori catalogo ,

*Singula quæque locum teneant sortita de-
 center ?*

§. LXXVI, Ceterum in contexenda Disci-
 plinarum serie quisque suam opinionem secte-
 tur , prout libuerit . Ego quippe *in utilitatem
 privati auditorii mei hæc seribo* , cui eadem
 puto , nisi mea me fallat opinio , *utilissima* .
 Illud autem oro , obtestorque , ut quævis se-
 ries , quivis ordo adoptetur a viris doctis , po-
 stremo tandem loco *ethicas* Disciplinas haud
 prætereundas patiantur . Hæ enim *finis* sunt ,
portus , atque *fructus* ceterarum . Meminerint ,
veram hominis sapientiam cognitionem esse ho-
minis ipsius . Hinc præ ceteris Disciplinis *Ethi-*
cam impense coluere , summisque laudibus ex-
 tollendam putavere præstantiores in antiquitate
 Philosophi . Hinc acriori censura reprehensi ,
 qui post spissa ceterarum philosophicarum Di-
 sciplinarum cusa volumina , *Ethicam* alto silen-
 tio præteriere . Hinc numquam satis hucusque
 laudatus , nec satis in posterum laudandus Ge-
 nuensis noster , qui horum turpem oscitantiam
 & in *Theologia naturali* , & in libris *de Jure*
 & *Officiis* , & in *Diccosina* , & in *Theologia*

revelata, & ubique operum suorum variis subformis, ordine, stylo, & idiomate abunde compensavit. Quamquam satis mordaciter ob id alicui dictum, eandem illum ubique crambem coquisse semper, semperque recoquisse. Hinc vel ipsimet tandem Poetæ, ne illa e manibus umquam excideret, ardentioribus precibus, & adhortationibus inculcarunt, in primis Persius Sat. III.

Discite, o miseri, & causas cognoscite rerum:

Quid sumus? & quidnam victuri gignimur? & ordo

Quis datus? aut metæ quam mollis flexus, & unde?

Quis modus argento? Quid fas optare? Quid asper

Utile nummus habet? Patriæ, carisque propinquis

Quantum largiri deceat? Quem te Deus esse

Jussit? & humana qua parte locatus es in re?

Disce: nec invid eas . . .

C A P U T IX.

De scopo, quem in veri inquisitione, Disciplinarumque studiis tirones sibi proponere debent.

§. LXXVII. **E**A est agentium *ratione* ac *libertate* præditorum indoles atque natura, ut sive agant quidquam, sive omittant; nihil horum illis contingat sine *sine*, *scopo*, *motivo*, aut *ratione sufficienti*, cur ea fiant potius quam non fiant, hoc potius modo quam alio. Quum enim *libertatis* status *aquilibrii* quidam status sit ac *indifferentie*; dari omnino debet *ratio sufficiens*, cur ad actionem potius ab eo statu humana mens transeat, quam inactiosa perseveret. Sine *ratione* namque *sufficienti* nihil fit. Hæc quum ita sint, quemadmodum actionum omnium, omissionumque humanarum, ita & studiorum, verique inquisitionis *scopus*, *finis*, *motivum*, aut *sufficiens ratio* (nam eodem recidunt) aliqua detur, necesse est.

§. LXXVIII. Porro si ad eandem naturam diligenter attenderimus, comperiemus profecto, studiorum *scopum* hunc situm esse debere in *boni* alicujus *affecutione*, aut in *fuga mali*. Ita quippe a natura constituti sumus, ut innato quodam pondere ubique feramur in bonum, malumque aversemur. Sane si actionum

om.

omnium, omissionumque nostrarum *analysim* rite instituerimus, perspicua res erit, quidquid agimus, quidquid omittimus, quidquid tentamus, machinamur, cogitamus, in commune centrum isthuc vertigine mira confluere omnia, *UT SIMUS, AC BENE SIMUS*, vel. ut *minimum* saltem, quoad fieri potest, *male simus*.

§. LXXIX. Quum autem non raro contingat, ut in bonorum, malorumque judicio decipiamur, *mala* turpiter putando, quæ reipsa *bona* sunt, ac vicissim *bona*, quæ sunt *mala*; qua de causa bonorum, malorumque divisio illa oborta in *vera & adparentia*: hinc serio cogitandum; ut studiorum, verique inquisitionis *finis verum ac reale bonum* sit, non *fucatum & adparens*. Utinam priusquam agimus quidquam, vel omittimus, serium maturumque examen istuc ex perpetua methodo iniremus! Non adeo patens esset malorum scatebra, nec errorum! . . . Sed pergamus.

§. LXXX. Quum hæc non advertissent, si-
ve (quod longe verius) advertere noluis-
sent viri quidam perversi, societatis simul ac Reli-
gionis opprobrio nati, non alium studiorum suorum sibi scopum proposuerunt ac finem præter impietatem, ac scelus: putantes, nescio quod nominis, & gloriæ incrementum per Europam se consecuturos, si *Sacerdotii* non minus, quam *Imperii* juga excuterent, populosque plane facerent exleges, sine Principe, sine Sacerdote, sine Deo. Quamquam ea in re illud longe detestabilius, quod ubi horum pestilentissima opu-
scu.

scula, quæ in Italiam clanculum injiciuntur, voracibus illico flammis addicenda forent; contra ea arripiuntur avidius, majorique cum animi ardore, ac voluptate perleguntur. Qua de causa fit, ut a sciolis quibusdam, & garrulis heic *naturalismo* plaudatur, illic *indifferentismo*, & alicubi fortasse etiam (horribile dictu!) *atheismo*.

*Eheu! cicatricum, & sceleris pudet,
Fratrumque. Quid nos dura refugimus
Ætas? Quid intactum nefasti
Liquimus? Unde manus juvenus
Metu deorum continuit? Quibus
Pepercit aris?*

§. LXXXI. Quondam erit igitur *verum* illud *bonum*, ad quod veri investigatione, ac Philosophiæ studiis contendere debemus? doceat id nos Cicero quum alibi, tum in libris *de Finibus*, ubi: *Omnis summa Philosophiæ*, inquit, *AD BEATE VIVENDUM* refertur, *idque unum expetentes homines, se ad hoc studium contulerunt*. Hunc igitur scopum, ad quem Philosophia suapte natura fertur, nobis ob oculos sistere debemus, *BEATE VIVERE*; nisi ad nostram aliorumque perniciem scientes ac prudentes insanire velimus.

§. LXXXII. Sed quidnam *beate vivere*, idest *felicitas* est? Et quænam *media* Philosophiæ studium nobis suppeditat ad eam assequendam? Principio *felicitas* generatim in *ca-rentia malorum*, & *voluptatis sensu* sita est. Quum autem mala alia corporis sint, ut do-
lo-

lores, alia mentis, ut ægritudines : hinc defini-
 niri felicitas poterit : *Carentia doloris in corpore , & ægritudinis in mente , ac subnascentis voluptatis interna conscientia .* Quo & spectat
viri felicitis character ex Stoicorum sententia :
Non dolere corpore , non ægrescere mente , ac subnascentem inde voluptatem vivide persentiscere .
 Verum istuc felicitatis genus, quo omni prorsus dolore careamus in corpore, omnique ægritudine liberi simus in mente , *plenam* scilicet , *perfectamque felicitatem* , frustra heic speraverimus, ubi quotidiana naturæ indigentia , ubi lex collisionis partium universi , ubi indomita affectuum rebellio, ubi iniqua improborum hominum prævalentia, ac ubi innumera quotidie mala, innumeros ex omni parte dolores & ægritudines adferentia , mille quotidie modis nos infelicitant. Tota igitur, quam in hac vita sperare possumus, felicitas sive beatitudo sita est, quemadmodum eleganter Tullio dictum in libris *de Officiis* , in *MINIMA DE MALIS*; ut numero scilicet, ac intensitate minoribus, quoad fieri potest, malis afflictemur. Atque hac quidem nedum contenti esse debemus, maximasque Deo grates assidue rependere ; sed & sapientissima quoque illius consilia, ac providentiam demirari . Quia si tot ærumnis, ac miseriis attriti vix ejusdem amantissimi Numinis recordamur ; quænam esset mortalium vita , si nos heic fecisset feliciores, ac beatiores ?

§. LXXXIII. Atque hæc *terrena felicitas* est, istuc *in terris beate vivere* . Media autem per

E

scien-

scientiarum studia illam nanciscendi non opes sunt, non dignitates, non honores, non stemmata, non superbum quidquam simile; quemadmodum nimis inscite quibusdam somnium. In primis enim hæc Philosophia non parat (§ 42.) Tum augendis ea potius doloribus in corpore, & ægritudinibus in mente apta sunt. Sane centies, ac imo millies feliciorum dixerim ruralem hominem, cui sunt tantum

. *mitia poma ,
Castaneæ molles , & pressæ copia lactis ;*
quippe qui exigua re familiari , parvaque suppellectili plane contentus , nullis gravioribus curis , nullisque desideriis angitur ; quam epulones quoslibet , ac illos præterea omnes , qui *semi-deorum* in classe constituti videri volunt , ac reputari . Quum scilicet horum honores , dignitates , stemmata , thesauri , graviores curæ , epulæ , nimis relaxationes , centena alia his similia , totidem duriora iuga , tyrannicæ servitutis , & importabilia onera sint , quibus opprimuntur , & infelicitantur (§. 44.) .

§. LXXXIV. Sunt ea vero *beate vivendi* media , quæ Philosophiæ nobis studia parant , potius hæc tria : 1. *honestæ commoda* cum sobrio eorum usu : 2. *perfectio intellectus* , per germanam Dei , nostri , aliorumque cognitionem : 3. *perfectio voluntatis* , virtutibus vivendi ex legibus iustitiæ & honestatis , *piæ* nimirum erga Deum , *sobriæ* erga nos ipsos , atque *iuste* erga alios homines . Quorum mediorum primum , in optimis saltem Præceptoribus , facile parat Philosophiæ

sophiæ magisterium nedum in publicis, ubi hi aluntur ære publico, sed etiam in auditoriis privatis; item *Jurisprudentia*, *Medicina*, *Chirurgia*, aliæque facultates, vel etiam liberales artes ex *Physica*, ac *Matheſi* simul derivatæ; ut *Architectura*, *Sculptura*, *Pictura*, *Balistica*, similes. Secundum adfert *Metaphysica*: ac tertium denique *Ethica*, sive *Moralis*. His autem mediis quum dolores corporis, tum ægritudines mentis facile fuerit volenti, & adnitenti divino cum adjutorio ad minimam partem revocare, & ideo beatiorẽ vitam ducere.

§. LXXXV. Atque hæc mirum quoque in modum cum humanæ felicitatis idea congruunt, quam scite admodum & cogitate nobis exhibet Juvenalis, quum illum heic esse scribit *beatum*, cujus est *mens sana in corpore sano*. Nam & sanitatem corporis, quoad minimam dolorum partem, honesta commoda pariunt cum sobrio eorum usu; & sanitatem mentis, quoad minimam quoque partem ægritudinum, *virtutes* inducunt tam *intellectuales*, puta Dei, nostri, aliorum cognitio; quam *morales*, *pietas* scilicet, *justitia*, *sobrietas*, sive *temperantia*, ceteræque præterea omnes, quæ ex his proficiſcuntur. Ut enim vitia quum mentis tum corporis sanitatem pervertunt; ita vicissim utramque sanitatem solæ adferunt, ac imo solæ adferre possunt, servareque virtutes.

§. LXXXVI. Ceterum quo inevitabiles dolores corporis, atque fatales ex lege commercii ægritudines mentis minus sentiamus, *pietas*

præcipue adversus Deum impense colenda ; atque in hac pietate humilis, ac plena subjectio constanter adhibenda divinæ voluntati, in ore semper habendo, & in corde Servatoris illud : *FIAT TOLUNTAS TUA*, quo tota hominis, christiani-que perfectio continetur. Ita quippe quacumque in rerum vicissitudine positi vix, ac ne vix quidem commovebimur. Non superbiemus in prosperis, nec in adversis consternabimur. Quinimmo libenter gloriabimur in infirmitatibus nostris cum Apostolo Paulo : ac illud in ore perpetuo habebimus cum patientissimo Jobo : *Dominus dedit, Dominus abstulit : sit nomen Domini benedictum*. Adeo verum, itemque pulcherri-
mum italicum effatum illud : *CHI SI CON-
TENTA, GODE*. Verum hic consensus, hæc plena conformitas Divinæ voluntati, Dei do-
num est, assiduis precibus ex imo corde, ca-
staque mente profusis efflagitandum. Quod ne
ipsis quidem gentilium Philosophis, ac Vati-
bus ignotum. Unde Juvenalis Sat. X:

*ORANDUM EST, ut sit mens sana in
corpore sano.*

*Fortem POSCE animum, & mortis terrore
carentem :*

*Qui spatium vite extremum inter munera
ponat*

*Natura : qui ferre queat quoscumque la-
bores :*

*Nesciat irasci, cupiat nibil : & potiores
Herculis ærumnas credat, sævosque labores
Et Venere, & cœnis, & pluvnis Sardana-
pali.*

§. LXXXVII. Hæc quum ita sint, juvenes nostros, ad veri inquisitionem, Disciplinarumque studia contendentes enixe precor, ut non alium scopum in iis sibi proponant, nisi *beate vivere*; nec alia inquirent *beate vivendi media* præter tria illa mox proposita (§. 84.), non emisso quarto (§. præ.), ceteris ad beate vivendum longe efficaciore, & opportuniore: scilicet 1. honesta commoda, 2. perfectionem intellectus, 3. perfectionem voluntatis, & arctissimam 4. divinæ voluntati adhæSIONem. Quæ tanto diligentius persequi debent, quanto in eo sæculo vivimus, in quo ob prava scelestissimorum hominum exempla, & assidua impietatis incitamenta, facillimum ipsis fuerit literarum studia in propriam ipsorum, aliorumque perniciem vertere. Alioquin longe melius, & commendabilius fuerit ea abjicere prorsus, solique *Religionis, naturæque catechismo* operam dare: ne scilicet, quod gravissime Augustino dictum, *veniant indocti, & rapiant regnum Dei: nos autem cum nostris literis demergamur in profundum.*

CAPUT X.

De recta definiendi, dividendi, & in ordinem disponendi arte, in inquisitione veri adeo frequenti, delicatiori, ac necessaria.

§. LXXXVIII. **V**erī investigator triplici potissimum arte plane instructus esse debet, *definiendi, dividendi, ordinate disponendi*. In ipsa enim veri inquisitione accidit sæpissime, ut in objectis, quæ examini subjiciuntur, quædam occurrant adeo obscura, ut nisi per adcuratas *definitiones* prius explicentur, ac determinentur, difficillimum fuerit inquisitionem ipsam ultra protrahere. Sæpe etiam in res compositas, ac plura in se complectentes ipsa investigatio incidit; quæ nisi apta divisione secernantur, hæreat ea statim, necesse est. Frequentissimus denique occurfus accidit rerum maxime involutarum, & confusarum, & quæ omnem ulteriori inquisitioni aditum præcludunt, nisi suo quæque loco statuantur, aptumque omnes in ordinem disponantur. Quæ quum ita sint, utilissimum, ac imo plane necessarium ducimus potissima *definiendi, dividendi, apteque disponendi* præcepta tironibus proponere; ut in Disciplinarum studiis nihil occurrat, quod aut veritatem illis obtegere, aut in errorem inducere possit. Sed a *definitione* exordiamur, §.

§. LXXXIX. *Definire* quidpiam perinde est, ac illud datis quibusdam regulis explanare, ac determinare. Hinc triplex oboritur definitionis genus, ut alia nimirum dicatur *etymologica* sive *nominalis*, alia *realis*, alia *genetica*; propterea quod obscuritas vel in nomine esse possit, vel in re, vel in gignendi modo. *Nominalis* definitio dicitur; qua, quod in nomine obscurum est; explicamus; ut si dicam: *Philosophia est amor sapientiæ*. *Realis*, quæ evolvimus id, quod latet in re, sive in rei natura & essentia: ut *triangulum est figura plana, tria latera, totidemque angulos completens*. *Genetica* demum, qua latentem modum enucleamus, quo data res fit, aut fieri potest: ut *linea est longitudo omnis latitudinis expers, orta ex continuo fluxu puncti*.

§. XC. *Reales definitiones* spectandæ viro philosopho tamquam *scientiarum semina*, *compendia*, *elementa prima*. Nam quæ paucis, compendiose, ac velut in nucleo ipsæ exhibent, & complectuntur, late postmodum in Disciplinis demonstrantur. Hinc intelligimus, definiendi artem nimis periculosam esse, ac delatatiorem; exposcereque proinde animum valde intentum, omnique præjudicio vacuum. Alioquin falsas, & erroneas definitiones construendo, tum ex earum præscripto scientiarum ædificia commoliendo, erunt omnino illa prava, chimærica, sæpe impia, ubique simillima chaos. Exemplum habemus in Benedicto Spinoza, qui in *Systemate theologico-politico* con-

struendo exordium ducens a falsis *substantiæ*, ac *modi* definitionibus, eò tandem erroris, ac impietatis devenit, ut *pantheismum* revocando, Deum confunderet cum universo, juxta Poetæ illud:

Jupiter est quodcumque vides, quocumque moveris.

Præstat igitur, in re tam delicatula, ac periculis plena esse oculatissimos; nec umquam a sensu optimorum communi *definiendo* recedere, nisi certa, ac perspicua ratio nos aliquando recedendum coegerit.

§. XCI. Sunt autem rectarum definitionum præcepta, quæ sequuntur: 1. ut *sint rebus definitis clariores, & luculentiores*. Alioquin nova opus erit definitionis definitione: quod ridiculum, æque ac illud *spatium spatii* apud Orlandum in *notis* ad *Physicam* Muschembroeckii. 2. Ut *nec sint nimium breves, nec admodum verbosæ*. Utrumque enim obscuritatem parit; quæ esse debet definitionibus inimica; quippe quæ ad eam eliminandam institutæ. 3. Ut *binas omnino rei definitæ notas, easque proximas & immediatas complectantur, genericam, ac specificam*. Ubi omnis diligentia adhibenda, ut hujusmodi *notæ, proprietates, attributa* (nam eodem recidunt) vera sint, genuina, rei eidem definitæ infixæ, inhærentia: ne, si sint ficta; aut aliquantulum immutata, ea postmodum mala obveniant, ubi scientiarum molimina construuntur, quæ mox (§. præc.) innuimus. Sed paullo adcuratius evolvamus singula.

§. XCII. Est itaque *nota generica*, in qua cum rebus aliis diversæ speciei res definita convenit: ut *figuræ* notio (§. 89.), in qua circuli, triangula, quadrilatera, polygona conveniunt. Est autem *nota specifica*, per quam eadem res definita a rebus aliis diversæ speciei discriminatur: ut notio *trium angulorum*, totidemque *laterum* (*ibid.*), per quam triangula discriminantur ab eisdem circulis, quadrilateris, polygonis. Rursus binæ notæ istæ esse debent *proximæ*, & *immediatæ*, per quas nimirum rei definitæ natura & essentia immediate constituitur, non *remotæ*, ac *generaliores*, per quas non constituitur, nisi remote admodum, ac *mediate*. Neque carent ista ratione: ut nempe quæ definita res fuerit, satis evoluta, satique determinata, atque a ceteris plane distincta ac secreta remaneat. Hinc homini designando impar hæc definitio foret solam notam *genericam* complectens: *homo est animal*; quia nondum constaret, ad quam animalium classem, sive speciem is spectat. Impar quoque hæc alia præferens solam illius notam *specificam*: *homo est rationis particeps*; quia non distinguit illum a spiritibus omni corporis compage destitutis; nec satis proinde eundem determinat. Sed & hæc alia tandem impar: *homo est ens vivens*; quia tam *generica entis*, quam *specifica nota viventis* nimis *remotæ*, ac *generaliores* sunt; nec hominem a brutis, ac plantis, quæ ambo *entia viventia*, secernunt, nec determinant. Sola igitur germana, recta, ac legitima fuerit definitio,

finitio, quæ subsequitur : *homo est animal rationis particeps* ; quia altera nota generica est, altera specifica ; ac utraque proxima, & immediata, proxime scilicet ac immediate hominis naturam & essentiam constituens, eumque a rebus specie diversis discriminans, planeque determinans. Non esse autem puerilia ista, otiique plena, quæ paullo superius (§. 90.) adnotavimus, abunde commonstrant.

§. XCIII. Sed hæc illud etiam in mentem revocant, quod tironibus nolo esse ignotum. Scilicet definitiones (de *realibus* loquor), quæ efformantur, vel integrarum Disciplinarum definitiones sunt, vel rerum peculiarium ad easdem Disciplinas pertinentium. Si primum, iis rite efformandis idonei tantummodo erunt, qui Disciplinas ipsas, quoad latissime patent, perspectas habuerint. Sunt enim id genus definitiones velut earum *epilogi* : dati autem libri, aut orationis *epilogum* e. g. is tantum rite concinnaverit, cui ejusdem argumentum cum omnibus suis partibus plane notum atque perspectum fuerit. Similiter ratiocinare de integrarum Disciplinarum definitionibus. Sin vero alterum, si, inquam, res peculiare definenda fuerint ; perspectas tunc esse oportebit definienti proprietates omnes etiam extrinsecas, ac variabiles, quæ ipsis insunt, atque inesse possunt. Cujus ratio manifestissima est ; quia intrinsecæ rerum essentia, ideoque ambæ notæ illæ, generica & specifica, per quas eadem essentia constituuntur, quasque reales definitio-

nes

nes complecti debent (§. præc.), sunt nobis ignotæ; nec alia eas detegendi via nobis suppetit, præterquam proprietatum, virium, modorum agendi, phænomenorum, similium. Hæc igitur prius noscat, oportet, qui *reales rerum peculiarium definitiones* rite efformare voluerit: alioquin falsas de earum natura ideas concipiendo, in falsas quoque; & abnormes theorias non poterit non dilabi.

§. XCIV. Sed a *definiendi* ad *dividendi artem* calamum, attentionemque convertamus. Aliquid *dividere* dicimur, quum illud in partes, quas complectitur, resolvimus. Est igitur divisio entium compositorum, non simplicium. Rite autem dividendi præcepta sunt: 1. *ut divisio fiat in partes generaliores*; tum, si opus fuerit, in minus generales, quæ illis comprehenduntur. Ut telluris divisio in Europam, Asiam, Africam, Americam: tum Europæ iterum in Italiam, Galliam, Hispaniam, Germaniam, regiones alias, quas ipsa complectitur. 2. *In partes oppositas*, quarum altera scilicet excludat alteram: ut divisio actionum humanarum in *bonas, & pravas, præmio vel pœna dignas*. 3. *In tot partes, quæ simul sumptæ totum divisum adequant*. Alioquin si pars aliqua deerit, nec inquisitio erit integra, nec explicatio plena. 4. *Nec nimia tandem divisio sit, nec manca*. Utrumque enim ab illius scopo alienum. Divisione quippe utimur ob mentis imbecillitatem, quæ quum pluribus simul intenta esse non possit, confusionem absque *divisionis* præsidio

sidio minime devitaret. Divisio autem si *manca* fuerit, plurimasque compositi partes simul involutas reliquerit, confusionem proculdubio non tollet: novam quoque, attentionem distrahendo, memoriamque opprimendo, inducet, si fuerit nimia, atque redundans. Quo spectat Senecæ illud ad Lucilium Epistola: *Idem vitii habet nimia, quod nulla (item manca) divisio. Simile confuso est, quidquid usque in pulverem sectum est.*

§. XCV. Progrediamur tandem ad *artem rite, ordinateque disponendi*, quam ego quidem tamquam unicam, aut præcipuam saltem *notam*, sive *characterem* spectare soleo *virii docti*: cujus scilicet ope literatum ab imperito, doctorem a discipulo, virum studiis subactum a tirone secernimus. Equidem mihi plane persuasum, virum doctum non tam ipsa multiplici rerum cognitione constitui, quam cognitione *nexa*, & *ordinata*. Sane memet non raro pudet, quum *viros doctos* quosdam adpellari audio, qui sive scribunt quidpiam, sive loquuntur, *diruunt*, & *edificant*, *aptant quadrata rotundis*; adeo ut nulla orationis pars suum locum teneat *sortita decenter*, sed quas priores esse oporteret, fiant *mediæ*, aut etiam *novissimæ*; & quas medias, aut novissimas, ex prioribus substituantur. Horum mentes spectare possis velut *sagenas plenas* quidem multorum ac diversorum piscium, verum inter se maxime immixtorum, & confusorum. Nam horum *ideæ* multiplices quidem, ac *variæ*; sed maxime *obvolutæ*, *per-*
tur-

turbatæ, invicem confusæ. Quæ non ad invidiam cuique conflandam dicta volo; sed ut tirones opportune moneantur, ad quod doctrinæ ac sapientiæ genus contendere debeant, ut *veri* dicantur, ac *germani viri docti*. Sed ad rem.

§. XCVI. Quæ duo præcepta superius (§.65.) tradidimus, ut philosophicarum Disciplinarum ordinem, seriem, ac nexum ex earum natura statueremus; ea heic quoque locum habent, ubi de rerum apta, concinnaque dispositione instituenda loquimur, quæ inter se obvolutæ maxime sunt, atque confusæ. Scilicet maturò inito examine, præmittendæ semper & commentandæ, quæ clariores, quæ lucem aliis præbent, & quæ fundamento esse possunt, quibus aliæ superstruantur. Quæ norma præ oculis habenda semper, nec umquam negligenda, quousque evolutio omnis expleta fuerit, ac partes omnes suis aptis opportunisque locis decenter quoque fuerint constitutæ. Maxime vero intendenda attentio erit ad partes illas, quæ aliarum *principia* sunt; tum ad alias, quæ priorum sunt *confectaria*; atque eorundem ambæ disponendæ, ut illæ, scilicet *principia*, has, nimirum *confectaria*, præant, & hæ vicissim illas ex perpetua methodo subsequantur. Sunt enim veritates omnes ita nexæ invicem & copulatæ, ut aliæ ex aliis fluant, atque quāmdam veluti catenam constituent. Quare germana eorum evolutio fuerit, si a prioribus annulis, idest a *principiis* ducto initio, con-

constanti gradatione , fluxuque perpetuo per sublequentes annulos , per sublequentia , inquam, *confectaria* ad postremum deveniatur . Sed ea de re sat ista modo ; alia fortasse postea .

C A P U T XI.

De viribus intellectus humani ad verum investigandum, & assequendum idoneis.

§. XCVII. **P**Lura hucusque nobis tradita veri inquirendi , adsequendique præcepta . Res nunc propius paullatim attingenda . Ac illud in primis examini subjiendum , insit ne humanæ menti vis talis ac tanta , qua ipsummet *verum* non pervestigare tantum , sed & plane detegere , & adsequi possit ? Frustra alioquin præcepta illa traderentur , nisi & vires istæ plane constarent . Atque id genus examen tanto diligentius ineundum , quanto certius noverimus , e Scepticorum , qui cuncta incertitudini subjiunt , turba esse nonnullos aut ludricos , aut insanos , qui eas vires humanæ menti prorsus denegant . Est in ea opinione , sive potius insania auctor Opu-
sculi *de imbecillitate mentis humane* , illustrissimo præfuli Petro Danieli Huetio vulgo adscripti . Falso id tamen , ac per summam calumniam ; quemadmodum viro summo Ludovico Antonio Muratorio demonstratum in alio
Opu-

Opusculo, quod contrario titulo data opera inscripsit, *de viribus intellectus humani*.

§. XCVIII. Est itaque *intellectus* ea vis mentis, qua nostri, aliarumque rerum extra nos positarum conscii sumus, de eisdem iudicamus, ratiocinamur, reminiscimur. Vocari etiam solet *ratio*, idest *vis calculatrix*, aut *collatrix* idearum, de qua Libro III. Ex intellectus huius perfectione varia (nisi verius in diversam corporeæ machinæ texturam totum illud discrimen rejiciendum sit) egregiæ hominum *indoles* proficiscuntur. Ac in primis *acumen* in iis, qui rebus difficilioribus, & intricatioribus mira facilitate evolvendis idonei sunt, In aliis *ingenium* ad nova, atque præclara animo concipienda, detegenda, & efformanda. In aliis *judicium* (quod *prudentiam*, ac *sapientiam* Ethici appellant), quo vera a falsis, bona a malis, utilia ab inutilibus, agenda denique ab omittendis facillime sejungunt. In aliis postremo *memoria* (quam a *vi intellectrice* nonnisi objecto distinguimus), qua ut rerum ideas cito arripiunt, ac tenacius diutiusque retinent, ita & pro lubitu revocare illas possunt, Præclaræ quidem vis intellectricis hædotes omnes, atque ad ingentes, ac nobilissimos in Disciplinarum studiis progressus efficiendos maxime idoneæ. Verum optandum in primis, ceterisque præferendum *judicium* (*sapientia*, *prudentia*), in quo totius humanæ literaturæ summa constituta; nisi somnia captare velimus, & umbras.

§. XCIX. Porro hanc vim mentis intellectualem

Stricem esse limitibus (quod vir scepticus in Opusculo mox laudato urget) circumscriptam , non nego . Multo plura enim sunt , ad quæ ejus acies , ut ut in quibusdam acutissima , ac perspicacissima , non pertingit , quam quæ per-vestigando assequi potest . At at id minime evincit , eam nihil prorsus certo tutoque scire posse . Nam ea est virium omnium finitarum indoles atque natura , ut licet ad majora quædam intervalla nihil agere possint ; intra earum tamen atmosphæram maxime actuosæ sint , ac plura agant reipsa . Ita finita oculorum acies ad quædam intervalla pertingit , ad majora non excurrit . Similiter auditus : ac generatim vires omnes magnetis , ignis , luminis , corporum aliorum .

§. C. Sed sunt ista fortasse leviora . Quod autem ad demonstrandum fortius conducit , anxius , & irrequietus sciendi ardor ille est , quem omnium hominum cælo , terra , mari , sæculisque disjunctorum pectoribus ingenitum esse , nemo ignorat . Ac ne forte eorum superbiæ , & arrogantia id quis tribuendum putet ; etiam & in pueris , quum prima rationis crepuscula scintillare incipiunt , eandem sciendi cupidinem , non aliunde adscitam , sed a natura ipsa ultroq; erumpentem observamus . Si nunc verum est illud , quemadmodum est verissimum , *universalis phœnomeni causam oportere esse universalem* ; ecquænam cupidinis hujus , ardorisque sciendi causa esse poterit alia , nisi eorundem hominum sator , & conditor Deus ? Ac
 si

si Deus vi sapientiæ, potentiæ, & bonitatis suæ nil frustra molitur, sed omnia ad eos fines adsequendos idonea reddit, ad quos suapte natura ferri voluit; palam, & sine controversia est, talem ac tantam veri inveniendi, ac intelligendi vim humanæ menti indidisse, quantum ad id necessariam esse dignovit.

§. CI. Ac indidisse revera illam, facto ipso evincitur manifestissimo. Nam plura certo, evidenterque intelligimus, de quibus nulla subest errandi suspicio; ut illud, *totum esse sua parte majus: bina binis addita efficere quatuor: Deum, idest ens summum; esse summe colendum*: plura id genus alia, quæ *metaphysicæ* in primis, *eticæ*, ac *mathematicæ* Disciplinæ exhibent magna copia. Atque quod in his veritatibus curatius adnotandum, immobilis plane, ac invariabilis illa constantia est, qua eodem semper a nobis modo intelliguntur. Constantia enim, ac perpetua uniformes cogitationum nonnisi a constantia, perpetuaque uniformitate objectorum oriri potest, a quibus ingeruntur; a cognita proinde veritate, quæ semper est eadem, nec ulli mutationi obnoxia. Nam *commenta*, quod scite, acuteque Tullio observatum, *delet dies*; ac *falsa*, tamquam a natura dissidentia, continuo *mutabilia* cernuntur.

§. CII. Tum risum elieit, quum scepticum hominem pugnare video adversus humanæ mentis vires, nec alia interim arma adhibere, nisi quæ ab eisdem viribus proficiuntur. Ita quærerem ab eo: vera ne ipse putet argumenta,
F quibus

quibus imbecillitatem mentis. evincere nititur in investigatione, & adsecutione veri; an falsa? Si putat falsa; ludricus est, aut insanus, dum ea adhibet; nec quidquam præterea proficit, dum vera falsis oppugnare contendit, Sin autem vera existimat; quum ea argumenta a viribus humanæ mentis profiscantur, sintque ejusdem fœtus; consequens est, eandem mentem non esse adeo imbecillam, nec ejus intelligendi vires adeo debiles, ut verum numquam assequi possint. Ita id commenti genus ex illorum numero est, quæ ipsamet fundamenta evertunt, quibus superstruuntur. *Tantum ne est in rebus inane!* . . .

§. CIII. Nec reponere juvat, videri ea quidem argumenta sibi vera; nescire tamen, an reipsa vera sint, vel falsa. Non juvat inquam, Nam si humanam mentem prorsus imbecillam, ejusque intelligentiæ vires impares reputat vero adsequendo; ne videri quidem ea argumenta sibi vera possunt, sed plane falsa: & ideo ludicrus denuo in iis objiciendis, vel insanus. Quod si denuo reponat, eam de humanæ mentis imbecillitate in vero adsequendo opinionem non *omnino veram*, sed *verosimilem* tantum a se reputari; & ideo nec *vera*, nec *falsa*, sed *verosimilia* tantum a semet existimari argumenta, quæ ad eam probandam opponit; adhuc ludricus, vel insanus reputandus, dum *verosimilibus* tantum argumentis everti posse arbitratur argumenta *certa*, planeque *infallibilia*, quibus nos utimur ad oppositam sententiam demonstrandam.

dam . Nam illud denuo ac lubenter repeto , repetendumque sæpiissime , quarundam cogitationum nostrarum *immutabilitatem* , atque *constantiam* manifestissimum argumentum esse *veritatis* earundem ; ipsarum scilicet objecta talia in se esse , qualia a nobis constanter , ac immutabiliter cognoscuntur , ac judicantur . Sola enim *vera* , utpote naturæ rerum uniformia , *immutabilia* esse possunt , semperque videri a nobis eodem modo , atque in *eosdem usus* adhiberi : falsa non item , quæ una vel altera die falsitate cognita , semet ruunt , & evanescunt , tamquam a natura difformia , & commentitia ; nec in eos *usus* adhiberi possunt , ad quos falso iudicio idonea reputantur . Qua de re mox clarius & uberius .

§. CIV. Nec quidquam proficit , dum idem *pseudo-Huetius* ait , solo *revelationis lumine* collustrari mentem posse , ut verum inquirendo adsequatur . Quonam , quæso , in divini Codicis libro unquam revelatum invenio , hunc esse calamum , hæc perspicillia , illud atramentum ; quæ ex diurno ceteroquin , nocturnoque *usu* , atque ex constantibus inde subsecutis effectibus talia esse scio ? Quomodo etiam Dei verbum ibi contineri sciam , si rationis lumine Deum esse ignoro ? Si loquutus ne sit Deus , an non , per naturalem rationem scire non valeo ? Sed demus , me undecumque ista cognoscere posse . Standum nunc igitur iis omnibus , quæ in eodem Codice docentur . Ergo quum Paulus præsertim sæpe in illo doceat ,

me per ea, quæ facta sunt, Deum cognoscere posse, digitoque monstrare; consequens est, solo naturæ lumine, & per creaturas ipsas in Dei cognitionem me posse devenire; ac proinde inesse humanæ menti vires satis idoneas quum ad creaturas ipsas, tum ad earum Condito-rem agnoscendos. Quamquam me vix temperare ab ira possum, dum hæc Scripturis sanctis ficta, atque fucata elogia a viro sceptico fieri audio. Quasi quod *scepticismi* scopus non ipsa sit veritatum omnium quum *naturalium* tum maxime *supernaturalium* ever- sio, ut, si diis placet, ubique triumphet *libertinismus*! Novimus quippe ab ungue leonem

§. CV. Ceterum si Scepticos, omnia in dubium vertentes, aut ludere, aut insanire ajo, dum nihil a nobis per naturæ vires sciri posse deblaterant; non ideo oppositam quorundam, qui *Dogmatici* vocantur, audaciam, atque superbiam unquam probaverim, qui nihil se ignorare prorsus jactitant. Stati enim sunt humanæ intelligentiæ fines, quos ultra ejus vires minime ex- patiantur. Scilicet ea fuit semper eritque in ævum sapientissima supremi Numinis œconomia, ut quæ vitæ humanæ quum *animali*, tum *rationali* commode, honesteque transigendæ necessaria erant, nobis ultro manifestarit; in ceteris operibus ejus *admirationis* quidem nostræ *objectum* esse voluit, non *comprehensionis*. Quare adlaborandum potius nobis est, ut hac divini vultus scintilla super nos divinitus ob- signata in eos *finis* utamur.

mur.

mur , ad quos summa munificentia fuit ea nobis a Deo communicata . Quæ germana , ac vera Philosophia .

C A P U T XII.

De triplici veritatis genere , physica , metaphysica , historica , earumque certitudine .

§. CVI. **I**Nsunt itaque , ex præcedenti Capite , humanæ menti vires tales ac tantæ , quæ veritatibus pervestigandis , & adsequendis satis idoneæ sint . Examini nunc subiicienda harum genera veritatum , quæ pervestigandæ . Porro earum divisio non ex alio fonte deducetur melius & adcuratius , quam ex rebus ipsis , quæ verorum sunt iudiciorum objecta . Eæ autem res , sive talium iudiciorum objecta , generaliora quidem , & ad quæ omnia facile revocantur , vel *physica* sunt ac *sensibilia* , vel *metaphysica* & *intelligibilia* , vel *historica* demum & *credibilia* . Quæ seorsum explicanda prius , tum veritates ipsæ determinandæ , & evolvendæ .

§. CVII. Principio igitur *physica* iudiciorum objecta adpello , quæ corporea sunt , ac sensibilia , quæque sensuum usu & adplicatione a nobis dignoscuntur . Ubi nihil referre putamus , sive nudis sensibus , sive instrumento quolibet armatis ea nobis dignoscantur . Quare in

physicorum objectorum censum conjicienda, nedum quæ *simplicibus observationibus* de mundo adspectabili nobis perspecta sunt; sed etiam quæ per *experimenta* ritè instituta deteguntur. Ut adeo ad *physicorum objectorum* genus spectent naturæ phænomena omnia, tum quæ semet in sensus incurrunt, tum quæ instrumentorum, & quarumlibet machinarum vi & ope sive *observando*, sive *experiundo* e naturæ puteo eruuntur, ac palam fiunt.

§. CVIII. Voco autem judiciorum objecta *metaphysica*, quæ abstracta & intelligibilia sunt, atque rationis usu nobis comperta. Quocirca ad hanc objectorum classem spectant res omnes insensibiles & inconspicuae, quarum cognitio sive ratiocinando, sive meditando, sive adhibendo analysim, sive synthesim, sive quævis alia media, de quibus Libro III. in nos manat, & funditur. Atque hinc ad eandem pertinet, nedum quidquid insensibilis & abstracti, atque rationis usu a nobis cogniti suppeditant *Discipline metaphysicæ*, sed & *mathematicæ* etiam, & *ethicæ*, & ipsæmet non raro *physicæ*. Nulla enim facultas est, quæ judiciorum objecta quædam intelligibilia & abstracta non contineat; & quæ intelligibilibus quandoque & abstractis argumentis aut evolvendo, aut demonstrando non utatur. Ut ecce: *Decrescant ne vires corporum, quæ in orbem diffunduntur, in inversa ratione quadratorum distantie a centro?* intelligibilis quidem & abstracta inquisitio est; simul tamen pertinet ad *Physicam*. Item: *Co-*
lendus

landus ne sit Deus super omnia ? aut : diligendi ne homines sicut nos ipsi ? Inquisitiones sunt etiam intelligibiles & abstractæ ; spectant nihilominus ad *Ethicam* . Nihil addam de *Mathesi* , præsertim *pura* , cujus argumenta omnia ejusdem generis esse , idest intelligibilia & abstracta , nemo ignorat . Nec prætereundum , nihil interesse , siue id genus objecta solo intellectu ac ratione cognoscantur , siue suas etiam in eorum intelligentia partes habeat *phantasia* , siue vis imaginatrix . Quo enim *metaphysica* dicantur , sat est non esse illa *sensibilia* , nec ulla auctoritate credita .

§. CIX. Voco tandem *objecta historica* , quorum cognitio neque a sensibus ingeritur , neque pura ratione formatur , sed per auctoritatem acquiritur ad *Criticæ* leges exactam . Id genus objectorum plenæ sunt *Historiæ* universæ ; quippe quæ in enarrandis præteritorum temporum factis , quoad latissime patent , eæ totæ occupantur . Nec ulla quoque Disciplina est , quæ *partem historicam* non complectatur nedum propriæ originis , progressus , vicissitudinum , cultorum , similium ; sed & sententiarum quoque diversarum in ea argumenta , quæ versat , enucleatque . Quod & factum bene . Ablata enim a Disciplinis parte *historica* , quæ supersunt , scheletro similia videntur ; atque *docendo* tantum , nec simul *oblectando* , patientissimorum quoque Lectorum ingenia lassant , defatigantque .

§. CX. Sunt igitur iudiciorum quorumcum-

que nostrorum objecta triplicia, *physica* & *sensibilia*, *metaphysica* & *intelligibilia*, *historica* & *credibilia*. Ad tria autem suprema genera istæ revocari omnia & singula posse, de quibus a nobis judicia feruntur, non est in dubio. Enimvero in *actuali* eorum cognitione vel intervenit ministerium sensuum, vel solius intellectus, vel auctoritatis. Neque enim est aliud cognoscendi medium, si recte conjicio. In priori autem casu sunt objecta *physica*, in secundo *metaphysica*, in tertio *historica*. Ceterum quum hæc docemus, caveant, ne sibi in animum inducant tirones, circa objecta quum *physica*, tum *historica* nullum esse intellectus ministerium. Adest enim quammaximum: quin & totum in judiciis de utroque ferendis artificium solius intellectus est, non sensuum, non auctoritatis. Distinguimus autem illa ab *objectis metaphysicis*, quatenus indita tantum sibi vi intellectus ista cognoscit; *physica* vero non nisi ope sensuum, atque auctoritatis ope tantum *objecta historica*.

§. CXI. His in antecessum evolutis, facillimum nunc fuerit veritatum genera nosse, ac determinare. Scilicet quum *veritas logica*, de qua heic sermo, in conformitate judiciorum cum objectis, de quibus feruntur, sita sit (§. 17.); tot consequenter statuenda erunt veritatum genera, quot sunt judiciorum objecta ipsa; ut patet. Hæc autem vel *physica* sunt, vel *metaphysica*, vel *historica* (§. 107. seqq.). Et veritates igitur aliæ sunt *physica*, aliæ *me-*

aphysica, aliæ *historica*; quarum priores si-
sunt in conformitate iudiciorum nostrorum
cum objectis *physicis* ac sensibilibus; secundæ
cum *metaphysicis* & intelligibilibus; postre-
mæ cum *historicis* & credibilibus. Atque hæc
quidem trimembris veritatum divisio quum ex
superioribus fluxu quodam naturali, ac neces-
sario sequatur; everti consequenter nequit, nisi
prius superioribus principiis everfis. Sed & sensu
quoque optimorum communi nititur, penes
quos ea vulgo recepta. Porro si hæc rite in-
vertantur, totidem *falsitatis*, *errorumque* genera
oborientur; ut patet.

§. CXII. Sed ad *certitudinem*, quæ præci-
pius est harumce (§. præc.) veritatum cha-
racter, gradum faciamus. Ea perinde est ge-
neratim, ac *firmitas*, *immobilitas*, *invariabi-*
litas; adeo ut *veritas certa* perinde sit ac *ve-*
ritas firma, *invariabilis*, *immobilis*. Sed du-
plex in iudiciis *certitudo* distinguenda, quarum
altera ex objectis in illa derivatur, de quibus
feruntur; quatenus videlicet immobiliter ea sunt
alia, qualia iudicantur: altera a mente ipsa,
quatenus firma illis adsentitur persuasionem, nec
minimum valet de eisdem hæsitare. Priorem *ob-*
jectivam dicere possis; *subjectivam* hanc poste-
riorem; quatenus ipsa mens nedum causa ef-
fectrix, sed & subiectum quoque est eorundem
iudiciorum.

§. CXIII. *Certitudo subjectiva*, sive men-
tis, simplicissima est, summa, graduumque
impatiens. Nam nisi summa, plena, perfecta,

NON

non *cetitudo* erit, sed *incertitudo*. Nec tutissimum ea est veritatis iudiciorum argumentum: quemadmodum nec *incertitudo* tutum argumentum falsitatis eorundem. Fieri enim potest, ac fit sapissime, in iis præsertim, qui seria, matura, & pacata de rebus examina negligere solent, ut mens *certa* sit quidem de veritate, aut falsitate iudiciorum; quæ horum autem putantur vera, sint falsa, & quæ falsa, vera existant. Similiter fieri potest, ut mens ob imbecillitatem, aut ejusdem examinis neglectu, hæsitet ipsa quidem de eorundem iudiciorum veritate, aut falsitate; interea dum ea immobiliter vera sunt, aut falsa. Oritur ea tandem certitudo mentis, sicut & incertitudo ex iudicio, quod ipsa efformat quum de *principiis*, tum de horum *adplicatione*, tumque demum de *illatione* confectariorum, de quibus ea certa est, vel incerta. Nam si principia putat vera, adplicationem adcuratam, ac legitimam illationem; certa est de confectariis inde deductis: sin contra, hæsitans, & incerta. Ubi opportune monendi tirones, ne certi umquam, aut hæsitantes sint de veritate, aut falsitate confectariorum, nisi prius quum principiis, & applicatione, tum illationibus rigido, maturoque examine libratis. Ea unica errores heic declinandi via.

§. CXIV. Hæc de *subjectiva*, & *extrinseca*. Adeamus certitudinem *objectivam*, & iudiciis ipsis *intrinsecam*. Mutuantur eam certitudinem iudicia vel a natura objectorum ipsorum, de quibus

quibus feruntur; vel ab *hypothesibus* adjunctis; quorum utrumque efficit, ut judicia vera, *immobilitèr vera sint*, æque ac *immobilitèr falsa*, quæ falsa fuerint. Ità si dicam: *triangulum est trilaterum; circulus est figura spherica; homo rationis particeps*: sunt ea judicia firmiter, invariabiliterque vera, certitudine ex ipsa trianguli, circuli, hominisque natura deducta. Sin vero dicam: *stantibus naturæ legibus, semotisque obstaculis, gravia deorsum ruunt*; erit hoc etiam iudicium certo, immobiliterque verum, certitudine tamen ex *hypothesibus* adjunctis derivata; quibus fit, ut æque ac priora illa nulla prorsus ratione in falsum commutari possit. Finge namque, causa quacumque posse in falsum commutari. Ergo vel naturæ leges commutatæ erunt, vel obstacula aliqua subposita, ne ea deorsum ruant. Alioquin quomodo pensilia in libero aere consistent gravia corpora? Utrumque autem evertit adjunctas *hypotheses*.

§. CXV. Atque hæc aptanda certis iudiciis omnibus quacumque veritate pollentibus, *physica; metaphysica, historica*. Omnia scilicet certa, & invariabilia vel ex objectorum *natura & essentia*, de quibus feruntur; quæ aliter ac est, esse non potest, quin ipsamet objecta simul pereant; vel ex *hypothesibus* adjunctis, sub quibus judicia vera nullatenus possunt in falsa commutari. *Hypotesis* in veritatibus *historicis* est illa *eventus jam præteriti*, sub qua fieri nequit, ut vera judicia commutentur in falsa. Quia
nulla

nulla potentia fieri potest, præteritum non præteriisse. Quo spectat Aristotelis illud communi virorum doctorum sensu probatum. *Hoc uno privatur Deus, insecta fieri, quæ facta sunt.* Atque ista quoque *objectiva* certitudo, æque ac *subjectiva* illa mentis (§. 113.), simplicissima est, summa, absoluta, nec ullos umquam gradus admittens. Alioquin si ullos gradus admitteret, non firmitas, non invariabilitas, non certitudo foret, sed incertitudo; ac major illa quidem, vel minor pro numero graduum, quos admitteret. Ex quibus intelligimus, certitudinis divisionem illam in *physicam*, *metaphysicam*, & *moralem*, quæ numero graduum sint inter se diversæ; quemadmodum innuere videntur Logici; commentitiam esse, & a certitudinis natura maxime abhorrentem.

§. CXVI. Sed horum usus, illosque egregios pro vita humana tandem subjiciamus est opus. Noverint itaque tirones, veritates semel detectas numquam, nisi forsitan imbecillitate memoriæ, amitti posse, nec in falsitates commutari: quia judicia vera æternum vera; sicut & æternum falsa, quæ semel falsa fuerint. Hæc quum noverint, illud una intelligent, & mores etiam uniformiter ad hujusmodi veritates de Deo, de nobis ipsis, deque ceteris hominibus conformatos, æternum quoque bonos esse; sicut vicissim semper pravi futuri erunt, qui ab illis semel disenserint; ac illos propterea semper præmio, hos poena semper dignos. Sed ea de re uberius Ethici.

C A P U T XIII.

*De physica, metaphysica, & historica veritatis
indiciis, quibus a falso secernantur,*

§. CXVIII. **C**onstitutis tribus veritatum generibus, *physica, metaphysica, historica*, determinanda nunc *indicia, signa, vera criteria* sunt, quibus ab earum inquisitoribus dignoscantur, & a falso secernantur. Nam in in hunc finem proposita reipsa hominibus esse hujusmodi *criteria*, quamquam Scepticis omnia in dubium vertentibus denegatum, in primis pseudo-Huetio; vix ulla tamen probatione indiget. Si enim Deus nedum vehementissimum & irrequietum sciendi desiderium hominum pectoribus indidit (§. 100.); sed & plura etiam scire voluit reipsa (§. 101.); consequens est, & veri sciendi *indicia* tradere illis debuisse, ac de facto tradidisse. Quamobrem sic integrum ea de re examen incundum, ut inter tot *veri criteria* a Logicis tradita, ac tradibilia, quod verum ac germanum fuerit, deligatur, ceterisque præferatur; idque brevissime. Non enim longas dissertationes evulgare (quod a Logica alienum) nobis, est animus; sed veritantum inquirendi præcepta tironibus tradere.

§. CXTIII. Est itaque *veri criterium* signum, aut indicium illud, quo vera internoscimus,

ac

ac secernimus a falsis . Ita indicium illud , quo hunc calamum esse scio , non perspicillia , non atramentum , non quidpiam distinctum atque diversum ; veritatis hujus *criterium* adpellatur . Ast quodnam indicium istud erit ? Proculdubio illud ipsum , per quod calamus in se calamus potius est , quam quævis res alia a calamo diversa . Quodvis enim ens per ea , a quibus ejus natura constituitur , ac distinguitur a ceteris , per eadem internoscitur . Hac unica res agnoscendi via sublata , nulla alia supererit ; ut patet .

§. CXIX. Quum autem generale principium istuc nulli sit exceptioni obnoxium ; clare intelligimus , veritatis criterium situm esse oportere in *notis characteristicis* , sive peculiaribus proprietatibus , quibus unaquæque res est id quod est , atque a ceteris distinguitur . Scilicet vera cognoscimus esse judicia , quæ de rebus efformamus , ope *notarum characteristicarum* , quæ rebus , de quibus illa ferimus , insunt ; falsa vicissim , si eædem *notæ* deerint , insintque diversæ . Ita si dicam , *hunc esse calamum* ; veram esse intelligo enunciationem istam ope *notarum characteristicarum* , quæ eidem rei , de qua illam efformo , inhærent , & quæ calamum constituent ; cujusmodi sunt e. g. interna cavitas , desinentia ex altera parte in scissum acumen , ex altera in plumam , usus ad scribendum idoneus , & ita porro . Quod si dicam , *illum esse perspicillia* ; hanc aliam enunciationem intelligo esse falsam ; quia *characteristicæ* perspicillio-

liorum *notæ* desunt, insuntque diversæ; quia, inquam, desunt vitra in orbem disposita, deest arcus; deest usus ad clarius acutiusque videntum idoneus, desunt perspicilliorum *notæ* ceteræ, insuntque oppositæ, atque diversæ.

§. CXX. Atque hæc locum quidem habent nedum in *physicis*, ac *metaphysicis*, sed & in veritatibus quoque *historicis*, de quibus supra (§. III.) Nisi, quod in veritatibus *historicis* præter rerum, quæ narrantur, *notas intrinsecas*, spectandæ quoque sint & *notæ extrinsecæ*, & *peritia*, ac *probitate* narrantium. Historico- rum deductæ, quod scilicet nec decepti sint ipsi, nec nos decipere voluerint. Ita enuuciationem hanc, *multa Romanorum millia ad Cannas ab Hannibale fuisse caesa*, agnosco esse veram, tam ob *notas* Hannibali *intrinsecas*, puta quia juratus erat Romanorum hostis, quia Dux invictissimus, quia tot præcedentibus victoriis inflatus, & ita porro; quam ob *notas* alias *extrinsecas* in Historicorum fide constitutas; quatenus qui talem tantumque facinus narrant, nec decepti ob peritiam ac sagacitatem sunt ipsi, neque ob probitatem bonamque fidem nos decipere voluerunt.

§. CXXI. Quæ cum ita sint, circa veri criterium statuere generale principium heic modo licebit, casui cuivis peculiari pro opportunitate aptandum, quod est hujusmodi: *Quidquid per intrinsecas, extrinsecasve características notas cognoscitur, tale est, quale cognoscitur; ideoque verum.* Notum namque per criterium.

Qui-

Quinimmo id genus cognitiones per *notas intrinsecas* sunt *scientificæ*, ac *philosophicæ*; quia per causam, sive per rationem sufficientem, cur potius sint, quam non sint, hoc modo potius, quam alio (§. 26.): licet *notæ extrinsecæ* non pariant nisi *fidem*. Qua de re suo loco. Interim principium istud tanto verius mihi videtur atque germanius, quanto tacita quadam philosophandi ratione, ac incitante, ducenteque natura eo generaliter uti solemus in librandis judiciis, eorumque veritate, ac falsitate stabilienda. Neque enim principium aliud præ oculis habemus, dum quidpiam verum ne sit an falsum, investigamus. Est porro velut lydius lapis, ad quem inquisitiones omnes exiguntur: ac tunc solum vera nos detexisse putamus, dum hæ *notæ rerum characteristicæ* nobis perspectæ fuerint: alias hæremus semper dubii, hæsitantes, incerti.

§. CXXII. Quamobrem idem principium, idemque *criterium* in naturalium studio Disciplinarum sic tironibus proponendum putamus, quatenus spectare illud debeant tamquam *fidum* inquisitionis omnis *ducem*, atque tutissimum detectæ veritatis *indicem*: neque verum detexisse se umquam reputent, nisi *characteristicas* veri *notas* prius intellexerint. Ubi & distinguendum ab illis volumus inter *sufficientia* rerum *indicia*, & *insufficientia*: inter *notas*, inquam, quæ harum potius quam aliarum rerum sunt *proprie*, & ideo *constantes* & *invariabiles*, atque clarè tutoque dignoscuntur; ab illis, quæ *vagæ*,
for.

fortuita, *variabiles* dici possunt, & *communes*, nec satis clare sunt tutoque cognitæ. Nam ut priora *indicia*, priores *notæ* certam evidentemque veri cognitionem, ideoque *scientiam* pariunt; ita & *indicia* posteriora, posteriores *notæ* non pariunt nisi cognitionem illius *mere probabilem*, ac puram putamque *opinionem*.

§. CXXIII. Sed tria in hæc quæri possunt, quæ non sunt callido prætereunda silentio. Primum: si hæc vera sunt, quid porro fiet de *evidentia* tantopere in scholis decantata, & pro veritatis criterio vulgo recepta? Secundum: abjiciendum ne consequenter, an retinendum principium illud alias probatissimum, ac vulgo notum: *Quidquid evidenter*, sive *clare distincteque percipitur*, est *verum*, eaque *de re potest affirmari*? Tertium: si res per suas respective *notas* cognoscuntur, quo alio criterio perspectæ nobis erunt *notæ ipsæ*? Num per *notas notarum*? Ita progrediemur in infinitum. Per seipsas? Ita cognoscuntur sine distincto, quale ceteroquin esse debet, criterio.

§. CXXIV. Respondeo ad singula. Ad primum. *Evidentia*, sive clara distinctaque rei perceptio, consecrarium potius est, & quodammodo effectus criterii, non criterium ipsum. Criterium enim palam rem menti sistit, atque a ceteris secernit: tum mens a criterio monita & excitata illam evidenter cognoscit. Deinde criteria quum sint *signa*, sive *indicia rerum*, non menti cognoscenti, sed rebus ipsis cognitis inesse debent, ut per ea cognoscantur, ac se-

cernantur . Quocirca non perceptiones ipsæ quantumvis claræ , & evidentes , sed *notæ* potius *characteristicæ* rebus ipsis inhærentes earum criteria erunt . Et sane datæ cujusvis arboris e. g. quænam alia indicia sunt , quibus cognoscitur , & secernitur , nisi truncus , cortex , rami , flores , folia , fructus ; *notæ* scilicet illius *characteristicæ* ? Erit ne forsitan , unde ea de re dubitemus ? Nec tandem in rei cujusvis investigatione aliud præposse contendimus , præter *characteristicas* ipsius *notas* ; quibus jam cognitis , ulterior statim cessat inquisitio omnis , ac rem ipsam , cujus illæ sunt *notæ* , jam detexisse gratulamur . Verbo : qui evidentem rei cognitionem pro ejusdem criterio habent , *signum* cum *perceptione signi* , effectum cum sua causa confundunt . Quo quidnam absurdius , & ineptius ?

§. CXXV. Ad secundum . Principium illud (§. 123.) egomet etiam retinendum esse ajo ; quia ubi evidens rei perceptio , ibi & *criterium* adest , *notæ* scilicet ejusdem *characteristicæ* , a quibus evidens ea perceptio in mente excitatur ; proindeque ibi etiam præsto est & veritas ipsa . Hæ enim *notæ* , ut rem constituunt , ita quum illam menti sistunt , & patefaciunt eandem simul , & ab aliis secernunt . Quamobrem *quidquid evidenter percipitur , est utique verum* ; quia evidentem rei perceptionem in mente excitat præsentia notarum *characteristicarum* , quæ eidem rei inhærent ; non quia evidens perceptio ipsa sit veri criterium ,

§.

§. CXXVI. Ad postremum ; *notæ charactéristicæ*, quarum indicio res cognoscimus, perspectæ nobis fiunt per *notas* alias, quas complectuntur, & hæ per alias, quousque per intelligentiæ vires eas scrutari, evolvere, ac detegere licuerit. Eædem *notæ notarum* commode dici poterunt ; nec opus erit in infinitum in earum investigatione progredi ; quin nec longe admodum illam diducere : quia ut quidpiam certo tutoque cognoscamus, ac secernamus, sat est *proximas* ipsius *notas* perspectas habere. Ita arborem cognoscimus per fructus : fructus per magnitudinem, figuram, odorem, saporem : magnitudinem per mensuras : figuram per partium dispositionem : odorem per gratas ingratasque olfactus sensationes : saporem per dulcedinis, & amarulentiaæ sensum, & ita porro, quin progrediendum sit in infinitum. Sed de *veri indiciiis* hucusque (a).

G 2

CA.

(a) Variæ ; ac multiplices *de veritatls criterio* veterum, ac recentiorum Dialecticorum sententiæ legi a tironibus nostris poterunt apud Genuensem, cujus volumina omnium jam manibus teruntur. Nam odi inutiles excursus, ubi patens, ac latissime strata (ut in re nostra) est via regia. Sunt enim ad otiaudum tantummodo comparati, Nihil autem indignius viro philosopho, scilicet serio, maturo, eravi, utilibusque tantum & commodis rebus intento, quam otia.

C A P U T XIV.

*De physica, metaphysica, & historica veritate.
inquirendæ mediis, sensuum experientia,
mentis ratione, & auctoritate ad
Critica leges exacta: deque nova
Logica partitione, novoque, ac
genuino lucubrandi ordine.*

§. CXXVII. **E**ST caput istuc postremum prioris Libri velut consecrarium, ac summa Capitum præcedentium. Ut adeo nec nobis in eo contexendo, nec tironibus in intelligendo valde adlaborandum sit, aut infudandum. Sat memoriæ revocasse fuerit, quæ in superioribus demonstrata fuisse.

§. CXXVIII. Itaque quum veritas, ad cujus adsecutionem tirones nostri contendere debent, partim caligine quadam obducta sit, partimque erroribus ac præjudiciis immixta; media omnino aliqua necessaria sunt, eaque hæc adcurate deligenda ac determinanda, quibus ex ignorantiae tenebris, errorumque confusione eruatur, atque per sua respective indicia, notasque characteristicas, de quibus Capite præcedenti (§. 119. seqq.) meridiana in luce collocetur. Etenim quod communi Ontosophicorum proloquio firmatum. *Qui vult finem, & media quoque vellet habet ad illius adsecutionem necessaria, & aptata.*

§. CXXIX. Quænam vero media istæ sunt veritatibus inquirendis, & adsequendis? Haud difficile fuerit definire. Quum enim veritas omnis vel *physica* sit, vel *metaphysica*, vel *historica* (§. III.): hinc totidem esse oportet earum adsequendarum media, scilicet *SENSUUM EXPERIENTIAM*, *MENTIS RATIONEM*, *ET HOMINUM AUCTORITATEM* ad Criticæ leges exactam. Ac sensuum quidem *experientia* medium est adsequendis veritatibus *physicis*: *mentis ratio metaphysicis*: *auctoritas historicis*. Nam & *physicæ* veritates nonnisi sensuum corporeis rebus adplicatione, & *metaphysicæ* nonnisi rationis ope, ac *historicæ* demum solo auctoritatis usu ad Criticæ leges exactæ inquireri, & inveniri possunt.

§. CXXX. Absit vero, ut quum hæc statuimus, illud in mentem veniat, *rationem* in investigatione veritatum dumtaxat *metaphysicarum* locum habere. Quinimmo seriam illam, intentamque semper esse volumus & in veritatibus quum *physicis*, tum *historicis*, tamquam inquisitionis omnis rectricem, moderatricem, ac magistram: quæ nimirum rerum in primis utilium delectum faciat: quæ ordinem, ac nitorem ubique servet: quæ errores devitet: quæ labores imminuat: quæque omnia ad totius Philosophiæ (§. 81. seqq.), ac studiorum omnium scopum ac summam, idest ad *beate vivendum* per pietatis, justitiæ, ac sobrietatis vestigia referat. Tantum dicimus, quod, supposito ubique *rationis* regimine, veritates *physicæ*

sicæ nonnisi per *experientiam*, *metaphysicæ* per *rationem*, *historicæ* per *auctoritatem* inquiri, & inveniri possint. Quo quidnam verius, ac luculentius dici potest?

§. CXXXI. Atque hinc nova, si recte memini, Logicæ partitio sese ultro nobis exhibet, quæ ex superioribus fluit suapte natura. Scilicet quum *Logica ars sit inquirendæ veritatis* (§. 6.); veritas autem alia sit *physica*, alia *metaphysica*, alia *historica* (§. 111.); easque respective investigandi media sint *sensuum experientia*, *mentis ratio*, & *humana auctoritas* ad Criticæ leges exacta (§. 129.): palam, & sine controversia est, *Logicam*, si quidem uniformiter ad naturam ejus, ac ingenita munera loqui velimus, in tres omnino partes dividendam esse, quarum prima artem doceat inquirendi veritates *physicas* per *experientiam*, secunda *metaphysicas* per *rationem*, tertia *historicas* per *auctoritatem* ad Criticæ leges exactam.

§. CXXXII. Hæc itaque *Logicæ* partitio vera, germana, naturæquæ ejus quammaxime aptata: quippe quæ ex ejus idea, ac natura suapte sponte fluens, non vi quapiam extorta. Ac si quartam his partem, quæ priori hoc Libro continetur, adjecimus, ea non tamquam compars proprie dicta, quæ cum tribus subsequentibus *Logicæ* corpus constituat, nobis spectatur; sed instar *Apparatus* ad easdem. Ea de causa priorem hunc Librum non forte fortuna, sed prudentes scientesque *præliminarem* adpellavimus (§. 1.). Siquidem ea est *Disciplinarum*
omnium


omnium indoles atque conditio, ut quædam integro earum corpori collustrando ac dirigendo inserviant; eaque de causa in antecessum præmittuntur; alia ad idem construendum, & conformandum tamquam integrantia membra pertineant; atque ob id in ipsomet corpore suis aptis opportunisque locis collocantur.

§. CXXXIII. Scio autem, me a vulgari Dialecticorum omnium quum veterum, tum recentiorum *Logicæ* partitione, & construendi methodo discessisse, etiam ab ea, qua nuperrime usus est Genuensis in *Logica* italico idiomate conscripta; atque ab alia, quam adhibuit P. Mako in *Compendiaria Logicæ institutione*. Verum quo justo id consilio a nobis factum, mox dicebamus (§. 131.) Neque quum divisionem, methodumque hanc nostram ex ipsa *Logicæ* natura, intimisque si ita quidem loqui fas est, præcordiis ac visceribus fluere dicimus, ceterisque subinde præferendam putamus, quidquam propterea illarum auctoribus detrachere est animus. Quippe ad propositum dumtaxat erudiendi juventutem, quod in illis fuit, & quo, Tullio teste, *nullum munus reip. afferri potest majus*, animum intendentes, eos summo opere laudamus; ceteris aliorum judicio relictis, non minus quam his nostris. Quippe *inter nullos magis*, si Senecæ fides, *quam inter Philosophos esse debet æqua libertas*.

§. CXXXIV. Tandem artem inquirendæ veritatis *physicæ per experientiam* primo loco evolvendam posuimus; idque non sine ratione, & consilio. Est enim in primis ob sensuum

in ea usum duabus aliis faciliior , & commu-
nior . Tum est etiam earundem velut basis ,
ac fundamentum : propterea quod primæ rerum
ideæ sensuum ministerio adquirantur . Quum-
que *experientiæ meditatio* succedat , & *critica*
diligentem postulet *meditationem* ; hinc secun-
do loco artem subjecimus inquirendæ veritatis
metaphysicæ per rationem ; ac postremo tandem
artem inquirendæ veritatis *historicæ per aucto-
ritatem* ad *Criticæ* leges exactam . Atque de
priori *Artis inquirendæ veritatis* Libro jam
fatis multa .





A R T I S

INQUIRENDÆ VERITATIS

L I B E R II.

*De arte inquirendi veritates physicas per
sensuum externorum experientiam.*

§. I. **A**bsolute in priori horum *Elemento-
rum* Libro ad tres subsequentes *Ap-
paratu*, rem ipsam adgredimur. Initium au-
tem ducimus ab *arte inquirendi veritates
physicas per sensuum experientiam*, ob divi-
sionem superius (Lib. I. §. 131.) propositam,
& rationem ibidem (§. præc.) traditam. Sit
igitur.

CA.

C A P U T I.

*De sensibus externis, eorumque ministerio in
delitescentium veritatum physicarum
investigatione.*

§. II. **S**unt sensus externi, sive externa organa sensoria illæ humani corporis partes, in quibus quum rerum sensibilibum impressiones fiunt, atque ad cerebrum mentis sedem atque tribunal propagantur, anima ad earum rerum perceptiones, ac sensationes determinatur. Horum numerum, ac ministeria Lib. II. *de verbis Domini* sic pulcre describit Augustinus: *Sensus carnis hujus quinque inveniuntur. In oculis visus est, auditus in auribus, odoratus in naribus, gustus in faucibus, tactus in omnibus membris. Alba, & nigra, & quomodocumque colorata, lucida, & obscura videntur sentimus. Rauca, & canora audiendo sentimus. Suave olentia, & grave olentia odorando sentimus. Dulcia, & amara gustando sentimus. Dura, & mollia, lenia, & aspera, calida, & frigida, gravia, & levia tangendo sentimus. Tum stupendam prorsus, divinamque eorum structuram, in primis oculorum, Anatomici, ad quos eorundem analysis spectat, digito commostrant, ac demirantur.*

§. III. Applicatio sensuum externorum corporibus

poribus extra nos circumpositis, dicitur *experientia*. Cognitio autem ea adplicatione parta, & in animo excitata, *experimentalis* adpellatur; cujusmodi sunt omnes, quæ a rebus sensibilibus, & organa moventibus ingeruntur. Est & aliud *experientiæ* genus in adplicatione intellectus ad ea, quæ in nobisipsis fiunt, constitutum, ex qua adplicatione ea, quæ aboritur, cognitio, *sensus intimus*, *intima conscientia*, ac *reflexio* nuncupatur. Ad hanc classem spectant perceptiones omnes, quibus internarum cogitationum, actionumque, ac passionum nostrarum conscii sumus. Porro nisi aliud addiderimus, *experientiæ* nomine semper illam *sensuum externorum* tironibus heic volumus intelligendam.

§. IV. *Experientia* isthæc, sive sensuum externis rebus adplicatio, immensi usus est in inquisitione *veritatum physicarum*. Quum enim mens cerebro tamquam carcere conclusa nullatenus per se valeat externa sibi corpora representare; pendet ob id ea prorsus a sensuum ministerio, eisque tamquam foribus utitur, ut in earum deveniat cognitionem. Ubi maximas Deo grates ex imo corde referre debemus, qui eatenus illos nobis contulit, ut in divinorum operum primum, tum per gradus quosdam in Dei ipsius intelligentiam, amorem, ac venerationem duceremur, rebusque telluris cum gratiarum actione frueremur juxta beneficos fines ejusdem Conditoris.

§. V. Quo in loco castiganda Scepticorum, in primis pseudo-Huetii audacia est; dum nihil

hil

hil nos de mundo adspētabili atque corporeo
 scire posse sensuum ministerio mentiuntur .
 Quasi quod Deus O. M. ideo sensus nobis tra-
 diderit , ut circitorum more vanis dumtaxat
 rerum imaginibus nos ludificaret ! Verum iis
 plane refutandis sat heic esse possunt , quæ præ-
 cedenti Libro I. a nobis demonstrata fuere (§. 103.).
Constantia enim , & *invariabilitas* , de qua ibi
 generatim , adeo frequens ac manifesta spectatur
 in tot tantisque sensuum repræsentationibus , ut
 cæcus , vel maxime refractarius sit , oportet ,
 qui de ea audeat hæsitare . Ut ecce : experien-
 tia omnium hominum , omnium locorum ter-
 ra , mari , cæloque disjunctarum , omniumque
 temporum , ac sæculorum constat , solem e. g.
 esse lucidum , calidum , pulcrum : terram innu-
 meris animalibus , herbis , plantis esse refer-
 tam : mare tot variis , diversisque piscium ge-
 neribus , quorum non est numerus , inhabitari :
 cælum immensa syderum multitudine , quæ nu-
 merari non potest , mire , pulcherrimeque exor-
 nari , & ita porro : atque hæc preterea omnia
 in eisdem *immobiliter* usus esse aptata , ad quos
 infinita Dei sapientia , bonitas , atque potentia
 destinavit . Quam ceteroquin *constantiam* in his
 sensuum repræsentationibus frustra perquireret ,
 nisi res repræsentatæ tales forent , quales repræ-
 sentantur . Ut in somniis : quæ , quia vana &
 commentitia , nedum continuo mutantur , sed
 & in eos *usus* , ad quos apta videntur , mini-
 me idonea sunt . Quis enim cibos , equos ,
 nummos e. g. ad manducandum , ad equitan-
 dum ,

dum, ad commercia agitanda per diem adhibuerit, quos dormitans somniavit per noctem?

§. VI. Ceterum quum sensuum repræsentationes veraces heic esse ajo, non is porro sum, qui, referente Tullio, *quidquid* (per sensus) *videtur, tale esse dicebat, quale videtur. Viderit id Epicurus. Meo autem judicio* (ut ejusdem Tullii verbis in Quæst. academ. persequar) *maxima est in sensibus veritas, si sani sunt, & valentes, & omnia removeantur, quæ obstant, & impediunt.* Si, inquam, conditionibus omnibus ad rectas, veracesque renunciationes necessariis muniantur. Alioquin egomet tironibus auctor sum, ut sensuum internunciis, si aliqua conditio desit, fidem minime adhibeant. Sunt autem conditiones istæ potissimum, quæ sequuntur: 1. valetudo, 2. quies, 3. proportionata intervalla, 4. medii uniformitas, ac limpeditas, 5. instrumentorum auxilia, 6. mentis attentio, ac diligentia. Quæ brevissime, quoad fieri potest, seorsum evolvendæ; ut ita sive in *observationibus* instituendis, sive in capiendis *experimentis* pro *physicarum veritatum* adsecutione, sensuum ministerio tuto, & absque errandi periculo uti valeamus.

§. VII. Ac sensus oportere in primis esse *bene valentes*, nullo scilicet morbo, aut pravo humore vitiatos, decernimus. Alioquin perturbabuntur abnormiter rerum externarum impressiones, quæ in illis fiunt; atque abnormiter quoque deturbatas earum imagines menti repræsentabunt. Quemadmodum iis accidit, qui regio

morbo

morbo laborantes, corpora omnia ob id flavæ conspiciunt. Contra vero quum ii bene valentes sunt, res prorsus easdem & invariatas eidem menti exhibent: ac si qua mutatio irrepsit, non erit ea certe nisi levissima tantum, & accidentalis. Hinc si *pietas* e. g. *temperantia*, *æquitas* in alba quadam chartula scribam, atque pluribus utcumque hominibus, forma, ætate, temperamento diversis legendam exhibeam; omnes proculdubio *pietas*, *temperantia*, *æquitas* unanimiter legent; quamquam alter vividiores fortasse, alter minus vividos, alter grandiores, alter exiliores characteres ipsos intueatur; nemo tamen leget *cælum*, *terra*, *pontus*, aut quidpiam simile. Idem prorsus eveniet, si scripturæ loco nudis vocibus utamur.

§. VIII. Deinde *quiescentes* sensus esse oportet, dum observationibus vacant. Quum enim rerum imagines in oculi fundo depictæ mutare situm debeant, si de loco in locum observando transferamur; moveri ob id in contrariam partem objecta videbuntur, quæ ceteroquin immota quiescunt. Quo spectat vulgatissimum Poetæ illud:

Provehimur portu, terræque, urbesque recedunt.

Atque propter eundem nostri oculorumque nostrorum motum non raro evenit, ut motorum corporum imagines non ea ratione in eadem retina situm mutant, quemadmodum ad veras illorum *directiones* discernendas mutare deberent, ac mutarent reipsa, si minime ipsi moveremur.

Qua

Qua de causa fit, ut si quis e mota navi pilam sursum excutiat; *perpendiculariter* relabi illam, communem navis motum insequentem, videat: quum alioquin in navim ea non decidat nisi *oblique*; sicut *oblique* reipsa decidentem conspiciunt, qui ad littora plane quiescentes immorantur.

§. IX. Rursus *intervalla*, ad quæ observationes capiuntur, *proportionata* esse debent, ut neque ob nimiam illorum viciniam objecta observabilia sensus opprimant; neque ob nimiam longinquitatem aut evanescant prorsus, aut nimis parva, & inobservabilia reddantur. Quibus in casibus *characteristica* ipsorum corporum *notæ* quomodo nobis perspectæ fient? Quomodo eorum subinde natura, &, quod magis urget, pro nostra aliorumque utilitate *usus*, ac *benefici fines* Creatoris discernibiles erunt? Quamobrem observaturus, num turris e, g. quadrata sit, an sphaerica: sistat se ad distantiam detegendis, si qui sunt, angulis sufficientem, ac proportionatam. Tum tuto putet, ejusdem esse illam figuræ, cujus a se ibi esse videtur. Nec refert, quod eminus inspecta, *constanter cylindrica* adpareat. Nam præterquam quod anguli, qui ob longinquiorem distantiam evanuerant, ea postmodum sufficienter imminuta, sensibiles fiunt; *usus* maxime ejusdem turris, quadratæ non sphaericæ figuræ aptatus, citra dubium ostendit, ejus figuram non sphaericam esse, sed quadratam. Mitto horum phænomenorum explicationes *opticas*, tamquam tiro-

num

num, in quorum utilitatem hæc scribo, intelligentiæ minus aptatas.

§. X. Ad hæc *medium*, per quod corpora observantur, *limpidum* sit, oportet, ac *uniforme*. Enimvero nisi sit limpidum, atque heterogeneis particulis defæcatum; objectorum *notæ* caligine quadam obductæ observatoris aciem effugient. Hinc fusco, rubiloque aere, nihil in locis remotioribus, multo minus in corporibus cælestibus observabile est: contra tranquillo, serenoque cælo. Nisi vero sit *uniforme*, objectorum situs omnino variabuntur: nummus e.g. in catino aqua pleno immersus paullo altius videbitur, quam reipsa est. Radii enim *optici*, sive *visorii*, qui ex illius superficie reflexi in oculos incurrunt, inflectuntur aliquantulum, quum ex aqua (*medio densiori*) in aërem (*medium multo rarius*) emergunt. Atque hinc quum visio fiat in directum juxta partem illam radiorum, quæ in oculos incurrit; consequens est, ut paullo altiori in loco idem nummus videatur; quum pars ista radiorum in directum intra aquam protensa, in locum paullo altiorem excurrat. Qua facillima methodo reddi quoque ratio potest, cur virga recta oblique, ac media sui parte aquæ immersa, curva, & inflexa videatur: ac sol præterea nondum supra orizontem elevatus, ob majorem terrestris atmosphæræ quam spatiorum cælestium densitatem, reipsa ortus appareat. Sed his de rebus plura *Optici*.

§. XI. Præterea quum nuda oculorum acies
in-

inquirendis, ac secernendis corporum *notis* impar est, & insufficiens; armatos eos esse volumus instrumentis quamoptimis, ac longo usu probatis. Enimvero innumera sunt, quæ aut ob enormem distantiam, aut ob incredibilem exilitatem nulla ratione observari possunt, nisi sensus quorundam instrumentorum ope, in primis telescopiorum, aut microscopiorum muniantur. De quibus fuse inferius.

§. XII. Tandem sensibus ad externa corpora sive *observando*, sive *experiundo* adplicatis præsempit semper & ubique volumus mentem ipsam, quæ seria, pacata, ac diligenter intenta, sit veluti rectrix, iudex, atque exploratrix renunciationum omnium, quæ ab illis fiunt. Ut si quæ forte surreptio, aut ludificatio quacumque de causa irrepperit, supremo *rationis sue puræ* iudicio pro opportunitate corrigat, omniaque in rectitudinis semitam revocet, apteque componat.

§. XIII. Atque hæ (§. 6. seqq.) præcipuæ conditiones sunt, sub quibus sensuum repræsentationes veraces habemus, eorumque fidei adquiescendum putamus. Adeo ut si qua difformitas in illis aliquando supersit cum rebus repræsentatis, ea non sit nisi *mere accidentalis*, & *fortuita*, in perspicuitatis, magnitudinis, & distantiarum, similiumque rerum gradibus constituta. Quo spectat memorandus Tullii locus in *Quæst. acad.* ubi: *Sensuum*, inquit, *ita clara iudicia* (repræsentationes intellige) *& certa sunt*, *ut si optio naturæ deitur, & ab ea Deus aliquis requirat: contenta ne sit suis integris*, in-

corruptisque sensibus, an postulet aliquid melius? non videam, quid quærat amplius. Quam magnifice simul, & officiose de operibus Creatoris, ac donis summa munificentia nobis collatis gentilis homo! Quam de eisdem contra abjecte, & inofficiose scepticus Auctor opusculi de imbecillitate mentis humana; quamquam & christianus, & maxime theologus per summam hypocrysim & calliditatem videri, haberique velit! . . . Sed in quæ errorum portenta hominem non inducit novitatis amor, seriæ meditationis neglectus, cordisque corruptio? . . .

C A P U T II.

De necessitate ipsum naturæ Codicem, sive ad spectabilia Dei opera per sensuum experientiam consuleydi, quo veritates physicae certius, ac promptius detegantur.

§. XIV. **N**atura librum, sive Codicem voco mundum ipsum adspectabilem atque corporeum, cujus nos exigua pars sumus, nobilior tamen, atque præstantior. Exhibet namque ille nobis propalam tamquam in Codice exarata nedum mirabilia Dei opera, eorumque beneficos fines, & usus ad nostram præcipue ipsorum multiplicem utilitatem & commodum; sed & per gradus quosdam in sempiternam quoque Factoris sui atque Rectoris

ris virtutem, ac divinitatem mirum in modum extollit, sublimatque. Adeo ut non palam, sed veritus in corde suo; nec vir sapiens, sed *stultus & insipiens* dicere audeat apud Psalmistam: *Non est Deus.*

§. XV. Porro *naturæ librum* hunc, si quidem ab omnibus, maxime a viro philosopho ipsa sensuum adplicatione consulendum volo in inquisitione potissimum veritatum *physicarum*. Quum enim in conformitate eæ sitæ sint iudiciorum nostrorum cum corporibus ipsis (Lib. I. §. III.); ecquisnam assequi illas, aut sperare umquam poterit, nisi utrinque collatione facta, serioque examine prius instituto? Nisi, inquam, eadem corpora, corporumque *notæ* adeantur, versentur diligentissime ex omni parte, atque iteratis sæpe observationibus, & experimentis subjiciantur? Eadem prorsus ratione, qua nemo prudens originali similem dixerit imaginem, nisi perspecto prius diligenter, consultoque *prototypo*.

§. XVI. Sane qui inconsulta per *experientiam* natura, de rebus sensibilibus atque corporeis iudicia crepant, itinerantibus illis mihi simillimi videntur, qui, quum quasdam nationes nonnisi leviter inviserint, nec regimen, ritus, leges, ac mores longa consuetudine, &, qua par erat, diligentia scrutati fuerint; tam multa nihilominus de iis proba, atque portenta evulgant, quæ subsequentes postmodum itinerantes diligentiores fabulis, atque commentis accensent. Quo & spectat fabulosus plurium

nationum *atheismus*, ne ipsis quidem (quod magis demirari possis) exceptis primitivis christianis, qui, ob rituum, doctrinæ, morumque ignorantiam, *atheis* quoque a quibusdam fuere adscripti. Verbo, qui sine experientia duce de rebus sensibilibus philosophantur, perinde faciunt, ac si quis terrarum australium, quæ hætenus ignotæ, *geographicas mappas* construeret. Quo quidnam stultius, viroque maxime philosopho indignius?

§. XVII. Hæc quum non animadverterent scholæ Philosophi, in inquisitione veritatum *physicarum* naturæ consultationem omnem neglexere, atque de mundo adspectabili in tenebris, ac cellularum quoque foribus obseratis philosophati sunt. Qua de causa factum est, ut a scopo quamlongissime aberraverint; eorumque *Physica* vana, sterilis, horrida, & inculta videatur *Metaphysica*, a Dei operibus tantopere abnormis, societati prorsus inutilis, atque torquendis dumtaxat adolescentum ingeniis, non explicandis naturæ phænomenis aptata.

§. XVIII. Contra vero Recentiores quum intelligerent, harum veritatum *physicarum* solam externorum sensuum experientiam ducem esse atque magistram; aliam viam, eamque germanam iniverunt, viam scilicet *phænomenorum*. Unde & nativa *physicis Disciplinis* facies magna ex parte reddita, & debitum divinis operibus ornamentum ac decus restitutum, & immensæ utilitates & commoda, quibus fruimur, in societatem collata: quæ magis etiam magisque in
dies

dies augere possunt, si, ut in pluribus minus cogitate faciunt, desinant otiosi; ac iis tantum in rebus physicis sedulo labore ac studio intumbant, quæ homini fovendo, ac perficiendo apta sunt: Qua de re late postea.

§. XIX. Nec me latet, in amplissimo *naturæ libro* plures esse paginas, quarum lectio non ita facile omnibus concessa: plura scilicet in tam vario, pulcherrimoque mundi theatro esse phænomena, quorum apta evolutio sive instrumentorum, aut machinarum defectu, sive causa alia quacumque pluribus denegata. Quo in casu grato animo aliorum laboribus utendum, in primis illorum, quorum tentamina in publicis Collegiis, & Academiis vel primum fuere inita, vel denuo iterata, atque probata. Nam aliena spernere prorsus, ac sua tantum amare, superbiorum proculdubio est, atque sciolorum: quorum impudentia ac petulantia quanto magis ad nauseam usque in quibusdam augetur in dies, tanto magis iusta compensatione ac pœna ii ludibrio habentur, ac ingenuis cordatisque viris, *nativis* videlicet *Philosophis* deridentur.

§. XX. Juvenes igitur *physicarum veritatum* inquisitores, quoad per ætatem, ingenium, vires, & commoda fieri poterit, *naturæ* ipsius *Codicem* legant, versent circumquaque, seriatim meditatione, atque apta sensuum adplicatione scrutentur. Ita quippe fiet 1. ut oculari intuitione ipsa longe clarius ac nitidius eas veritates assequantur: 2. ut novarum in veritatum

intelligentiam sæpe deveniant : 3. ut errores bene multos , ac præjudicia ex animo depellant : 4. demum ut a pulcritudine , ordine , finibus , usibusque rerum corporearum in Dei cognitionem promptius , ac facilius evehantur ; eumque diligant super omnia , ac tamquam amantissimum Parentem venerentur . Quod in scientiarum studiis rite institutis præcipuum , atque illud *unum necessarium* semper esse ajo, de quo in Evangelio : nec ab ea sententia me quisquam ratione quacumque ullibi dimovebit.

§. XXI. Velim denique , iidem alta mente reponant , Philosophorum , primi etiam subsellii, linguam longe humiliorem esse, atque ad vivas ac genuinas mirabilium divinatorum ideas animo ingerendas longe & debiliorem *experientiæ* lingua, lingua, inquam , ipsiusmet *naturæ* . Philosophi namque instabiles sæpe sunt , balbutientes , muti : *natura* autem & *experientia* semper eadem , maxime vivax , eloquentissima . Illi rudes , hæc disertæ : illi discipuli , hæc magistra . Quam pulcrior naturæ iris picto utcumque iride Philosophorum ! Quam elegantiores naturæ flores pictis quoque floribus librorum ! Quam spectabiliora tandem Dei magnalia quibusvis vel elaboratissimis operibus artificum humanorum ! Dicam verbo, dicamque serio , & cogitate : si alia cum aliis apta collatione conferantur, erunt illa pulcritudo ipsa , hæc deformitas : illa ordo , hæc confusio : illa lux , hæc tenebræ . Atque si quem pulcritudinis , ordinisque gradum humana quædam artefacta præferre videantur ; spectandus

Is velut æmulatio, imitatioque *naturæ*. Quam graviter & cogitate regio Psalmographo fere in ecstasim repto dictum: *Quam mirabilia sunt opera tua, Domine! Omnia in sapientia fecisti: impleta est terra possessione (gloria) tua!...* Ipsa itaque Dei magnalia, ipsum naturæ *Codicem* consulere, scrutari, demirari paullatim adfuescant, quantum possunt, tirones nostri; si quidem Philosophi nativi, veraces, Deoque obsequentes, ac sibi, & reip. utiles esse velint.

C A P U T III.

De inquisitionis hujus veritatum physicarum utilitate uberrima: deque delectu in ea faciendo.

§. XXII. **P**hyficarum veritatum studia ingentes humano generi utilitates adferunt. Principio præter magnum illud animi oblectamentum, quo in contemplatione perfundimur pulcritudinis, ac varietatis corporeæ naturæ; immensa quoque, ac multiplicia comoda sunt, quæ naturæ hominum animali fovendæ, ac perficiendæ ex eo studio promanant. Hinc quippe tot machinæ, & instrumenta, & artes societati tantopere salutaria oborta. Hinc aucta *Nautica*, & *Mechanica*; exulta *Herbaria*, & *Agricultura*. Hinc perpolitæ *Astronomia*, *Geographia*, *Medicina*, *Chirurgia*, *Chimi-*

ca. Hinc demum proventus omnes, ac voluptates ex animalibus, ex metallis, ex tincturis, ex corporibus omnibus immensa copia profecti.

§. XXIII. Verum enim vero non solis terrenis hisce, atque caducis commodis studia isthæc coercentur. Conferunt præterea nobis utiliora, & præstantiora longe bona, inter quæ illud præcipuum, quod contemplatione ordinis, pulcritudinis, & harmoniæ partium universi, in Dei factoris, ac provisoris sui cognitionem rapiamur. Sunt enim totidem linguæ, quæ gloriam, ac magnificentiam enarrant Conditoris. Hinc Newtonus, magnus ille *naturæ* scrutator & contemplator, audito *Dei* nomine, totum se, referente familiari suo discipulo Clarkio, in obsequium, ac venerationem devotissime componebat. Tum & hoc aliud, quod ex eodem mundi ordine, internaue constitutione *naturalem legislationem* intelligamus, atque ad *sobrietatis, justitiæ, ac pietatis* officia incitemur. Quinimmo quum naturam universam *mechanicas* sibi præscriptas *leges* sancte servare observamus, ac solum hominem *leges morales* sibi injunctas conculcare, vivereque exlegem, ex indomito arbitrio; magna proculdubio confusione obruimur tantæ improbitatis, ac pervicaciæ; indeque ad meliorem frugem sensim sensimque revocamur.

§. XXIV. Nec illud silentio prætereundum, studio ipso, & contemplatione *naturæ* innumera nos anteaetæ ætatis præjudicia deponere, in primis *panicos* quosdam *timores*, qui risum eli-

eliciunt potius, quam refutationem ullam exigere videantur. Illustre exemplum habemus in anno 1770. (si recte memini), mense Januario, quum *auroræ borealis* fulgoribus cælum hoc nostrum consentinum sub nocte silenti flammescere, atque omnia absumere velle videretur. Enimvero indocta plebs, innoxii phœnomeni prorsus ignara, sus deque commota est, exustionem, nescio quam, Civitati imminentem pertimescens. Hinc mille lacrumæ, & ejulatus ad sydera jacti: nec sedari ea umquam potuit, nisi publicis precibus indictis. Porro *pietatem* ea in re plurimum commendabant viri docti: cetera, in *emphatici* phœnomeni theoria satis instructi, ridebant. Panicum hunc, & istum timorem illud magis magisque comprobabat, quod e medio adparentium harumce nammaram frigidissimus adeo ventus borealis exufflaret, ut & lustrales aquas ubique viarum in glaciem converteret, & omnia frigore rigerent acutissimo: quum vicissim ferventissimum, urentesque calores exundare debuissent, si eæ non *emphaticæ*, sive adparentes, sed veræ, ac reales flammæ fuissent.

§. XXV. Verum ut hæc rerum physicarum studia has (§. 22. seqq.) utilitates, & comoda nobis conferant, principiis omnino, quibus regantur, utendum, & delectu. Ac de principiis dicam Capite sequenti. Delectum vero quod spectat; fugienda in primis ea omnia, quæ ignorata non nocent, nec juvant scita. Cujusmodi sunt sempiternæ disputationes illæ de
cor.

corporum divisibilitate, de gravitatis origine, de spatii natura, existentia, & possibilitate, de qualitatibus corporum, de æstu maris reciproco, de planetarum systemate, deque millenis id genus aliis, quæ jam tædet percensere. Ac si ea nolumus prorsus omittere; libemus ea tantum levissime; & ea quidem parte, ubi gradus aliquis cubat probabilitatis, & utilitatis. Ceteris meliora, ac utiliora præferamus. Equidem Scholasticos irridemus, quod eorum *Physica* tota disceptatrix esset, ac muscarum captatrix; interim aerem ipsi quoque verberamus in diem, & latratus æternum jactamus in lunam!

§. XXVI. Missis igitur, quæ aut arcana & inutilia, aut ficta & idealia videntur, ea tantum seligenda, ac sperimentali studio subjicienda, quæ generatim 1. fugandis doloribus corporis, & ægritudinibus mentis conducunt: quæque 2. vitæ hominum quum animali, tum morali fovendæ, ac perficiendæ apta sunt. Hujus autem generis argumenta plura societati utilissima suppeditabunt *Physicæ* partes universæ, in primis vero *Mechanica*, *Medicina*, *Nautica*, *Metallica*, *Astronomia*, ceteræ: Utinam vero *Physica* universa solius maris, terræ, aerisque cultura a viris summis coerceretur! Utinam tota Physicorum occupatio in promovenda, ac perficienda piscatione, agricultura, ac iis præterea artibus aliquando intenta esset, quæ humanæ societati emolumenta plura adferre solent. Frustranei namque, ac reprehensione digni

gni labores omnes, in primis scientifici, qui huic scopo non collimant !

§. XXVII. Hæc juvenes *physicarum* veritatum inquisitores præ oculis habeant. Caveantque etiam diligenter, ne in earum studio curiositate potius, quam utilitate ducantur. Quocirca non tam rerum naturam, adfectionesque varias, quam earum pro societatis commodo *usus* varios, ac *beneficos fines*. Conditoris in iis parandis ac largiendis insequantur. Hæc vera Philosophia.

C A P U T IV.

*De præcipuis quibusdam animadversionibus,
quibus physicarum veritatum inquisitio
regenda.*

§. XXVIII. **E**A est infelix humanarum actionum conditio, ut, nisi quibusdam principiis, de quorum certitudine ac veritate non ambigitur, opportune dirigantur, a recto tramite sæpe sapius aberrant; sive id imbecillitate mentis fiat, sive malitia, aut oscitantia. Ea de causa quo in veritatum *physicarum* investigatione tirones recta contendere possint, quædam generaliora principia ob oculos semper habenda illis proponimus; proposituri alia minus generalia, ubi *de observationibus, & experimentis rite instituendis* paullo in-

inferius differemus. Ea autem sunt hujusmodi.

§. XXIX. Primum: *Ad realem Dei mundum minime pertinere, sed ad idealem tantum & Philosophorum, quæcumque sub fictis hypothesebus demonstrantur.* Ex ficta namque hypothesis non nisi ficta pariter illatio deduci potest. Opera autem Dei adspectabilia vera sunt, realia, subsistentia. Id genus argumentis, fictis hypothesis innixis, Recentiorum *Physica*, præsertim *Mechanica* scatet ubique; quamquam pulcherri-
ma videantur, ac geometricis quoque formulis de industria expressa. Hujusmodi sunt in primis leges, sive regulæ omnes, quæ de duro-
rum, atque elasticorum corporum collisione, ac subnascentibus inde motibus in universa *Dinamica* demonstrantur. Innituntur eæ enim fictis hypothesis de perfecta corporum duritie, perfecta-
que elasticitate. Corpora quippe quum perfecte dura, tum perfecte elastica in mundo reali, ac Dei nusquam sunt (a). Hujusmodi
sunt

(a) Nihil tam elasticitati adversum, quam humiditas præcipue, & calor; quomododum pluribus observationibus & experimentis exploratum. Hi autem ut per vices corpora pervadunt, ita eorum elasticitatem multifariam perturbare debent. Ut adeo perfecte elastica numquam esse illa sinant. Sed & perfecte dura oportet omnino esse perfecte densa, talia nimirum, ut omnia prorsus interspersa spatiola vacua excludant; ut patet. Quod ceteroquin ut cartesianum, & fictum, ita eximiis quibusque Philosophis merito rejectum, & improbatum.

sunt quoque innumeræ leges aliæ collationis duorum corporum *uniformiter*, sive *æquabiliter* motorum, quibus theorematum omnia adplicantur, quæ de *parallelogrammis* inter se collatis demonstrantur in *Mathesi*: item *accelerationis motus*, ac *retardationis*: tum *projectorum*, & *curvarum parabolicarum*: rerum id genus sexcentarum. Pendent namque hæc omnia ex *hypothesi* alia æque *ficta*, quod corpora moveantur *in medio non resistente*, scilicet *in vacuo*. Ast medium istuc *non resistens*, & *vacuum*, ut vocant, *magnum* sive *coacervatum*, in mundo *reali* ac *Dei* ubinam, quæso, est? Quin immo etiam si ullibi extaret; mota nihilominus in eo corpora semet continuo resisterent vi motrici impressæ; quemadmodum ob *inertiam* de facto resistunt, quum ea primum communicatur: ac ita ne *in vacuo* quidem haberetur motus *uniformis*, sive *æquabilis*; a quo ceteroquin motus regulæ illæ omnes, & *curvæ parabolicæ* omnino dependent.

§. XXX. Has igitur motus leges, quibus tantopere ludunt, otianturque. Recentiores, velut *ideales* tantum ac *possibiles* tirones spectent; proindeque non *ad realem*, ac *Dei* mundum, sed *ad idealem* tantum, *possibilem*, ac *Philosophorum* pertinere sciant. Ac ne turpiter ipsi quoque otientur; prorsus abjiciant. At at retinendæ, inquiet forte aliquis, ex saltem *leges*, sive *motus regulæ* tamquam præstantissimorum virorum inventa; & quia reales naturæ motus, sin minus ad amussim, quampro-

xime saltem ad illas accedunt. Verum

*Stat contra ratio, & secretam gannit in
aurem,*

ut a viris summis ea excipiamus tantummodo, quæ vera, quæ realia; ac naturæ motus ad eas præterea leges, quoad fieri potest, exigamus, quas corpora sequuntur reipsa, non quas sub fictis, planeque falsis *hypothesibus* sequerentur. Istuc serio philosophari est: illud aut ludere pueriliter, aut ineptire. Ac si in *Physica possibilium*, ut ego quidem adpello, & *hypothetica* otiari licet; ecceur non æque otiari licebit in *possibilium* & *hypothetica Theologia*? Ita horum exemplo revocent etiam *Scotistæ* nostri conscriptas diu quæstiones, in primis celeberrimam illam: *Si Adam non peccasset, utrum Dei Verbum humanam carnem adsumpsisset?* ... Sed pergamus.

§. XXXI. Secundum: *Nihil in natura esse sive permanentis, sive successivi sine causa.* Ex nihilo enim, idest sine causa, nihil fieri potest. Quamobrem si harum cognitio causarum in propriam, aut communem utilitatem referri potest, scrutari illas, ac detegere adnitantur. Sin secus, prætereant; atque animum, attentionemque ad utiliora convertant. Quod si forte ob futuram utilitatem scrutari illas statuerint; hac regula in earum investigatione ducantur: *Sub eisdem circumstantiis eadem causæ naturales sive necessariæ eosdem producant effectus, similes producant similes.* Siquidem his in casibus effectuum immutatio alioquin tribuenda foret

foret nihilo : quod fieri nequit . Itaque visis ,
libratisque phænomenis , facillimum ea regula
fuerit eorum causas peruestigare . Est eadem
philosophandi regula a Newtono proposita ,
communique calculo a viris doctis comprobata .

§. XXXII. Tertium : *Nullam est minimulam
corporum particulam in nihilum abire* . Corpo-
rum namque partes , utut exilissimæ , & incon-
spicuæ , quum substantiæ , entia nimirum sub-
sistentia sint ; ut naturæ viribus creari non pos-
sunt , ita nec eisdem annihilari . Utraque enim
actio solius Dei , entis scilicet omnipotentis
est , Metaphysicorum nemine diffitente . Quocir-
ca actione^a causarum naturalium , finitaque vi
pollentium dissolvi quidem , minutissime atteri ,
in fumum , auramque abire , ac multiplicibus
variisque modis occultari eæ poterunt ; haud
tamen deperire prorsus , & in nihilum abire .

§. XXXIII. Quartum : *Promiscuam rerum
commutationem quorundam phanaticorum commen-
sum esse a natura prorsus alienum* . Est hoc
Alchymistarum deliramentum , in primis illo-
rum , qui lapidem , nescio quem , *philosophicum*
se habere jactitant , quo aliorum metallorum
commixtione quadam *aurum* se efficere posse
fabulantur . Aurum quippe , quemadmodum &
plura id genus corpora alia , aer , ignis , aqua ,
mercurius , similia , *simplicia* corpora sunt , im-
mutabilique natura , semperque eadem ac sibi
simili a Deo condita . Qua de re legendus il-
lustris auctor gallus eximii Operis italice red-
diti , cui titulus : *Spettacolo della natura* , edit.
neap.

neap. an. 1742. Tom. VIII. Quamobrem ex horum *simplicium* commixtione varia fieri quidem *mixta*, atque *etherogenea* corpora possunt, fiuntque reipsa; ea tamen in ipsis *mixtis*, quamquam indiscernibilia, eandem semper naturam servant; atque ut fuere simul permixta, ita & arte *chymica* denuo sejungi possunt, atque ad pristinum statum revocari.

§. XXXIV. Quintum: *Nihil casu, nihil frustra, nihil præter leges generales in natura contingere*. Omnia enim veris ac miris modis, licet persæpe humanæ imbecillitati imperviis & occultis, ad sapientissimos fines a Deo ordinantur: idque ex præscripto generalium legum naturæ mechanicarum; ut universum semper idem perseveret, licet continuis vicissitudinibus, in se tamen *periodice* redeuntibus, sit obnoxium. Quo & spectat veracissimum illud: *Deus, & natura nihil frustra moliuntur*. Sane vel suspicari tantum, ne dicam arbitrari, aliquid *casu*, aut *frustra* in natura contingere, magnum est id ignorantiae, & impietatis argumentum. In primis enim omnia in nostram, aliorumque utilitatem recta, aut per gradus quosdam vertere possumus. Tum Deum O.M. operi suo præesse, illudque sapientissime moderari, vel ipsis gentilium Philosophis, nedum Metaphysicis nostris aperte demonstratum.

§. XXXV. Sextum: *Nihil per saltum, nihil simultanee, sed omnia ex lege continuitatis in mundo corporeo fieri*. Scilicet non momento eodem, neque per saltum, sed successive per-

lu-

Iustrantur a motis corporibus spaciâ, successive augentur celeritates, successive retardantur, successive fiunt omnia, successive destruuntur. Fiunt enim, ac destruuntur omnia *motu*. *Motu* autem corpora nec simul in diversis locis eodem tempore esse possunt; nec ab uno in alium transferri, quin loca omnia percurrant intermedia. Itaque *successiva*, non *simultanea*, neque per *saltum* omnium naturæ phænomenorum, & corporum ipsorum productio est, *successiva* solutio; licet nunc tardius eæ fiant, nunc celerius, & momento quandoque eodem fieri videantur, ne excepta quidem soni, luminisque ipsius in orbem propagatione, ac diffusionem.

§. XXXVI. Septimum: *Loge simplicitatis caute admodum utendum*. Vulgo creditum, omnia in natura fieri debere per viam, ut ajunt, simpliciorē ac breviorē. Adeo ut in commune adagium jam abierit illud: *Frustra fiunt per plura, quæ fieri possunt per pauciora*. Minus tamen acute, minusque cogitate. Multiplicitas enim mediorum ad finem, si ordo, si proportio, si nexus, si elegantia, ac pulcritudo ubique servetur, argumentum quandoque sunt sublimioris in artifice sapientiæ, & ingenii amplioris. Plerumque etiam indicia ea sunt divinæ erga nos bonitatis, ac beneficentiæ effusioris. Ut quum paucis e. g. herbarum, olerumque, ac fructuum generibus alere nos, atque animalia Deus potuisset; innumera tamen eorum genera ac species nedum pro *necessitate* & *commodo*, sed & pro *luzu* etiam, ac *voluptate* munificentissimæ

me paravit, & parat. Sæpissime tandem velut monumenta spectanda erga multiplices hominum indigentias intensioris Dei curæ, ac providentiæ sollicitioris. Quo in casu plura media illa, licet in eundem finem tendere omnia videantur; tot nihilominus tamque beneficos respiciunt fines alios, quot sunt media ipsa. Hinc quum pro nostra, brutorumque sustentatione via longe breviori fructus parare potuisset; ut cæpas e. g., ut cucumes, ut cucurbitas reipsa parat; tamen magnis arboribus, tot radicibus & tot ramis, tot foliis, totque floribus pulcherrimo prorsus artificio refertis uti voluit, ut totidem simul media essent ad alios fines. Nam & lignis utimur in ignis pabula, ac in millenos alios artificiosos usus pro vita humana; & foliis quum æstivos calores temperamus, tum alemus pecudes: & floribus denique quum visum olfactumque oblectamus, tum mala plurima pro opportunitate fugamus: & ita porro, Nusquam igitur frustra fieri aliquid reputent tirones, quum illud per plura fortasse fieri observant, nisi *plurium* confluentium *mediorum* in eundem finem peculiare fines alii fuerint ipsis plane noti, atque comperti.

§. XXXVII. Octavum: *Cautè etiam adhibenda systemata generaliora*. Auctores namque *systematici* postquam sua generalia systemata animo concepere, & construxere, amore erga illa nimio incalescunt, atque (ut olim superstitiosa gentilitas *fortunam*) phœnomenorum ea omnium fontem, & scaturiginem

ginem similiter spectant. Hinc nihil est, quod *qualitates occultæ* non efficiant apud scholæ Philosophos. Nihil, quod non gignat *materia subtilis* apud Cartesianos. Nihil, quod non producat *attractio* apud Nevvtonianos. Atque nihil hisce nostris temporibus, quod *electricismo* non sit adscribendum apud Franklinianos. Interim quum veritas una sit, systemata vicissim nedum multiplicia, sed & secum ipsis valde pugnantis; facile hinc perspicere possumus, non esse illa *mundi realis* ac *subsistentis*, quemadmodum oporteret, *imagines* & *exemplaria*, sed *debonescentia* & *larvas*. Nec illud prætereundum, uno eodemque systemate plura inter se contraria phænomenorum genera explicare velle, perinde esse, ac si quis non incalescere solum, sed & frigescere etiam contenderet ad ignem; aut accensione tormenti bellici silentium simul inducere, & fragorem, Quæ aut ludrica, aut insana.

§. XXXVIII. Nonum: *Collisionis legem præ oculis semper habendam*. Est porro *lex collisionis*, qua corpora circumjacentia sese mutuo urgent, sistunt, retardant, comprimunt, ac sæpe etiam conterunt. Huic *collisioni* subjacent corpora omnia universi; quia inter se maxime nexa, & colligata, nec plane umquam quiescentia sunt. Ejus igitur ratio habenda semper in phænomenorum evolutione, præsertim ubi de nanciscenda cognitione agitur *mathematica* (Lib. I. §. 26.), Eadem *collisionis lex*, ut ad etiam tironibus innuam, malorum quoque

scatebra est, quæ *physica* adpellantur; cujusmodi sunt morbi, dolores, sensationes quæque molestiores, & acerbiores, similia. Quamquam majora, & atrociora id genus mala sunt, quæ ab improborum hominum vi ac prævalentia ingeruntur ferro, igne, bello, similibus nequitia & improbitatis instrumentis, quam quibus subijcitur a natura. Ut ita *collisio civilis* multo magis noxia hominibus sit *collisione naturali*; atque quum ex *mutui auxilii* lege esse deberet *homo homini Deus*, misericors videlicet ac beneficus, factus sit *homo homini lupus*, exitialis nempe, & infensus! Adeo ne in ferinam naturam commigravimus? . . . Sed quid miri, si nos ipsi infensiores nobis evasimus nova maiorum pariter *physicorum* colluvie, quæ impudicitia, ebrietate, ingluvie, vigiliis, vitæque acta præpostere ac inordinate parta, & atrocius justo nos Dei iudicio excruciant, & pertinaciora, ac diuturniora sunt? Quod tertium *collisionis* genus nisi *collisionem personalem* dixerimus, nescio, quo alio sit nomine adpellandum. Ut adeo mala omnia *physica*, quibus tantopere afflictamur, ex triplici collisione oriuntur, *naturali, civili, personali*.

§. XXXIX. Decimum: *Effectuum realium ac physicorum causas oportere esse reales ac physicas; nec plures, quam quæ eorum productioni explicandæ sufficiunt. Ideales enim causæ effectus producant sibi similes, nempe fictitios, mere possibiles, sæpe chimericos. Præter eas autem, quæ effectui producendo sufficiunt, ceteræ super-*

pervacaneæ sunt, & ad arbitrium adscitæ. Intulcat principium istud sæpe Nevvtonus. Videntur autem viri docti, in primis Abbas Pluche, auctor laudati Operis (*Spettaculo della natura*), & P. Fortunatus a Brixia, ne attractione illa universali idem vir summus illud convellat.... Peccatum quoque adversus idem scholæ Philosophis antipathia illa, *sympathia*, *horrore vacui*, *qualitatibus occultis*....

§. XL. Undecimum: Nullum esse in natura malum, nisi tantum relative. Mala enim *physica*, de quibus hæc sermo, quæ censentur *absoluta*, si ad totum referantur, nec spectentur *ex parte*, non proprie mala sunt, sed, ut cuncta Dei opera, *valde bona*; quia ad optimos ac sapientissimos fines a Deo condita, & ordinata. Quinimmo si sapienter iis uti scriverimus, ac voluerimus, erunt etiam & saluberrima, & utilissima, & proficua bona, ne *venenis* quidem exceptis, ex quibus tot remedia potentioribus fugandis morbis hodie a viris doctis parata ceruntur. Quamobrem cogitandum potius, qua arte ac magisterio in communem utilitatem verti possint, quam velut *absoluta mala* eadem horrere. Sunt enim *mala* iis, qui vel abutuntur, vel rectum eorum usum ex beneficiis finibus Creatoris ignorant. Quid quod quæ optima, ac salubria nosmet habemus, in exitialia venena degenerant, quum abutimur? Ita exquisitiore cibi, ita liquores delicatesiores, ita cetera.

§. XLI. Postremum: In contemplatione divi-

*orum operum ad beneficam Creatoris manum oculum semper mentemque intendendam. Est id principiorum omnium, quibus naturæ investigatio regenda, præcipuum, & sine quo vana omnia, & contemptibilia. Siquidem bruti, ac stupidi pecoris est frui pascua, nec reminisci pastoris. Quin & animantia quædam vim beneficiorum sentiunt, adblandiunturque benefactori; quanto magis homo rationis particeps, cui gratitudinis virtus propria esse debet ac præcipua, tot tamque eximia Dei dona animo sensibusque versans, ad beneficam Creatoris manum intendere debet? Neque *ascetica* sunt ista, *virique ascetici*; sed hominis, sed Philosophi *pura rectaque ratione* utentis. In naturæ Codice tria omnino exarata reperio: *PARATA BONA: PARATA HOMINI: PARATA A DEO*. Priora duo nocturna nunc tam diligenti versabimur manu, versabimusque diurna; tum adversus tertium, ad cujus considerationem incommutabiles *pietatis, gratitudinis, ac justitiæ* leges nos vocant, in utramque altum dormiemus auriculam? Ah! (a)*

CA.

(a) Rerum physicarum studiosis, naturæque contemplatoribus totus in ea gratitudine arga effusissimam Dei beneficentiam inculcanda est incomparabilis Ab. Pluche in eodem Opere mox laudato: *Spettacolo della natura*. Utinam tam immortale opus, tamque eximium ac præclarum *Physicæ* corpus, quo, nescio, an ullum aliud sit melius, elegantius, atque fovendo homini quum *animali* tum *moralis* utilius ac salubrius, omnium manibus tereretur!

C A P U T V.

*De observationum, & experimentorum natura ;
discrimine, ac generibus variis.*

§. XLII. **E**xperientiam esse externorum sensuum rebus sensibilibus adplicationem ; tum cognitionem ex ea adplicatione partam *experimentalem* adpellari, dictum supra (§. 3.). Verum sunt, qui *experientie* nomine cognitionem intelligunt, quæ comparatur attentione ad res in sensus incurrentes. Nec desunt, qui cognitionem nullo docente per usum *adquisitam* definiunt. Utrique autem minus recte. *Experientia* enim ab *experiri* est : *experiri* autem est externos sensus rebus pariter externis adplicare. Quare *experientia* non est nisi adplicatio ipsa ; cognitio autem inde parta cognitio *experimentalis*, non & *experientia* ipsa adpellanda. Sed apage tricas, in sola temporis jactura de more constitutas, mihi que tantopere odibiles, & invisas !

§. XLIII. Res externæ, quibus sensus per experientiam adplicantur, vel adplicationi præexistunt ; vel industria quadam ac labore, & artificio nostro producuntur. Priori in casu experientia *observatio* dicitur : in posteriore *experimentum*, ac *tentamen* adpellatur. Ac ea, quæ utroque in casu in sensus incurrunt, *phœ-*

nomena, sive *adparentia* nuncupantur. Est itaque *observatio* nudum phaenomeni jam praëxistentis ope sensuum examen. *Experimentum* vero artificiosa phaenomeni productio, a subsequenti illius examine non disjuncta. *Experimentum* enim numquam esse debet a productorum phaenomenorum diligenti observatione sejunctum.

§. XLIV. *Observationes* vel *nudæ* sive *simplices* sunt, vel *armatæ* sive *compositæ*. Illæ nullo instrumentorum adminiculo, ac immediata sensuum adplicatione fiunt: hæ sensibus aliquo instrumento armatis. Quum enim multa in naturæ regnò sint, quæ vel ob enormem distantiam, vel ob stupendam exilitatem oculorum in primis aciem effugiunt; subjici proculdubio observationibus ea minime possunt, nisi sensus idoneis instrumentis muniantur, telescopio in primis, & microscopio.

§. XLV. Ac telescopio quidem utimur in observationibus quum *astronomicis*, quarum objecta observabilia, corpora nempe cælestia, in immensum a nobis distita sunt; tum *terrestribus*, ac *maritimis*, quotiescumque ob longinquiore distantiam observabilium corporum *notæ*, aut etiam corpora ipsa nudis oculis sunt inconspicua. Utimur vero microscopiis quum *simplicibus*, tum *compositis*, una scilicet lente, vel pluribus instructis, in iis observandis rebus, quæ ob incredibilem exilitatem simplici oculorum acie detegi non possunt. Utriusque instrumenti vis in eo sita est, ut observabilium

corporum imagines mirum in modum adaugeant, ac multo etiam vicinioreſ obſervatoribus reddant. Quam multa, quamque ſutilia, atque jucunda in locupletiffimo naturæ regno, *planetarum* in primis, & *animalium*, tum *inſectilium*, atque *plantarum* id genus instrumentis detecta ſunt, quæ prius erant prorsus ignota.

§. XLVI. Eſt & alia obſervationum diviſione ratione objectorum, quæ iis ſubſciantur. Sunt enim obſervationes *aſtronomica*, *meteorologica*, *medica*, *chymica*, *optica*, ſimiles. Item et *experimentorum*; licet non in omnibus, in quibus obſervationes ſunt, & experimenta quoque iniri poſſint. Obſervationes quippe ad immania etiam intervalla, ut *celeſtes*, excurrunt; præſertim quum *teſcopia* vel *galileana* ſunt, vel *aſtronomica*, quæ illis meliora putantur. At experimenta quouſque manus, ac machinarum, quibus ineuntur, vires pertingunt; proſtendi poſſunt; ulterius non excurrunt.

§. XLVII. Item ratione modi, quo inſtituuntur, aliæ *vulgares* obſervationes ſunt, aliæ *artificioſæ*. Vulgari obſervatione ſcimus, viderem e. g. planetam eſſe nimis præfulgentem, ac pulcherrimum, qui nunc vespere ſolem inſequitur, nunc mane præcedit. Aſt mirabiles illius phaſes lunaribus ſimillimas *artificioſæ* obſervatione per *teſcopia*, Galilæo duce, deſcripſimus. Eadem & experimentorum diviſio, nec diſſimilis explicatio. Virgultum e. g. terræ commiſſum radices hinc inde protendere, ac ſenſim ſenſimque in arborem concreſcere,

val.

vulgare experimentum est agricolis familiarissimum. *Artificiosa* vicissim, ac sollertissimorum virorum propria, quæ sunt ope machinæ pneumaticæ, electricæ, barometri, thermometri, similia.

§. XLVIII. Quum intimæ rerum essentia sint nobis ignotæ, nec facile per sensuum *experientiam* observabiles; hinc observationes, & experimenta eo dirigenda nobis sunt, ut *characteristicas* earum *notas*, *constantes* præcipue & *invariabiles* e tenebrarum caligine eruant, ac meridiana in lucem reponant. His namque cognitis, una opera satis cognitæ erunt res ipsæ; licet intima earum essentia adhuc ignota. Diligenti observatione novi e. g. dati corporis pondus esse ceterorum sub eodem volumine maximum. Tum in admirandæ subtilitatis lamina, ac filamenta idem esse ductile. Ac tandem croceo, pulcherrimoque colore spectabile. *Notis* hujusmodi cognitis, eo ipso cognitum erit, tale corpus esse *aurum*, non quidvis aliud ab eo dissimile atque diversum; quamquam intimæ auri essentia in abdito delitescat.

§. XLIX. Neque hunc tantum in finem, ut corporum genera secernantur, *constantes* & *invariabiles* eorum *notæ* per observationes, & experimenta inquirendæ; sed ut veritates quoque *universales* earum ope detegamus. Scilicet quum experientia, in quam observationes & experimenta resolvuntur (§. 43.), sit rerum existentium, ideoque singularium, & individuarum (§. 342.); hinc veritatibus dumtaxat

xat singularibus peruestigandis , & adsequendis semet idonea erit. Ipsa autem *constantium* , ac *invariabilium* notarum inventione viam casternit ad *universalium* veritatum intelligentiam. Quia quum id genus *notæ* sint necessario cum re connexæ , ab eaque proinde inseparabiles ; inesse quoque debent & rebus ceteris ejusdem speciei. Quare ubi per *experientiam* noverim , *ductilitatem* e. g. *constantem* , & *invariabilem* esse *notam auri* ; statim intelligo , *omne aurum esse ductile* : quæ veritas est universalis. Sed ea de re Libro sequenti in Capite de usu rationis in adsequendis veritatibus metaphysicis per analogiam. Nam heic rem delibasse tantum sufficiat.

C A P U T VI.

De observationibus rite instituendis , earumque usu in detegendis veritatibus physicis .

§. L. HIS itaque prædiis , de quibus Capitibus præcedentibus , muniti juvenes naturæ contemplatores ; ac *physicarum veritatum* inquisitores , ditissimum naturæ regnum quæ *observationibus* , quaque *experimentis* ultro rimandum , explorandumque ingredi poterunt. Ac de experimentis partite dicam Capite sequenti. Heic de observationibus tantum , ut & confusio omnis devitetur , & suus cuique limes

limes & honos servetur argumentō.

§. LI. Quæ igitur rerum scrutinia , & investigationes *observationibus* fieri possunt , ea proculdubio ad quinque suprema genera , aut classes commode reducuntur . Nam vel 1. nudam earum existentiam spectant : vel 2. existendi modum : vel 3. notas , sive proprietates tam *constantes* quam *variabiles* : vel 4. earum causas : vel 5. demum , quodque præcipuum , & in quod cetera tendere debent , beneficos Creatoris *finis* , ac *usus* pro hominum vita quum *animali* tum *moralis* . Evolvamus singula .

§. LII. Ac nudam *rerum existentiam* quod spectat , ex si adhibito per plures quoque sensus sufficienti , adcuratoque examine , nudorum sensuum aciem plane effugiant ; in subsidium pro opportunitate vocanda instrumenta , telescopia scilicet , aut microscopia , quæ & affabre elaborata sint , & longo usu probata . Tum observationes iterandæ sæpissime , quo e tenebris in lucem , conspectumque deveniant . Quod si ne his quidem mediis ex sensibiles atque conspicuæ reddantur ; relinquendæ tunc paullulum in Democriti puteo , quousque per sollertiores alios naturæ indagatores novis , aut melioribus instrumentis munitos eruantur . Hugonii telescopium effugerant quatuor alii *satellites* , sive *lunula circum Saturnales* ; qui anno 1655. non detexerat , nisi unam , quæ est ordine quarta : quas tamen postea , an. scilicet 1671. 1672. ; & 1684. meliori telescopio instructus detexit Cassinus . Lentis palustris semina multis retro-

mi-

microscopiis fuerant impervia : quæ conspicua se tandem præbuerunt Vallisnerii microscopio. Scilicet Senecæ illud in quæst. natural. *Rerum natura sacra sua non simul tradit . . . Illius arcana non promiscue , nec omnibus patent . Reductu , & in interiori sacrario clausa sunt , ex quibus aliud hæc ætas , aliud , quæ post subibit , aspiciet .*

§. LIII. Quod verò spectat productionis , sive existendi modum , interest plurimum pervidero , ac nosse diligenter , an datum phænomenon ad causam aliquam fortuitam referendum sit ; an vero ad consuetum naturæ cursum pertineat. Nam ubi primum fortuitus productionis , existendique modus constiterit , erit is velut *exceptio* quædam & *aberratio regulæ* ; cuius proinde nulla ratio habenda , ad quidpiam in eo genere probandum , vel refellendum . Equidem nã is plane ridiculus , qui omnes homines cæcos nasci contenderet , quod aliquis fortuitis de causis , & præter constantem ac ordinarium naturæ cursum cæcus oriatur . Ubi vero constiterit productionis , existendique modus *constans* plane & *invariabilis* ; erit ea *regula fixa & immobilis* ; ex qua proinde de ceteris universe argumentari licebit . Quo autem fortuita a constantibus phænomenis diligens naturæ observator secernat , iteratis sub variis circumstantiis loci , temporis , statuum , observationibus , initaque diligenter earum comparatione & calculo facile dignoscet .

§. LIV. Præterea in perscrutandis rerum
notis ,

notis, maxime *intrinsecis*, & *invariabilibus*; idest *characteristicis* versanda pluries ex omni parte corpora sunt; tum in varia tempora, ac status deducenda, atque cum aliis specie similibus diligenter comparanda. Quod cum fit, sedulo attenteque inspicendum, quas versando, statusque varios, ac tempora permutando ea retineant, quas mutant, quasque cum aliis conferendo similes, atque communes habeant. Nam quæ in omni statu, & tempore, ac sub variis tentaminibus videntur semper eadem; & quæ omnibus ejusdem speciei corporibus communes observantur; eæ *constantes*, & *invariabiles* eorum notæ sunt; ideoque *intrinsecæ*, & *characteristicæ*, per quas scilicet sunt id, quod sunt, & a ceteris discriminantur. Quæ autem eadem diligentia adhibita, eisdemque circumstantiis permutatis, variari per vices, nunc scilicet inesse, nunc abesse a corporibus conspiciuntur; in *notis variabilibus*, & *accidentalibus*, sive *fortuitis* habendæ. Ita fossilium, ita metallorum, ita plantarum, ita animalium, ita ceterorum denique corporum utriusque generis notæ deteguntur, ac discriminantur.

§. LV. Rursus in pervestigandis phænomenorum causis tria ob oculos maxime habenda sunt: 1. virium quantitas effectui producendo necessaria: 2. rei cujusvis accessus, quum ille producitur: 3. nexus inter causam producentem & effectum productum. Ac primum quidem quod spectat, quum effectus sua causa perfectior esse non possit; si datæ causæ vires effe-

ctui

Atui producendo impares esse videantur; ea effectus hujus causa esse non poterit. Quod si tales vires sufficientes inveniuntur; non ideo statim ceu vera ejusdem causa agnoscenda, nisi & duo alia certo consent, quæ subsequuntur. Ita si e. g. in hac amoenissima *sylva* nostra *regia* magnum incendium de more sequutum fuerit; licet quævis scintilla ei excitando par esse potuerit ac sufficiens; non ideo hanc potius quam aliam illud excitasse discernere licebit.

§. LVI. Quod vero spectat secundum, causarum naturalium inquisitori diligenter inspiciendum, quidnam fortasse accesserit, quum effectus productus fuit, & ante cujus accessionem is minime producebatur. Nam eo cognito, una opera cognita erit & causa ipsa: veram scilicet illius causam rem omnino eandem esse, ad cujus accessum effectus erupit. Hinc si flores in viridario flaccescant; tum injecta aqua, virentes statim reddantur; effectus hujus causam aquam ad eorum radices effusam esse ajo.

§. LVII. Quod denique tertium, attente pervestigandum, quam cum re datus effectus nexum habeat, Quænam scilicet res illa sit, qua posita, is ponatur, quaque sublata, statim tollatur. Ubi post diligentem inquisitionem ea res in lucem prodierit, effectus ejusdem productio ipsi adscribenda erit. Scilicet quum inter lunæ deliquium, atque ejusdem in telluris umbram immersionem arctissimus adeo interfit nexus, ut ea immersione sequuta, luna statim

tim obtenebretur; collustretur ea denuo, statim ac ex ea emerferit; legitima illatione colligam, lunaris ecclypsis causam esse ejusdem lunæ in umbram telluris immersionem.

§. LVIII. Postrema inquisitionis objecta mox (§. 51.) proposita sunt rerum *usus*, ac benefici fines Creatoris, propter quos ea fuere nobis tam large parata. Horum investigatio per *notas* ipsas ineunda. *Notæ* enim rerum sunt propter earum *usum*; *usus* autem devolvitur in *finem*, qui in creatione spectatur. Jamvero quemadmodum rerum *notæ* pervestigandæ sint, dictum supra (§. 54.). *Notis* vero cognitis, tentando sæpe, experiundo, meditando, *usus* etiam ac Dei *fines* perspecti fient. Nam his ex fontibus ea commoda sensim sensimque nata, quibus sollertissimorum virorum opera perfrui-mur, & quæ tot tantisque artibus quotidie nobis obveniunt. Ceterum distinguendi rerum *usus* ab *abusibus* prudenti rerum æstimatori, viroque maxime honesto omnino erunt, Legitimus rei *usus* a Deo in ejus creatione ac largitione intentus, erit, qui prodest nobis, nemini nocet, *legesque naturæ morales* intactas esse sinit. In ceteris damnabilis erit *abusus*. Ceterum quum rerum *usus* hominum naturæ *animali* prodesse dignoscitur; adnitendum præterea, ut prosit quoque *rationali*, ac *moral*i; animum scilicet ad Dei amorem, gratitudinem, ac venerationem excitando, qui munificentissime ea nobis bona largiri dignatus est. . Qua de re recolenda hic, quæ diximus supra (§. 41.).

§.

§. LIX. Illud autem in observationibus in-
undis summo studio cavendum, ne ea, quæ
ad nos spectant, rebus externis tribuamus. Ex
punctione acus doloris sensus in nobis excita-
tur; qui ad nos spectat, non ad acumen acus.
Similiter differendum de sensationibus odoris,
saporis, caloris, frigoris, colorum, luminis,
soni, qualitatum, ut vocant, ceterarum. Horum
scilicet sensationes ad mentem observatricem
spectant, non ad res observabiles; nisi quate-
nus hæ viribus quibusdam activis ciunt orga-
na sensoria, atque impressiones quasdam nunc
placidas, nunc perturbatiores in eisdem produ-
cunt, ex quibus totidem sensationes nunc gra-
tæ, nunc molestæ in anima excitantur. Totus
in his explicandis est illustris philosophus Bri-
xiensis in Dissert. physico-theol. de *qualitatibus
corporum sensibilibus*.

§. LX. Cavendum est etiam, ne in *vitium
subreptionis* observando non minus, quam ex-
periundo prolabamur; credendo scilicet obser-
vata ea, quæ nusquam observata fuere, sed aut
illusoria imaginatione concepta, aut ex obser-
vatis illegitima illatione deducta. Hujusmodi
sunt, qui telescopiorum ope lunares incolas,
ac microscopiorum torrentes e magnete erumpen-
tes se vidisse fabulantur. Oritur autem *sub-
reptionis* vitium vel ex observatoris oscitan-
tia, vel ex præjudicatis opinionibus, vel ex
imaginatione perturbata. Quæ causæ ut illude-
re illum facile possunt, adeo ut videre sibi
videatur, quæ nusquam videt; ita diligenti

observatori opportune præcavenda.

§. LXI. Quod si demum post plures, accurateque observationes nondum aliquid detegere contigerit; non idcirco tamquam falsum putandum, quod observationi subiectum fuerat, nisi ex eo genere sit, quod in datis casibus, ac sub datis circumstantiis necessario in oculos incurrere deberet. Innumera quippe in natura sunt, quæ sensuum vel optimis instrumentis armatorum aciem effugiunt. Ex subsultu culicis totam tellurem contremiscere, ex perfectissimo ipsius æquilibrio facile deducitur. Interea nullus sensuum tremorem hunc animadvertit.

C A P U T VII.

De ineundis experimentis, rectoque machinarum usu ad physicas veritates in lucem eruendas.

§. LXII. **M**achinæ sunt instrumenta quædam affabre constructa, artificioseque elaborata, quibus in experimentis capiendis utimur pro novorum phænomenorum productione, & observatione. Hujusmodi est machina *boyleana*, *pneumatica* vulgo dicta, qua ex recipiente educto aere, tam miræ phænomena producuntur, quæ alias nusquam producerentur. Nam & fumum in recipientis fundo subsidere, & floccidam vesicam intumescere, & animalia gravissimis symptomatibus angī & agi.

agitari, & millena id genus alia non sine administratione ac stupore observamus.

§. LXHI. Machinæ aut *artificiosæ* sunt, aut *vulgares*. Ad posteriorem classem spectant ut plurimum instrumenta artium quum *primitivarum*, ut venatio, piscatio, pascua, agricultura; tum *derivativarum*, ut ceteræ in immensum in tanto sæculi *luxu* auctæ hodie ac perpolitæ; quarum proinde constructio nec adeo plerumque difficilis, nec laboriosa. Quæ autem *artificiosæ*, ut *pneumatica*, ut *electrica*, ut similes, artificem expostulant & physicum, & mathematicum, aut saltem a physico ac mathematico bene instructum. Omnes ut rite & cum successu adhibeantur, usum requirunt, exercitationem, dexteritatem, maxime *artificiosæ*. Est enim experiundi ars quanto naturalibus disciplinis, artibusque augendis ac perficiendis, humanæque proinde societati fovendæ ac locupletandæ idonea; tantumdem contra periculi plena, ac novorum errorum, quibus valde obnoxia, scatebra & occasio; maxime si experimentator ab omnibus affectibus liber minime sit, atque præjudicatis opinionibus detineatur.

§. LXIV. Quum nota machinarum vis in partium ordine ac proportionem, quibusdam ciendis motibus idonea, sita sit; curandum in primis, ut eæ sint adcuratissime elaboratæ, tersæ item, ac perpolitæ, atque a vitiis omnibus, si quæ irreperint, diligenter emendatæ. Alioquin aut frustranei erunt labores omnes, aut subnascentia inde phænomena pror-

sus ambigua. Adeo ut anceps semper ac dubia res fuerit, num machinarum vitiis, an causis aliis ea tribuenda sint. Exemplum habemus in Mariotto, qui, quum experimenta *optica* super luminis radios ope prismatis quamterfissimi ac elaboratissimi a Newtono capta iterare vellet, ac prisma simul uteretur minus terfo, ac venulis, bullulisque circumsperso; iis de causis illusor putavit, primitivos lucis colores non esse, quemadmodum Newtonus expertus fuerat, immutabiles, sed in alios, atque alios dividi rursus, ac resolvi posse.

§. LXV. Deinde pervidendum diligenter, quinam sit partium machinae status, quinam corporis ad machinam applicandi, & quamnam proinde actionem in se invicem exerere possint: ne scilicet accidentia subinde orta causae alteri cuicumque tribuantur. Sane si corpus e. g. sit per machinam attollendum, non aequè ponderare ac reniti videbitur, adhibitis funibus madidis, ac siccis. Nec idem quoque ejusdem pondus, si lanci frigidum, ac si candens imponatur. Ubi & illud curandum, ut machinae, quoad fieri potest, simpliciores sint, ac paucissimis partibus instructae. Has enim natura, quae per tot ambages suos effectus producere non solet, expostulat. Sane qui minimis producendis phaenomenis amplissimo machinarum apparatu utuntur, perinde faciunt, ac vetustissimi Aegyptiorum reges illi, qui ut cellulam sepulcralem sibi pararent, qua eorum cineres recondiderentur, tot hominum myriades, tamque

tamque ingentibus pyramidibus construendis diutissime intentos detinebant.

§. LXVI. Rursus quamquam tanta sit machinarum perfectio, ut ab iis experimenta capienda haud vitari possint; non ideo statim ad tentamina convolandum. Sunt enim experimenta plura, quæ etsi non deturbent machinæ, non experimentatoris dexteritas, non quidvis simile; deturbant nihilominus circumstantiæ aliæ multiplices externæ. Ita si experimentum ineundum sit super propagatione soni, seligenda dies tranquilla & placida. Ventorum namque impetus aut illam accelerabit plurimum, aut retardabit, prout amborum directiones vel conspirantes fuerint, vel oppositæ. Ac si vitari quandoque eæ mutationes a loci, temporis, aliisque adjunctis inductæ nullo modo possint; earum saltem ratio in experimentis habenda. Hinc quia vis magnetica e. g. fortior est hyeme quam æstate; alia quoque fiunt in magnis corporum massis, alia in parvis; ac pendula demum tardius sub æquatore oscillant, quam in locis ad polum sitis, & ita porro; habenda ob id harum circumstantiarum ratio est, atque adcurato calculo subducenda: quinimmo earum causæ tamquam novarum inquisitionum objecta spectandæ.

§. LXVII. Ad hæc quum, paratis omnibus, ad experimentum ventum fuerit, lentius, quoad fieri poterit, ac morosius procedendum. Tum notanda diligenter nedum phænomena, quorum productio jam antea expectabatur; sed & illa

etiam, quorum nulla prius suspicio oborta fuerat, ac fortuito veluti casu erumpere videntur. Nam hæc, plerumque jucundiora nimis sunt, ac societati utiliora. Equidem eorum, quæ in hominum utilitatem hæctenus inventa sunt, bona proculdubio pars fortuito quodam casu fuere detecta. Ea telescopiorum origo, ea pulveris pyrii, ea aliorum sexcentorum. Quamquam verear, ne pulveris pyrii inventio noxia potius & infesta humano generi dicenda sit, cujus stragem & exterminium tantopere minatur & infert, quam salutaris & commoda.

§. LXVIII. Præterea quum quorundam phænomenorum variabilitas aut constantia per experimenta quæritur, juvabit plurimum ea iterare sæpiissime nedum eadem, sed & aliis quoque machinis, loco pariter, tempore, aliisque adjunctis permutatis. Etenim quæ sub tot mutationibus semper eadem observantur, in firmis & constantibus naturæ phænomenis habenda: contra vero in fortuitis ac variabilibus, atque ex fortuitis ac variabilibus causis provenientibus accensenda, quæ continuo simul permutantur.

§. LXIX. Tandem eadem quoque methodo utendum, loco scilicet, tempore, ac machinis a prioribus diversis experimenta sæpius iteranda, quum phænomenorum causa quæritur, a qua producantur. Non raro enim accidit, ut quæ phænomenorum primis experimentis subnascens causa in suspensionem adducitur, multiplici eorum permutatione firmetur. Instar
omnium

omnium exemplum sit D. Paschalis, qui quum tubos a Torricellio adhibitos varie permutasset, ac tentamina nunc in montibus, nunc in ima valle, nunc pluvio, nunc sereno cælo iniisset; subducto mutationum omnium calculo, omnibusque diligenter adnotatis, plena tandem certitudine & evidentia collegit, veram ac germanam suspensionis fluidorum causam in tubis Torricellianis esse *aeris pondus*, & *eluterium*.

§. LXX. Atque hæc, saltem præcipua, *experiendi præcepta* sunt, quæ tironibus ad *physicarum* veritatum inquisitionem contendentibus non erant in mysterio detinenda. *NAM EA ARS LOGICA*. Cetera minus fortasse præcipua seorsum subicere nec vacat, nec est necesse. Experimenta etiam, quæ quacumque de causa a nobis iniri non possunt, a publicis Collegiis, & Academiis grato animo mutuanda esse, dictum suo loco (§. 19.).

§. LXXI. Monendi vero nunc juvenes *physicarum* veritatum inquisitores, ut spectent illas tamquam ceterarum *metaphysicarum*, & *historicarum* semina & elementa prima. Sunt generatim namque primæ, quæ mentem rerum omnium ignaram subeunt; quippe quæ sensuum ministerio acquisitæ; & ex quibus ceteræ *meditationis*, & *criticæ* usu adcurato hauriuntur. Quo spectat vulgare prologium: *Nihil est in intellectu, quod prius non fuerit in sensibus*.

§. LXXII. Sed & spectandæ eædem veritates

physicæ velut uberrimus fons & scaturigo aliarum quoque singularium, quarum *physicæ* Disciplinæ plenæ sunt, atque ex eisdem legitima illatione deducuntur. Nam ea veritatum naturæ, ut aliæ cum aliis amico foedere, ac indissolubili nexu, instar catenæ plurium annulorum, connectantur; nec ullibi hiatum admittant, nisi interposito errore. Cujus ratio perspicua, quia antecedens veritas rationem sufficientem continet subsequæntis. Ut si vi experimentorum cognito aeris pondere dicam: *Aer est gravis*: ex hac prima veritate colligere possum hanc aliam: *Ergo circumterrestria corpora præmit undequaque*. Tum hanc aliam: *Igitur quæ sunt leviora, sursum attollit, detinetque pensilia*: ac ita porro.

§. LXXIII. Ceterum in his confectariis ex observationibus, & experimentis deducendis caute admodum procedendum. Scilicet conferenda ea prius diligentissime, adcurateque inspiciendum, sint ne *vere ac realiter* ita invicem connexa, ut alterum necessario sequatur ex altero, utque alterius ratio sufficiens in altero contineatur; an præcedentis veritas subsistere possit, quamquam subsequens sit falsum? Nisi ea præcautio diligenter adhibeatur, facillimum fuerit in errorem progrediundo dilabi. Est hoc vitium oscitantium hominum, ac potissimum illorum, qui *præjudicatis opinionibus* turpiter detinentur. Nam *quæ amamus, facile credimus*, aiebat ille: quin & *fingimus, imaginamurque facillime*, addiderim & ego; atque, ut Ixion aman-

amantissimam Junonem suam, ubique videre illa nobis videmur.

C A P U T VIII.

*De usu Mathesis in evolvendis naturæ
phænomenis, per observationes
& experimenta detectis.*

§. LXXIV. **I**N explicandis naturæ phænomenis per observationes & experimenta detectis utilem esse *Mathesim*, discimus id in primis ipsiusmet Salomonis oraculo, quum *Deum fecisse omnia*, scribit, *in numero, pondere, & mensura*. Ex quibus clare intelligimus, ad evolvenda naturæ phænomena, præter *Staticam*, qua corporum pondera in machinis pervestigantur, adhiberi utiliter & commode posse *Arithmeticam*, numerorum scientiam, ac *Geometricam*, scientiam dimensionum. Atque *Arithmetica* quidem, ubi ad determinandos corporum motus, vires, celeritates, alia hujusmodi, opus est calculo numerali. *Geometria* vero, ubi eorumdem magnitudines, distantiae, motuum directiones, id genus plura examini subjiciuntur.

§. LXXV. Sed non utilis tantum, verum & interdum necessaria *Mathesis* videtur, ut phænomena quædam intelligantur, & explicentur. Sunt enim nonnulla obscura adeo & involuta,

ta, ut nisi facem *Mathesis* opportune suppediet, frustra tentare illas, & evolvere præsumpseris. Id genus arcanis & involucris sca-
tent *Physica* partes universæ, in primis *Statica*,
Hydrostatica, *Balistica*, *Hydraulica*, *Optica*
item, *Catoptrica*, *Dioptrica*, *Astronomia*, fere
omnes reliquæ cum *Mechanica*, qua virium,
temporisque compendio ingentia pondera mo-
vere, atque in altum attollere docemur.

§. LXXVI. Deinde cuinam bono ac usui
Mathesis fuerit, nisi in physicarum studio Di-
sciplinarum eam utiliter adhiberemus? Non
me latet, *Mathesim puram* mirum in modum
adolescentum ingenia atuere: judicium quoque
firmare in veri a falso discrimine: ac habitum
tandem conciliare paullatim ad cogitandum, ac
differendum *ordinate*. Quæ equidem eximia
bona sunt, ex quibus ceterarum quoque Disci-
plinarum adquisitio nimis facilior, ac prom-
ptior evadit. Verum præstare ista quoque pos-
sunt & *Logica*, & *Ontologia*, & Disciplinæ
aliæ. Itaque & copulari cum *Physica* utiliter
Mathesis potest, & jungi quinimmo cum eadem
debet, ut peculiæres ac proprias utilitates &
commoda humanæ societati adferat. Quo spe-
ctat veracissimum Genuensis illud ad calcem
Inst. *Logicæ*: *In sola pura, & contemplatrice*
(*Matheli*) *immori, hominis videri potest pa-*
rum humana curantis. Nisi ut in Ordinibus
monasticis, ita in Disciplinis alios *contem-*
plativos tantum, alios & simul *activos* dicere
velimus. Quæ divisio si ibi laudabilis & san-
cta;


ita ; heic contra damnabilis prorsus , ac devitanda :

§. LXXVII. Quamquam vero Mathesim conjungendam esse ajo cum Disciplinis physicis ; idque & utile , & necessarium fore contendo ; *modum* tamen , sine quo nihil rectum , nihil ordinatum , nihil laudabile umquam fuerit , exopto . Mathesis naturalium Disciplinarum fax est : ergo in tenebris adhibenda . Ne alioquin quum & ipsa satis per se difficilis ac sublimis scientia sit ; ubi in perspicuis , ac per se notis adhibetur , involvantur ea potius , & obtenebrentur . Equidem ubi incedere via regia possumus , quid per ambages , incertosque cuniculos implicamur ? Quid *egyptiacis hieroglyphicis* , & *characteribus* pene *arabicis* utimur , ubi lingua patria semet intelligibilis est , elegans , perspicua , disertissima ? Quid interpretes naturæ agimus , ubi naturæ vox non eget interprete ?

§. LXXVIII. Quæ quum ita sint , haud spernenda tot virorum doctorum judicia sunt , qui de eo Matheos abusu tantopere conquerruntur . Experimento enim discimus , haud levia incommoda quum Physicæ , tum illius cultoribus , ac humanæ præterea societati ea de causa obvenire . Ac Physicæ quidem , quum tot *algebraicis formulis* de industria quælitis , ac geometricis demonstrationibus ubique luxuriando , otitandoque , *idealis* magna ex parte ea redditur , *hypothetica* , *possibilium* . Qua de re satis dictum supra (§. 29. seq.) . Tironibus etiam is abusus maxime noxius est ; quippe qui tot inextric

tricabilium calculorum algebricorum frequentia non minus, quam difficultate perterriti, a Physicæ studio sæpissime avocantur. Quod quantum humanæ societati detrimenti adferat, nemo ignorat. Utamur ergo *algebraicis formulis*, utamur *calculis*, ubi hi clariores phenomenis fuerint: abstineamus vero, ubi phænomena sunt illis clariora. Ac siquam ea in re generalem adhibendi illas, omittendique *normam* fingere, determinareque velimus (velle autem omnino debemus); sit ea solius *necessitatis*, *majorisque utilitatis*. In ceteris otia putanda, ac tenebrarum damnabilis lumini effusio. Sed *de arte inquirendi veritates physicas per sensuum experientiam*, deque integro Libro II. ista satis.





A R T I S

INQUIRENDÆ VERITATIS

L I B E R III.

*De arte inquirendi veritatis metaphysicas
per mentis rationem .*

§. I. **A**B arte inquirendi veritates *physicas* per *sensuum experientiam*, de qua precedenti Libro II. ad artem devolvimur inquirendi veritates *metaphysicas per mentis rationem*, de qua hoc Libro III. Ubi tirones nostros sub initium monitos opportune volumus, ut, quoniam de rebus paullo sublimioribus & abstractis heic agendum nobis erit, omnes ingenii conatus generosius intendant ad eas nondum intelligendas & assequandas, sed ad familiares quoque, quoad fieri potest, facillimasque sibi reddendas: rati insuper, nobiliora ac præstan-

stantiora, quæ inde obventura illis erunt bona, nullo umquam esse quolibet cum labore comparanda. Ad rem igitur.

C A P U T I.

*De humana ratione, ejusque præstantia,
ac muneribus variis.*

§. II. **Q**uidnam sit *vis mentis intelligens*, quæ ejus variæ dotes, & quemadmodum satis idonea ad verum per-
vestigandum & adsequendum; dictum Libro priore (§. 98. seq.): quæ heic recolenda. Sunt, qui eam vim *intellectum* adpellandam censent, quum in sola rerum idearumque contemplatione versatur: tum *rationem*, quum rerum ideas, ac inde subnascentia judicia, ac ratio-
cinia sic multifariam inter se confert, ut ex iis, quæ cognita sunt, alia nondum nota legitima illatione deducat. *Ratio* quippe perinde ac *vis calculatrix*, & *collatrix* est; quemadmodum ibidem adnotatum.

§. III. *Ratio* summum illud, & inextimabile donum est, quo per naturam & essentiam a mulo & equo secernimur, in quibus non est *intellectus*, Ratione nihil est in homine præstantius: quippe qua homines sumus totum id, quod sumus. Est præfulgens ille *divini vultus radius* super nos obsignatus, quo nedum nostri,
re-

rerumque extra nos positarum conscii sumus ; sed ex earum quoque ordine , pulcritudine , & harmonia in Dei , entis summi , ac omnium parentis amantissimi intelligentiam elevamur . Præstare quidem sensibus quibusdam delicatioribus , & acutioribus nonnulla nos animalia possunt , juxta Martialis illud :

*Nos aper auditu , lynx visu , simia gustu ,
Vultur odoratu , præcedit aranea tactu .*

Verum ingenti ab illis sejungimur semper inextimabilis *rationis* divortio . Multifor-
mum genere munita illa quidem , & instructa esse possunt . Ast homo solo *rationis* præsidio , sagacitate , & calliditate ea omnia nedum eludere potest , eluditque reipsa ; quin & in proprium famulatum & commodum edomando ea adducit , subjicitque ; eorumque dominum , arbitrum , ac moderatorem se constituit .

§.IV. Neque hæ solum eximiæ humanæ *rationis* dotes , nobilitas , atque præstantia . Ipsi quippe Disciplinarum omnium ortus , progressus , incrementa , & omnia adscribenda . Per eam inventæ primum artes , tum excultæ paullatim , tandemque perpolitæ . Ejus lumine latæ leges , extructæ civitates , inducta imperia , perpoliti mores . Est *ratio* amplissimus fons , ac perennis scatēbra bonorum omnium , sive a natura inductorum , sive adscitorum arte , quibus bruta animalia defectu *rationis* destituuntur . Nam hæc quia solo *instinctu* ducuntur , nec prætergredi cogitando sensibilia possunt ; ad eundem agendi modum perpetuo determinantur ab ortu ad mortem

mortem usque. Ad quæ nimirum vix in lucem edita bruta eorum natura extimulat, ea semper agunt ad interitum; nec quidpiam permutare usquam norunt, nec nova sibi commoda parare.

§. V. Quum autem bonorum heic meminerimus vi *rationis* a natura nobis inductorum, horum præcipuum ipsa *arbitrii libertas* est, qua propria sponte, nec ulla compellente vi *interna* aut *externa*, agere possumus & omittere, hoc potius vel alio modo agere. Nam ea voluntaris ad agendum potius quam non agendum *libera determinatio* spectanda velut confectarium antecedentis *consultationis*, & *examinis* ipsius *rationis*; sit nimirum actio legi conformis, & ideo *moraliter bona*, proindeque facienda; an difformis, & *prava*, eaque de causa omittenda. Quæ adeo vera sunt, ut actiones omnes, quæ hanc *rationis consultationem* anteverunt, motibus *pure machinariis*, & extemporanee erumpentibus merito accenseantur; nec ulli imputationi propterea subsint sive ad præmia, sive ad pœnam. Qua de re Ethici.

§. VI. Jam dividunt *rationem* in *rectam* sive *puram*, & *erroneam* sive *depravatam*. *Recta* sive *pura* est, quum inter ratiocinandum & veris indubiisque utitur *principiis*; & *rectam*, accuratamque horum adhibet *applicacionem*; ac legitima tandem inde deducit *consequaria*. Est autem *erronea* sive *depravata*, si aut *principia* fuerint falsa, aut non *recta applicatio*, aut præposteræ nec legitimæ *illationes*. Ad *rectam* spectat exemplum istuc: *Enti summo*

summa summa debetur religio (quod est principium). *Deus est ens summum* (quæ est applicatio). *Deo igitur summa religio debetur* (quæ conclusio). Ad erroneam vi principii falsi hoc aliud : *Qui majori vi pollet , majus habet jus . Divites pollent vi majori . Majus ergo jus habent .* Item & hoc aliud ob pravam adplicationem : *Natura inæqualibus inæqualia competunt jura naturæ . Sunt autem homines natura inæquales . Hominibus igitur inæqualia naturæ jura competunt . Tandem & hoc aliud propter illegitimam conclusionem : Nimia disciplinarum studia valetudini obsunt . Abjicienda igitur studia disciplinarum , ne valetudini noceant . Legitima quippe illatio est hæc alia . Moderanda igitur studia , modusque illis imponendus , ne valetudini noceant .*

§. VII. Quum recta ratio in homine dominatur , cuncta illi prospere contingunt , recte , ordinate . Nam sive de rebus judicia profert ; & errorum dehonestamenta cautus devitat . Sive agere quidquam , aut omittere decernit ; & actiones omnes , aut omissiones ad justitiæ , pietatis , ac sobrietatis præscriptum perpetuo componit . Contra si ea fuerit depravata . Nihil erit in judiciis veri , nihil in actionibus , & omissionibus boni , & honesti . Judicia namque ferimus , itemque agimus , ac omittimus , quemadmodum cogitamus : ideoque recte honesteque , si ratio recta ; turpiter contra ac præpostere , si depravata . Hinc intelligent rationes , quantum necesse sit disciplinarum stu-

diis *rationem* colere, augere, perpolire, perficere, ut & recta de rebus judicia feramus; & mores, vivendique normam ad *pietatis*, ac *justitiae* leges componamus. Præcipue vero vitanda nimia in judicando proclivitas, sive *mentis præcipitatio*; tum *partium studium* refrænandum; ac compescendi denique *affectus*; ne immoderato, uti fit, æstu tetra eam caligine obnubilent. Quibus ex fontibus, impurisque lacunis major errorum, vitiorumque pars oboritur (Lib. I. §. 31. 37. 38.), ac ratio ipsa plusquam alias depravatur.

§. VIII. Quemadmodum in inquisitione veritatum *physicarum* externos sensus nunc nudos adhibemus, nunc armatos: nunc observando illis utimur, nunc experiundo; nunc demum uno, nunc alio modo rebus sensibilibus aptamus; de quibus late superiori Libro II. ita & multiplex est *rationis* artificium in investigatione veritatum *metaphysicarum* & *abstractarum*. Et quemadmodum multiplex ille sensuum usus eo tandem spectat, ut *physicas* veritates nobis ob oculos ponat; ita & de multiplici rationis artificio differendum quoad *metaphysicas*. Horum præcipua sunt, *ratiocinia pura*, tum *analytica*, inde *synthetica*, postea *analogica*, *antylógica*, & ita porro: de quibus mox seorsum, & ex instituto, Omnium autem vis & efficacia in ea sita est, ut ex *veris principiis*, & *adplicatione recta*, *legitima consuetudine*, tamquam effectus a sua causa deducantur. Quæ munia sunt *rationis rectæ* (§. 6.); quippe

quippe quæ sola vero quum perquirendo, tum adsequendo idonea est. Nam *erronea* ac depravata cuncta perturbat, errorum sordibus intellectum deformando, ac depravando voluntatem foeditate vitiorum.

§. IX. Humana igitur *ratio*, eaque *pura* ac *recta*, par redditur *metaphysicis* veritatibus pervestigandis, & adsequendis multiplici ratiociniorum usu, eoque intelligibili & abstracto. Quum autem prima, ac remotiora ratiociniorum semina sint *ideæ*, tum velut proximiora membra *enunciationes* sive *judicia*, quæ ex ideis componuntur; hinc ordo postulat, ut de ideis primum, inde de judiciis sermo instituat, priusquam de ratiocinorum constructione, usuque vario differamus. Id autem triplici capite expedire curabimus, quæ velut totidem *excursus* spectanda; *necessarii* tamen, & qui præteriri nullatenus poterant ad eorundem ratiociniorum naturam, internamque constitutionem evolvendam & explanandam. Quare sit.

C A P U T II.

De ideis, primordialibus ratiociniorum elementis, earumque objectis, ac signis.

§. X. **S**unt *ideæ* respectu disciplinarum, quod personæ respectu civitatum. Nam ut ex personis fiunt familiæ, & ex familiis com-

muni jure, legibus, ac imperio utentibus civitates oriuntur; ita ex ideis efformantur judicia, ex judiciis ratiocinia, atque ex ratiociniis longa serie, aptoque ordine inter se dispositis scientiæ componuntur. Adeo ut quemadmodum personæ spectari commode possunt tamquam rerump. semina, & elementa prima; ita & ideæ velut prima elementa, ac semina disciplinarum. Itaque de ideis heic differentes primum earum naturam, tum genera varia, usus, objecta, ac denique signa evolvenda proponimus.

§. XI. Nuda rei contemplatio sine ulla affirmatione, & negatione, *simplex rei perceptio* adpellatur in scholis. Si primos infantilis ætatis dies fortasse excipias, vix crediderim, ullam esse *simplicem perceptionem*. Adeo nempe ad judicia ferenda vera aut falsa, bona aut prava, universalialia aut peculiaria, absoluta aut hypothetica, distincta aut confusa, & ita porro, quum quidpiam nobis obversatur, ab ingenio pertrahimur atque natura. Interim varias ea sortitur adpellationes pro objectorum, ac circumstantiarum varietate. Hinc dicitur 1. *sensatio*, si ejus objectum corporeum fuerit, ac sensibus externis præsens: 2. vocatur *imaginatio*, si aut corporeum fuerit quidem, sed absens; aut incorporeum, verum sub corporea imagine conceptum: 3. *intellectio*, sive *intelligentia*, quum & incorporeum erit illud, & sub incorporea imagine cognitum: 4. *Conscientia*, sive *reflexio*, quum alia interna fuerit mentis actio, aut ejusdem passio: 5. demum *reminiscentia* nuncupatur, quum

quum ejus objectum res fuerit antea visa, modoque recognita. De *intellectione pura* dubitaverim quoque, ulla ne in nobis sit in hoc conjunctionis statu. Propterea quod vis imaginatrix serpere adeo soleat per omnes animi actiones, ut vel ipsas simplices & incorporeas substantias sistere nobis soleat tamquam corporeas, & sub imaginibus corporeis. Ut adeo in ferendis de iis judiciis caute admodum sit procedendum; ac spectanda solum *ratio recta ac pura*, non *phantasia* sive *imaginatio*. Alioquin corporeos, humanisque membris instructos putabimus e. g. Deum, Angelos, mentesque humanas turpi phanatismo.

§. XII. Quod menti percipienti fit præsens, *idea* dicitur, quasi rei *effigies*, *simulacrum*, *imago*. Nam non res ipsas extra nos positas, sed earum imagines a mente percipi, ostendunt observationes *optica*, in primis lentium polyedricarum, quibus unum idemque objectum multiplicatum videmus pro numero facierum. Ceterum somnia, specula, plura id genus alia tironibus exemplo esse possunt ad idearum naturam clare intelligendam, & a rebus ipsis, quarum sunt imagines, secernendam.

§. XIII. De idearum generibus post Arnaldum copiosissime egere primi etiam subsellii Scriptores logici, ut olim de *terminis*, quibus illæ substitutæ, scholæ Philosophi. Displicet autem summopere, quod ii, qui *modum* ubique inculcant, *modi* nihilominus tam facile obliviscantur, atque in extrema, in quibus defectus ac vi-

tia cubant, oscitanter excurrant. Nos itaque juvenibus evolvendas tantum ducimus, 1. ideas veras ac falsas: 2. claras & obscuras: 3. singulares & universales: 4. absolutas ac relativas; 5. abstractas & concretas: 6. demum simplices, compositas, & adsociatas; tamquam scitu utiliores, atque ad judiciorum, ac rationum doctrinam facilius adsequendam idoneas.

§. XIV. Ideam esse *veram*, quæ objecto suo conformis est; contra *falsam*, quæ eidem difformis, dictum Libro priore (§. 15.); ubi ideas *falsas* tot falsorum esse judiciorum causas, licet *occasionales*, pariter & adnotatum (§. 19.). Quare heic dumtaxat addendum, ut summo studio curent tirones *falsas* rerum ideas prorsus abjicere, adoptareque *veras*: ac illas, de quarum cum objectis uniformitate non satis constat, diligentî examini submittere; nec adhibere umquam illas in judiciis ferendis, quousque ea uniformitas dubia fuerit, aut non satis cognita & explorata. Ea salubris errores quoslibet, ex *falsis ideis* promanantes, deviandi ars; istuc medium par ad id ubique, & ideoneum.

§. XV. *Clara* mihi est idea, quæ rem a ceteris secernit: ut idea lunæ. *Obscura* vicissim, quæ minime secernit ab aliis; ut apud imperitum vulgus idea saturni, cui a ceteris syderibus secernendo impar est & insufficiens. Cui autem rem, cujus est idea, *clara* secernit, non secernit *obscura*? Scilicet totum id ex *notis* rerum *characteristicis* repetendum. Nam &

nu-

numero, & qualitate tot rei *notas characteri-
sticas* idea *clara* menti exhibet, quot illi a
ceteris secernendæ sufficiunt. Eas autem non
exhibet *obscura*. Ex quibus intelligimus, cla-
ritatem idearum suos habere gradus pro nume-
ro *notarum*, quæ rebus insunt, aut inesse pos-
sunt. Adeo ut si quæ idea nedum *notas* omnes,
sed & *notas* quoque *notarum*, quæ rei insunt,
menti repræsentaverit, ea erit *clarissima*, *eui-
dentissima*. Si hanc ideam alicui *adequatam*,
comprehensivam, aut etiam *distinctam* adpellare
placuerit, non repugnabo. Sed erit ea vocabu-
lorum diversitas, non idearum. Interim quum
ideæ *claræ* semper *veræ* sint, ac velut verorum
judiciorum, & ratiociniorum semina; hinc
summo studio tironibus enitendum, ut *claris*
rerum ideis mentem imbuant, ac in dies con-
tinuoque adaugeant. Quod fit in primis res
seorsum; ac diligenter examinando: tum vi-
tando *precipitationem mentis*: inde cum aliis
perspicue cognitis illas conferendo: ac tandem
viros doctos assidue colendo, atque consulendo,
eorumque Opera seria meditatione perlustrando.
Hæc siquidem idonea, maximeque aptata ideas
claras adsequendi media.

§. XVI. Rursus *singularis* idea dicitur, quæ
rem unam; *universalis*, quæ plures simul
repræsentat. Prioris generis est idea solis: po-
sterioris idea trianguli; quæ triangulis omnibus
repræsentandis idonea est. Quum autem res
omnes existentes singulatas sint & individue;
quinam erit *universalium* idearum ortus, &

origo ? Nempe repræsentatio *notarum similium*, quæ rebus insunt, quas simul repræsentant. Hinc *universalem* diximus ideam trianguli; quia tres angulos, totidemque latera generatim menti exhibet, quibus in *notis* triangula omnia sunt similia. *Universalium* idearum usus haud exiguus est in ratiociniis, quæ sine universalibus judiciis, & ideo sine ideis universalibus constare non possunt. Quo autem artificio ex rebus singularibus ideæ eruantur universales, dicam inferius in Capite de *Analogia*.

§. XVII. Ad hæc quæ idea se sola concipitur, *absoluta*; quæ autem concipi nequit, nisi ex relatione ad aliam, *relativa* adpellatur. *Absoluta* est idea circuli: *relativa* idea causæ, quæ ad effectum refertur. Porro magna idearum pars *relativa* est: ut adeo priusquam de iis judicia ferantur, spectanda sint & loca, & tempora, & status, & temperamenta, & mores, & sexcenta huiusmodi. Hinc quum Erasmus, ut ut mordacissimus, *sanctum* fere adpellat Socratem verbis illis: *Parum abest, ut dicam: sancte Socrates ora pro me*; accipienda ea laus ratione habita ad alios gentiles, non ad christianos. Nam & mulierosum illum fuisse scimus; & galli oblatione illa *Æsculapio* facta idololatram, ac superstitiosum.

§. XVIII. Præterea *abstractas* dicimus ideas, quæ *notas* tantum velut a suis subjectis avulsas exhibent; ut idea probitatis: *concretas* vicissim, quæ *notas* una cum suis subjectis repræsentant; ut idea viri probi. *Abstractarum* idea-

rum

ram immensus pene usus in scientiis universis, ac in ipsamet vita civili. Quum enim ob intellectus imbecillitatem plura simul cogitare nequeamus; præstat *abstractione* uti, sejungere ea nimirum a se mutuo, ac seorsum, prout ordo postulat, pertractare. Equidem verbosi, ac scioli, itemque molesti hominis est, plura simul ac diversa conglobare: tum saltitare huc illucque: ac tandem involuta omnia, & indigesta relinquere. Spectandus igitur *abstractionis* usus velut salutare remedium adversus confusionem, & obscuritatem.

§. XIX. Tandem sunt ideæ *simplices*, quæ in alias resolvi nequeunt; ut ideæ primitivorum colorum: *compositæ*, quæ in alias possunt resolvi; ut ideæ arborum, ramos, flores, folia, fructus complectentium. *Adsociatæ*, quæ quum simul a nobis cognitæ fuerint, simul etiam *attractione* quadam excitantur: ut quum aliquem dato in loco, datisque in circumstantiis vidissemus; ubi illum denuo conspiciamus, loci ejusdem, earumdemque circumstantiarum, ideæ simul recurrunt, simulque excitantur. Porro ideæ *simplices* ob plurium *notarum* carentiam evolvi nulla ratione possunt. Contra *adsociatæ*, atque *compositæ*. Illud etiam *adsociatæ* ideæ habent commodi, ut memoriæ imbecillitatem mirifice adjuvent, quum earum operum alias cognitarum reminisci volumus. Quare satagant tirones, ut ea potissimum, quorum prompta recordatio urget, plurium circumstantiarum ideis adsocient. Ita namque
alte.

alterutra quavis earum excitata, & ceteræ attractione quadam facillime excitantur.

§. XX. Hæc de *ideis*. Addamus nunc aliqua de earum *objectis*. Idearum objecta res ipsæ sunt, quæ per ideas repræsentantur. Sunt eæ vero generatim vel *substantiæ*, vel substantiarum *notæ*. Substantiæ sunt entia per se existentia, sive *notarum* omnium veluti fulcra, atque subjecta prima: *Notæ* sunt proprietates, quæ substantiis insunt tamquam subjectis, sine quibus existere non possunt; quæque illas, ut hæc potius, quam res aliæ sint, determinant, atque secerant. In corporibus elementa prima, ex quorum simultanea conjunctione ea coalescunt, *substantiæ* sunt: Tum soliditas e.g. extensio, gravitas, inertia, proprietates ceteræ, *notæ* adpellantur.

§. XXI. Sunt autem *notæ* vel *substantiales* & *intrinsecæ*, vel *extrinsecæ* ac *modales*. Illæ ad substantiarum naturam spectant; ut soliditas, extensio, similes: hæc ad existentiam; ut figura, situs, motus, relationes, aliæ. *Substantiales* & *intrinsecæ* in *constantes*, ac *variabiles* iterum dividuntur: quarum priores a substantiis inseparabiles sunt; ut eadem extensio, ac soliditas in corporibus; posteriores vero continuo permutantur; ut colores, sapes, odores, qualitates innumeræ. Sed & *constantes* alteri etiam divisioni subsunt, in *communes* sive *genericas*, & *peculiares* sive *specificas*. Priores sunt, in quibus res diversarum specierum simul conveniunt; ut *figura* nota in triangulis, quadrilateris,

lateris, circulis, polygonis. Posteriores, per quas diversarum specierum res discriminantur; ut *sphæricitas*, per quam circuli discriminantur a figuris ceteris specie diversis. Hæ vocabulo satis idoneo dicuntur etiam *notæ characteristicæ*, in quibus rerum *indicia*; *verique criteria* sita ostendimus Libro priore (§. 118. seqq.)

§. XXII. Quum plures *notarum* divisiones attulerimus, est ne aliqua & *substantiarum*? Est proculdubio. Ac in primis dividi substantiæ possunt *infinite* & *infinite*: quarum illæ sunt creaturæ omnes ex nihilo conditæ, ac limitibus circumscriptæ: hæc solus Deus, scilicet *ens summum*; *ens magnum*, atque uti Tertuliano emphatice de more dictum, *sumum magnum*; cui & infinite perfectiones insunt, & unaquæque earum est pariter infinita; ideoque *ens*, quemadmodum Metaphysici loquuntur, quum *extensive*, tum *intensive* infinitum. Deinde *finite* substantiæ dividi quoque possunt in innumerabiles species alias juxta numerum, & qualitatem *notarum characteristicarum*, a quibus & constitui illæ intrinsecus, & ab aliis discriminari possunt. Nam ea substantiarum *finite* divisio, ut alie *spirituales* sint, alie *corporeæ*, precatia omnino est; nec ulli innixa rationi. Mihi enim contra, planeque persuasum est, Deum omnipotentia, ac omniscientia sua infinita substantiarum genera creare posse, quæ numero ac varietate *notarum characteristicarum* quoad naturam & essentiam sint inter
se

se diversa. Hinc nec veraces, nec ea in re scitis acuti mihi videntur, qui brutorum animas aut corporeas esse debere contendunt, aut ita spirituales, ut mentibus humanis sint omnino similes. Quasi quod eæ a vi sentiendi, ac sponte agendi, cum memoria, & affectibus determinatæ, non aliud substantiæ genus constituent a corporibus, mentibusque humanis natura & essentia distinctum, atque diversum! Sed in quæ errorum portenta ruere nos non cogit præjudicata semel opinio, ac diligentioris rerum examinis neglectus, meditationisque profundioris, ac pacatoris! . . .

§. XXIII. Quum substantiæ ipsæ per sese nobis inconspiciunt, quia interna *notarum fulcra* prima (§. 20.); unica earum naturam scrutandi via erit illa *notarum*, per quas determinantur. Ita ex *cogitandi*, ac *libere agendi* vi mentes humanas incorporeas esse novimus. Ex pondere, colore, ductilitate, aurum. Ex ramis, foliis, floribusque, ac fructibus arbores: & ita porro. Ut adeo intelligant tirones, quantum præstet in *notarum* studio sedulo, serioque versari. Ne autem ea substantiarum, notarumque cognitio vana sit, & scrutandi labor inutilis; earum *usus* pro hominum utilitate & comodo diligenter investigandi. Nam quod sæpe dictum, ac millies pro opportunitate repetendum, Philosophum sic animo semper constitutum volo, ut oculorum alterum in scientiarum studia, alterum in societatis emolumenta fixum, intentumque detineat. Id enim *philoso-*

lofophari est, cetera *in arundine longa equitare*.

§. XXIV. Hæc alia de *idearum objectis*. Superest, ut pauca de earum *signis* subjiciamus. Longa enim ea de re commentatio Rethorum potius, atque Grammaticorum est, quam Philosophorum. Sunt igitur *idearum signa* ipsamet vocabula, quibus eas invicem communicamus. Ac *signa* quidem non a natura tributa, sed ex hominum arbitrio, pactisque conventis inducta. Hinc tot idiomatum genera, quot nationes variæ per orbem longe lateque diffusæ. Utinam vero, fugatis nationibus barbaris, adlaboratum per universam Italiam ab Academiis fuisset in pristino, puroque *latino idiomate* restituendo! Quale nunc ipsius decus foret! quale præstantissimum ornamentum! ut scilicet europeæ nationes omnes, sicut olim legibus & imperio ita nunc in Disciplinarum studiis latinæ linguæ usu essent Itali, italique saperent! Et quia ad id tunc minime fortasse cogitatum, curæque omnes in nova inducenda, ac perpolienda itala lingua impensæ: utinam nunc saltem Italarum curæ in id essent intentæ, ut in scholis sua domicilia immobiliter retineret, ac iis præsertim in disciplinis, quæ magnis ingeniis, præcipue theologicis reservatæ videntur! Nam dilacerari nimium mihi ad præcordia sentio, dum ut gallicum illi idioma substituatur, prorsus exulandam proclamant. Sed quæ comparatio lucis ad tenebras? quæ paleæ ad triticum? plumbique ad aurum? Quæ exemplaris, inquam, spurii, maximeque

neque corrupti ad authographum genuinum;
& incorruptum? . . . Vide ea de re dicta Li-
bro priore (§. 57. not.).

§. XXV. In vocabulorum usum duo tironi-
bus adnotanda . Primum , quemadmodum ex
Scriptorum mente interpretari illa oporteat ,
quum in eorum libris paullo obscuriora , ac
perplexiora occurrunt ; ne tales illis opiniones
affigant , quales numquam fortasse somniave-
runt . Alterum , quomodo eisdem vocibus uten-
dum sit , quum animi nostri sensa aliis commu-
nicamus . Quorum illud in loca rejicimus op-
portuniora , ubi de *arte hermeneutica* , Hoc ve-
ro quod spectat , germanus rectusque erit vo-
cabulorum usus , si 1. sensu in ea disciplina ab
omnibus recepto adhibeatur , Si 2. non im-
mutentur pro arbitrio novandique prurigine ,
sed sola urgente necessitate . Si 3. substituân-
tur pro opportunitate clariora , & elegantiora .
Si 4. obscura fortassis , aut ambigua adhiben-
do , per accuratas definitiones fuerint ea prius enu-
cleata . Si 5. in dicendo brevitatis simul , con-
cinnitas , atque energia servetur , sine qua cum
auditorum , lectorumque tædio , ac veritatis
ipsius detrimento omnia languescunt . Hæc in
vocabulorum usu non omittenda , si quidem
intelligi , ac prodesse aliis volumus . Velle au-
tem debemus ; alioquin *si patere animi sensa*
loquendo , aut scribendo *nolumus* ; præterquam-
quod turpiter otiamur ; *tacere* melius , quemad-
modum lepidus Poeta ille agebat , prudentiusque
possimus . Sed de *ideis* , *idearumque objectis* , ac
signis ista satis.

C A P U T III.

*De Judiciis , proximioribus
ratiociniorum membris.*

§. XXVI. **D**E judiciis , proximioribus ratio-
ciniorum membris , hæc tiro-
nes latere non debent ; 1. eorum natura , 2. ge-
nera , 3. usus , 4. objecta , 5. demum ea fe-
rendi præcautiones : de quorum duobus postre-
mis quum alibi dictum , ac præcipue Libro
I. cap. 4. & 12. nihil heic addendum superest.

§. XXVII. Judiciorum natura in conjunctio-
ne sita est duarum idearum , vel a se invicem
disjunctione ; quorum primum *adfirmativa* , al-
terum *judicia constituit negativa* . Ut : *rei sunt*
plectendi ; innocentes non sunt puniendi . Hinc
non satis placet , quod hodie traditur a quibus-
dam Logicis , *judicium nempe esse duarum*
idearum comparisonem , *Collatio* enim præcede-
re quidem debet , ne copulemus ideas alioquin
sejungendas , aut ne copulandas sejungamus .
Verum non est ea *judicium ipsum* ; quod
tunc fit , quum conjunctio per adfirmatio-
nem , ac disjunctio per negationem in ideis
invicem *comparatis* subsequitur . Frustra etiam
præciperemus , in rebus dubiis & obscuris su-
spendenda esse *judicia* , quoties post maturum
examen , idest post *adcuratam comparisonem* ,
nondum

enunciationem esse falsam : *Mens humana est substantia corporea* ; quia ejus *vis agendi libere* pugnat cum *vi inertiae* corporum ; ac una eademque res constare nequit ex iis , quæ se se mutuo destruunt . Tutissima ea est , inquam , vera a falsis judiciis secernendi methodus . Verum multa sæpe ad id opus est *experientia* , *meditatione* , *critica*

§. XXX. Si nunc duo invicem judicia conferamus , vel *equipollentia* erunt illa , vel *opposita* . Ac si opposita , vel ita inter se pugnantia , ut omne medium excludant , vel aliquod admittant . Prior oppositio dicitur *contradictoria* : ut *virtus est laudabilis* : *virtus non est laudabilis* . Posterior *contraria* : ut *figura est trilatera* : *figura est quadrilatera* . Nam etsi utrumque simul esse nequeat ; potest nihilominus esse aliud ab utroque diversum , puta *sphærica* , *elliptica* , *pentagona* , *exagona* . Sed cuinam *usui* ista ? Nempe ut noscant primo tirones , in propositionibus *contradictoriis* alterutra rejecta necessario admittendam esse aliam ; & vicissim . Ea enim vis contradictionis , ut *idem* nequeat esse simul , & *non esse* . Tum non esse id necessarium in *contrariis* , quæ ambæ rejici possunt , ac tertia substitui . Ceterum ut oppositioni locus sit , nedum necessaria est identitas subjecti , sed & temporis etiam , & circumstantiarum ceterarum . Alioquin nulla erit oppositio . Quo spectat commune Logicorum effatum : *Oppositio esse debet de eodem subjecto , respectu ejusdem temporis , atque juxta eandem*

notam considerato. Quæ vera.

§. XXXI. Sunt apud Logicos ut idearum (§. 13.), ita & enunciationum genera plura, quarum magna pars aut semet, aut ex solis *Lexicis* nota, nec Philosophorum commentariis egena. Quare heic *modus* quoque adhibendus, & delectus pro ratiociniorum constructione tantum, & intelligentia. Partiemur itaque illas 1. in *necessarias* & *contingentes*: 2. in *simplices* & *compositas*: 3. in *particulares* & *universales*: 4. in *certas*, *probabiles*, ac *dubias*. De quibus seorsum, & paucis.

§. XXXII. Principio *necessaria* dicitur propositio, cujus attributum necessario & inseparabiliter inest subjecto: ut *circuli radii sunt omnes inter se æquales*. *Contingens* vero, cujus prædicatum non inest subjecto nisi fortuito: ut *arbor est fructibus onusta*. Usus enunciationum *necessariarum* magnus est, itemque securior in *analogia*, de qua infra. Item & in ratiociniis *demonstrativis*, sicut *contingentium* usus in *probabilibus*. Interim advertant heic, velim, studiosi tirones, attributa propositionum *necessariarum* esse ex genere *notarum constantium* & *invariabilium*: *contingentium* vero ex *notis variabilibus* & *inconstantibus*, sive *fortuitis* (§. 21.).

§. XXXIII. Deinde *simplex* est propositio, quæ in alias resolvi nequit; ut *vir justus neminem lædit*. *Composita*, quæ in alias resolvi potest: eaque vel *conditionalis* est, vel *copulativa*, vel *disjunctiva*. *Conditionalis* enunciationis partes nectuntur particulis conditionalibus *si*, *quoties*,

ties, dummodo: ut si universum est ens contingens, est etiam ex nihilo conditum. Copulativæ membra junguntur particulis copulativis &, atque: ut nemo esse potest bonus civis, & privatam utilitatem publicæ anteferre. Disjunctivæ demum particulis disjunctivis sive, aut, vel: ut homo vel rebus utilibus vacat, vel otatur. Omnium maximus usus est in ratiociniis compositis, de quibus paullo post. Ceterum ut conditionalis propositio vera sit, necesse est, ut illius consequens, pars scilicet quæ subsequitur, ex antecedente, ex parte nimirum, quæ præcedit, necessario fluat. Item ut veræ sint copulativa, & disjunctiva, oportet, ut earum partes sint adeo inter se oppositæ, ut medium omne excludant. Alioquin falsæ erunt omnes, & ineptæ; cujusmodi sunt sequentes: si fontes punientur, nulla erunt in posterum crimina: item nequit quis esse justus, & commercia agitare: tandem princeps aut probos cives fovet, aut vexat. Quæ defectu oppositionis partium, quæ medium omne haudquaquam excludunt, singulæ falsæ & ineptæ.

§. XXXIV. Rursus enunciatio, quæ de rebus omnibus ejusdem generis, aut speciei fertur, dicitur *universalis*: quæ de aliquibus tantum, *particularis* adpellatur. Prioris exemplum esto: *omnes legum contemptores sunt Deo odibiles*. Posterioris: *quidam juvenes disciplinarum studiis serio incumbunt*. Quo in loco diligenter adnotandum, propositiones *necessarias*, de quibus nuper (§. 32.), ob indivisam attributi cum subiecto

cohesionem esse semper *universales* : *contingentes* vicissim ob fortuitam eorundem conjunctionem esse semper *particulares* ; quamquam universales etiam *particulæ omnis* , *nullus* in iis adhibeantur : Ut Davidis emphatica illa : *Omnis homo mendax* , quæ æquivalet huic particulari : *major hominum pars mendax est* . Porro de arte rite construendi propositiones *universales* dicam in capite de *analogia* . Paulo etiam inferius experimento discent tirones absolutam necessitatem propositionum *universalium* in ratiociniis rite construendis .

§. XXXV. Tandem expendendæ supersunt enunciationes *certainæ* , *probabiles* , *dubie* postremo loco propositæ (§. 31.) . Sed de *certis* satis dictum Libro priore (§. 112. seqq.) . *Probabilis* autem ac *verosimilis* enuntiatio dicitur , quæ veritati magis quam falsitati eccedit : contra *improbabilis* & *inverosimilis* , quæ falsitati propius accedit quam veritati . Major vero accessus hujusmodi veritati quam falsitati in *probabilibus* enunciationibus ex majori faventium , ac minori contrariorum argumentorum pondere petenda est : contra vero major accessus falsitati in *improbabilibus* . Ex quibus intelligimus 1. quum *probalitatem* , tum *improbabilitatem* suos habere gradus ; ac illam quidem augeri tam aucta faventium argumentorum vi , quam contrariorum imminuta ; vicissim vero hanc aliam . Tum 2. collatis inter se duabus *probabilibus* enunciationibus illam esse alia *probabilioram* , cujus aut faventium rationum vis major

jor fuerit, aut minor contrariorum. Inde & 3. duarum enunciationum probabilitates esse inter se in ratione *directa* virium argumentorum faventium, & *inversa* oppositorum. Mitto *algebraicas formulas*, ne de industria otiosi videar in re semet manifesta. Quo autem ex fonte, *rationis* ne an *auctoritatis humane*, probabilitas oriatur, dicam Libro postremo.

§. XXXVI. Illud etiam haud latere volo tirones, probabilitatem per disciplinas omnes longe adeo lateque fundi ac propagari, ut, si solam *Mathesim puram*, *Ontologiam*, *Theologiam naturalem*, ac *naturalem Jurisprudentiam* excipias, ceterarum magna pars *mere probabilis* videatur. Cujus potissima ratio quum in intellectus imbecillitate sita est, tum in nimia caligine & obscuritate rerum ipsarum; præcipue vero in occultis divinæ providentiæ consiliis; ut ediscamus, longe plura illius potentiam ac sapientiam efficere posse, quam nos possimus intelligere; ac ita humiles & obsequentissimi in ejus cultu ac veneratione maneamus. Qua de re postea. Hæc interim non eo ceteroquin consilio dicta volo, ut ab earum studio juvenes ipsi avocentur; sed ut majori ac diligentiori illud conatu, atque nova in dies detegendi spe generosius, avidiusque adgrediantur, ac persequantur.

§. XXXVII. *Dubia* tandem vocatur propositio, quæ a vero æque ac falso recedit. Quod quum duplici ex causa oriri possit, vel quia tam faventium scilicet, quam oppositorum argumeto-

rum vires sunt æquales, & ideo sese mutuo destrunt, ut 8 — 8~~=====~~; vel quia eæ defunt ex utraque parte: hinc factum est, ut in priori casu enunciatio *positive dubia* diceretur, in posteriori *dubia negative*. Quo autem id genus propositiones e *dubiis certa* reddantur, argumentis opus est demonstrativis; probabilibus vero, ut in *probabiles* convertantur. Quousque autem *certitudo*, aut *probabilitas* non effulserit, iudicium omne cohibendum. Istuc unicum illudque tutissimum in *dubiis* non errandi remedium. Quo fere spectat aureum Ciceronis monitum in priori libro de Officiis: *Bene præcipiunt, qui vetant quidquam agere, quod dubites, æquum ne sit, an iniquum*. Nam eadem ratione bene quoque præcipimus, dum vetamus quidquam iudicare, quod dubites, verum ne sit, an falsum; nisi quod ibi de *actione prava*, heic de *erroneo iudicio* præcavendo agatur.

C A P U T IV.

De quibusdam enunciationum generibus Geometrarum usu in demonstrando probatis.

§. XXXVIII. **E**ST & alia enunciationum classis, quæ ratiocinia quoque spectat ea ratione, qua a Geometris construuntur, atque longa serie, pulcherrimoque
nexu

nexu , & ordine disponuntur . Eæ a *pura Mathematica* , cujus lapsis retro sæculis erant propriæ , in *Physicam* , *Metaphysicam* , *Ethicam* , ac *revelatam* quoque *Theologiam* eruditorum nunc opera convolarunt . Ea de causa tirõnibus nostris consulto heic , paucisque evolvendæ . Sunt autem *definitiones* , *axiomata* , *postulata* , *hypotheses* , *lemmata* , *problemata* , *theoremata* , *corollaria* item , & *scholia* . De quibus seorsum agendum , exceptis *definitionibus* priori jam Libro (§. 89. seqq.) late enucleatis : quæ heic omnino recolendæ .

§. XXXIX. Itaque *axiomata* sunt enunciationes quædam theoreticæ , & universales , quarum plena intelligentia ex sola vocabulorum comprehensione pendet : ut *omne totum est sua parte majus* . Dicuntur etiam propositiones *per se notæ* , *veritates primitivæ* , *prima principia* , *scientiarum elementa prima* : quia nec demonstratione egent ; ac prima etiam disciplinarum constructio , unde scientifica tela consurgit , ex axiomatum vel secum invicem , vel cum definitionibus concatenatione mutua connexorum duci solet . *Axiomata* immediata , ac semet fluenta definitionum confectaria esse debent : aliòquin demonstratione egerent ; nec ideo enunciationes essent *per se notæ* . Sint quoque , oportet , *propositiones universales* ; in quibus aliæ scilicet comprehendantur : ut ita adsumi in ratiociniis possint tamquam *principia* , ex quibus nova confectaria , novæque veritates legitima illatione colligantur .

§. XL. *Per se notæ* enunciationes sunt etiam *postulata*, quibus aliquid faciendum proponitur; verum non *theoreticæ*, sive *speculativæ*, sed *practicæ*: ut geometricum illud: *dato centro, datoque intervallo, circulum describere*. Philosophorum *postulata* eo ut plurimum spectare videntur, ut quorundam contradicendi, ac omnia sus deque pervertendi libido & audacia coerceatur. Ut illud: *Philosophandum ex ideis, quas de rebus habemus*. Ut istuc: *Quæ clara & evidentia, in dubium minime revocanda*. Ut hoc aliud: *Adhibendus in scientiis animus docilis, ac veritatis studiosus, non refractarius & pertinax*. Ut hoc denique postremum: *In quavis disciplina tam certo ea credenda, quæ in illa probantur, quam creduntur reliqua, quæ paris roboris momentis, ac rationibus nituntur*. Quorum postrema duo ab illustri præsule Huetio in *Demonstr. Evang.* proposita, & nos quoque *demonstrationi nostræ veritat. resurrec. J.C. adversus incredulos præmittenda* putavimus Tom. I. §. 44. 46. ubi & in subjectis scholiis eorum æquitatem, ac rectitudinem demonstravimus (ibidem 45. 47.).

§. XLI. *Hypotheses* sunt propositiones, quæ tamquam certæ, ultroque ab aliis admittæ, sine demonstratione adsumuntur, non quia *per se notæ*, quemadmodum *axiomata* ac *postulata*, sed quia facile demonstrari possent; verum ne tempus inaniter teratur, earum demonstratio prætermittitur. Quandoque id etiam fit, quia in alia disciplina, vel, si in eadem, opportuniore

niore tamen in loco earum sunt demonstrandæ. Quemadmodum non raro id etiam accidit, quia rationem sufficientem phaenomenorum eadem continent, quæ evolvenda sunt. Verum posteriori sensu isto sumpta *hypothesi* his præcipue conditionibus prælita esse debet. 1. Nedum *possibilis* ea sit, oporet; verum & 2. *probabilis*; & 3. phaenomena, quorum per ipsam ratio sufficiens reddenda est, non vi quadam extorta, sed suapte sponte ex ea fluant: 4. ut in supplementum eadem adsumatur *causarum realium ignotarum*: 5. denum ut condiciones ceteras præferat, quæ Benjaminus Martini recenset in opusculo, cui titulus: *Grammatica delle scienze filosofiche*. Alioquin si alterutra, aut singulæ desint, eulandæ prorsus id genus *hypotheses* e philosophicis disciplinis erunt, ac *veræ, reales, physiceque* phaenomenorum causæ studiosius inquirentæ, ac proponendæ (Lib. II. §. 39.). Quod i earum inquisitio & inventio difficillima videatur, humanamque superet imbecillitatem, futuras tunc potius in ætates ea detegenda dimittantur, quam ullis evolvantur *hypothesis* numquam *realibus*, sæpe *fictis*, non raro *chimericis*, & *absurdis*.

§. XLII. *Lemmat* vocant Geometræ propositiones, quæ neque *per se notæ* sunt, neque ad rem, de qua agitur, spectant; quia vero theorematis, aut problematis demonstrandis inserviunt, nec aliunde citari possunt, iis præmittuntur, ac demonstrantur. *Deum* e. g. *existere* adversus atheos demonstraturus; quum id
genus

genus theorema rerum *contingentia* nitatur, nec ea citari aliunde possit, quia nullibi jam prius ea fuit, ut heic supponitur, demonstrata; si in antecessum ostendero, *universum esse ens contingens*, ideoque *egere ente necessario*, ut *existat*; eamque enunciationem in divinæ existentiae theoremate demonstrando citavero; vocabitur eadem enuntiatio *lemma*. Sed hæc clariora praxi quam calamo. Lemmatum usus apud Geometras potissimum frequentissimus est; propterea quod theorematum demonstrationes sola citatione breviores et reddant, clariores, & concinniores. Verum solde prius demonstranda sunt; ne iis vacillantibus, theoremata quoque ipsa, quæ eisdem superstruuntur, simul nutent.

§. XLIII. *Problema* dicitur propositio, quæ & practica est, & demonstratione indiget. Ut si dicam: *In ludo, qui vulgo dicitur trucco, punctum invenire, a quo resiliens pila eburnea in alteram incurrat*. Ut possibile censeatur *problema*, necesse est modum ostendere, quo id, quod faciendum proponit, aut fiat reipsa, aut saltem fieri possit. Ita possibile erit *problema* propositum, quia juxta regulam *æqualitatis angulorum incidentiæ & reflexionis*, quam elastica quamproxime sequi videntur, facillimum fuerit istiusmodi punctum in alterutro lusoriæ mensæ latere designare.

§. XLIV. *Theorema*, quod & *propositio* generatim, & *thesis* quoque dicitur, est enuntiatio speculativa, cujus veritas per demonstrationem patet

patet : e. g. *Deus leges naturæ morales re ipsa hominibus promulgavit* . Quum *theoremata* ex præmissorum principiorum concatenatione mutua ostendantur ; hinc tantam illis vim inesse putandum est , quantam principia habent , quibus demonstrantur . Ex quibus intelligimus , quam diligenter firmanda sint prius principia ista , ne iis ruentibus , *theoremata* quoque simul collabantur .

§. XLV. *Corollaria* dicuntur novæ quædam veritates , sive enunciationes , quæ necessaria illatione , ac suapte sponte ex definitionibus , axiomatibus , postulatis , hypothesebus , lemmatibus , problematibus , ac theorematibus deducuntur . Adeo ut tota eorum ratio sufficiens in eisdem contineatur . Nam si aliunde oporteat illa demonstrare , non *corollariis* , sed *theorematibus* accensenda erunt . Sunt *corollaria* , sive *confectaria* utilitatis uberrimæ , dum paucis verbis aliunde eruta atque deducta , novis postac firmandis theorematibus , ac disciplinis propterea ditandis , ac prolatandis conducunt . Verum ingenium postulant satis acutum , & meditationibus addictum , scrutandisque rerum relationibus ac nexibus valde inceptum , & idoneum .

§. XLVI. *Scholia* demum spectanda tamquam uberiores definitionum , hypotheseum , lemmatum , problematum , theorematum , corollariorum &c. explicationes , quibus e vestigio subjiciuntur . Fieri autem ea uberior explicatio potest modo multiplici . Ac i. quidem
per

per exempla; quæ suapte natura rem, ad quam spectant, collustrare solent: 2. per novarum rationum additamenta: 3. per rei, de qua agitur, historiam: 4. per ostensionem *usuum*, quibus eadem res pro hominum utilitate & commodo inservire potest: 5. per contrariorum argumentorum enodationem: 6. demum per cujusvis rei alterius adnotationem scitu dignam. Quo autem ordine ea principia in demonstrationibus adhibenda, & pro opportunitate collocanda, dicam postea in loco opportuniore. Nam nunc percensuisse illa tantum, & explanasse sufficiat.

C A P U T V.

De ratiocinii natura generatim.

§. XLVII. **V**Entum ad *ratiocinium*, cujus gratia tria proxime præcedentia capita sunt a nobis proposita, & evoluta (§. 9.). In ejus recta adcurataque construendi ratione, ac theoria intentos primum, tum maxime peritos, atque versatos volo esse tirones. Est enim *ratiocinium* unicum illud medium, per quod multiplici, admirandoque artificio *veritates* perscrutamur, adsequimurque *metaphysicas*. Et quamquam ratiocinandi vis ingenita nobis sit, non aliunde mutuata; nihilominus ut inditæ facultates ceteræ, puta *cannendi*,

nendi, pulsandi, saltandi, aliarque similes, cultura ea maxime eget, ut perpoliatur, firmetur, augeatur, perficiatur. Ad rem igitur, sed si sæpe alias, heic maxime qua eundum, non qua itur.

§. XLVIII. *Ratiocinium* generatim adpello artificiosam mentis operationem, qua ex duplici veritate cognita latentem tertiam legitima illatione deducimus. Ut *virtus est adsequendæ felicitatis medium. Justitia est virtus. Justitia igitur adsequendæ felicitatis medium est.* Legitime autem latentem tertiam ex duabus prioribus jam notis deducimus; quia ejus ratio sufficiens in eisdem tamquam effectus in sua causa continetur. Nam si justitia est virtus, ac virtus adsequendæ felicitatis medium est; sequitur manifeste, & justitiam adsequendæ felicitatis medium esse. Alioquin aut justitia non esset virtus, aut virtus medium non esset adsequendæ felicitatis; ut patet. Atque istuc quidem ratiocinium *adfirmativum* dicitur ob tertiam enunciationem adfirmativam.

§. XLIX. Idem prorsus accidit in hoc altero, quod propter tertiam pariter enunciationem negativam, *negativum* adpellatur. Scilicet *vitium non est adsequendæ felicitatis medium. Avaritia est vitium. Avaritia igitur adsequendæ felicitatis medium non est.* Enimvero si avaritia est vitium, ac vitium non est medium adsequendæ felicitatis; sequitur quoque manifeste, avaritiam adsequendæ felicitatis medium non esse. Alioquin, aut avaritia non esset vitium,

tium, aut vitium adsequendæ felicitatis medium foret.

§. L. Tota autem ratiocinii concludendi vis in duobus principiis sive axiomatibus sita est, quorum alterum fundamentum est ratiocinii *affirmativi*, alterum *negativi*. Horum primum est: *Quæ conveniunt cum tertio, conveniunt quoque inter se*. Quocirca si idea *medii adsequendæ felicitatis* convenit cum idea *virtutis*, quia *virtus medium adsequendæ felicitatis est*, quemadmodum dicitur in enunciatione prima; & cum eadem *virtutis* idea convenit etiam idea *justitiæ*; quia *justitia est virtus*, quemadmodum dicitur in enunciatione secunda: vi istiusmodi axiomatis sequitur, & ideas quoque *justitiæ*, ac *medii adsequendæ felicitatis* inter se convenire; ac justitiam proinde *adsequendæ felicitatis medium esse*; quemadmodum colligitur in propositione postrema.

§. LI. Est et alterum: *Quorum unum convenit cum tertio, cum quo aliud minime convenit, ea non conveniunt inter se*. Itaque si cum idea *vitii* non convenit idea *medii adsequendæ felicitatis*; quia *vitium adsequendæ felicitatis medium non est*; quemadmodum in prima enunciatione dicitur: cum eadem autem *vitii* idea convenit idea *avaritiæ*; quia *avaritia est vitium*, quemadmodum dicitur in enunciatione secunda: vi alterius hujusce axiomatis pariter sequitur, ideas *avaritiæ* ac *medii adsequendæ felicitatis* inter se minime convenire; ideoque *avaritiam adsequendæ felicitatis medium non esse*.

esse, quemadmodum deducitur in propositione tertia.

§. LII. Porro ex his plura intelliguntur, quæ tironibus non sunt prætereunda silentio. Ac in primis omne ratiocinium rite conformatum constare omnino debere tribus ideis, quarum duæ, quæ *extremæ* dicuntur, comparandæ sint cum tertia, quæ dicitur *media*, ut ex ea comparatione juxta superiora axiomata (§. 50. seq.) palam fiat, convenient ne inter se; ideoque sint ne eæ mutuò conjungendæ, an divellendæ in enunciatione tertia. Deinde omne ratiocinium complecti quoque debere totidem enunciationes, ut in duabus prioribus fiant binæ collationes illæ duarum *extremarum idearum* cum *media idea*, tum in postrema earundem conjunctio, aut separatio. Porro duæ priores enunciationes vocantur simul *antecedens*, sive *principia* ratiocinii, tertia *consequens*. Ubi & fluxus quoque adnotandus ipsius consequentis ex antecedente vocabulis *ergo*, *igitur*, similibus expressus, qui & *illatio*, & *consequentia* adpellatur. Tandem mentis rationem *vim* dici *calculatricem*, sive *collatricem* in ratiocinando, ob comparationem illam, quam instituit inter duas *extremas* ideas ac *mediam*, ut sibi constet, convenient ne illæ an secus inter se. Ut quum in priori exemplo (§. 51.) duæ ideæ *extremæ*, *medii* scilicet *adsequenda felicitatis*, ac *justitiæ*, conferuntur cum *media idea virtutis*.

§. LIII. Quum igitur ratiociniorum conclu-
dendi

clendi vis ex duplici axiomate oriatur ; tanta erit illorum stabilitas ac firmitudo , quanta axiomatum ipsorum , idest plena , summa , perfecta . Cur igitur , quæret quispiam , non eadem sunt de quibusdam ratiociniis hominum judicia ? Scilicet pluribus de causis , quarum præcipuæ sunt , *acumen* , *attentio* , *partium studium* , *suimetipsum amor inordinatus*.... Principio *acumen* non idem omnibus a natura tributum . *Attentio* non æque ab omnibus pro opportunitate intenditur . *Partium studium* sectæ principe neminem doctiorem , ac perspicaciorem credere finit . *Inordinatus* denique *nostri amor* nostra , quæcumque ea sint , alienis anteferre compellit . His de causis fit , ut quorundam ratiocinorum vis aliis stabilis ac firma , aliis nutans & imbecilla videatur . Scilicet pendent ea judiciorum discrimina ex eo , quod eadem res ex inæqualibus intervallis , juxta inæquales doctrinæ , examinis , attentionis , ac indifferentiæ gradus , conspiciatur . Oporteret esse illam velut in *sphæræ centro* positam : tum qui de ea judicaturi sunt , in totidem superficiei punctis habere oculos , atque ex illis per æquales radios opticos eandem contueri . Tunc equidem judicia omnia mirum in modum inter se congruerent . Sed inania vota !

§. LIV. Ratiocinia *vera* æque ac *falsa* esse possunt . Quum antecedens , sive principia , in quibus duarum *extremarum* comparatio fit cum *media* idea , vera fuerint , & illatio legitima , ratiocinium dicitur *verum* . *Falsum* contra , si
horum

horum alterutrum deerit . Quodnam autem sit principium , enunciatio , iudicium *verum* , dictum supra (§. 29.) . *Legitima* vero erit illatio sive consequentia , si ex datis principiis suapte sponte fluat , non vi , præterque naturam trahatur . Si , inquam , eadem duæ ideæ , quas *extremas* vocari diximus (§. 52.) , jungantur , aut divellantur in consequente juxta eandem *notam* , secundum quam in eisdem principiis cum *media idea* fuere comparatæ . Atque in ratiociniorum constructione ob oculos habere semper ista debent tirones , si quidem paralogismos , ac sophismata , omnesque præterea errorum monstra declinare voluerint . Alioquin nullus erit errandi finis ; quum in contexendis disciplinis priora ratiocinia sint velut fundamenta ac bases eorum , quæ subsequuntur ; atque super falsa nonnisi falsa alia superstrui possint : adeo ut nutantibus prioribus , tota superinducta machina collabatur , necesse sit .

§. LV. Quum principia evidenter vera fuerint , & evidenter quoque legitima illatio , ratiocinium *demonstrativum* adpellatur . Quod si alterutrum , aut utrumque deerit , dicitur *probabile* . Prioris effectus in mente productus *scientia* est , cognitio nimirum certa & evidens rei per causam , sive per rationem sufficientem . Posterioris *opinio* , cognitio scilicet mere *probabilis* , vacillans , & incerta . Quam late per omnes sapientiæ partes , paucis exceptis , *probabilitas* excurrat , dictum suo loco (§. 36.) . Nihilominus probationibus mere

N

pro-

probabilibus sæpissime nunc præfixam videas literam D. (*demonstratur*), tum in fine Q. E. D. (*quod erat demonstrandum*); quum potius præfigenda esset litera S. (*suadetur*), tum postea Q. E. S. (*quod erat suadendum*). Quot aberrationes adcurata rerum distinctio, ac neglecta vocabulorum proprietas non inducit ?

§. LVI. Demonstratio vel *directa* est, vel *indirecta*: tum *a priori*, vel *a posteriori*. *Directam* vocant, quum immediata rationum serie *rem ita esse* demonstramus. *Indirectam*, quum velut *oblique ostendimus, rem aliter esse non posse* propter absurda, quæ inde sequerentur. Exemplum demonstrationis *directæ*: *Quod subjecta corpora premit, est grave. Aer subjecta corpora premit. Aer igitur gravis est.* *Indirectæ*: Si Deus non est *universi conditor*, erit illud vel *æternum*, vel *a seipso productum*, vel *productum a nihilo*. Singula autem absurda, atque pugnantia. Primum: quia esset simul contingens, ac necessarium. Secundum: quia foret seipso prius ac posterius. Tertium quia nihilum esset simul nihil & non nihil. Deus igitur est *universi conditor*. Porro *directa* demonstratio certitudinem simul parit & evidentiam: *indirecta* certitudinem tantummodo; quum *nexum* minime pandat subjecti cum prædicato. Ea de causa non nisi raro, & ob deficientiam demonstrationum *directarum* adhibenda. *Indirecte* demonstrandi genus dicitur *apogogicum*, & *ad absurdum*, estque ad revincendos refractarios maxime idoneum;

netum; quum ad contradictoria simul concedenda eo adigantur.

§. LVII. Demonstratio *a priori* fit, quum effectus per suam causam demonstratur. Quum vero causa vicissim demonstratur per suum effectum, erit ea demonstratio *a posteriori*. Quorum adpellationum ratio est, quia causa prior est suo effectui, & is sua causa posterior. Ubi & *causæ* nomine non *physica* tantum & *efficiens* respectu effectuum *physice* productorum intelligenda; sed & natura etiam & essentia respectu subnascensium *notarum*; atque quidvis aliud, quod *anteriorem* rationem sufficientem contineat alterius. Sed exemplum demonstrationis *a priori* fuerit istuc; *Deus est summe bonus. Ergo & providus*. *A posteriori*; *Existunt entia contingentia. Ergo & ens necessarium, a quo fuere producta*. Quibus autem principiis regendæ demonstrationes istæ, satis dictum Libro II. (§. 31. 51. seqq.). Plura cupienti legendus Genuensis Instit. Log. lib. 4. cap. 3.

C A P U T VI.

De variis ratiociniorum generibus, in primis de syllogismo.

§. LVIII. **R**atiociniorum, de quibus generatim capite præcedenti, septem genera a scriptoribus logicis vulgo fecer-

cernuntur, scilicet 1. syllogismus, 2. enthymema, 3. epicherema, 4. dilemma, 5. sorites, 6. inductio, 7. exemplum. De *inductione* agam in capite de *Analogia*. De ceteris heic seorsum.

§. LIX. *Syllogismus* est ratiocinium tribus constans ideis, totidemque propositionibus, quarum postrema ex prioribus fluit tamquam effectus a sua causa. Ut: *Hominum jura sunt intangibilia. Vita est hominum jus. Vita igitur intangibilis est.* Quum de ratiocinio generatim egerimus hucusque, tamquam de mentis actione tribus ideis totidemque propositionibus constante, quarum postrema ex prioribus legitima illatione deducatur: hinc quæcumque de eo hætenus dicta sunt, syllogismo etiam opportune aptanda. Ceterum ubi de syllogismo agitur, prima enuntiatio dicitur *major*, secunda *minor*, sive *adsumptio*, tertia *conclusio*: ac duæ priores *premissæ* adpellantur.

§. LX. Dividitur autem syllogismus in *simplicem*, & *compositum*. Quum enunciationes ejus omnes *simplices* (§. 33.) sunt, vocatur *simplex*: *compositus* vicissim, si præmissarum alterutra fuerit *composita*. In syllogismum *simplicem* duo problemata proponi possent, exercendis tironum ingeniis utilissima. Primum: *Data enunciatione, syllogismum construere, cujus ea sit conclusio.* Alterum: *Syllogismo jam constructo, rectus ne ille sit, an pravus, ostendere.* Porro de simplicium syllogismorum constructione tot tamque implicita, & involuta regulis illis, figuris, ac modis tradidere olim scholæ Phi-
lo.

losophi, ut invium valde nemus, ac inextricabile labyrinthum merito dicere possis. Ea passim damnant recentiores Logici tamquam inutilia, usuque carentia, atque ad *gustum germanæ Philosophiæ retundendum* comparata. Quæ recta. Retinenda tamen censent, ac retinent reipsa tamquam *superioris ætatis barbariei monumenta*. Quæ ego non probo. Sat enim, si putida id genus monumenta (si quidem retineri, ac non potius deleri prorsus, tamquam præstantissimæ disciplinæ dedecora ac labe mereantur) in Scholasticorum libris asservetur. Turpe siquidem, ut *superflua sciamus, necessaria nescire*.

§. LXI. Itaque simplicissima, plana simul, ac germana prioris problematis solvendi via fuerit, si ratio sufficiens inveniatur, cur datæ propositionis attributum subiecto conveniat, aut non conveniat. Ea porro inventa, atque pro *media idea* adsumpta, res tota absoluta erit, solutumque problema propositum, in hunc modum. Sit primum enuntiatio isthæc *affirmativa: Deo est parendum*. Ratio, cur prædicatum *parendum* subiecto, idest *Deo* convenit, summum est illius in nos *dominium* ratione creationis, & conservationis. Quare eo *dominio* pro *media idea* adsumpto, sic conficitur syllogismus: *Ei, qui summum in nos dominium habet, parendum. Deus summum in nos dominium habet. Deo igitur parendum*. Sit modo hæc alia enuntiatio negativa: *Luna non est corpus lucidum*. Ratio sufficiens, cur prædicatum

lucidum non convenit subiecto, nempe *luna*, sunt illius *phases*, quibus illa non subijceretur, si suapte natura licida foret. His proinde pro *media idea* adsumptis, syllogismus alter conficitur in hunc modum: *Corpora lucida non sunt phasibus obnoxia. Luna phasibus obnoxia est. Luna igitur non est corpus lucidum.* Quomodo autem ea ratio sufficiens nexus, aut pugne attributi cum subiecto invenienda sit, meditatione opus est plurima, studioque assiduo.

§. LXII. Solvitur autem problema alterum dupliciter, ac duplici adhibita observatione. 1. Si duæ *extremae ideæ* eo modo copulatæ, aut sejunctæ in conclusione fuerint, quemadmodum in præmissis fuere cum *media idea* comparatæ. 2. Si præmissarum altera conclusionem contineat, altera contineri illam declaret. His in casibus recta erit simplicium syllogismorum constructio, nec ulli vitio obnoxia. Ut in hoc exemplo: *Legum contemptores sunt societati infensi. Libertini sunt legum contemptores. Libertini igitur sunt societati infensi*: in quo, quia & ea trium idearum comparatio rite instituta est, & conclusio in *majori* continetur; quemadmodum *minor* enunciatio declarat; nullum prorsus in eo vitium occurrit. Ubi illud tironibus addendum, in syllogismis affirmativis *continentem* propositionem esse universaliorē affirmativam; in negativis universaliorē negativam; cujus ratio est, quia ea est veluti *totum*, in quo conclusio tamquam *pars* continetur. Unde illud in syllogismis affirmativis

tan-

tantopere decantatum: *Posito toto, ponitur pars.* Et in negativis: *Toto sublato, pars tollitur.* Ut in hoc exemplo: *Nemo coinquinatus intrabit in regnum caelorum. Adulteri sunt coinquinati. Adulteri igitur non intrabunt in regnum caelorum.* Ubi sublato toto in maiori, tollitur *pars* in conclusione.

§. LXIII. Dum syllogismus simplex hominum mores spectat, quatenus boni sunt aut pravi, legibus proinde conformes aut diffformes, prior enunciatio dicitur *principium*, secunda *adplicatio*, postrema *sententia*. Quamquam & in ceteris nunc promiscuè rebus eadem nomina & adpellationes jam vulgo adhibeantur, *principium* præsertim & *adplicatio*, *major* scilicet ac *minor*. Ac *principium* quidem constituitur per *jus*, aut *legem*: *adplicatio* per *factum*, sive per actionem *moralem* aut *factam*, aut *omissam*: *sententia* vel absolvit ut innocentem, vel ut reum condemnat. Ac si a nobis ipsis super proprias actiones, aut omissiones efformetur, vocatur *conscientia*, fierique dicitur *in foro interno*; *in foro autem externo*, adpellaturque *judicium*, exigitque plenam in Præatore legis, legisque spiritus, tum *jurium*, ac *factorum*, *circumstantiarumque omnium intelligentiam*, quum alienas actiones spectat, & omissiones. Ad *judicium* pertinet exemplum istuc: *Qui alienam uxorem violat, est mæchus. Paris Helenam Menelai uxorem violavit. Paris igitur fuit mæchus.* Quia de alieno facto. Ad *conscientiam* vero hoc aliud Judæ proditoris: *Qui*

tradit sanguinem justi, peccat. Proditione autem magistri ego tradidi sanguinem justi. Peccavi igitur: quia de proprio. Conscientia priorum delictorum inexorabilis est, semperque remordet ac damnat, etiamsi totum genus humanum insontes nos, innocentisque proclamet. Hinc Davidis illud: Peccatum meum contra me est semper! Utinam ut conscientia in propriis, tales quoque essent & Prætores in factis alienis! Sed pergamus.

§. LXIV. Syllogismus *compositus* (quæ altera divisionis pars §. 60.), æque ac *composita* enunciatio (§. 33.), vel *conditionalis* est, vel *copulativus*, vel *disjunctivus*. *Conditionalis*, si major *conditionalis* enunciatio fuerit, minor pars illa, cui præfixa particula *conditionalis*, conclusio pars reliqua. Ut: *Si Cajus est probus, laudatur & alget. Est autem probus. Laudatur igitur & alget. Copulativus*, si major fuerit *propositio copulativa* ea ratione in partes distributa, ut si altera minorem *affirmativam* constituat, altera *conclusionem negativam vi oppositionis* constituere debeat: ac vicissim. Ut: *Nemo esse potest bonus civis, & privatam utilitatem publicæ anteferre. Cato est bonus civis. Privatam igitur utilitatem publicæ minime antepont. Disjunctivus* tandem, si eadem major *propositio* fuerit *disjunctiva*, ac ejus pars una *affirmetur* in minore, altera in *conclusionem* vi ejusdem *oppositionis* denegetur: aut vicissim: Ut: *Prætor vel justus judex esse debet, vel iniquus. Est autem justus. Non igitur judex*

judex iniquus. Vel: Est autem judex iniquus. Non est igitur justus.

§. LXV. Atque hæc *compositorum* syllogismorum genera, quorum usus in scientiis universis patet quamlatissime. Ceterum levissima attentione intenta, facillimum tironibus fuerit eos in *simplices* commutare. Ut ecce hæc eadem exempla. Primum: *Viri probi laudantur & algent. Cajus est vir probus. Ergo laudatur & alget.* Secundum: *Bonus civis privatam utilitatem publicæ anteponit. Cato est bonus civis. Privatam igitur utilitatem publicæ anteponit; vel contra.* Tertium. *Justus judex non est iniquus. Prætor est justus judex. Non igitur iniquus: vel contra.* Quæ idcirco innui, ut constet, quæ de *ratiociniis* generatim dicta sunt (§. 48. seqq.), nedum *simplicibus* (§. 59.), sed &, levissima hac immutatione facta, *compositis* etiam syllogismis aptari posse. Quin & ceteris consequenter *ratiociniorum* generibus aptantur, quæ consequuntur: quum singula ad syllogisticam formam, uti mox patebit, nullo negotio revocari possint. Quinimmo haud immerito fortasse putaverim, totam eorum concludendi vim ex eo pendere, quod tacita quadam ratione *intrinsecus*, & quoad *substantiam* totidem syllogismi sint; licet *extrinsecus*, & quoad *verborum* complexum diversi videantur. Alioquin nec generalis *ratiocinii* definitio omnibus recepta atque probata aptari iis posset; & absque duarum idearum comparatione cum tertia nil revincerent, nihilque concluderent; ut patet.

§. LXVI. *Enthymema* fit, quum alterutra præmissarum syllogismi reticetur. Ut: *Sentit. Vivit igitur.* Ubi reticetur: *Qui sentit, vivit.* Est itaque syllogismus quidam compendiarius, ad brevitatem æmulandam adhibitus. Ut proinde eadem sint utriusque præcepta.

§. LXVII. Germanus quoque syllogismus est *epicherema*, eisdemque præceptis regendum, atque in eundem brevitatis finem adhibitum. Nam eo spectat probatio illa, quæ alterutri, vel utrique præmissarum in ipsius constructione adjungitur. Ut in hoc exemplo: *Omnis contractus, in quo non servatur æqualitas, injustus est, legeque naturæ proscriptus. Quia æqualitate deficiente, vel dolus interest, vel fraus: quorum utrumque naturæ lex proscibit. In contractu vero mutui cum usuris non servatur æqualitas. Mutuans namque tutus est quum de sorte, tum de lucro: mutuatarius vicissim periculo subjacet quum amittendæ sortis mutuantis, eamque solvendi, tum amittendi industriam, ac propriis præterea sumptibus solvendi usuram, Contractus igitur mutui cum usuris injustus est, legeque naturæ prohibitus.* Curandum autem in *epicheremate* construendo, ut rationes præmissis adjunctæ solidæ ac firmæ sint, nullisque exceptionibus obnoxia. Alioquin ineptissimum erit illud, novisque probationibus egenum.

§. LXVIII. *Dilemma* (cornutum argumentum vulgo dictum) est quoddam ratiocinii genus, in quo ex singulis disjunctivæ enunciationis partibus, quæ antecedentis loco ponitur, sua

pe-

peculiaris conclusio deducitur . Ut si dicam : *Universum aut intelligentiæ & consilii opus est , aut puri casus . Si intelligentiæ & consilii ; cuncta in eo ordinata sunt . Si puri casus ; confusa omnia , ac perturbata .* Tota vis dilemmatis in oppositione partium disjunctivæ propositionis , quæ medium omne excludant , sita est . Alioquin ad demonstrandum æque ac refellendum ineptum erit . Curandum etiam , ut singulæ conclusiones , quæ ex partibus illis colliguntur , suapte sponte fluant . Resolvi etiam in totidem syllogismos potest , quot partes antecedens enunciatio complectitur ; licet vi oppositionis earundem partium unus tantummodo *verus* esse possit . Ut in eodem exemplo : *Opus intelligentiæ & consilii , est opus ordinatum . Universum est opus intelligentiæ & consilii . Ergo ordinatum .* Qui *verus* . At contra *falsus* : *Opus puri casus , est opus confusum ac perturbatum . Universum est opus puri casus . Confusum igitur ac perturbatum .* Ut proinde syllogismorum præcepta ne in *dilemmate* quidem construendo negligenda sint .

§. LXIX. Vocant *sortitem* , sive *acervum* ratiocinandi genus , in quo plures ad arbitrium enunciationes ita simul neciuntur , ut prædicatum primæ fiat subiectum secundæ , hujus etiam prædicatum subiectum tertiæ , & ita porro , donec tandem prioris subiectum cum prædicato ultimæ in conclusione copuletur . E. g. *Qui leges violat , prave agit . Qui agit prave , sceleratus est . Qui est sceleratus , est etiam infelix .*

Ergo

Ergo qui leges violat, infelix est. Huic etiam syllogismorum præcepta aptanda; quum in totidem syllogismos resolvi possit, in hunc modum: *Qui leges violat, prave agit. Cajus leges violat. Cajus igitur prave agit.* Item: *Qui prave agit, scelestus est. Cajus prave agit. Est igitur scelestus.* Tandem: *Qui scelestus est, est etiam infelix. Cajus est scelestus. Infelix igitur.* Quæ plurium syllogismorum concatenatio, in qua præcedentis conclusio in majorem transit subsequenter, *polysyllogismus* appellatur, a quo non abhorrent Geometræ, adhibetque Cicero in *Tusculanis* lib. III. cap. 7. Ceterum quum *sortite* utimur, cavendum diligenter, ne qua propositio aut falsa, aut non fatis firma immisceatur. Alioquin subsequens enunciationum series, & inde conclusio ipsa postremo loco deducta, falsa, aut vacillans erit. Nulla enim firma moles absque firmis, atque stabilibus fundamentis umquam subsistet.

§. LXX. Ratiocinamur denique *ab exemplo*, quum ex facto quopiam particulari factum aliud colligimus. E. g. *Romana resp. civium luxu & ambitione corrupta est. Ergo & quævis alia simili luxu & ambitione corrumpetur.* Esopi *fabulæ*, & *parabolæ evangelicæ* totidem *exempla*, licet non realia sed ficta, sunt hominum moribus conformandis de industria instituta. Quo autem exempla ad probandum sint idonea, similitudine utrinque opus est circumstantiarum, licet non exacta illa ac plena; alioquin non similitudo ac *paritas* ea foret, sed *identitas*:
quæ

quæ ut plurimum nimis rara. Sat erit, si ea parte interfit, qua alterum exemplum colligitur ex altero. Ceterum sunt ea Oratorum potius, quam Philosophorum propria, nisi vel ad quidquam illustrandum tantummodo ea fuerint adhibita; vel a causis necessario agentibus petantur. Quæ enim exempla res gestæ sunt causarum liberarum; ut hæc in agendo instabiles, variæ, ac numquam fere sibi similes esse solent; ita & illa variabilia, sibi que difformia; nec proinde ad quidquam demonstrandum idonea. Possunt ea etiam ad syllogisticam formam deduci, ac syllogismorum subinde præceptis subjici in hunc modum: *Eadem causa eosdem producant effectus, similes producant similes. Luxus autem & ambitio romanam rempublicam corruerunt. Ergo quascunque alias similiter corrumpent.*

§. LXXI. Sed monendi postremo loco tiro-
nes, ne inter ratiocinandum *paralogismis*, aut
sophismatibus turpiter implicentur. Sunt porro
paralogismi ratiocinia, quorum vitia statim
in oculos incurrunt. *Sophismata* vicissim men-
tem cautam, serioque intentam, quo detegan-
tur, expostulant. De his utramque paginam
apud Logicos, etiam qui delicatiores videri
amant, repletam invenias. Vereor autem, ne
quum ea tam late ac minutatim tironibus
exponunt, *sophisticam* artem illos una opera
edoceant. . . . Ut autem ea Philosophorum
dehonestamenta devitent, ideas in primis ac
voces eodem ubique sensu in ratiociniorum con-
stru-

structione adhibeant. Ita quippe *homonymias* sive æquivocationes declinabunt. Tum enunciatio, quam aut demonstrandam, aut refellendam adsumunt, conclusio ea semper sit, juxta methodum supra (§. 61.) traditam, ratiocinii, quo utuntur. Ita enim sophisma prorsus vitabunt, quod *ignorationem elenchi* adpellant. Nec *principium* ullibi pueriliter petant, idipsum pro certo adsumendo, quod in quæstione versatur. Abstineant postremo a *circulis vitiosis* sive *diallelis*, in quos ridicule prolabuntur ii, qui idem per idem, A. videlicet per B., & B. per A. comprobant. Nam id neutrum probare est, sed aut insanire prorsus, aut ineptire. Sed nudam veritatem sine dolo, sine fraude ubique persequantur. Id enim *philosophari* est, id studiorum labores cum successu, cum laude, cum nominis gloria impendere: cetera rationem ipsam turpiter deferere, otiosi item, ineptire, insanire



C A P U T . VII.

*De inquisitionis veritatum metaphysicarum
necessitate , utilitate , delectu .*

§. LXXII. **C**onstitutis superioribus Capitibus principiis illis , quorum intelligentia *veritatum metaphysicarum* inquisitioni ingentem lucem præbere solet , in viam veluti deducimur præceptorum inquisitionis ipsius . Ut autem id genus studiis impensus , avidiusque dent operam tirones nostri , ab illorum necessitate , & utilitate exordiendum putamus . Ea est enim avida simul ac laboris impatiens hominis natura , ut quemadmodum sine ulla boni , sive *realis* ac *veri* , sive tantum *apparentis* , spe , etiamsi furca compellas , iners nihilominus & inactiosa persistit ; ita vicissim genere & hilariter quidvis adgrediendum censet , adgrediturque re ipsa , ubi magna , & eximia propo- sita illi fuerint laborum præmia , præsertim cum gloria nominis conjuncta . Est igitur *metaphysicarum* veritatum investigatio quum necessitatis maximæ , tum utilitatis uberrimæ , præsertim si cum inquisitione ac studio conferatur *veritatum physicarum* , de quibus superiori Libro II. cap. 3. Illa enim *animalis natura* commoda proxime spectat : hæc bona *spiritualis* . Illa corporea ac sensibilia , hæc incorporea & intelligi-
bilia ;

bilis: illa terrena & caduca, cœlestia hæc & sempiterna: illa, verbo, mundum corporeum, hæc spirituales, ac ipsum præcipue universi Conditorum contemplatur. Tum *sensibilia observando, experiundoque*, coturnices quodammodo imitari videmur; quæ humili depressoque volatu solum fere ipsum abradunt. At intelligibilia ac spiritualia *meditando*, in sublimē gloriosius elevamur ut aquilæ.

§. LXXIII. Sed generaliora ista. Rem propius attingamus. Principio est *Ontologia*, velut seminarium universaliorum principiorum, quibus tamquam primordialibus fundamentis disciplinæ ceteræ superstruuntur. Habent quidem singulæ sua peculiaria principia; elementa propria: sed *proxima*, sed *immediata* tantum, ac talis propterea naturæ, ut vim omnem ac pondus ob *ontologicis* scēnerentur. Hinc *Ontologia*, quemadmodum alibi dictum, *prima philosophia*, *præfatio*; ac *prolegomena disciplinarum omnium* adpellitata, ne excepta quidem *Mathesti*, quæ axiomata plura, eaque fundamentalia, quibus videlicet tamquam fundamentis superstruitur, ab illa mutuatur. Hæc intelligibilem mundi ordinem pandit. Hæc primas rerum rationes suppeditat. Hæc in divinam entium omnium originem, ac finem manu quodammodo nos ducit. Hinc absoluta necessitas patet inquisitionis; ac studii veritatum *ontologicarum*; nisi philosophicum molimen construere velimus sine basibus ac fundamentis nimis ridicule.

§. LXXIV. Deinde neque minus utiles, minusque

nusque necessariæ veritates *psychologicae*. Hæ namque docent nos in primis, quid sumus, unde sumus, & quonam tendimus, *victurique gignimur*. Quæ quantum nostra inter sit scire, ipsiusmet Apollinis celeberrimo oraculo significatum, dum præcipit: *NOSCE TE IPSUM*, nosce videlicet animam tuam. Nam quemadmodum Platoni scite adnotatum in *Alcibiade*, *animam nosse jubet, qui præcipit: NOSCE TE IPSUM*. Quæ & Ciceronis quoque sententia fuit in *quæst. tusculanis*, & ceterorum præterea scriptorum. Interest, inquam, plurimum nosse, hunc Dei *halitum*, *divinæ hanc auram naturæ* non inertis materiæ compagem, sed spiritum esse illum semet percipientem, Dei, rerumque divinarum intelligentem, bonorum cupidum, malorumque averfantem, ratione, liberoque arbitrio, aliisque præterea eximiis dotibus exornatum: tum immediata Dei actione ex nihilo conditum, nec morti, aut corruptioni obnoxium, sed incorruptibilem, sed immortalem, sed ad immarcescibilem virtutum, bonorumque operum coronam, æternamque ac plenam in cælis felicitatem tendentem, & anhelantem. Hæc, inquam, & innumera, ac præclara id genus alia, quæ nos propius tangunt, & quæ nobiliorem nostri partem, quin & nosmetipsos (*animus quippe uniuscujusque is est quisque*) spectant, valde interest scire.

§. LXXV. Rursus nec levior necessitas urget, aut utilitas veritatum *pneumatologicarum*.

O

Est

Est quippe amplissima hæc, stupenda, ac supra modum pulcherrima mundi machina instar cujusdam *Regiæ*, quam incolendam, & inhabitandam summa nobis munificentia Deus largitus est, condiditque ex nihilo. In ea tot varia, tamque multiplicia parata bona, quibus nedum naturæ indigentis & commodis subveniremus, sed oblectationibus quoque innumeris, ac jucundis, velut *luxu* quodam animum recrearemus. In eadem velut adfidentes ad mensam providentissima Dei manu alimur, allimur blanditiis, ac motum quotidie excipimus, & spiritum, & vitam. Quum igitur in sua domo, ac suam velut ad mensam tot beneficiis, tantaque dilectione, ac munificentia a Deo cumulemur; adeo ne rudes, adeo ne vecordes & ingrati erimus, ut ne scire quidem damnabili negligentia curemus, quisnam sit talis tantusque Parens amantissimus, summeque providus? quæ ejus dotes, ac perfectiones? qui in tam effulgentissima erga nos caritate finis? & quemnam postremo cultum grati impendere debeamus? Quisnam tam barbarus, tamque ferox, & immanis hospes, qui ne nosse quidem suum curet benefactorem; nedum nullas pro collatis beneficiis ei gratias agere? Sed ut *psychologici*, ita & *pneumatologici* studii illud maxime necessitatem ostendit & utilitatem, quod magno *Scientiæ morum*, in primis *Jurisprudentiæ naturalis* ædificio utraque ea *Metaphysicæ* pars & fundamenta suppeditat, & muros, & tecta, & omnia. Adeo ut sint velut

Iut *Ethica fundus*, a quo & humanæ actiones regendæ, & morales naturæ leges rectrices, & Dei hominumque jura servanda, & pœnæ denique, & præmia in illam derivantur: nec ea aliud seorsum præstare videatur, quam hujusmodi mutuatas suppetias honeste vivendi rationi, ac normæ accommodare.

§. LXXVI. Adeamus tandem disciplinas *ethicas*, quarum veritates licet ob mores ad eas conformandos *præctica* dicantur; sunt tamen æque *metaphysicæ*, intelligibiles, & abstractæ, ac ceteræ; nec aliter quam *rationis usu* inquiri, & inveniri possunt. Harum necessitas superioribus fortasse major, ideoque summa dicenda est; quum sit necessitas *finis*: *ontologicarum* vero, *psychologicarum*, & *pneumatologicarum* necessitas tantum *medii* (Lib. I. §. 76. 81. 83.); propterea quod videlicet per virtutum, officiorumque semitas *ad beate vivendum*, quod *Ethica* docet, ordinantur. Hujusmodi sunt in primis, quæ virtutes ipsas, quæ Dei hominumque jura, quæ leges naturæ morales, quæ harum præmia, ac pœnas, quæque *pietatis* adversus Deum, adversus nosiplos *sobrietatis*, ac *justitiæ* demum & *beneficentiæ* adversus alios homines officia latissime spectant. Has enim veritates tam inquirere, ac nosse oportet, quam necesse est mores, vivendique rationem ad eandem componere. Quæ utique necessitas summa, maxima, & qua urgentior excogitari non potest alia. Nam quid tristius accidere

umquam homini poterit, quam *intemperanter*; quam *injuste*, quamque *impie* vivere?

§. LXXVII. Est itaque *metaphysicarum veritatum* investigatio & adsecutio, plusquam quævis alia, utilis ac necessaria. Verum *judicio* opus est plurimo, ut quæ in propriam dumtaxat aliorumque utilitatem conferri possunt, ceteris omiſſis, deligantur, seriæque meditationi subſciantur. *Judicio*, inquam, ea quidem in re opus est plurimo. Enimvero quamquam a *methaphysicis* nunc disciplinis exulare jam fere omnes videantur sempiternæ ac steriles tricæ illæ scholasticæ; substitutæ nihilominus a recentioribus aliæ, quæ si non æque ispidæ ob novitatem & incultæ, æque tamen vanæ ac supervacaneæ cenſeri poſſunt. Hujusmodi e. g. ſunt, quæ de idearum origine, de tempore creationis animorum, de mutuo mentis corporisſque commercio, deque pluribus id genus aliis, quibus *Psychologia*, nobiliſſima alioquin diſciplina, ſcatet univerſa, moleſto ſatis ac interminabili calamo diſputantur. Siquidem ſi conglobentur ea omnia in unum, tum vi quantalibet valida comprimantur, haud certe ſperandum, ut ſimplex ac minimula aquæ gettula (ſi ita quidem loqui fas eſt) pro noſtra aliorumve utilitate & commodo in terram diſfluere videatur. Adeo ne otia cum otiis turpiter ac ridicule commutavimus, quando *Manibus* potius devovere utraque, atque in malam crucem amandare deberemus?

Num.

Numquid tantopere gloriabimur, quia scænum paleæ substituímus, & glandes pomis agrestibus?

§. LXXVIII. Idem quoque delectus diligenter faciendus in *Ontologia*, in quam nova illa *cosmologicorum* argumentorum adsociatione, universa pene *Physica* generalis intrusa est. Item & in *Theologia naturali*, & in *Scientia morum*, præsertim in *Jure naturæ*. Nam hoc opus adeo in immensum reluctante natura jam excrevisse videmus, ut si quorundam, etiam qui magistri in eo putantur, singuli libri in quatuor partes dividerentur, vix una tantum germana esset, naturalis, ac ipsius *Jurisprudentiæ* propria: ceteris prorsus extraneis, & nothis, atque partim ad *Philologiam*, partimque ad *Forum*, atque ad disciplinas alias pertinentibus. Adeo ne disciplinam, quæ ad doctos æque atque ad ignarum vulgus, ipsasque femellas spectat (quippe quæ *omnium pectoribus*, teste Paulo, *in sculpta est*; omnesque ex æquo ad *naturæ officia* adigit atque compellit) interpolavimus, involvimus, deformavimus, ut magnis per sæpe ingeniis inextricabili labyrintho similis videatur? Utinam in eam formam concinnaretur in posterum, ut, quemadmodum *theologicus* ille ac *fidei*, ita corpus ex eadem compactum *philosophicus* sive *naturæ catechismus* dici posset! Sed quousque plus hac illacque excurrere, quam recta progredi; plus foliis oblectari ac floribus, quam fructibus vesci; ac plus demum propria ostentare ingenia, quam lectoribus prodesse ethici scriptores amant; frustra ea vota fuerint,

rint , atque ad auram , ut dicitur , numquam
reditura projecta , & jaculata .

C A P U T VIII.

De generalioribus quibusdam monitis sive animadversionibus , quibus humana ratio in metaphysicarum veritatum investigatione regenda .

§. LXXIX. **E**ST metaphysicarum veritatum investigatio quantum ex præcedenti capite utilis ac necessaria , tantumdem salebrosa , ac periculis plena . Adeo ut vel sublimiora persæpe ingenia in arduos quosdam scopulos inextricabiliter illidantur . Ne igitur tirones nostri ullibi periclitentur , tutaque via incedentes mella tantum ex floribus , veneno abjecto , fugere possint ; generalioribus quibusdam animadversionibus sive monitis præmunitos volumus , quæ in meditationibus metaphysicis axiomatum loco ob oculos semper obversari ipsis debent . Ea autem sunt hujusmodi .

§. LXXX. Monitum primum : *Librandas antea proprias vires , si meditationibus incundis pares fuerint ; alioquin sublimioribus eas ingeniis reliquendas . Pares erunt eæ vero & idoneæ , si 1. ingenium non sit omnino hebes : si 2. ferat valetudo : si 3. urgentiores curæ permit-*
tant :

tant : si 4. iis præfidiis munitus fueris , a quibus rei meditationibus subjectæ intelligentia pendet . Alioquin ne tempus teratur inaniter , satius fuerit a sublimioribus saltem meditationibus abstinere , easque amplioribus ac præstantioribus ingeniis remittere . Hinc *solidam* e. g. *Matheſim* meditationibus committere vel le sine præfidio *plane*, ineptire est , aut prorsus insanire . Quo spectat Juyenalis illud Sat. XI:

..... *Burse*

*Noſcenda eſt meſura tuæ , ſpectandaque
rebus*

*In ſummis , minimisque . Cum piſcis ematur,
Ne multum cupias : cum ſit tibi gobio tan-
tum*

In oculis

Ceterum ob ſolam rei difficultatem , quæ ut rebus ceteris , ita & in meditationibus incun- dis primum in animum incurrat , non ſtatim deſiciendus eſt animus , nec inquiſitio abjicienda . Secus nihil egerimus umquam , nec ſcientiarum limites ultra protenderentur . Quamobrem meminerint , altaque heic mente reponant ge- neroſi tirones , pulciora & utiliora inventa , ut laborioſiora ac difficiliora plerumque eſſe ſolent , ita & generoſe enitentiſ ingeniū ſint , oportet , & conſtanter inquirentiſ . Quam infor- miſ , ac ſcheletro ſimiliſ adhuc Aſtronomia for- eſſet , ſi equeſ Newton ſub initium difficultate perterrituſ vires ſpoſondiſſet , animumque ab illiuſ ſtudio avocaſſet ? Quam contra aucta nunc , perpolita , atque ad perfectioniſ fere cul-

men & apicem evecta, propterea quod difficultates omnes, quæ initio sibi objecere, intrepido, generosoque conculcavit pectore, obfirmatoque animo superavit!

§. LXXXI. Monitum secundum: *Quæ humanum captum prætergrediuntur, non esse illa metaphysicæ inquisitioni subjicienda*. Scilicet utendum intelligentiæ viribus, quemadmodum vires corporis adhibere solemus, quas trahendis, aut elevandis, aut deferendis ponderibus nunquam impendimus, nisi horum renisu illæ intentiores fuerint ac robustiores. Eadem prudenti æconomia utimur in usu ceterarum facultatum. Oculorum aciem non intendimus ultra intervalla, ad quæ pertingere potest. Item & auditus. Nec gressus ultra dilatamus, nec expandimus brachia, quam expandere, aut dilatare possumus. Sunt arcana quædam adeo involuta, ut sempiterna quædam & immobilia obstacula interposita videantur, quæ illa nobis celent, occultentque. Quantopere a sublimioribus ingeniis adlaboratum in evolvendo mentis corporisque commercio? Nihilominus post totosque labores hæremus adhuc *in mysterio*. Idem dixeris de *permissione malorum*: idem de *origine gravitatis*: idem de millenis aliis vulgo notis. Hæc igitur in inquisitionibus metaphysicis prætereunda. Nam *vitium est*, inquit scite Cicero in priori de Officiis, *quod quidam nimis magnum studium, multamque operam in res obscuras . . . conferunt*. Næ plane ridiculus, aut insanus is proculdubio foret, qui ultra in-
ter-

tersectum montem bovem, aut equum prospicere contenderet !

§. LXXXII. Monitum tertium : *Nihil idcirco falsum reputandum, quod ab humana intelligentia comprehendendi non possit*. Hæc enim parvitate sua non est veri norma atque mensura . Si eoque ejus vires protenderentur, ut nihil veri ipsam lateret ; falsa tunc essent omnia, quæ ab se comprehendendi nequirent . Nunc contra se se res habet . Millies quippe ac millies majora numero sunt, quæ ejus vim prætergrediuntur, quam quæ certa & explorata habet . Fuit olim istud Dogmaticorum (si quidem ii extitere umquam) delirium (Lib I. §. 105.), ut nihil se ignorare putarent . Verum ut nulla est fœditas sine amatore, ita nulla absurditas sine patrono ; quod Senecæ sapienter adnotatum . Quam prudentior, ac modestior magnus ille Augustinus, dum monet, *melio rem esse fidelem ignorantiam, quam temerariam scientiam* ! Quid igitur falsæ verique norma fuerit atque mensura ? Scilicet est norma falsi manifesta dumtaxat pugna & oppositio subjecti cum prædicato . Quemadmodum vicissim norma veri manifesta eorundem connexio . Ubi neutra adfulserit ; suspendenda tunc potius ex prudentiæ legibus judicia erunt, ac res inter arcanas, & ignotas accensendæ ; non autem putandæ falsæ, quod eas comprehendere nequeamus .

§. LXXXIII. Monitum quartum : *In inquisitionibus metaphysicis mentis attentionem supra modum intendendam* . Mentis attentio est ejusdem

eiusdem adplicatio rei , quam contemplamur ; quemadmodum *attentio* sensuum est eorundem adplicatio rebus , quas observamus , aut experimur . Quare sicut absque sensuum adplicatione nil videmus , nihil audimus , nihil sentimus ; ita nec intelligere possumus quidquam absque mentis attentione . Ea autem maxima esse debet in inquisitionibus metaphysicis ; propterea quod earum objecta , quia captu difficiliora , facilius mentis aciem eludunt . Itaque *attentio*, eaque seria , nimisque intenta , spectanda velut frænum , quo res menti objectæ immobiliter fixæ detinentur , ne avolent , & evanescant . Porro sive cogitemus quidquam , sive agamus , *attentio* adeo ubique necessaria , ut sine illa plene intenta nihil unquam fuerit in cogitationibus , actionibusque nostris pulcri , nihil concinni , nihil ordinati . *Attentioni* contraria est mentis *alienatio* : quæ quum magna est , modumque excedit , ne fragorem quidem tormenti bellici audire sinit , nec ustionem ex adposito igne sentire ; quemadmodum de presbytero illo Restituto narrat S. Augustinus .

§. LXX IV. Monitum quintum : *Nihil spectandum ex parte , sed omnia ex relationibus ad totum dijudicanda* . Universum quippe , sive sensibile & corporeum , sive intelligibile ac spiritale , opus proculdubio est summi consilii , mentisque infinita sapientia , infinitaque intelligentia pollentis . Cuncta igitur in eo *nexa & ordinata* . Quivis autem *ordo* id omnino postulat , ut *toti ordinati* partes ad ipsum totum

tum referantur, in quo sunt, & propter quod ita potius quam aliter *nexæ*, & *ordinate* sunt. De iis igitur, bonæ ne sint an malæ, pulchræ an deformes, utiles an inutiles & supervacaneæ, ac ita porro, iudicium omne ferendum ex relationibus, quas habent ad totum, in quo sunt, & propter quod ita potius quam aliter sunt. Ea de causa ridiculus plane haberetur & ineptus, qui de data quavis horologii particula *seorsum* iudicare vellet, fore scilicet illam e.g. utilem aut inutilem, bonam aut malam; nec prius referret illam ad integram horologii machinam, in qua est, & propter quam ita potius quam aliter est. Quin *de ideis* omnibus, rebusque *relativis* ea recte, ut diximus (§.17.), iudicandi præcepta sunt, ut prius nempe ad se mutuo apta collatione referantur.

§. LXXXV. Monitum sextum: *Præcavendum summo studio, ne ullibi in phanatistum ruatur.* Est porro *phanatismus* vehemens phantasiæ sive imaginationis inflammatio ac perturbatio, qua in quibusdam magni momenti rebus, præsertim ad religionem pertinentibus, excitatis nonnullis imaginibus, vividissimisque *idolis*, vera illa ac *realia* credimus, videreque proinde nobis videmur, quod non videmus. Ejus scatebra, si recte conjicio, inde est, quod aut aliorum dictis plus æquo credamus; aut quod nimium amemus nostra, præsertim si nova, si pulchra, si jucunda, si rata, ac præstantia nobis videantur. Ea quippe larvarum origo: ea spirituum mortuorum hominibus adparentium: ea plurimum de-

denique illusoriarum adparitionum femellis creditarum, & jactatarum. Facilius est autem abstracta & intelligibilia meditando in phanatismum ruere; quod vis imaginatrix magnas in his partes habeat; atque attentione ipsa mirum præterea in modum incalescat. Inde *idola* illa, quæ aut aliorum dictis nimis creduli, aut nimium amantes nostra, mirum in modum augeamus, ac delirantes *vera* credimus, *sensibilia*, *realia*; quum non sint nisi *ficta*, & *adparentia*: ut illa delirantium, ut alia somniantium, ut omnia mentecaptorum. Præcavetur autem quamfacillime phanatismus omnis, si quæ menti velut præsentia fiunt, ac *realia* videntur, rigido, pacato, atque ab omnibus affectibus libero examini subjiciantur: tum nihil tamquam *verum*, ac *reale* credatur, nisi argumentis plane indubiis atque perspicuis tale esse constiterit, quale videtur. Quod examen si iniri tunc æstuante imaginatione non potest; ineatur saltem postea ea sedata, ac pacatiore facta (a).

§.

(a) Vide L. A. Muratorium in eximio opusculo, cui titulus: *Riflessioni sopra il buon gusto &c.* Par. I. cap. XI. Quum autem de *phanatismo* in meditationibus præcavendo sermonem heic instituerimus, monendi studiosi tirones, inter abnormes ipsius fœtus *materialismum* in primis, *fatalismum*, ac *panteismum* sive *spinozismum*, de quibus copiose Metaphysici, esse accensendos. Quum enim *recta ratio* tamquam immania errorum monstra atque portentia, religioni non minus, quam societati, hominisque ipsius ingenitæ excellentiæ ac dignitati tantopere infensa

§. LXXXVI. Monitum septimum : *Imper-
scrutabiles Dei fines in mundi regimine &
œconomia non esse curiosius perscrutandos*. Mens
quippe illa infinita, infiniteque intelligens in-
finitos proculdubio fines, infiniteque sapientes
sibi præfigere potest in Mundi regimine & æco-
nomia, qui humanæ intelligentiæ exilitati sint
prorsus inaccesibiles, & impervii. Quare eos
curiosius perscrutari, & superbissimum est, &
otii plenum. Cuinam, quæso, ludibrio &
cachinnis non subjiceremus ipsi muscam, aut
for-

fenſa & oppoſita eos damnet, atque reſellat; cui-
nam cauſæ alteri tribuendos putabimus, niſi *ima-
ginationi* ſive *phantafiæ* ſupra modum æſtuanti ac
perturbatæ, vel ob immoderatam innovandi pru-
riginem; vel ob nimium erga nos noſtraque amo-
rem & exiſtimationem; vel ob cordis ipſius corru-
ptionem, vivendique licentiam; vel denique ob cœ-
cam nefandorum alias hominum deliriis credulita-
tem? Sunt & alia id genus monſtra, ut *deiſmus*,
ut *epicureiſmus*, ut *idealismus*, ut cetera, in quæ
phanatici ſimul perverſique homines eiſdem de cau-
ſis turpiter lapſi ſunt; quæque ſummo ſtudio, ſum-
maque diligentia præcavere oportet in meditationi-
bus ineundis. Illud autem præ ceteris admirandum
ſtupendumque valde, quod quum obnormium hujus-
modi humanitatis opprobriorum pudere nos nimium,
ac tædere oporteret; præclara viciffim, & eximia
inventæ Incredulis ac Libertinis jactantur, ad quæ
mores etiam exigendi ſint, & conformandi! Adeo
ne veri ac falſi, boni ac mali, turpis & honeſti
ideas involvimus, confuſimus, immutavimus, de-
formavimus? Crederet ne id umquam vel Judæus
apella?

formicam, si hominum consilia scrutari se, & comprehendere posse jactaret? Quam tamen proximior muscæ anima mentibus humanis est, quam hæ divinæ menti, & intelligentiæ infinitæ? Magnus philosophus, multoque sublimior theologus, cælestique præterea lumine afflatus erat Apostolus Paulus: nihilominus in ea æconomia aliquoties perscrutanda exclamare coactus est: *O altitudo divitiarum sapientiæ, & scientiæ Dei, quam incomprehensibilia sunt judicia ejus, & investigabiles viæ ejus!* Itaque ut noscamus, quod omnia sancte, justeque gerantur, quæ in mundi regimine fieri observamus, sat a priori nosse erit, quod ea gerantur a Deo, cujus natura bonitas, cujus judicia æquitas, cujus sapientia ordo: nec quidquam inquirendum erit ultra. Alioquin audaciores, ac temerarii scrutatores Majestatis facti, opprimemur a gloria.

§. LXXXVII. Monitum octavum: *Vitandam ubique impietatem, ac superstitionem, puramque religionem ex animo percolendam.* Est porro impietas sive atheismus opinio, qua Deum minime existere blasphematur. Ad quam & deismus quoque spectat, & epicureismus, qua præcipue parte omnem providentiam e medio tollere conantur. Superstitio vero est religionis cultus vel ei exhibitus, cui non debetur; vel exhibitus quidem, cui debetur, at forma, & ritibus cum ipsius natura maxime pugnantibus. Hujusmodi in primis est idolorum cultus; tamquam iis exhibitus, quibus non debetur.

betur. Tum cultus quoque vero quidem Deo præstitus, aut ritibus vel obscænis, vel mores hominum depravantibus, vel falsis cum opinionibus conjunctus: putando e. g. esse illum aut invidum, aut crudelem, aut nostri indigum. *Vera* demum ac *pura religio* cultus est nedum Deo vivo ac vero exhibitus; sed & ritibus etiam ac formis nedum mores hominum perficientibus, sed & ipsiusmet quoque Dei naturæ maxime consentaneis, nec ullis falsis cum opinionibus permixtus, & copulatus. Hæc, inquam, errorum monstra ubique devitanda: hæc religio pura & sancta summo studio, menteque casta custodienda, ac percolenda. Nam si est quidquam in humanis, divinisque disciplinis certi, manifesti, & explorati; id proculdubio & Dei omnium conditoris, ac provisoris, parentisque amantissimi existentia est; & purus, sanctusque religionis cultus ei tantum debitus, ac jure meritoque exhibendus. Adeo ut nedum scelestissimi, sed & maxime insipientes & ignari habendi sint illi, qui tam perspicuis, tantique momenti veritatibus præfractæ adversantur: licet *atheos ex animo* nec extitisse umquam, nec existere posse non dubitemus.

§. LXXXVIII. Monitum nonum: *Inquisitiones, quæ super revelatam religionem fortasse fiunt; oportere esse illas humiles, ab omni affectu liberas, supernoque Dei lumine indivulse sociatas & collustratas.* Principio oportet illas esse humiles. Id enim obsequii ac reverentiæ ab homine
exigit

exigit divinorum codicum, in quibus *revelata religio* continetur, auctor Deus. Id Dei verbum in illis exaratum. Id hominum gratitudo, qui Scripturis sanctis, tamquam *Epistolis e caelo missis*, ut Patrum formula utar, ad justitiam & sanctitatem instruuntur. Alioquin tamquam audaces ac profani inquisitores confundentur in superbia sua. *Scriptum est enim*, inquit Apostolus I. Corinth. 1: *Perdam sapientiam sapientium, & prudentiam prudentium reprobabo, superbam scilicet, & inflatam. Quia sapientia hujus mundi*, teste eodem Apostolo ibid. cap. 3, *inimica est Deo.*

§. LXXXIX. Tum necesse est, easdem inquisitiones esse ab omni affectu liberas. Secus enim non id, quod loquutus est Deus, sed quod ipsi volumus, ut sit loquutus, in divinis eloquiis legere nobis videbimur. Nam quæ volumus, facile fingimus: inde facilius credimus: postremoque difficilius tamquam falsa, & commentitia abjicimus. Quin ex præjudicatis opinionibus, cordeque corrupto *revelationis* examen instituendo, facillimum quoque fuerit ne tamquam Dei verbum quidem eam agnoscere; refellereque subinde illam ut hominum inventa, profanasque doctrinas. Id quod iusto Dei judicio contigisse novimus *Deistis*, *Libertinis*, ceterisque audacioribus id genus hominibus; ne mores scilicet, vivendique rationem ex eadem sancte recteque componerent; ac ita ad interitum servarentur, ut, ni resipiscant, reipsa servantur, æterno supplicio puniendi.

§.

§. XC. Tandem esse debent eadem inquisitiones super *revelatam religionem* institutæ superiori Dei lumine collustratæ . Quum enim profunda nimis sint eloquia Domini , ac varios præterea in sensus flecti possint ; alterutrum proculdubio contingere oportebit ; aut nimirum ex illis futuri erimus , qui *videntes non vident , & intelligentes non intelligunt* ; aut (quod longe funestius) ex illis , qui germanum Scripturarum sensum pervertentes , impia ex illis dogmata , absurdasque ac falsas opiniones cum *hereticis* ad suam ipsorum perditionem exhaustiunt . Imitandi itaque ea in re Ecclesiæ Patres , in primis Hieronymus , qui divina Biblia non prius legenda ac meditata aperiebat , quam ante Crucifixi imaginem in terram humillime provolutus esset , ac precibus ex imo corde profusis mentis illustrationem a Patre luminum exorasset . Immo (quod longe notabilius) ipsimet Prophetæ , licet divinitus afflati , novi luminis affluxum eundem in finem a Deo postulabant . Quo spectat Davidis numquam memoria excidenda deprecatio illa : *Da mihi intellectum , & scrutabor legem tuam , & custodiam illam in toto corde meo .*

§. XCI. Monitum decimum atque postremum : In *metaphysicis inquisitionibus* non esse diutius , aut perpetuo immerandum , sed redeundum per vices ad communia societatis commoda procuranda . Prima enim lex hominibus lata lex est *laboris* , non perpetuæ meditationis . Hinc Democritus viris doctis merito re-

prehensus & irrisus ; quia , quum colendæ telluri operam dare debuisset , de construenda vicissim tellure assidue cogitabat . Tum homines in mutuum auxilium , mutuamque utilitatem fieri ac nasci nemo ignorat , Quamobrem ut plurimorum ipsi societatis bonorum participes quotidie reddimur ; ita & gratitudinis , & incommutabiles justitiæ leges postulant , ut agendo , laborandoque eidem reciproce adjumento simus . Atque hanc exploratissimam , magnique momenti veritatem nemo melius animo intellexisse , & comprehendisse videtur sanctissimo parente Francisco , qui ut Fratribus , literarum studiis operam novantibus , rectam vivendi normam daret , aiebat illis *Opusculor.* pag. 504. *Orac.* 3: *Tantum habet homo scientiæ , quantum operatur , Et tantum est religiosus bonus Orator , quantum ipse operatur . Arbor namque ex fructibus cognoscitur .* In quem locum , licet nonnihil immutatum , præclare L. A. Muratorius *Rifless. sopra il buon gusto* par. II. cap. postremo ; *Non si sa* , inquit , *che S. Francesco d'Assisi passasse mai per un gran Letterato . Sembrami nondimeno , che egli più ne sapesse di moltissimi Letterati , allorchè disse , e col suo esempio comprovò quella sentenza , che io vorrei impressa nel cuor di noi tutti : TANTUM SCIT HOMO , QUANTUM OPERATUR (a) .*

CA.

(a) Sunt & monita , sive animadversiones alie , quas præ oculis habere semper oportet in metaphysica

C A P U T IX.

*De usu rationis in metaphysicarum veritatum
inquisitione per ratiocinia.*

§. XCH. **P**rimus rationis usus in metaphysicarum veritatum investigatione est per vulgaria ratiocinia, quæ *directa* dicuntur (§. 56.), eaque sive *a priori* sive *a posteriori*,

P 2

ficis meditationibus incundis. Eas tamen brevitatis gratia prætermisimus, principales tantum produxisse contenti, & utiliores. Verum binæ aliæ leviter saltem attingendæ ac delibandæ, quæ magnâ quoque momenti videntur, nec omnino prætereundæ. Harum prima est: *Interiorem mundi ordinem ac nexum non esse adeo fatalem ac necessarium, neque divine quidem subsit voluntati, & imperio.* Quum enim mechanicæ leges omnes, quibus is nexus & ordo regitur, a Deo liberrimo rerum omnium opifice rebus ipsis adfertæ, tributæ, ac velut infixæ, & communicatæ sint; suspendere consequenter illas, moderari, destruere etiam, ac immutare poterit, ubicumque, quandocumque, & quomodocumque sibi placuerit. Hinc si in prima rerum adspectabilium formatione statuit mari terminum suum, & legem posuit aquis, ne transirent fines suos; nihilominus diluvii tempore, ut humanum genus vitiis ubique corruptum atque scædatum iusta punitione necaret, ea lege suspensa, aquæ statis sibi finibus abruptis ac prætergressis, exundarunt, operueruntque universam

su-

steriori, sive *simplicia*, sive *composita*. Horum

superficiem terræ. Item si præcepit soli, ut in sua orbita constanter moveretur, atque *in circuitu pergens, lustransque universa in circulos suos reverteretur*; tamen ut de Gabaonitis per servum suum Josue alcisceretur cruentissimo bello, ad plures horas stare illum jussit, stetitque medio cælo. Mitto ceterarum nam solius pertinacis, maximeque refractarii est, liberum supra opus suum imperium ac moderamen in artifice non agnoscere. Atque hinc latissime nunc via sternitur ad *miraculorum*, effectuum scilicet supernaturalium ad hunc nexum & ordinem minime pertinentium, possibilitatem adversus Incredulos evincendam, ac demonstrandam. Quæ de re plura a nobis dicta Tom. II. *Verit. resurrect.* J. C. heic recolenda.

Est & animadversio altera: *Phænomena omnia, quæ usque in finem successive evolvuntur, ita a Deo affixa rerum ordini ac nexui censenda fore, ut iis præcise temporibus singula eveniant, quibus reipsa eveniunt; idque ob sapientissimos fines infinita ipsius intelligentiæ notos.* Constant partes singulæ. Prima. Est enim Deus universi auctor; ideoque rerum nedum permanentium, quales sunt substantiæ, sed & successivarum, qualia sunt phænomena, effectus scilicet ac mutationes omnes, quæ in illo contingunt. Ea igitur rerum nexui affixit, inseruitque. Quæ pars prior. Secunda. Phænomena omnia, quæ huic nexui affixit, inseruit ea proculdubio evolvenda non casu, non tumultuarie, non fortuito, sed ordine ac serie sibi prævisa, atque decreta. Inseruit ea igitur successive evolvenda *iis præcise temporibus, quibus reipsa eveniunt.* Quæ pars secunda. Tertia. Agentia ratione prædita, quum agunt, *propter finem* agunt. Multo magis igitur infinita illa mens, infinitaque

rum vis ac pondus tale tantumque est , ut si

P 3

ea

nitaque intelligentia pollens, ob sapientissimos fines agit, quæcumque agit . Iis igitur *præcise* temporibus, quibus jam eveniunt, phænomena universa evolvenda decrevit ob sapientissimos fines ipsius intelligentiæ notos. Quæ pars postrema. Sed hæc nimis generica & abstracta, aptandaque proinde exemplo alicui portentosiori, quo tironibus sensibilia reddantur, & clariora. Sitque illud horribilis *terremotus*, qui quinque ab hinc annis tantopere heic nos perterrituit, exagitavitque: cui substitui pro opportunitate poterunt famis, pestis, incendia, alluviones, cetera. Ea igitur *terre concussio* affixa jam primitus, insertaque a Deo fuit interiori nexui ac structuræ telluris, ex cavitatibus, mineralibus, ignibus, aquis, solidis, ac fluidis ceteris compactæ (*ex par. 1.*); ut eodem *præcise* tempore fieret, quo jam evenit (*ex par. 2.*); idque ob sapientissimos fines sibi notos (*ex par. 3.*). Quinam autem fines isti? Quantum generatim conjicere possumus, sunt, ut alios scilicet, quos vitæ reservavit, a peccatis avocaret *ex misericordia*; alios, quos horribili strage interemit, *ex justitia* puniret. Nam sub Deo justo nemo quidquam patitur, nisi prius mereatur. Hæc mere philosophica, & *ex naturali ratione*, *recta* nimirum ac *pura* deducta: quæ *revelatio* mirum postea in modum confirmat, dum flagella omnia Deo irascenti & ulciscenti immediate attribuit. Ut adeo nec Philosophum esse oporteat, nec Theologum, qui in dubium ea vertere audeat. Quin & plane stupidi, aut perversi, & obcæcati censendi sunt illi, qui harum *concussionum* tempore minime concutuntur, nec Deum *per penitentiam* sibi proprium reddunt, interea dum colles, saxa, montes illius iram, ac vindictam perentiunt, & contremiscunt.

ea recte constructa & conformata fuerint, inventam veritatem velut digito commonstrent: nec fieri ullo modo poterit, ut in veri a falso discrimine nos aliquando decipiant. Si enim duæ illæ *extrema idea* (§. 52.) reipsa, nec adparenter tantum, cum *media* conveniant; tam possibile erit, secum invicem minime illas convenire, quam est possibile, ut, *quæ cum tertio conveniunt, non conveniant inter se*. Quod equidem impossibile. Alioquin convenirent simul, & non convenirent cum eadem *media idea*: haberent scilicet eandem *notam*, quam ipsa habet, & per quam cum eadem conveniunt, ex hypothesis, & non haberent; quia secus inter sese mutuo etiam in eadem *notâ* convenirent. Ideoque esset simul quidquam, & non esset: quod *per principium contradictionis* repugnans est & impossibile: quia nulla res constare potest ex iis, quæ sese mutuo destruunt.

§. XCIII. Opponit ad hæc summus scepticorum patronus & coriphæus Bayle mysterium Trinitatis, in quo tres Personæ conveniunt cum divina natura; quia ex doctrina fidei *Deus est Pater, Deus Filius, Deus Spiritus Sanctus*; at non conveniunt, inquit, inter se; quia *alia est persona Patris, alia Filii, alia Spiritus Sancti*.

§. XCIV. At inepte, neque ut quidquam adversus exioma illud statuatur, sed ut idem potius Trinitatis mysterium impius, nulliusque fidei homo evertat. Nam sacrilegos & audaciores
ejus

ejus conatus adversus christianam Religionem, quibus impium *Dictionary* ejus *historico-criticum* scatet universum, plane novimus. Inepte, inquam. Quia trium Personarum convenientia cum divina natura non est penes *hyposteses*, sed penes naturam ipsam, quatenus ea singulis inest: atque in eadem natura hoc sensu inter se quoque conveniunt: quia *Deus est Pater, Deus Filius, Deus Spiritus Sanctus*. Ita & productum axioma verum est, & Trinitatis mysterio maxime consentaneum, nec ullo modo adversum.

§. XCV. Ut ejusdem ratiocinii vim elidat, opponit hæc alia scepticus auctor Opusculi sæpe citati *de imbecillitate mentis humanæ*. Inquit: Nullum ratiocinium constare potest absque *enunciatione universalis*, in qua conclusio contineatur; quamquam implicite ea sæpe tantum subintelligatur, nec enunciatur semper explicite, ut in *enthymemate*. Quare in omni ratiocinio particularis enunciatio probatur per universalem. Ast universalium veritas non constat nisi ex *inductione*, ac veritate particularium. Itaque concludit: in omni ratiocinio *probatur idem per idem*, admittiturque *circulus vitiosus* (§. 71.): proindeque nihil probatur.

§. XCVI. Respondet Muratorius in opposito Opusculo *de viribus intellectus humani*, propositionem universalem pendere quidem ex veritate particularium; at quum ea in ratiocinii *antecedente* adsumitur, non comprehendi in eadem *enunciationem* particularem, quæ per

eandem probatur, & in conclusione deducitur; licet ceteræ particulares omnes comprehendi intelligantur. Quare ratiocinium ita constructum immune est a vitio *dialleli*, sive *circuli vitiosi*. Ita fere vir clarissimus. Verum firmior solutio mihi videtur hæc alia, si dicatur, universalium enunciationum veritatem, quæ *contingentes* tantum fuerint, pendere ex enumeratione particularium, non item quæ *necessaria* dicuntur (§. 32.). Harum namque veritas ex *nexu* ipso arctissimo, ac indivisibili pendet attributi cum subiecto; quo *nexu* fit, ut quemadmodum idem attributum a subiecto inseparabile est, ita quidquid subiecti naturam & essentiam præfert, eidem insit, oporteat, ipsummet prædicatum. Ita quo sciam, in omni circulo radios omnes esse inter se æquales, nulla circulorum possibilium & existentium enumeratione opus est; quum id simpliciiori via scire possim, ad solam circuli naturam, a qua ea radiorum omnium æqualitas inseparabilis est, ac fluit, oculum attentionemque intendendo. Quare quum alia via constet universalium enunciationum veritas, alia in ratiocinio probetur veritas particularium; nullus consequenter inter ratiocinandum *circulus* committitur *vitiosus*: ac firma proinde remanet ratiocinii vis rite constructi.

§. XCVII. Haud itaque dubitandum, quin firmissima semper sit ratiociniorum vis, ubi rite ea fuerint, legitimeque constructa. Quare adnoscendum potius, ut rite construantur: ut antecedentes

centes scilicet enunciationes veræ sint, & consequens legitime ex illis deducatur. Qua de re dictum suo loco (§. 54.). Veræ autem enunciationes, quæ sint *primæ veritates*, *primæque cognita*, ac velut ceterarum semina, & elementa prima, tribus ex fontibus in nos derivantur: 1. *sensuum experientia*: 2. *immediata mentis intuitione*: 3. *sensu intimo*. Quibus 4. loco accedunt *veritates derivativæ*, quæ aliunde nimirum firmatæ prius, ac demonstratæ fuerunt. Ex his *ratiocinii* ope intelligibiles & abstractæ veritates inquiri & inveniri possunt longa serie. Magnum autem artificium in eo constitutum, ut, eisdem *primitivis*, aut *derivativis* veritatibus positis, seria attentione observetur, quibusnam cum rebus, rerumque *notis* eæ relationem habent, atque cum illis conferantur. Nam facillimum tunc fuerit novas veritates, ac longa serie ratiocinando detegere. Exemplis rem totam illustremus.

§. XCVIII. Principio sit primitiva veritas isthæc *sensuum experientia* parta: *Corpora perpetuis vicissitudinibus sunt obnoxia*. Confero illam cum *notis* entis immutabilis, cum quæ relationem habet; atque ratiocinii ope veritatem *derivativam* invenio, *corpora* scilicet *non esse immutabilia*, in hunc modum: *Immutabilia non sunt vicissitudinibus obnoxia* (quæ nota entis immutabilis). *Corpora autem sunt perpetuis vicissitudinibus obnoxia* (quæ veritas primitiva sensuum experientia parta). *Corpora igitur non sunt entia immutabilia* (quæ prima

ac nova veritas derivativa). Tum vero eandem veritatem de novo inventam confero cum notis entis *necessarii*, atque ope secundi rationcinii detego, *corpora non esse entia necessaria*, hoc modo: *Ens necessarium est ens immutabile* (quæ nota entis *necessarii*). *Corpora non sunt immutabilia* (quæ prima veritas derivativa inventa). *Corpora igitur non sunt entia necessaria* (quæ secunda veritas derivativa). Pergo ulterius, atque secundam hanc veritatem cum notis confero entis *æterni*, opeque tertii rationcinii invenio tertiam, hac methodo: *Ens æternum est ens necessarium* (quæ nota entis *æterni*). *Corpora non sunt entia necessaria*. (quæ secunda veritas inventa). *Corpora igitur non sunt æterna* (quæ tertia veritas derivativa) : & ita porro .

§. XCIX. Eodem rationis artificio, eodemque ordine facillimum quoque fuerit ex veritatibus aliis *primitivis*, sive *immediata* mentis *intuitione* cognitis; cujusmodi sunt *axiomata* omnia; sive *sensu intimo*, ut *esse nos*, *vivere*, *cogitare*, longas novarum veritatum series invenire. Harum exempla brevitatis gratia prætereo. Nam tironibus ingeniosis, atque ardentiori addiscendi studio & cupiditate flagrantibus sat digito fontem demonstrasse fuerit; ut fecimus. Quamobrem ii monendi tantum, ne in novarum veritatum seriis ope *ratiocinii* evolvendis & contexendis aliqua ullibi enunciatio aut falsa, aut anceps intejiciatur; neve per vim, ac reluctante natura conclusio aliqua deducatur. Alioquin

quin subsequens serici pars, quantumvis in longum protensa, pulcherrimeque contexta, mole sua collabatur, tamquam ruentibus, nec satis firmis fundamentis superstructa.

C A P U T X.

*De usu rationis in metaphysicarum veritatum
inquisitione per analysim.*

§. C. **M**ethodus generatim est ars idearum, cogitationumque nostrarum ordinatrix, ut, quoad per humanæ mentis imbecillitatem fieri potest, nihil in iis sit obscuri, nihil perturbati, nihil confusi. Quantum ea viro in primis docto, ac philosopho necessaria sit, dictum Lib. priore (§. 95.) : ubi & præcipua quoque præcepta ejus, ad quorum normam componenda, tradidimus (§. 96.). Ceterum eandem quoque spectant Libri hujus caput VII. & VIII. tum pleraque alia pro opportunitate in locis aliis adjecta.

§. CI. Dividunt porro methodum in *analyticam*, & *syntheticam*. Quod factum bene. Verum quum in utraque expendenda secum invicem Logici pugnant e diametro, id emendatione eget, veræque commentationis substitutione. Equidem sunt, qui *analysim* ad veri inquisitionem, *synthesim* ad docendi munus spectare contendunt. Alii contra quæ docentur,
ana.

analytice doceri volunt ; quæ autem inquiruntur , *synthetice* pervestigari . Nec ea tantum scribendi pugna . Nam quæ uni *analysis* definitio est , alteri est *synthesis* , & vicissim . Ita quum de methodo *cogitationum ordinatrice* philosophantur , cogitationes ipsas , germanam methodi naturam spectantes , immaniter perturbant , & involvunt . Adeo ut *methodi methodo* (nam quis temperet a falibus ?) opus sit , quo perturbata *methodi* notio , ut oportet , evolvatur !

§. CII. Porro ego sic statuo . Primum , nihil vetare , quominus eadem methodo , qua quidpiam inventum ac detectum fuerit , eadem edoceatur . Nam si data via , nulloque duce occulta veritas cognita inquisitori fuit ; ecurr non eadem via , ipsoque postmodum inventore duce , eadem veritas jam detecta & cognita tradi poterit & auditori ? Duci igitur commodissime auditores in docendo poterunt eodem itinere , quod ipsi pressimus investigando ; modo tamen ea rescentur , quæ tentando , scrutandoque necessaria quidem fuerant , nunc docendo superflua . Qua de causa factum est , ut Logicam definiendo (Lib. I. §. 6.) , *artem* adpellaverimus *inquirendæ* tantum , non item & *docendæ veritatis* . Deinde utramque & ad docendum , & ad investigandum pro rerum indole atque natura esse aptissimam ; nec necesse fore , ut interjecto divortio altera secernatur ab altera . Quinimmo tam inter docendum , quam inter investigandum casus persæpe incidunt plures ,
in

in quibus ab *analysi* transeundum sit ad *synthesin*, & vicissim : adeo ut neutra utrique muneri obeundo se sola plerumque sufficiat . Tandem veram ac germanam utriusque notionem a vocabulis ipsis *analysis*, ac *synthesis* esse desumendam ; ne alia sit vis nominis, alia rei . His præobservatis, ad rem .

§. CIII. *Analysis* græce , ac *resolutio* latine unum idemque sonant , quemadmodum *synthesis* & *compositio* : de qua capite sequenti . Quum autem id , quod resolvitur , magis complexum esse oporteat iis , in quæ resolvitur ; hinc erit *analysis* inquisitionis quoddam genus, quo a generali cognitione compositi ad specialem intelligentiam & examen partium componentium sensim sensimque progredimur .

§. CIV. Porro *compositum* quum heic dicimus, id omne generatim intelligimus, quod plura in se complectitur, a quibus determinatur : quemadmodum & *partium* nomine ea , quæ complectitur , & quæ illud determinant . Hinc 1. *composita* sunt sensibilia corpora respectu partium componentium , & a se mutuo separabilium : nisi quod horum *analysis* manu fieri debeat, actione mechanica , arte chymica : sitque proinde Chymicorum propria, ad quos simplicium elementorum investigatio spectat , quibus *mixta* sive etherogenea corpora componuntur . 2. *Composita* etiam *physica* sunt eorundem corporum naturæ & essentiæ ex relatione ad *notas* earum *physicas* atque sensibiles, easque tam *constantes*, quam *variabiles* , quas complectuntur ; quarumque

rumque *analysis* pertinet ad Physicos, tamquam ea quæ observando, experiundoque sensuum ministerio iniri debeat. 3. *Composita* similiter genera omnia, ac species ex suis respective notis intelligibilibus & abstractis, ac relationibus præterea innumeris, quas præferunt; quorum *analysis* solius rationis est, & ad Metaphysicos pertinens. Sed & tota demum 4. & *composita* intelligibilia & abstracta, ideoque *metaphysica* sunt veritates, sive enunciationes omnes generales, quæ plures alias sub se particulares tamquam partes complectuntur. Quamquam harum aliqua per sese, ut axiomata, perspicua sint, nec ulla egeant demonstratione; nihilominus quia multo majora sunt, quæ demonstrare oportet, ut earum veritas nobis perspecta fiat; ea de causa tota, sive *composita demonstrabilia*, aut per demonstrationem communi vocabulo appellari possunt. Horum compositorum *analysis* & examen nedum ad Metaphysicos pertinet, sed & præcipue quoque a nobis spectatur utroque capite isto X. & XI. Sunt ea etiam magis minusque composita nedum pro majori minorique numero veritatum, quas complectuntur; sed & pro majori etiam minorique numero principiorum, ex quorum concatenatione mutua demonstrantur. Nam quo principia ista numero majora fuerint, eo tota ipsa *demonstrabilia* implicationiora, intellectuque difficiliora cernuntur; minus autem involuta, minusque intellectu difficilia, quo fuerint numero minora. Sat secum, invicem contulisse fuerit priora

priora Geometrarum theoremata cum posterioribus. Interim pergamus.

§. CV. Jamvero ut physica illa & compositorum sensibilibium, ita & hæc metaphysica & intelligibilium *analysis* sive resolutio novarum veritatum intelligibilium detegendarum feracissima est. Composita namque in suas partes resolvendo, tum partes singulas seorsum, diligenter, ac meditate examinando, facillimum fuerit in plenam earum intelligentiam devenire; atque nedum totidem novas veritates detegere, quot sunt partes ipsæ, verum & multo plures, juxta numerum aliarum *notarum*, quas ipsæ complectuntur; atque pro multiplici etiam relationum numero, quas ad res alias singulæ habere intelliguntur. Exemplum, quin extraneæ adsciscam, heic habent tirones in his elementis, prout sequitur.

§. CVI. Siquidem posita tamquam *toti* sive *compositi* cujusdam *demonstrabilis* notione Logicæ, esse nempe illam *artem inquirenda veritatis*, veritatem ipsam in tres classes primum resolvimus, *physicam*, *metaphysicam*, *historicam*. Deinde singularum *notis* diligenter enucleatis, totidem illas perscrutandi, & adsequendi media deteximus, *sensuum experientiam*, *mentis rationem*, & *auctoritatem* ad Criticæ leges exactam. Postac quum *artem* omnem datis quibusdam regulis regendam observaremus, eas deligendas curavimus, ac suis respective locis pro opportunitate stabilivimus. Tandem rebus quibusvis aliis, quæ cum his relationem ha-

haberent, eaque collustrare, aut firmare, aut etiam exornare possent, undique conquisitis, in plenam, ac distinctam elementorum, quæ Logica complectitur, cognitionem, prout heic exarata vides, sensim sensimque *analyzando* devenimus.

§. CVII. Quo autem humana *ratio* promptius, & expeditius *analysim* instituere possit, ad hæc potissimum præcepta oculum, attentionemque convertat. I. *Toti*, sive *compositi analyzandi* divisio juxta regulas alibi (Lib. I. §. 94.) traditas fiat. II. Vocabula aut obscura, aut ambigua ubicumque sese offerent, ex legibus ibidem (Lib. I. §. 91.) traditis adcurate definiat, ne in ancipiti laboret. III. Inquisitionem omnem, resolutione facta, ab ea parte incipiat, quæ ceteris præbere lucem potest. IV. Quæcumque cum eodem *composito*, aut cum illius partibus relationem habent, undecumque adsciscat, attenteque cum eisdem conferat. V. Quæ vero ad scopum minime conducunt, aut illi etiam adsequendo oneri sunt & impedimento, tamquam supervacanea ac noxia resecet prorsus, & abjiciat. VI. Inventas sensim sensimque veritates, prout naturalis earum ordo, nexusque postulat, in aptam seriem disponat. VII. Si hypothesis alicubi opus fuerit, eas ultro confingat, verum non ut retineat semper, sed ut *reales* veritates sic multifariam tentando e tenebris fortasse eruat. VIII. Ratiocinia, quæ ad res pro opportunitate firmandas persæpe inter *analyzandum* adhibentur, vera sint, firma,

le.

legitimeque constructa . IX. Corollaria ad rem spectantia undecumque , quum fieri poterit , deducat , aptoque in loco in eadem serie collocet . X. Utatur etiam , quum opus fuerit , scholiis ; ut prima inquisitionis lux ad finem usque constanter perseveret . XI. Quod si post *analyticum* examen , ob rei difficultatem , nihil fortasse novi detexisse contigerit ; sublimioribus eam ingeniis evolvendam committat ; ac interim inter ignotas , & arcanas reponat .

§. CVIII. *Analysis* his præsiidiis munita , si sæpe alias , in condendis præcipue *Operibus* maxime necessaria est . Quum enim in obscurum , & incertum duci calamus nulla ratione possit , præsertim apte & ordinate : necesse ob id omnino erit , ut integrum pertractandum evolvendumque argumentum (quod *toti* instar spectandum *demonstrabilis*) in majores primum partes resolvatur , quæ erunt velut totidem ejusdem Operis libri . Deinde libri singuli in totidem capita , ac singula capita in totidem paragraphos , tamquam in simplicia elementa prima , *summaria* velut distinctione partienda . Ea *analysisi* instituta , libri cum libris , cum capitibus capita , ac paragraphi cum paragraphis conferenda ; ut inde palam fiat , quæ præbere aliis lucem possint , quæ recipere : quæque fundamenti loco præmittenda sint , quæ illis superstruenda . Qua diligenti comparatione facta , omnia juxta naturalem nexum , quo sibi mutuo devinciuntur , ac alia aliis velut invitante natura succedunt , in ordinem , aptamque se-

riem collocentur . . Quibus in hunc modum compositis, habebitur velut totius *Operis* forma, compendium, epilogus, & *index*, in successiva illius constructione ob oculos perpetuo habendus, tamquam scientifici moliminis, itinerisque dux, norma, & comes, Postea a prioribus paragraphis ducto initio, construendi singuli, firmandi, explanandi, perpoliendi, ac pulchrioribus eruditionum fragmentis pro opportunitate exornandi. Ita integrum totius *Operis* corpus numeris omnibus absolutum habebitur, Verum id genus Opera magnorum ingeniorum, itemque patientissimorum, atque annosis præterea studiis plane subactorum labores esse debent, Alioquin in confusa, & abnormia *miscellanea*, massamque rudem, indigestam, & informem abibunt, magno cum lectoris tædio, & Auctoris dehonestamento,

C A P U T XI.

De usu rationis in metaphysicarum veritatum investigatione per synthetis.

§. CIX. **A**ltera *methodi* generatim pars, quemadmodum mox innuimus (§. 101.), est *synthesis* sive *compositio*. Ea proinde in veri investigatione, & adsecutione utimur, quum a *partibus* jam cognitis ad *compositi*, sive *toti*, quod in tenebris adhuc latet, in-

intelligentiam velut *componendo* adfurgimus . Ubi & *compositi*, & *partium componentium* notiones eædem heic nobis sunt , quæ superius (§. 104.) traditæ, evolutæque fuere . Atque ut ibi *analysis*, ita & heic *synthesis* in partibus a se invicem separabilibus Chymicis remittendæ : quemadmodum & *Physicis* quæ *synthesis* instituitur in *notis* corporum *sensibilibus*, & organa moventibus .

§. CX. Si *analysis* ac *synthesis* invicem conferantur, non sine animi oblectamento observabitur, prioris terminos initia esse posterioris : adeo ut ubi illa desinit, hæc incipiat, ac ubi desinit ista, illa initium ducat . Nam illa a *composito* fluit ad partes componentes ; hæc a partibus ad *compositum* inverso ordine regreditur . Quin & descendere eundo illa videtur ; hæc vicissim redeundo conscendere, & elevari . Unde pulcre quibusdam dictum , inquisitionem *analyticam* a toto ad partes spectandam velut descensum e montis vertice ad imam vallem : *syntheticam* vicissim a partibus ad totum velut ab ima valle ad jugum montis ascensum .

§. CXI. Si utilis quoque est *synthetica* methodus veritatibus perquirendis ac detegendis, siue physicæ sint illæ ac sensibiles , siue metaphysicæ & intelligibiles ; non æque tamen , si recte conjicio , ac *analytica* . Plerumque enim fit, ut sola partium , *notarumque* intelligentia composita simul ipsa absque novi examinis præsidio intelligantur : ac si quid occulti supererit perscrutandum , *notas* tantummodo id spectabit,

quæ ex earumdem partium conjunctione, viriumque attemperatione mutua de novo in composito oriuntur. Ita si corporis, animique proprietates perspectæ mihi fuerint & exploratæ; compositum ex utriusque conjunctione resultans eo ipso hominem esse dignosco. Ac si qui circa illum *synthetica* investigationi locus supererit, *notas* tantummodo spectabit, quæ ex corporis mentisque conjunctione, & commercio promanant. Ut proinde quum partium cognitio *analytico* debeatur examini, atque ex ea *compositi* intelligentia fere integra semet subsequatur: hinc & ejusdem quoque cognitio eidem *analyti* videtur adscribenda.

§. CXII. Atque hæc quidem de iis compositis dicta volo, quorum partes aut substantiales sunt, & a se mutuo separabiles, aut in *notis* sive sensibilibus, sive intelligibilibus consistunt; per quas eorum natura & essentia determinatur. Enimvero ubi *compositi* nomine universales veritates, *tota*, inquam, *demonstrabilia* (§. 104.) intelliguntur; dubitari non potest, quin hoc in casu post minus complexarum intelligentiam, multum sit *synthetice* nobis adlaborandum, ut compositiones aliæ ex illis eruantur. Compositior veritas, quæ in triangulo rectangulo æqualitatem spectat quadrati super hypotenusam cum summa duorum quadratorum super reliqua latera, diu Pythagoræ ignota fuit; licet minus complexæ veritates, ex quibus tamquam partibus intelligitur, ac *synthetice* demonstratur, plane perspectæ seorsum illi essent, & exploratæ. §.

§. CXIII. In his igitur compositorum generibus *synthetice* pervestigandis & utilitas erit plurima, & labor non exiguus. Quo autem a simpliciorum hujusmodi veritatum intelligentia in magis complexarum cognitionem deveniamus, conferendæ invicem ex omni adspectu eæ quamdiligentissime sunt, atque quidnam ex comparationibus singulis consequitur, acute, attenteque pervidendum. Ac si in prioribus comparationibus nihil fortasse novi adfulserit; iterandæ eæ denuo, ac sæpissime, atque nunc quidem binæ, nunc tres, nunc plures, nunc pauciores veritates in mutuam collationem adducendæ: Plerumque enim fit, ut duæ tantum simpliciores veritates, quavis ex parte conferantur, novæ, magisque compositæ pervidendæ ac intelligendæ non sufficiant: tum pares sufficientesque reddantur, statim ac in mutuam collationem adscita fuerit tertia, quarta, quinta, & ita porro. Ita collatis invicem duabus his simplicioribus veritatibus, 1. *mentem carere in agendo necessitate interna*: 2. *Et externa*; nondum plane intelligo esse illam *arbitrii libertatem* præditam; quæ veritas est magis composita. Intelligo id vero, statim ac in mutuam comparationem adsciscam hanc tertiam, *agere simul ipsam prævia rationis consultatione, atque ex solis motivis boni vel mali sibi propriis ad agendum determinari*. Id, inquam, intelligo *synthetice* ascendendo velut a partibus ad totum sive compositum in hunc modum: *Mens humana in agendo caret* 1. *necessitate interna*, 2. *Et*

externa, 3. agit *prævia rationis consultatione*, atque ex *motivis boni vel mali sibi propriis*. Quod autem ita agit, liberum est *libertate arbitrii*. Mens igitur libera est *libertate arbitrii*.

§. CXIV. Canones demum sive præcepta, quibus *synthetica inquisitio* regenda, eadem, magna saltem ex parte, mihi esse videntur, quæ pro *inquisitione analytica* superius (§. 107.) recensuimus. Ut proinde supervacaneum sit nova condere, & enarrare (a). Illud potius non omittendum silentio, veritates *synthetice* inventas, si cum aliis diligenter serioque conferantur, media esse posse novis semper ac novis in infinitum veritatibus magis compositis per-vestigandis, ac detegendis. Nam ea est *compositorum* conditio, ut quod respectu datarum partium *totum* est inferius descendendo; tum ascendendo superius pars quodammodo evadat altius

(a) In demonstratione *synthetica* construenda præteriri ex æquo geometrica enunciationum nomina possunt, quæ superiori Cap. IV. (§. 38. seq.) explicavimus, & distincte etiam pro opportunitate adhiberi. Utroque in casu ordo servandus is erit. I. Titulus præfigendus rei, de qua agitur, verbis quamperispicuis. II. Subjiciendæ *definitiones*, quarum est opus. III. Juxta notionem in definitionibus traditam aperiendus germanus quætionis status jam propositæ. IV. Si quæstio in sententiarum varietate sita sit, earum e vestigio historia contexenda. V. Juxta varias argumenti indolem atque naturam, proponenda *experimenta*, *observationes*, *axiomata*, *postulata*, &, si opus, etiam *hypotheses*. VI. Tum progrediendum

rius amplioris , magisque compositi . Theore-
mata in primis Geometrarum rei hujus exem-
pla suppeditabunt magna copia , quorum quæ
tota , scilicet *demonstrabilia* , sunt respectu præ-
cedentium , ex quorum concatenatione mutua
demonstrantur , in *partes* posthac degenerant
respectu theorematum subsequen-
tium , in quo-
rum demonstrationem cum aliis adsumuntur ,
& conglobantur .

Q 4 CA.

dum ad *lemmata* . VII. Lemmatis rite demonstratis,
proponenda *theoremata* , atque ex præmissorum con-
catenatione principiorum demonstranda . VIII. *Corollaria*
ad rem spectantia undecumque deducenda . IX. Ac
ubivis etiam necesse fuerit , *scholia* adponenda . X.
Graviores denique difficultates refellenda . Sunt dis-
sertationes plurimæ , ac integra etiam volumina
quum philosophica tum etiam theologica ea me-
thodo , quam & *syntheticam* , & *geometricam* , &
scientificam , & *naturalem* etiam adpellant , pulcre ,
sapienterque contexta . Eam & ipsi quoque adhibui-
mus in *Dominicæ resurrectionis veritate* adversus In-
credulos demonstranda , quam Tom. I. & II. si
placet , vide .

CAPUT XII.

De usu rationis in metaphysicarum veritatum investigatione per analogiam.

§. CXV. **A** *Nalogia* græce perinde est ac *similitudo* latine. Ea proinde utimur, quum id, quod dato generi convenit, ob naturæ similitudinem extendimus ad omnes generis ejusdem species; & quod convenit speciei, illius individuis ob similitudinem pariter naturæ aptamus. Prioris exemplum est: *Metallum est fusile* (quæ veritas generica). *Aurum igitur, argentum, stannum, æs, plumbum, fusilia sunt* (quæ speciebus adplicatio). Posterioris: *Circulus radios omnes à centro ad peripheriam du-ctos æquales habet* (quæ veritas specifica). *Circuli igitur A. B. C. D. &c. ita porro, omnes hujusmodi radios habent æquales* (quæ individuis adplicatio). Quo autem analogie usus rite procedat, nec ulla subsit errandi occasio, triplici omnino regula regenda est, quarum prima quum generis, tum speciei, & individuorum naturam spectat, secunda, & tertia eorundem notas, sive proprietates & attributa. Eæ autem sunt hujusmodi.

§. CXVI. *Analogie regula prima: Quum naturam generis species illius singulæ, tum speciei naturam singula illius individua complectan-
tur.*

tur. Hinc præcedentia exempla rite procedunt; quia tam generica natura metalli in auro, argento, stamno, ære, plumbo, ceterisque illius speciebus adservatur; quam specifica natura circuli in illius individuis A. B. C. D. comprehenditur. Quod si ea conditio desit, nullus erit analogiæ locus. Quare ridiculus plane & ineptus foret, qui analogiam sic adhibere vellet: *Corpus fluidum est sphericis, vel quasi sphericis particulis coagmentatum. Lapidēs igitur, herbæ, plantæ sphericis vel quasi sphericis particulis coagmentata sunt.* Item: *Triangulum est trilaterum. Lineæ igitur A. B. C. D. trilateræ sunt.* Ineptus, inquam: quia nec generica natura fluidi lapidibus, herbis, plantis inest; nec specifica trianguli ulli, convenit lineæ. Nam nec lapides, herbæ, plantæ fluidorum species sunt; nec lineæ A. B. C. D. triangulorum individua.

§ CXVII. Analogiæ regula secunda. *Note generis, quæ ad species illius singulas, & speciei notæ, quæ ad singula ejusdem individua extenduntur, & applicantur, tam cum generis, quam cum speciei respective natura, & essentia sint necessario, inseparabiliterque connexæ.* Esse, inquam, oportet ex notis constantibus & invariabilibus, non si fortuitæ ac variabiles fuerint, insint quidem generi, sed non speciebus singulis; ac si speciei, non singulis individuis, uti mox dicemus, inhæreant. Hinc quia nota extensionis solidæ constanter, ac necessario inest genericæ naturæ corporis; omnibus corporum spe-

speciebus aptari potest. Similiter & nota *ductilitatis* omnibus auri massis aptari poterit; quia specificæ naturæ auri necessario, & inseparabiliter inhaeret. Quare vi hujusce regulæ sic *analogice* progredi licebit: *Extensio solida necessario, & inseparabiliter inest genericæ naturæ corporis*. Omnes igitur corporum species *extensa solida sunt*. Item: *Ductilitas necessario, & inseparabiliter inest specificæ naturæ auri*. Singulae igitur auri massæ *ductiles sunt*. Ex quibus universalium propositionum omnium *necessariarum*, tam quæ *genericæ*, quam quæ *specificæ* adpellantur, vis tota pendet, & origo. Pendent nimirum illæ quidem ex eo, quod *nota generis*, quæ ad singulas species *universali* enunciatione extenditur, eidem generi *necessario*, & *indivulse* conveniat: ut in priori exemplo. Hæ autem, quia *speciei nota*, quæ *universali* quoque enunciatione omnibus aptatur individuis, eidem speciei *indivulse* pariter inest, ac *necessario*: ut in exemplo posteriore.

§. CXVIII. *Analogia* regula tertia. Nec fortuita *nota generis* ad species singulas, nec fortuita *speciei nota* ad singula individua extendantur absque prævia, perfecta quæ specie-rum, tum individuum inductio. Hujusmodi enim *nota* contingentes ac variables, licet insint generi, possunt tamen a quibusdam illius speciebus abesse; ac abesse quoque possunt a quibusdam individuis, quâquam illorum speciei inhaereant. Hinc quia *nota spatii una linea in se redeunte circumscripta* fortuito *statum*

tum convenit genericæ naturæ *figura* ; quum
 servari ea facillime possit in spatio tribus ,
 quatuor , quinque lineis comprehenso ; non-
 nisi errando ad singulas figurarum species absque
 perfecta inductione extenderetur . Similiter er-
 rando etiam extenderetur nota *aequalitatis tri-
 um laterum* ad singula triangulorum individua
 absque prævia , perfectaque eorundem inductio-
 ne ; quia fortuito tantum ea quoque convenit
 specificæ naturæ trianguli . Nam & *isoscelia* ,
 & *scalena* adhuc vera triangula sunt , licet illa
 duo tantum latera æqualia habeant , hæc omnia
 inter se inæqualia . Hinc intelligitur , cur uni-
 versales propositiones *contingentes* , sive *genericæ*
 illæ fuerint sive *specificæ* , efformari nequeant si-
 ne prævia inductione , perfectaque partium enu-
 meratione . Quia scilicet *fortuitæ notæ generis*
 a speciebus , ac *fortuitæ notæ speciei* ab illius
 individuis abesse possunt , absuntque sæpissime .
 Conferantur heic , & in præcedenti paragrapho
 alibi (§. 96.) dicta .

§. CXIX. Atque ad hos fortasse canones
 oculum , attentionemque intendens eques New-
 ton , circumterrestrium corporum *notas* ad cæ-
 lestia quoque extendit , aptavitque celebri re-
 gula illa : *Qualitates corporum , quæ intendi ne-
 queunt , neque remitti ; quæque corporibus omnibus
 insunt , in quibus experimenta institui licet ; præ
 qualitatibus corporum universorum habendæ sunt .*
 Quandoquidem id genus *qualitates* , sive *notæ* ,
 de quibus loquitur , *constantes* , & *invariabiles*
 sunt juxta regulam secundam (§. 117.) . Quæ
 enim

enim corporum *notæ intendi nequeunt*, neque *remitti*, eadem semper sunt, & invariabiles; atque necessario insunt, quibus insunt. Ideoque a genere ad species singulas, & a specie ad singula individua extendi, & adplicari possunt. Secus ac illis contigit, quæ varios *intensitatis*, ac *remissionis* gradus admittentes, inconstantes ac variabiles eo ipso sunt, atque interitui, & in alias quoque commutationi obnoxia: quemadmodum de coloribus, odoribus, saporibus, calore item, frigore, similibus, exploratum est: quæque proinde a genere ad species singulas, & a specie ad singula individua citra *perfectam inductionem* extendi juxta regulam tertiam (§. præc.), & aptari nequeunt.

§. CXX. Ex quibus porro intelligimus, *analogiæ* usum, in notis *fortuitis* ac *variabilibus* præbere argumenta *probabilia* tantum, non item & *demonstrativa*. Quum enim *perfecta inductione* carenti debeat, ut rite procedere, ac certo aliquid concludere possit; ea autem perfecta inductio, si in speciebus enumerandis satis difficilis est, in individuis proculdubio ob eorum infinitatem impossibilis omnino videtur: inde fit, ut aliquot species tantum, ac aliquot tantummodo individua recolentes, cetera alto prætereuntcs silentio, manca ea semper & imperfecta futura sit; milleque proinde exceptionibus obnoxia. Atque id quidem si sæpe alias, maxime in rebus *mediis*, *ethicis* item, atque *politicis* contingere solet. Ac in *mediis* quidem: quum quæ uni remedia sunt, alteri, eodem

eodem quantumvis morbo laboranti, ob temperamentum, aliarumque circumstantiarum diversitatem, interdum sint venena; vel si non nocent, nec etiam prosint; Tum & in *ethicis*, atque *politicis*, in quibus qui affectus, quæ inclinationes, quæque aversiones sunt unius hominis, aut unius nationis propria, nonnisi *probabiliter* & *conjectando* hominibus aliis, aliisque nationibus aptari poterunt. Propterea quod nimirum hominum mores pro vario eorum temperamento, climate, educatione, *vi sympathica* & *antipathica*, ac usu præcipue abusuque rationis & libertatis multifariam flecti possint, ac imo flectantur. In his igitur, similibusque rebus *analogia* caute admodum utendum; nec alium certe in finem, nisi ut eadem tamquam *exemplis* quibusdam, de quibus superius (§. 70.) dictum, collustrentur, atque selectis eruditionum fragmentis ad oblectandum exornentur.

§. CXXI. Contra vero sese res habet in *necessariis*, & *invariabilibus* rerum *notis*. Quippe quum in his *analogia* usus & ad demonstrandum firmissima argumenta suppeditat; & innumerabilibus præterea veritatibus quum *physicis* tum *metaphysicis* absque *inductionis* præsidio detegendis viam parat. Ac firmissima quidem ad demonstrandum humanæ rationi argumenta suppeditare, ex eo exploratum est, quod ubi *notæ* necessario, ac invariabiliter quum generis naturæ insunt, tum speciei. ab his inseparabiles esse debent, & individua. ab his

quia

quia nec necessariae eæ forent , nec invariabiles ; ut patet . Quocirca & speciebus singulis , quæ *neffariæ* sunt *notæ* generis , insunt ; & quæ *necessariæ* speciei notæ , singulis quoque individuis inhærent . Quia nimirum & generis natura in illius speciebus singulis , & natura speciei in singulis ejusdem individuis integra , ac perfecta adservatur .

§. CXXII. Tum ejusdem *analogiæ* usum in *necessariis* & *invariabilibus* rerum *notis* humanæ rationi viam sternere , atque parare ad innumerabiles veritates absque ullo *inductionis* præsidio detegendas , adeo exploratum , ut nihil magis . Enimvero statim ac serio , adcuratoque examine constiterit , datas *notas* necessario ac indivulse ad generis , aut speciei naturam & essentiam pertinere ; una opera , & absque ulla *inductione* intelligitur , quæ sunt generis , speciebus singulis , & quæ *notæ* sunt speciei , singulis quoque individuis necessario , & indivulse inhærere . Adeo ut simplex veritas *generica* pro numero specierum , ac simplex *specificæ* pro individuorum numero quodammodo multiplicari videatur . Ita ubi intelligo , ad genericam *figuræ planæ* naturam necessario pertinere , ut sit plana superficies una vel pluribus lineis comprehensa (quæ simplex veritas *generica*) ; statim quoque intelligo , triangula , quadrilatera , pentagona , exagona , circulos item , ellipses , & ita porro , quia singula figuræ planæ sunt , planas quoque esse oportere superficies una vel pluribus lineis *respective* compre-

prehensas (quæ multiplices veritates *specificæ*). Similiter ubi agnosco, ex natura *circuli* necessario sequi, habere illum radios omnes a centro ad peripheriam ductos inter se æquales (quæ simplex veritas *specificæ*); simul etiam agnosco, singula circuli individua A. B. C. D. eisdem radios habere inter se æquales (quæ innumerabiles veritates *individuales*).

§. CXXIII. Quæ quum ita sint, *analogie* usum si quidem in *physicis*, maxime heic in *metaphysicis* & intelligibilibus veritatibus investigandis ac detegendis tironibus proponendum, & inculcandum putamus. Meminerint ii vero semper præcedentium regularum (§. 116. seq.), atque juxta illas integrum *analogie* artificium & usum ubique instituire adnitantur. Ita quippe & firmissima ad demonstrandum argumenta conficient; & una tantum veritate sive *physica* sive *metaphysica* inventa, multiplices, quin & innumerabiles veritates alias una opera invenient, non sine ingenti eorum voluptate & utilitate, ac Disciplinarum præterea ipsarum multiplici incremento,

C A P U T XIII.

*De usu rationis in metaphysicarum veritatum
inquisitione per antilogiam,*

§. CXXIV. **A**ntilogia, ut ego quidem ad-
pello, notio *analogiæ* notio-
nioni contraria & opposita est. Quocirca ut
analogia similitudinem, ita *antilogia contrarie-
tatem* sonat. Atque ut *analogia a simili ad si-
mile* ratiocinando utimur (§. 115.); contra
antilogiam a dissimili ad dissimile ratiocinando
pariter adhibemus.

§. CXXV. Integrum autem *antilogiæ* artifi-
cium in eo constitutum, ut rejectis casibus
omnibus in contrarium adsumptis tamquam fal-
sis, qui solus postremo casus data in controversia
superest, tamquam verus, ac genuinus stabiliatur.
Hinc *antilogia* demonstrationi *indirectæ*, de
qua superius (§. 56.) diximus, quodammo-
do similis esse videtur: nisi quod *indirectæ*
demonstratione ad refractarios in absurda &
contradictoria deducendos, eorumque pertina-
ciam compescendam utimur; *antilogia* autem
ad contrarios casus omnes possibiles tamquam
falsos excludendos, ac unicum illum, qui ve-
rus ac germanus est, & superest, illatione
quadam colligendum, ac stabiliendum. Ita si
ad demonstrandum, *centrum circuli esse in recta*
per

perpendiculari, a puncto contactus alterius rectæ circulum tangentis intra eundem circulum excitata, casus omnes oppositos, idest singula puncta cetera per integram circuli aream adsumpta seorsum excludo tamquam illa, in quibus esse nequit centrum circuli; tum statim concludo, centrum huiusmodi consequenter esse oportere in recta perpendiculari recensita: erit istuc ratiocinandi genus ab *antilogia* depromptum. Quo autem *antilogia* rite instituat, binæ regulæ ob oculos habendæ sunt: altera, qua oppositi casus omnes uno eodemque argumenti genere excludi, ac refelli possint: altera, qua ad eosdem excludendos, ac refellendos novis ac respective diversis opus sit argumentis. Eæ porro sunt huiusmodi,

§. CXXVI. *Antilogia* regula prima. Si oppositi casus omnes uno eodemque argumento excludi possunt, uno tantum casu rejecto tamquam falso; & ceteri quoque absque ulla inductione rejecti, ac semet exclusi intelliguntur velut æque falsi. Nam si unum idemque argumentum oppositis casibus omnibus tamquam falsis rejiciendis ac refellendis par erit atque sufficiens; ubi unus tantum ex illis rejectus fuerit, supervacaneum prorsus erit casus alios seorsum enumerare, eodemque argumento refellere: quum illud eandem vim ex hypothesi habeat adversus reliquos. Hinc quia in præcedenti exemplo singula puncta extra perpendicularem illam in circuli area adsumpta uno eodemque argumento rejici possunt, atque in Geometria factō

R

ipso

ipso rejiciuntur ; postquam eorum unum rejectum fuit & oppugnatum , cetera rejecta simul & oppugnata intelliguntur sine ulla *inductione*, novaque & otiosa argumenti ejusdem reiteratione .

§ CXXVII. *Antilogia* regula secunda . Si autem oppositi casus omnes uno eodemque argumento excludi , ac refelli minime poterunt ; perfecta tunc singulorum *inductione* opus erit , singulique diversis respective argumentis refellendi . Si enim unum idemque argumentum ad casus singulos refellendos est insufficiens ; uno tantum illorum rejecto & oppugnato , ceteri adhuc subsistere intelliguntur ; qui proinde *inductione* perfecta recensendi , novisque pro opportunitate argumentis respective refellendi . Fieri namque poterit , ut is , qui reticetur , verus ac germanus casus sit ; ac ille proinde qui postremo loco colligitur tamquam verus , spurius sit ac falsus . Qua in hypothesis tota *antilogia* in sophisma vertetur , quod *imperfecta enumerationis partium* adpellant . Ut in hoc exemplo : *Commercium mentis & corporis non fit occasionalismo . Non anima media . Non harmonia prestabilita . Fit igitur influxu physico* . Nam quum uno eodemque argumento tres priores *hypotheses* cum ceteris possibilibus refelli nequeant ; iis exclusis , non statim subsistere intelligitur quarta . Quum fieri facile possit , ut idem commercium alio ex tot possibilibus modo , etiam a quarto illo diverso exerceatur . Quam saepe regulæ hujus neglectu in errores prolabantur Philosophi ! . . .

§. CXXVIII. Itaque ubi duabus hisce regulis *antilogia* regatur, tutissime humana ratio ea uti poterit ad novas veritates nedum *metaphysicas*, sed & *physicas* etiam perscrutandas, ac detegendas. Propterea quod fieri minime possit, ut dum contrarii casus omnes quum reales tum etiam possibiles aut uno eodẽmque argumento, aut totidem pro opportunitate ac necessitate diversis plane jam ac solide rejecti fuerint; postremus ille, qui superest, minime subsistat. Alioquin nec plane rejecti forent, nec solide: quod adversatur hypothesi.

§. CXXIX. Ceterum parce tantum, ac ubi data veritas alia via inquire, ac detegi non poterit, *antilogia* artificio utantur, volo, tirones. Nam, ut ibidem (§. 56.) de demonstratione *apogogica* adnotatum, demonstratio quoque *antilogica* mentem quidem ad postremum casum, rejectis ceteris, firmandum compellit; verum aut nimis parce, aut nullatenus etiam eandem collustrat. Cujus ratio perspicua, quia *antilogia* ostendit quidem, rem aliter esse non posse, nisi *uno soloque modo illo*, qui in casu postremo enunciatur: nexum autem subjecti cum prædicato, ex cuius intelligentia totum lumen & collustratio pendet, minime patefacit. Nam, quod nonnullis aliquando dictum, *certitudinem* ab *evidentia* se jungi non posse; id & per sola *mysteria fidei* (quæ certissima, tetraque simul caligine obducta) falsum est; & inter consuetos Philosophorum lapsus, atque deliquia computandum.

§. CXXX. Præterea si *nunc*, quum hæc scribo, *ver esse*, directâ immediataque ratione intelligere, ac ostendere possum; quia nimirum prata undique rident, ac plantæ pulcherrimis, elegantissimisque floribus onustæ quodammodo superbiunt; quæ *characteristica veris notæ* sunt; eccur indirectis & obliquis turpiter otiando utar in hunc modum: *Non est æstas; quia nondum calor effervesceat. Non autumnus; quia nondum fructus adpareant. Nec denique hyems; quia frigus baud mitius evasit. Est ergo ver?* Utendum ergo ambagibus; verum ubi necessitas ad id nos cogit, ubi via regia undique interclusa fuerit.

§. CXXXI. Interim priusquam huic capiti finem imponam, scire quoque volo tirones, id quod ex hucusque ceteroquin dictis semet jam fortassis observavere, progressionem scilicet *analogicam*, de qua capite præcedenti, e diametro oppositam esse *antilogicæ*. Ubi namque illa ex una tantum generica, aut specifica veritate jam inventa innumeras alias *ob similitudinem* intelligit: hæc vicissim ex innumeris rejectis falsitatibus unam tantummodo, ac simplicem veritatem *ob dissimilitudinem* deducit. Ut adeo, si sæpe alias, heic præcipue vim *humane rationis* multipliciter artificiosæque sollertem, & actuosam demirari possint, atque in infinitam Dei sapientiam ac potentiam mirabundi obstupefcere, qui sic præstantes nobilissimosque spiritus, sic præstanti nobilissimaque vi præditos ex nihilo condidit,
hu-

humanoque corpori copulavit. Nam uti sæpe dictum, ac centies pro opportunitate repetendum, id genus observationes *in habitum* convertant, volo, in Deum pii, officiosique tirones. Ea namque vera ac utilior philosophandi ars homine rationali, christianoque digna: non sicca illa ac sterilis, quæ in sola factarum rerum contemplatione immoritur, atque tabescit.

C A P U T XIV.

De usu rationis in metaphysicarum veritatum inquisitione per librorum dogmaticorum lectionem. Ubi de arte hermeneutica.

§. CXXXII. **Q**Uum librorum lectio immediata sensuum adplicatione characteribus ipsis, quibus exarati, fiat; videri alicui fortasse poterit, cognitiones ea via partas non *metaphysicis* ac *intelligibilibus*, sed maxime *physicis* ac *sensibilibus* accensendas; atque hinc præpostero quodam differendi ordine de illis heic a nobis agi, quum vicissim agendum potius fuisset Libro II. tamquam in loco longe opportuniore. Effet autem iudicium istuc ex illorum proculdubio genere, quæ subitanea, quæ oscitantia, quæque minus considerata dicuntur: & quæ proinde nonnisi forte fortuna ab errore immunia

sunt. Enimvero quo veritates *physicæ* ac *sensibiles* dicantur, oportet, ut sensuum adplicatio fiat rebus ipsis sensibilibus, quibus eæ insunt, non characteribus in pagina exaratis, qui illarum non sunt, nisi *signa* tantum, hominum arbitrio inventa, & adoptata. Quamobrem in librorum lectione veritates, quæ ipsos sensibiles characteres spectant, *physicæ* quidem sunt; non quæ res per eosdem characteres designatas. Hæ namque ad solam rationem, intelligibili stupendoque artificio eas revocantem, & in se ad characterum contuitum excitantem pertinent.

§. CXXXIII. Atque hæc quidem observatio sequens quoque caput spectat, in quo *de usu disputationis* erit nobis sermo. Nam utrobique, ut dicitur, par ratio. Jamvero integra de librorum lectione tractatio duplici parte constat, *librorum legendorum delectu*, & *legendi arte*. Primum. Sunt libri omnes triplici in classe constituti. Nam alii noxia continent: alii inutilia: alii demum utilia, scituque necessaria: de quibus seorsum, ac paucis pro *elementorum* modulo.

§. CXXXIV. Printipio qui libri noxia continent, vel Religionem oppugnant, vel depravant mores, vel cives ad seditionem concitant. Religionem impugnare libri possunt vel *revelatam* tantum; cujusmodi sunt libri *Deistarum*: vel quæ *revelatam*, tum *naturalem*; ut libri *Atheorum*, *Epicureorum*, *Scepticorum*, ac *Materialistarum*: vel diversis tantum erroribus, falsisque dogmatibus utramque, vel alterutram

foedando ; ut libri *Hæreticorum* . Mores autem libri corrumpunt , qui ad turpia , ac facinora provocant , quique boni & mali , iusti & iniusti , turpis & honesti discrimina tollunt ; ut volumina *Libertinorum* . Ad seditionem denique cives provocant , qui summum Imperium sola *vi* ac *prævalentia* primitus inductum , modoque regi etiam & perpetuari edocent ; ut opera *Naturalistarum* .

§. CXXXV. Horum omnium lectio tamquam pestis fugienda & anguis : præsertim quum salibus illis , jocis , ac floribus , quibus callidi homines ad decipiendum venena propinant , vel cautissimos quandoque lectores præcipites trahant in ruinam . Hinc merito ab Ecclesia ea volumina proscripta , ac sub severioribus censuris eorum *lectio* , atque *detentio* vetita . Nam quod hoc præcipue ævo nostro quidam minus pie , minusque cogitate deblaterant , eam proscriptionem & inhibitionem non ex jure , sed ex summorum Pontificum arbitrio ac prævalentia obortam ; id & *corrupti christianismi* est , & imperitorum proprium . Alia quippe apud primitivos , idest *veros* christianos harum legum existimatio . Nam, Actor. xix. adversus pestifera id genus volumina prædicante Paulo , ac doctrinam signis ac virtutibus confirmante , *multi credentium veniebant confitentes , & annuntiantes actus suos .* MULTI AUTEM EX EIS , QUI FUERANT CURIOSI SECTATI , CONTULERUNT LIBROS , ET COMBUSSE- RUNT CORAM OMNIBUS . ET COMPU-

TATIS PRETIIS ILLORUM, INVENERUNT PECUNIAM DENARIORUM QUINQUAGINTA MILLIUM. Ex quibus intelligimus, jus proscribendi libros non recens in Ecclesia esse, sed *christianismo* cœvum: nec Pontificum arbitrio aut prævalentia inductum, sed ex Apostolorum praxi ac traditione perpetuatum: nec demum illi obstitisse olim bonos piosque fideles, sed tot vicissim cum impensis proscriptos comburendo libros ultro paruisse.

§. CXXXVI. Deinde inutilia ac supervacanea continent libri, in quibus ab imo ad summum nihil tradi videtur, quod in propriam aliorumque utilitatem converti possit. Hos infructuosæ ficulneæ evangelicæ non immerito adsimilaveris, quam præcidendam iussit Servator, ne inutiliter terram occuparet. Horum quoque lectio, ne oleum frustra amittatur & opera, neve tempus turpiter subtrahatur lectioni utili, devitanda. Scio nullum esse librum, in quo inter inutilia plura ac supervacanea non quidquam bonæ frugis contineatur. Verum quum granum purum, excussa palea, aliis in operibus haberi promptius atque commodius potest; quorsum quærimus illud in palea excutienda? In horum censum minime computanda volumina, in quibus varia eruditionum genera, aut pulcra, ac jucunda plurima conscripta sunt, in primis Poetarum, Comicorum, Tragicorum, ne exceptis quidem *romanensibus* quibusdam *fabulis*, quæ lepore illo, & opportunis integumentis vitia communi odio &

exc-

execrationibus objiciunt ; virtutes contra mirum in modum promovent, extollunt, ac ita amabiliore reddunt. Legenda tamen illa parce, & ad necessariam animi relaxationem tantummodo, non toto pectore, uti inconsulto fit, haurienda ; ne gustus germanæ sapientiæ retundatur. Inter romanenses fabulas summo pere mihi adblandiuntur, quas italicò idioma te elegantissime conscripsit, pulcherrimisque documentis *ethicis*, atque *politicis*, necnon *criticis* locupletavit illustris Ab. Chiari (a).

§.

(a) Nemo melius, pulcrius, & elegantius hucusque, si quid cerno, *italicè* scripsit viro hoc illustri, cujus fama ac nomen per cultas Europæ nationes satis celebre, ac præclarum. Ausim dicere, ut Cicero in *latina*, ita & virum hunc cl. velut exemplar juvenibus proponi posse in politiori, & cultiori addiscenda *lingua italica*. Quæ verborum proprietas? Qui situs? Quæ fluiditas? Qui concentus? Qui nitor? Quæ elegantia? Quæque ars & ad oblectandum suavior, & penetrantior ad persuadendum? Utinam vero tam rarum, eximiumque italæ nationis hujus nostræ ingenium, abjectis crepundiis illis, selectioris eruditionis, ac doctrinæ sublimioris argumenta evolvenda, commentanda, perpolianda melliori judicio delegisset? Quas utilitates & commoda in communem societatem nunc non intulisset? Quæ incrementa scientiis ipsis artibusque non accessissent? Quæ decora & ornamenta disciplinæ omnes ex tam illustri calamo non accepissent? Sed magnus etiam Achilles licet igne, gladio, bello ad subjuganda imperia factus esset; muliebrem nihilominus vestem armis anteposuit! . . .

§. CXXXVII. Utiles postremo, lectuque necessarios voco libros, qui ea docent, quæ hominum vitæ *animali*, ac *civili*, præcipue vero *moralis* fovendæ, ac perficiendæ apta sunt. Horum auctores magna in existimatione habendi; oporteretque esse illos sempiternos, & immortales: quippe quorum scientifici labores numquam satis compensari possunt. Quis enim pro merito compensabit eximia adeo ac immortalia bona, quæ ex eorum lectione & studio in nos promanant? Enimvero rerum quum intelligibilium tum corporearum origines, naturas, causas, effectus, loca, tempora, usus, fines, relationes, omnia, ac eventus præterea omnes evolventes, nobisque fideli narratione & calamo communicantes, rebus omnibus, omnibus locis, omnibusque temporibus reddunt nos quodammodo coexistentes, ac ita æternos fere, omniscientes, omnique præsentis. Hæc igitur aurea, cedroque digna volumina diurna manu versent, volo, juvenes disciplinarum studiosi, versentque nocturna.

§. CXXXVIII. Ceterum quousque sub præceptorum disciplina extiterint, pauca habeant, eaque quamoptima, ac politiori stylo conscripta. Pauca quidem; ne attentionem in plura distrahentes, nihil ediscant funditus, ac ita tota eorum sic parva sapientia, ita uti fit, superficialia, & ex cortice reddatur. Quo spectat Plinii illud lib. VII. epistol. 9. alta mente reponendum: *Non multa sunt legenda, sed multum.* Tum quamoptima: ut ita quam

ex illis haurient, sapientia atque doctrina, & in propriam convertent, sana sit; utilis, pulcra, decora, laudeque digna. Tandemque cultiori stylo conscripta: ut assidua eorum lectione politiorem dicendi scribendique stylum sensim sensimque contrahant. Nam ut linguam datæ nationis, quam incolimus, quotidie audiendo ediscimus; ita & auctoris dialectum, in cuius assidua lectione versamur, nostrum quodammodo facimus ac proprium.

§. CXXXIX. Hæc in *librorum legendorum delectum*, quæ superioris (§. 133.) divisionis erat pars prior. Adeamus nunc *legendi artem*, quæ pars posterior, ac iis quidem in libris, qui *dogmatici*, ac *scientifici* dicuntur. Quamquam horum præcepta plurima librorum quoque *historicorum* lectioni commode aptari possint: nisi quod libri *historici*, qui *historicas* scilicet *veritates* nobis suppeditant, *criticis* etiam præceptis aliis (de quibus Libro sequenti) maxime indigeant. Nec dissimulandum, in libris *scientificis* atque *dogmaticis metaphysicas* æque ac *physicas* veritates nos ediscere posse. Verum quousque corpora ipsa sensibilia immediata sensuum adplicatione & *experientia* a nobis post lectionem consulta non fuerint; *physicæ*, quæ in illis traduntur, veritates, tamquam sola mentis ratione a nobis cognitæ, inter *metaphysicas* & abstractas, quemadmodum superius (§. 132.) diximus, computandæ.

§. CXL. Magnum porro lectionis optimorum

rum scriptorum commodum, magnumque emolumentum! Quippe dum ea, quæ improbo ac diuturno labore scrutari ipsi, ac peruestigare per tot ambages, nec sine multiplici errandi periculo deberemus; in scientificis eorum Operibus eruta jam omnia e Democriti puteo, parata, firmata, perpolita, ac in ordinem digesta nobis exhibentur. Adeo ut non aliud agendum nobis supersit, nisi frui tantum labore, ditarique opibus alienis. Quo autem ea commoda promptiora ac faciliora, eaque emolumenta locupletiora nobis reddantur, *arte* ea in lectione opus est, *artis*que *præceptis*, quæ per tutissima veri vestigia ad scopum nos ducant, quo anhelantes tendimus, & quo scriptores ipsi antea pervenire. Ea autem, saltem præcipua & accommodatiora, sunt hujusmodi.

§. CXLI. Principio probare sub initium seipsos tirones debent, sint ne animo, ut oportet, pacato, atque ab omnibus affectibus libero, ac ita etiam ad æquilibrium composito, tamquam si nusquam de rebus ad eam disciplinam spectantibus quidquam loqui inaudivissent. Id enim omnino necesse est, ut vera a falsis, bona a malis, pulcra a deformibus, atque utilia ab inutilibus æquo judicio discriminari possint; atque antea actæ simul ætatis præjudicia sensim sensimque deponere. Deinde primo omnium loco auctoris *præfationem*, & quæ *præfationis* loco sunt, una cum librorum, capitumque *indice* sus deque perlustrent. Ita quippe uno velut oculi ductu plura intelligent, quæ Operis

ris lectioni ingentem plerumque lucem adferre solent, in primis vero scriptoris genium, sectam, nationem, ætatem, scribendi occasionem, finem, methodum, rerum partitionem, ordinem, complexum, atque systema. Tum vocabula, præsertim frequentiora, juxta sensum ab auctore traditum ubique accipiant, altaque mente reponant. Principia etiam, quibus integrum ædificium superstruitur, perpendant diligenter, seriem, ordinem, & concatenationem, qua propositiones demonstrantur. Nec oppositarum difficultatum, ac responsionum, quibus e vestigio illæ refutantur, vires secum invicem conferre prætermittant. Ubicumque vero pulcri aliquid, rari, ac peregrini occurrerit, in tabulas seorsum referant, læpeque perlegant.

§. CXLII. Verbo: sit librorum lectio non perfunctoria, non perturbata, non abrupta, non per saltum inita; sed seria, nexa, continua, ordinata. Singula ad rationis lancem, tamquam ad lydium lapidem, severo judicio exigantur, si vera, si falsa: si clara, si obscura: si utilia; si supervacanea: si satis evoluta, si manca, si redundantia: si imbecilla, si sufficienter firmata; si fideliter proposita, si tota vi oppugnata: si præpostera, si ordinata: sique quidpiam insit vitii, sin vero nihil, atque omnia numeris omnibus sint absoluta. Equidem in auctoris cujusque lectione sic paullatim adsuescere volo tirones, ut non bruti pecudis instar *eant, qua itur, sed qua eundum*, pergant. Nul-
libi, inquam, reputent, scriptores, quod ma-
gni

gni nominis sint , & omnium doctissimi habeantur , ab erroribus idcirco , aliisque in scribendo deliquiis esse prorsus immunes . Summa namque veracitas & infallibilitas folis Scripturis sanctis , tamquam Dei falli ac fellere nescii , spiritu exaratis , reservata . Ceteri vero pro majori , eximiaque , quæ in illis est , prudentia atque doctrina minoribus tantum ac levioribus , quam scriptores reliqui , non autem nullis omnino defectibus premuntur . Scilicet nemo umquam quidpiam egerit , aut scripserit sine vitiis : *Optimus ille est , qui minimis urgetur* (a) .

§. CXLIII. Ecquid demum , si in loca , uti sæpe fit , inciderimus obscuriora , perplexa , æquivoca , pignantia , absurda ? Scilicet adhibenda tunc *Artis hermeneutica* , sive interpretandi præcepta , atque ex illorum præscripto ea loca

(a) Monitos heic omnino volo italos tirones nostros , ne externos quosdam scriptores doctos idcirco illos , magnosque reputent , quod eorum nomina , aut etiam cognomenta portentosiora sint , & pronuntiatio asperiora , & difficiliora . Satis late ridiculum id judicandi genus per incautam juventutem , perque sciolos quosdam & garrulos grassari videtur . Quippe qui , nescio quo , stupore & ecstasi abnormia ea nomina & cognomenta jactant , ac reverentur . Quasi quod CHAMÆLEONTEM , exiguum satis vermiculum , ingens idcirco , valdeque abnorme animal dicere oporteat , quod ejus nomen nimis emphaticum sit , ac nescio quid magni , ac portentosi exprimere videatur !
Pudeat

loca expendenda , & in concordiam revocanda . Primum autem , ac princeps ejus artis pro locis æquivocis , perplexis , obscuris , undecumque ea obscuritas proficiscatur , fuerit istuc , si nimirum verba antecedentia & subsequenta , itemque loca alia *relativa* , in quibus eadem de re clarius edisserit auctor , invicem conferantur , serioque perpendantur . Ea quippe ratione facillimum fuerit in verborum mediorum intelligentiam devenire . Quod si eo in obscuro loco data scriptoris sententia involvatur , nec ea fortasse regula erui possit ; ex pluribus tunc interpretationibus , quæ adferri possunt , ea præferatur , quæ *ceteris illius scriptis , factis , animo , atque vitæ* uniformior fuerit . Quod & Tullio monitum in libro *de Inventionē* . Hos autem aliosque auctoris characteres partim ex illius *præfatione* , & *indice* , partimque

Pudeat sollertissima , ac nobilissima Italorum ingenia tam putida imperitorum præjudicia , & inania commenta , quæ nauseam & stomachum ingenuis jam movent , vel etiam ad risum atque cachinnos concitant , ullibi fovere ! Viros magnos selectæ dumtaxat eruditionis , ac doctrinæ amplitudine , ordinatæque , ac perpolitæ cogitandi ratione reputent ; non nominum , & cognomentorum ampullositate , & portentositate . Præsertim quum septemtrionalium scriptorum nomina nimis resonantia plerumque sint ; Opera vicissim non raro muta , sæpe blasphema : quinimmo , quum quidpiam bonæ frugis continent , Italorum de more nostrorum ut plurimum plagiarum . Mitto horum exempla : quippe quæ satis frequentia , ac vulgo nota .

que ex *historia literaria* facile detexerimus. Ex pugnantibus vero locis, si alter non sit retractatio alterius, is ex auctoris mente præferatur, qui reliquæ illius doctrinæ conformior fuerit. Sin vero alter altero retractetur; nulla eo in casu prioris ratio habenda erit, sed sola spectanda retractatio ab ipsomet auctore facta. Illustria ejus rei exempla habemus in *libris Retractionum* S. Augustini, & in *Anacronismis* Cardinalis Norisii. Quæ tandem loca Religioni, moribusque adversa videntur, ubi nota fuerit auctoris probitas, benigne illa interpretari licebit. Accipienda vicissim ut sonant, si de illius improbitate, malaque fide dubitari non possit. Una quippe eademque formula aliud versipellis hæreticus ac libertinus, aliud probus catholicus intelligit (a). Ceterum quum magna tenebricosorum locorum pars ex *translationibus* in aliena idiomata pendeat, quæ difficillime ad auctoris mentem, ejusque originariam linguam exiguntur: hinc quo-

(a) Hinc aliud *Verbum* apud Arianos, aliud apud Catholicos. Alia *gratia* Pelagianorum, alia Catholicorum. Alia *presentia Christi* in sacramento altaris calviniana, alia luterana, alia catholica atque romana: & ita porro. Similiter *Dei* nomine pleni sunt Spinozæ libri. Sed quisnam Spinozæ Deus? *Quodcumque vides, quocumque moveris*; ipsummet scilicet universum adspectabile atque corporeum. Aliud denique *naturæ jus* verum, verisque Philosophis admissum, quod jura omnia fovet, tuetur, ac perficit: aliud *hobesianum*, quod omnia evertit, convellitque jura naturæ. Cetera

quo ea obscuritas facilius tollatur, utilissimum fuerit & ejusdem idioma probe callere, & originarios fontes consulere. Equidem fons persæpe limpidus est & cristallinus; interea dum rivuli turbidi sunt atque cænosi Quod si ob idiomatum originariorum imperitiam id fieri non potest; adeantur eo in casu, qui in iis peritiores fuerint, vel qui eadem de re *lingua nota* adcuratius scripsere. Ita quæ mella ex uno flore sugere tirones non possunt, exsugent ex alio, ut apes,

C A P U T XV.

De usu rationis in metaphysicarum veritatum inquisitione per disputationem. Ubi de scientiarum, bonarumque artium Academiis frequentandis,

§. CXLIV. **R** Ecolendam heic in primis adnotationem volumus initio capitæ præcedentis (§. 132.) propositam; atque ea, quæ de characteribus in pagina exaratis ibidem diximus, & vocibus etiam quibus disputatio omnis instituitur, heic aptanda. Rursus huc etiam spectat animadversio altera ibidem (§. 139.) tradita, ut lectione scilicet librorum, ita & disputatione non *metaphysicas* tantum, sed & *physicas* etiam, & *historicas* veritates inquire, & inveniri posse.

S

Verum

Verum *historicas* egere legibus præterea *criticis*, de quibus libro sequenti : ac *physicas* inter *intelligibiles* & *abstractas* interea computandas , quousque propria sensuum *experientia* consultæ nobis non fuerint , & observatæ .

§. CXLV. Si ex librorum lectione magna in scientiarum studiis obvenire nobis commoda solent , dum brevi plura illa ac præclara assequimur , quæ eorum auctores immenso plerumque labore , ac meditatione detexere (§. 140.) ; haud fortasse minora ea commoda & emolumenta plura sunt , quorum ex idæ collatione cum viris doctis brevi etiam cipes efficimur . Nam quæ ex multiplicibus , variisque floribus longævo studio , ac diuturna patientia & industria ipsi mella ut apes collegere ; uno veluti haustu nobis quoque per disputationem propinantur . Sed & illud etiam disputatio habet commodi , quod , concussis spiritibus , privatæ meditationis languore jam torpentibus , (*assidua enim meditatio* , ut est in proverbiiis , *exsiccat ossa*) mens e sopore quodam excitata , nescio quid virium ac generosi vigoris non sine oblectamento lætabunda capit . Nec calamo exprimi satis potest quum ad loquendum , tum ad cogitandum prompta illa & expedita facultas , quam disputatio nobis ingenerat , præsertim si fuerit publica . Quippe quum in ea , nescio quo , publicæ acclamationis incantamine capta mens , plenissimam attentionem ad omnia intendit , ut auditorum plausus & gratulationes promereatur . Nec silen-

silentio prætereundum , dum res inter disputandum ex omni parte mira celeritate versantur , conferuntur , ac librantur , *judicium* in veri a falso discrimine mirum in modum firmari , ac roborari . Quæ idcirco innui , ut tirones quum publicis , tum privatis disputationibus alacriter ineundis incendantur , in eis-que quotidie , quum possunt , exerceantur .

§. CXLVI. Porro disputatio , sive publica ea sit , sive privata , est velut scientificum certamen inter duos initum , quorum alter , qui adversus propositam *thesim* argumenta obtrudit , *opponens* dicitur ; alter , qui ea dissolvit , *defendens* adpellatur . Triplici autem methodo iniri disputatio potest , *academica* , *socratica* , *scholastica* . Quum soluta oratione argumenta simul omnia producantur , ac refutantur , disputatio dicitur *academica* . *Socratica* , si interrogationibus quibusdam , ac responsionibus utrinque absolvatur . *Scholastica* demum , quum constanti ratiociniorum , præcipue syllogismorum serie argumenta contraria ab opponente objiciuntur ; atque ad eorum enunciationes singulas peculiare responsiones a defendente per vi-ces adhibentur , veras scilicet concedendo , negando falsas , & æquivocas pro opportunitate distinguendo .

§. CXLVII. Negari non potest , quin *scholastica* disputandi methodus , si rite instituat , tamquam uberior novarum veritatum scatebra quum *academice* , tum *socraticæ* sit præferenda . Quum enim inviolabilis in ea lex sit , ut tam

negatas a defendente enunciationes directe ostendere, quam adhibitas ad argumenta solutiones directe etiam impugnare teneatur opponens: ac, defendens vicissim nimis cautus in respondendo esse debeat, ne aut falsas enunciationes tamquam veras concedendo, aut negando veras ut falsas, aut minus denique solidas ad argumenta solutiones adhibendo, facillime refellatur ab opponente, ac non sine pudore & dedecore ad silendum, tamquam de falsitate convictus, compellatur: hinc mirum in modum eorum ingenia, præsertim si disputatio publica fuerit, acuntur, & incallescunt; ac ita iis extempla cogitandis idonea fiunt, quæ alias in mentem numquam fortasse venissent. Nam ea humanorum ingeniorum indoles atque natura, ut simul attrita silicis instar micantes undique scintillas quodammodo jaculentur, numquam illas vibratura, nisi simul attererentur. Scio, eam methodum paullo esse difficiliorem, ac diuturnam, intentamque exigere exercitationem. Utrumque vero abunde compensabitur illius utilitate majori, & locupletiori. Equidem sic censeo, *socraticam* disputandi methodum puerorum esse ac ludimagistrorum: *academicam* desudum, atque inertium: *scholasticam* sollertium, ac perspicacium ingeniorum. Ceterum in explanando pueris *catechismo* haud negaverim, quin *socratica* methodus salubrior sit, & accommodatior; quemadmodum & *academica* in congressibus domesticis

sticis, & academicis (a).

§. CXLVIII. Quo autem ea rite procedat, præceptis quibusdam regenda; quorum potiora sunt. Primum *urbanitatis officia* utrinque esse debent intangibilia, sancteque servanda. Nisi enim scientiarum studia perpoliant cultorum mores, ecquidnam aliud eos perpoliverit? Deinde proponenda, ac verbis quamperspicuis exponenda *thesis*, quæ in disceptationem venit; ne in incertum vagetur disputatio. Tum communi disputantium calculo stabiliendi fontes, ex quibus argumenta capiantur. Sine principiis namque utrinque probatis nullus erit disputationi locus: quemadmodum accidit cum scepticis. Rursus siquæ principia, quamquam falsa, a defendente admittantur ut vera, in *veri* confirmationem, ultro ea adhibeat opponens.

S 3

Verum

(a) Qui a lyceo, publicisque concertationibus *scholasticam* disputandi methodum exulare vellent, simillimi mihi videntur iis, qui *latinum idioma* e scholis ejiciendum clamant. Pendet utrumque vero ex aucta sæculi *inertia*, qua fit, ut laboriosiora quæque magno nos thædio afficiant, placeantque crepundia, ac faciliora. Cur autem in juvenibus *inertia* aucta? Quia auctæ relaxationes, aucta spectacula, aucta naniarum existimatio, aucta . . . Quia, inquam, lachrymabili tetroque deliquio magna ex parte jam degenerarunt e generoso illo, nobilissimoque antiquorum juvenum animo, de quibus Poeta:

*Si cupit optatam cursu contingere metam,
Multa fecit, tulitque puer, sudavit, & alsit,
Abstinent venere, & vino.*

Verum, namque falso, quod adversario censetur verum, formula illa *ex concessis* confirmare licebit; secus ac falsum, cui nusquam favendum. Ad hæc nihil pro certo sibi umquam adsumat opponens, quod a defendente in dubium verti possit. Alioquin aut silere prorsus cogetur, aut extra thesım turpiter excurrere, atque vagari. Præterea enunciationes a defendente negatas *directe* probet opponens; ita nimirum, ut prioris argumenti filum constanter retinendo, conclusiones eæ semper sint subsequenrium probationum. Alias novi habebuntur excursus, novæque *medii termini*, ut dicitur, desertiones. Item negata a defendente *consequentia*, non propositio ipsa argumenti postrema, idest consequens, sed *illatio* ejus ex antecedente per opponentem probanda. Secus hæc etiam nova habebitur *extra chorum* cantilena. Tandem veritate per disputationem inventa, disputantibus æque gratulandum, ac pacifice abeundum. Mitto cetera tamquam usu ipso ac praxi longe intelligibiliora, quam calamo.

§. CVLIX. Hæc inter disputandum præcepta servanda. Vitia autem fugienda fuerint in primis jurgia, convicia, maledicta, rixæ. Ea enim dum affectus concitant, ac mentis rationem obnubilant, sunt etiam urbano, ingenuoque viro indigna. Deinde in disputationem numquam adducendæ theses inutiles, absoletæ, exsuccæ, sed utiliores semper, pulciores, & selectiores: iique præterea errores acriter oppugnandi, qui atrocius grassantur in
dies.

dies , ac jura omnia quum divina tum humana pervertunt . Stultum est enim , dum præferociter cruentamur ad vitam , in verberando aere ; muscisque captandis otiosi . Quin prudentissima ea semper fuit Apologistarum praxis , is Patrum mos , ea summorum virorum consuetudo . Vitanda etiam inter disputantes *occulta collusio* , nostris hisce temporibus adeo frequentissima . Disputatio enim , quæ *ex compacto* fit , aut ludentium indicium est , aut trepidantium , aut imperitorum . Turpis etiam abusus videtur , opponentem , ut *argumentationi in forma* finem imponat , ab ipsomet defendente moneri . Liberum enim opponenti esse debet , quousque potuerit , ac imo voluerit , eam protrahere : ut ita intelligi per auditores possit , utri veritas ipsa magis faveat . Tandem quis etiam ferat , ad palmarum damnablem percussione , aut ad sonitum , uti fit , tintinnabuli solutum se putare defendentem ab inviolabili lege , & onere argumenta jam proposita enodandi , ac refellendi (a) ?

S 4

§.

(a) Optandum quoque foret , ut in concertationibus publicis numquam philosophica quædam , ac theologica præsertim dogmata cribanda , ac ventilanda proponerentur , quæ minus cautis & imperitis , quorum in publicis his congressibus ut plurimum magna pars , scandalo esse solent . Cujusmodi sunt e. g. animorum immortalitas , Dei existentia , ac providentia , cœlibatus , Christi præsentia realis in Eucharistia , Mariæ virginitas præsertim in partu , æternitas poenarum

§. CL. Superest, ut de *academicis congressibus* nonnihil dicamus. Sunt ii scientiis, bonisque artibus collustrandis ac prolatandis nimis idonei; ac ingentem præterea utilitatem & commodum auditoribus adferunt, dum unius circiter horæ compendio multa illa addiscere possunt, quæ illustres Academici, *dissertationum* compositores, diuturno labore ac studio detexere. Nihil dico, quod in hac florentissima civitate nostra, quam duplex in primis Academia, *Constantium & Cratyllidorum*, jamdudum exornat, non sit exploratum. Verum quo bona ista & commoda pro merito ii nobis adferre possint, necesse est in primis, ut qui in Academicos eliguntur, viri sint ex
tota

narum, plura his similia. Cujus duplex ratio manifestissima. Prima: quia animum attentionemque plus de more intendimus in argumenta, quibus ab opponente ardentius oppugnantur, quam in solutiones, quibus a cathedra animo paciori defenduntur. Altera: quia non raro evenit, ut defendentis incuria, aut etiam imperitia ea objectamenta non satis clare enodentur; interdum etiam prorsus insoluta remaneant. Quibus de causis, fit, ut imperitorum ac debitorum mentes, qui sancte credi illa, non in controversiam adduci amant, satis perturbentur; eorumque fides nonnihil tepescere, ac sanciri videatur. Horum itaque disputationes *calamo* melius, ac *lycæo* committendæ, ac reservandæ, quam *publico circulo*. Sunt enim plura, aiebat S. Hieronymus de *Origenis restauratione universali* differens in Ezechielem, quæ in vulgus, tamquam nimis periculosa, haud immittenda. Quæ verâ.

tota saltem civitate electissimi , quorum gravitas spectabilis , quorum auctoritas veneranda , quorumque sapientia ac doctrina multis jam experimentis comprobata . Alioquin quomodo præceptorum ac magistrorum patriæ seminarium Academia haberi poterit ? quomodo decus servare ? quomodo publicum civium obsequium ac venerationem exigere , sibi que conciliare ? Deinde quæ argumenta in academicis congressibus evolvenda proponuntur , non sint ex iis , quæ ut non juvant scitâ , ita nec ignorata nocent : sed quæ *homini* , quæ *civi* , quæ *christiano* , maximeque *catholico* excolendo , ac perficiendo apta intelliguntur ; quæque in communem utilitatem & commodum quum vitæ hominis *animalis* , tum *civilis* , ac præcipue *moralis* conferri possunt . Ne secus id genus congressus verborum ac nugarum potius videantur , quam rerum : aut tinnienti cimbalo similes evadant , quod quum demulcet aures , nihil præstat aliud . Postremo per Academiæ Principes atque Rectores colligendi diligenter , præstantiores saltem & utiliores academici labores , atque vel generosa Metœnatum liberalitate , vel communibus Academicorum impensis in publicam lucem edendi . Ita quippe & in societatem conferre ea emolumenta poterunt ; & ad nova , ac nobiliora perscrutanda , ac detegenda Academicos ipsos allicere , & extimulare . Mitto cetera , de quibus legendus L. A. Muratorius initio Opusculi *sul buon gusto nelle scienze , e nelle arti* .

C A P U T XVI.

*De usu rationis in metaphysicarum veritatum
inquisitione per meditationem .*

§. CLI. **M***editatio* est eorum omnium ,
quæ observando , experiundo ,
ratiocinando , legendo , disputando , aut quovis
dummodo alio sensus mentemque exercendo
didicimus , maturius , quam umquam alias ,
examen , ac velut distincta , exactaque cribratio ,
& ventilatio . Fit itaque meditatio *reflexione*
mentis super ideas omnes , quas undecumque
hausimus ; ac judicia , & ratiocinia , quæ de
rebus quovis in casu , & quavis occasione effor-
mavimus ; necnon super quamlibet rem aliam ,
quæ ad eorum nexum , seriem , relationes , ac
millenas circumstantias alias quomodocumque
pertineat . Estque idcirco velut *speculatrix* no-
tionum omnium , quæ menti insunt , undecum-
que devenerint : nisi earumdem *spiritum* , &
animam aptius , & opportunius adpellare malue-
ris . Ejus campus , per quem expatiatur , est
memoria , promptuarium scilicet idearum ; ideo-
que amplior aut contractior , prout ea tenacior
fuerit , aut labilior .

§. CLII. *Meditatione* seria cogitationes om-
nes acute spectantur intrinsecus , versantur at-
tente *ex* omni parte , atque cum aliis , ad quas

relationem habent, diligenter conferuntur. Hinc spectanda velut amplior, & uberior scaturigo novarum veritatum intelligibilium & abstractarum; velutque severus & incorruptus iudex earum omnium, quas ex aliis quibusvis fontibus deduximus. Sane mens *meditationi* intenta, nescio quo, intelligibili ac spiritali lumine circumfunditur, quo magis, quam umquam alias, idonea reddatur rebus sublimioribus & intricatioribus perspiciendis, ac mira facilitate & nitore evolvendis. Quæ adeo vera sunt, ut ausim dicere, mentis rationem aut nullo modo, aut præcipue *meditando* novarum veritatum investigationi, & adsecutioni esse idoneam: quin *philosophari* non tam *cognitione directa discere* esse, quam *reflexa meditari*. *Discunt* enim & pueri, & rudes, & etiam famellæ: soli autem Philosophi, veri scilicet illi, nativi, ac germani *meditantur*.

§. CLIII. Meditatio; quamquam nobilissimum sit intelligentiæ munus, ex quo purior, ac præstantior disciplinarum succus in nos promanat; parum nihilominus utiliter tironibus inculcatur, dum ea in ætate *meditando* minus idonei esse videntur. Sane juvenes sive plura cito addiscendi aviditate illa; sive animo, quo sunt, impatienti & irrequieto; sive propter nondum expromptam & evolutam librandi facultatem; devorandis quidem rebus, simulque confarcinandis, atque *addendis acervo* apti sunt; cribrandis vero, & pacate meditandis minus idonei. Hinc *meditatio* Philosophorum propria

pria est ætate provectorum ; ac spiritibus sanguineque frigidiorum . Conferre eos possis cum bovom , oviumque moribus . Nam ut hi edendo , replendoque ventri per diem intenti sunt , nocte vero depastas herbas ruminare , ac tritutare solent ; ita & juvenes florente ætate memoriæ quidem rerum notionibus implendæ , ac locupletandæ ardentius vacant ; cribare postmodum illas , ac meditari incipiunt ætate proVecti , annisque maturi .

§. CLIV. Atque hæc quidem adeo vera sunt ut scientifici juvenum labores satis rudes de more videantur , indigesti , inconcimni ; atque plerasque opiniones ambabus ulnis adoptare , acriterque defendere plerumque observentur , quas annosi postmodum , plenique dierum pacatius contemplati , tamquam falsas ultro rejiciunt . Quæ etiam & in Operibus typis datis *novarum editionum* causa est , & origo . Quo in loco de iis novis editionibus loquor , quibus retractantur falsa , corriguntur prava , suppleantur manca , redundantia coercentur , enucleantur obscura , nutantia firmanur , hiantia ac perturbata nectuntur & ordinantur , ac ruvida demum & irfuta elegantiori forma , ac politiori stylo perpoliuntur . Quippe quum ea vitia minime illis , dum primum in lucem eduntur , inessent , si eorum auctores in *meditando* profundiores fuissent , ac patientiores . Quæ enim Opera germanæ *meditationis* foetus sunt , ea & pulcra , & nexa , & ordinata , & numeris denique omnibus absoluta in lucem eduntur .

§. CLV. Neque etiam spectare alio putaverim Venuſinum noſtrum, dum ſapienter monet, ut, *quæ ſcribuntur*, antequam publici juris fiant, *nonum in annum dimittantur*. Nam hinc incalſcente nimis juvenum phantaſia, nimioque præterea inordinato rerum ſuarum amore capti; illinc rebus, ut oportet, cribrandis ac maturandis minus idonei; fit, ut ea adglomerare ſimul, & conſarcinare videantur, quæ niſi multos poſt annos ſevero, pacatoque examini ac meditationi ſubjecerint, atque in meliorem formam redegerint, indigna proſus ſunt, ut in publicam lucem emittantur. Quamquam ea Poetæ admonitio etiam ætate maturos, ſtudiisque attritos atque ſubactos facile ſpectare poſſo videatur. Nam ſive nativa mentis imbecillitate id fiat; ſive quotidianis diſtractionibus & curis; ſive nimio noſtri amore, quo nobis cuncta noſtra placent; ſive cauſa alia quacumque; difficillimum proſus fuerit, ut primi calami ductus ac ſætuſ numeris omnibus ſic abſoluti prodeant, quatenus publicam lucem ſtatim, & abſque ulla emendatione ac perpolitione promeantur. Hinc & viris quoque ſummis ſubſcriptionis librorum initia *paternæ ſæpe cecidere manus*, ac *folia ſæpe fuere ludibria ventis*

§. CLVI. Ceterum ſi ſublimioribus ac diuturnioribus meditationibus ineundis minus idonei ſunt tirones noſtri; enitantur ſaltem; quantum poſſunt, ut illis paulatim adſueſcant. Bibant equidem quotidie de ſcientiarum fluens

tis,

tis, quantumcumque voluerint; sed *deguſtando* per vices, non toto pectore, plenoque gurgite perpetuo hauriendo. Nam præter quam quod quæ meditando didicerunt, clarius ac nitidius intelligent; profundiora etiam veſtigia in memoriæ promptuariis eudent; ac ita tenacius, diutiusque in eadem hærebunt. Quod quum fit, mirum in modum eorum ſapientia augebitur in dies; ſi quidem verum eſt, quod alibi adnotatum: *Tantum ſcit homo, quantum reminiſcitur*. Contra vero juvenes, qui nova ſemper ac nova ſine ullo prorsus *meditationis* præſidio addiſcere, memoriæque demandare ſatagunt, *retrogradi*, quodammodo in ſtudiis utplurimum videntur. Quia nimirum minus intelligendo, quæ ſic avide, & immeditate memoriæ committunt, leviora in ea veſtigia imprimunt, ac ita facilius eadem ut umbræ dilabuntur, tamquam ſi nuſquam didiciſſent.

§. CLVII. Sant & eximia emolumenta alia, quæ ex *meditationibus* rite inſtitutis in nos promanant. Sane quum aliorum dicta, aut facta, aut etiam ſcripta attente meditamur, atque aliqua in illis vitia detegimus; totidem animadverſiones ac monita ea nobis ſunt, ne in eadem oſcitanter prolabamur. Viciffim vero totidem potentiffima incitamenta atque calcaria erunt dotes illæ plures & ornamenta, quæ in illis obſervaverimus, ut eadem pro opportunitate imitemur. Quinimmo nedum devitare mala, imitarique bona, ſed & meliora quoque, ac præſtantiora commoliri adnitemur. Nam ea
hu.

humanorum ingeniorum , saltem nobiliorum
generosa indoles atque natura , ut deterioris
conditionis suæ velut erubescencia atque per-
tæsa , aliorum præclare dicta , gesta , atque scri-
ta , & cogitata nedum exæquare festinent , sed
& velis , ut dicitur , equisque prætergredi , ac
superare contendant .

§. CLVIII. Quo autem *meditationes* rite in-
stituantur , atque magnis hujusmodi emolumen-
tis in studio disciplinarum nobis suppeditandis
reddantur idoneæ , sequentia præcepta servanda
proponam . Primum nempe sit mens ab omni-
bus affectibus libera : ut res meditationi subje-
ctas tales ipsa cernat , quales sunt in seipsis .
Deinde rebus eisdem sit ea nimis quoque in-
tenta . Attentio quippe quo major fuerit &
acutior , eo mentis obtutum in res ipsas velut
profundius infiget . Rursus nullis rumoribus ,
nullaque extranea cura meditationis tempore ea-
dem mens perturbetur . Ne scilicet attentio-
ne imminuta , res velut illius aciei subtrahan-
tur , & evanescant . Hinc nocturna silentia , &
loca opaca meditationibus rite ineundis valde
aptata . Præterea cogitationes undecumque de-
haustas ea sic meditetur , ut severo pacatoque
examine minutatim cribret , veræ ne sint illæ ,
an falsæ : vacillantes , an firmæ : bonæ , an pravæ :
utiles , an supervacaneæ : ordinatæ , an pertur-
batæ : satis evolutæ , an adhuc confusæ : pul-
crene , ornatæque contextæ , an horridæ , & in-
cultæ : alia hujusmodi . Præcipue vero , num
rationes , quibus ex ita potius quam aliter no-
bis

bis videntur, solidæ sint atque perspicuæ, an imbecillæ minusque claræ introspiciendum. Tandem meditatione completa, generose abjicienda, expurganda, supplenda, firmanda, corrigenda, evolvenda, collustranda, ordinanda, nectenda, ac perpolianda, quæ falsa, quæ supervacanea, quæ manca, quæ imbecilla, quæ prava, quæ confusa, quæ obscura, quæ perturbata, quæ abrupta, quæque demum inculta, & inornata meditando visa fuerint. Nam cribratione expleta, excusso rusticano furfure, purior tantum farina adservanda.

§. CLIX. Quum ea cogitationum, rerumque discretio per meditationem acta fuerit, velim, sincero animo, menteque pacata setum ipsis reputent æqui bonique rerum estimatores, quam pauca sint, fereque nulla, quæ clara immobilique cognitione comprehendimus! Quam vicissim multa, quamque infinita, quæ aut ignoramus prorsus, aut vacillanti, incertoque iudicio tenemus! Nam istuc princeps ac præstantius *meditationis* emolumentum fuerit, si propriæ ignorantiae conscius fiat homo; ne umquam superbiat in sapientia sua, sed humanitatem ubique profiteatur, mansuetudinem, comitatem. Imitandum memorabile Socratis, magni illius in antiquitate Philosophi, exemplum, qui hac via eo incomparabilis humilitatis devenit, ut de se fateri non erubesceret: *HOC UNUM SCIO, ME NIHIL SCIRE.* (a).

Sed

(a) Celebre istud Socratis effatum tamquam eximæ


Sed de *Arte inquirendæ veritatis metaphysicæ per mentis rationem*, deque integro Libro III. jam satis multa. Ad postrema progrediendum.



T

AR.

mix potius *humilitatis* ejus argumentum, quam universalis *scepticismi* indicium, uti vulgo fit, heic proponere, adhibereque malui; propterea quod nescio quid *enfasis* in illo mihi secernere videar: atque ubi de viris præterea magnis agitur, cohibendus semper calamus sit; nec ob leves suspiciones, ac non satis firma monumenta ad ea protinus convolandum, quæ illis aliquam levitatis, oscitantæ, malitiæ, fraudis, aut infamiæ notam inferre possunt. Quæ iusta, ac tironibus, ut in *habitu* convertant, nunquam non inculcanda. Scilicet vere scepticum, idest veritatis omnis hostem & oppugnatorem Socratem, cujus tam magnificæ per omnia sæcula laudes, nunquam adduci possum, ut credam. Quod si ad compescendam Dogmaticorum fortasse superbiam id ab se dictum conicere velimus, non repugnabo. Nam ea sæpe magnorum virorum prudentia est, ut, quo aliorum adregantiam salubrius reprimant, seipsos ad ima dejiciunt.



A R T I S

INQUIRENDÆ VERITATIS

L I B E R IV.

*De arte inquirendi veritates historicas per
auctoritatem ad Criticæ leges exactam.*

§. I. **V**Entum jam tandem ad Librum IV, eumque postremum, in quo *de arte investigandi, adsequendique veritates historicas* nobis sermo. Est & hic campus longe lateque diffusus: quippe quum narrationem spectet innumerabilium eventuum omnium temporum, omnium nationum, omniumque locorum. In eo percurrendo *mentis ratione* opus est plurima, plurimaque *critica*; ne clausis velat oculis fidem indiscriminatim cuivis adhibendo, ficta etiam, spuria, & interpolata pro realibus,

ge.

genuinis, & incorruptis habeamus. Itaque si sæpe alias, heic etiam & acuitur mirifice *ingenium*, & *judicium* in veri a falso discrimine mirum in modum roboratur. Adnitantur itaque tirones, ut quæ eam in rem dicturi sumus, non ediscant solum, sed & familiaria sibi quoque reddantur. Ita quippe magnorum virorum prudentiam imitati, errores in iudicando cauti declinabunt: nec *cito*, *uti fit*, *credentes*, *leves erunt corde*. Quod vitium ipsimet Scriptores sacri reprehendunt, quum monent: *Qui cito credit, levis corde est*.

C A P U T I.

De auctoritate humana, ejusque principiis generatim.

§. II. **D**ictum quodvis, aut scriptum, quo aut docetur aliquid, aut enarratur, *auctoritas* generatim adpellatur. Eaque duplex est, *divina* & *humana*. Nam quum Deus, tum homines & docere nos aliquid possunt, & præteritorum temporum gesta narrare. Porro de *auctoritate divina* dicam capite postremo: heic tantum de *humana*. Quam etiam ex ea dumtaxat parte spectandam adsumo, qua præterita facta, sive *veritates historicas* enarrando nobis tradit, & contestatur: quale scilicet, quantumque pondus illi insit pro diversitate circumstantiarum,

quæ ipsius narrationem, & attestationem comitantur. Quatenus enim ea docet, quæ naturalium sunt disciplinarum; sat heic dixisse fuerit, magna quidem, si de Viris illustribus sermo sit, in veneratione illam & obsequio habendam; verum tantam illi vim ac pondus ad probandum ac refellendum inesse, quantum rationes præferunt, quibus ea aut fulcitur expresse, aut prudenti judicio & conjectura fulciri intelligitur. Alioquin *naturæ vox* audienda; quippe quæ & prima, & aliarum magistra, & semper eadem, semperque verax: quum vicissim & Ciceroni Demosthenes, & Homerus Horatio, & alii præterea aliis *dormitare* aliquando videntur. Prudenti autem judicio humana auctoritas ratione fulciri intelligitur, quum & viri probi, & docti, & graves ii fuerint; & magna præterea studia, ac meditationes ea in re impenderint, de qua sine expressa ratione quidpiam docent, ac stabiliunt.

§. III. Quum auctoritas humana in rebus facti *principii* loco inter ratiocinandum adsumitur, conclusiones inde deductæ non ad *scientiam*, certam videlicet evidentemque cognitionem spectant, sed ad meram *fidem*, eamque humanam, quam ad sensum non immerito dixeris præteritorum temporum factis exhibitum propter Historicorum, qui ea narrant, auctoritatem, & contestationem. Ita si dicam: *Romanarum rerum Historiographi mira consensione testantur, Julium Cæsarem a Bruto & Cassio in senatu fuisse trucidatum. Vere igitur ab hujusmodi*

jusmodi conjuratis Julius Cæsar necatus fuit : ea conclusio ad *humanam fidem* spectat ; in qua proinde præter *certitudinem*, aut *probabilitatem*, nulla *quærenda evidentia* . In conclusionibus namque ex iis tantummodo principiis manare *evidentia* potest, quæ *nexum* subjecti cum prædicato patefaciunt . Cujusmodi ea tantum principia sunt, quæ 1. ex *externorum sensuum experientia* : quæ 2. ex *immediata mentis intuitione* : quæ 3. ex *intimo sensu* : quæque demum 4. ex *veritatibus aliunde demonstratis*, non quæ ex *auctoritate* quacumque, sive *divina* sive *humana*, deducuntur .

§. IV. Eccur igitur, quæret hæc forte aliquis, ad pervestigandas & adsequendas *veritates historicas* humana auctoritas adsumitur, si mentem e tenebris, quibus præteritorum temporum gesta obvolvuntur, in evidentiae jubar minime deducit ? Scilicet in hunc ea finem adhibetur, quia nulla alia via in illarum notitiam devenire nobis permittitur, multo minus clariori agnitione comprehendere . Non quidem *experientia* sensuum ; quia quum præteritis ea temporibus fierent, nedum ipsi non interfuimus, sed ne editi quidem fortasse in lucem eramus . Nec *ratione mentis ac meditatione* ; quia quum fortuita & contingentia ea facta fuerint, nullum suppetit medium, quo intelligamus, contigisse eadem potius, quam non contigisse . Nec postremo *sensu intimo & conscientia* ; quippe quum ad hunc tertium humanæ sapientiæ fontem ea minime pertineant,

nec ullam cum eodem relationem habeant. Quid igitur? Remeabimus ne retrogrado cursu præterita sæcula, ac ita facta ipsa propriis nosmet oculis intuebimur? Inania vota! . . . Anne in omnigenæ ignorantiae tenebris conspulta relinquemus? Sed magnæ illæ, quæ (ut sequenti capite dicam) ex eorum studio utilitates in nos manant & commoda, non permittunt. Velimus itaque, nolimus, Historicorum attestationibus utendum, qui, quum fierent, oculati testes adèrant, eorumque historiam fideli narratione ad nos demandarunt.

§. V. Principia autem, quorum vi facta credimus, quæ Historiographi nobis facta testantur, in duo generaliora facile conjici possunt. Primum: *quod in eorum cognitione & examine haud decepti sint ipsi*. Alterum: *quod nec in eorundem narratione nos decipere voluerint*. Ubi principia isthæc ambo constiterint; quamquam de uno tantum teste sermo sit; plenam nihilominus rei gestæ fidem conciliat, quam narrat: nec, nisi præfraçte, & ad libidinem in suspicionis notam adduceretur (a). Ut adeo heic intelligant

ti-

(a) Alioquin in univèrsa re historica nihil crediderimus umquam, sed aut dubiis acconferimus omnia & incertis, aut fabulosis ac falsis. Qui fane damnabilis scepticismus est, homine dumtaxat superbo, procaci, ceterorum contemptore, nec umquam rationali & ingenuo dignus. Quare quum facta fluxu refluxuque perpetuo accidunt in dies; dari proguldubio medium aliquod firmum, stabile, & cui adscensus omnino de-

tirones, testium multipliciter, non *præcise* quatenus plures sunt, sed quatenus ab huiusmodi principiis vim singuli scenerantur ac robur, in unius ejusdemque facti narratione majorem fidem promereri. Adeo ut fidei incrementum ex iterata potius talium principiorum applicatione, quam ex iterato testium, quibus applicantur, numero proficisci videatur. Hinc nisi utroque, ut oportet, principio isto singuli munirentur; quamquam & tenteni, & milleni etiam testes forent, ne minimum quidem probabilitatis gradum attestationibus suis conferre possent.

§. VI. Sed quibusnam indiciis dubium omne excusserimus, *Historiographos in facti cognitione & scrutinio haud fuisse deceptos*, juxta principium priori loco propositum? Scilicet si testes fuerint & coævi, & oculati, & eximie doctrinæ, & perspicacissimi ingenii, & judicii rigidissimi. Nam id genus testes, ac eximiis hisce dotibus exornati, quum rei gestæ interfunt, quum illam ex omni parte scrutantur attentius,

T 4

quum-

denegari non possit, quo veræ a falsis, certæ a dubiis multiplices eorum narrationes secernantur. Nisi autem medium istuc *in immunitate quum fraudis, tum illusionis ejus*, qui narrat, situm sit; equodnam, quæso, aliud erit? Sciscitanti vero, qua nota distinxerimus eum, qui in rerum gestarum narrationibus omnes indiscriminim homines falsiloquos, ac mendaces habet? Equidem harum alterutra omnino reputarem: aut *impudentis* scilicet, aut *desirantis*, aut etiam *insani*. Quippe ut nemo omnes, ita omnes neminem fallunt.

quumque de eadem nonnisi recta judicia ferunt; in illius intelligentia, & circumstantiarum cognitione ac discrimine ab errandi periculo prorsus immunes sunt. Quæ vera adeo & indubia, ut (quemadmodum in superioribus libris sæpe dictum, ac tironibus inculcatum) in judiciis ferendis non alia nobis supersit errores declinandi via. Præditi ne vero hisce dotibus Historici fuerint, qui rerum gestarum narrationes conscribere; ex eorundem Operibus, aliisque scriptoribus coævis facile perverstigari, ac dignosci poterit. Ceterum sunt facta quædam, quæ tam præcellentem doctrinam, tamque ingenii perspicacitatem in testibus oculatis minime exigunt, ut in eorundem cognitione factorum ab errore immunes censeantur. Tanta scilicet eorum evidentia esse solet, ac tam multiplici experimentorum genere comprobata! Ut magnum e. g. incendium in civitate fuisse excitatum: nimborum grandinum tempestate agros fuisse depopulatos: ingenti concussione telluris ædificia fuisse solo æquata: verum fuisse hominem, cum quo longo dierum intervallo multi loquuti fuerint, manducarint, biberint, tetigerint, palparint, & ita porro. His namque in casibus sat erit, si iidem oculati testes non omnino hebetes, ac stupidi fuerint, nec opus præterea quavis dote alia.

§. VII. *Fuisse autem viros probos, nec in rerum proinde gestarum narratione nos decipere voluisse; quod erat principium alterum ibidem (§. 5.) propositum; scire poterimus quum*
in-

intrinsecas, tum *extrinsecas* improbitatis causas recensendo; atque num in ipsorum, aliorumque Historicorum coævorum libris ex inventantur, diligenter perscrutando. Libri namque totidem linguæ sunt, ex quibus auctorum vitia, ac virtutes facile intelliguntur. Ac extrinsecæ quidem improbitatis causæ, propter quas rerum gestarum narrationes data opera augeri, imminui, permutari, totoque molimine fingi possunt; ac ita auctæ, imminutæ, permutatæ, totoque molimine fictæ posterorum memoriæ demandari, sunt, *patriæ amor*, *adulatio*, *odium*, *timor*, *ambitio*, *pecunia*, *phanatismus*, similes. Tum intrinsecæ, *animi levitas*, *natura ad mentiendum proclivis*. Ubi aut his omnibus, aut aliquibus etiam maculatum noverimus Historiographum, mendacem illum in suis narrationibus ac deceptorem, nec ulla fide dignum reputabimus. Veracem contra, sincerum, & cui merito plena sit fides præstanda, si ab omnibus, ac singulis eisdem improbitatis, malæque fidei causis immunis fuerit.

§. VIII. Hæc de *oculatorum* testium fide, eorumque narrationum certitudine. Quidnam vero de *supparium*, ac subsequantium sæculorum? Scilicet (quod alta hæc mente reponendum) *centrum omnis credibilitatis in historia humana*, ex quo scilicet tam in suppare, sive rei gestæ viciniore, quam in subsequantium ætatum Historicos fides velut in orbem manat ac funditur, ipsos esse testes & coævus, & oculatos, & doctos, & perspicacissimi ingenii, & iudicii

rigidissimi, & probatæ demum sinceritatis, ac probitatis. Nam eatenus hi fidem promerentur, quatenus ab eisdem cœvis, & oculatis narrationes suas hausisse intelliguntur. Alioquin peritescendum semper, ne aut ex incerto, impuroque fonte illas hauserint; aut successione saltem temporum, & orali traditione res ipsa gesta, ejusque præsertim comitantes circumstantiæ auctæ, uti sit, imminutæ, aut permutatæ prorsus fuerint. Quid igitur de *apostolicis traditionibus*, quæ calamo minime exaratæ, nisi a Patribus secundi, tertii, aliorumque subsequentium Ecclesiæ sæculorum? Scilicet ab hac suspicionis lege eximendæ; quia quum urgentia nimis eas retinendi, nec immutandi essent Apostolorum præcepta fidelibus inculcata; sollicita hi cura, moribus, ritibus, ac professione incorruptas servavere, ac Patribus, qui literis postea consignarunt, velut per manus demandavere.

§. IX. Ceterum (ut ad institutum regrediamur) quum supparet, ac subsequentium continuo sæculorum Historici, præsertim emunctæ naris, & criticæ severioris, cœvorum narrationes & recipiunt, & probant, & posterorum memoriæ committunt; ac ita earum *integritatem*, ac *genuinitatem* cuivis ætati testificantur; magnam illis proculdubio vim ac pondus adjiciunt. Adeo ut vel obtusi prorsus plumbei que ingeni, vel maxime superbi ac pervicacis sit, adversus talem tantamque testium nubem easdem in suspicionis notam adducere. Idque præsertim, si rerum gestarum, quæ ab illis enar-

enarrantur, rudera quædam, fragmenta, epitaphia, similia vetustatis monumenta, ut in romanorum victoriis, adhuc supersint. Hæc, inquam, & similia non tam *negare*, idest, *cum ratione rejicere* est, quam *negare velle*, scilicet *ex pertinacia non recipere*. Quod nisi viro philosopho indignum, ecquidnam aliud erit?

§. X. Ea igitur ambabus semper ulnis excipienda; quamquam centenæ sæculorum myriades, ut ita dicam, elapsæ forent. Nam quod nonnullis creditum, rerum gestarum certitudinem temporum successione imminui, ac tandem post binas circiter sæculorum decades prorsus evanescere; id aut joco dictum putaverim, aut ea tantum in hypothesi, in qua *genuinæ & authenticæ* cœvorum historiæ vel interierint prorsus, vel maxime corruptæ ac interpolatæ fuerint. Alioquin non video, quomodo tam putida errorum figmenta cuiquam in mentem venire potuerint. Si enim veritas semper eadem: si oculares, genuinæ, ac veraces illius attestations minime corruptæ & immutatæ: ecurr non eadem quoque certitudo, non eadem semper fides illis adhibenda? Belle! Si *criticæ artis* istiusmodi dehonestamentum flaret, nedum primitiva certitudine, sed & omni etiam probabilitate excidissent jam facta omnia, quæ quantum, aut quantum ante Christum sæculum præcessere. Quin ne homines quidem eadem de causa extitisse sciremus, quos ante ea tempora vixisse, ac floruisse narrat historia quum sacra tum profana. Quis temperet a risu?....

C A P U T II.

*De utilitate inquirendi, ac perdiscendi veritates
historicas : & delectu, ac præcautionibus,
necnon mediis in eo studio adhibendis.*

§. XI. **V**eritatum historicarum, siue Historiæ generatim studia nullo non tempore viris doctis utilissima visa, & inculcata. Quin & hebræis magna emphasi inculcat Moyses Deut. xxxii. 7 : *Memento dierum antiquorum : cogita generationes singulas : interroga patrem tuum, & annuntiabit tibi : majores tuos, & dicent tibi.* Inculcat ea vero, ut memores mirabilium, quæ fecit Dominus in terra Ægypti, ut illos e Pharaonis tyrannide liberaret ; & quemadmodum in deserto *custodivit sicut pupillam oculi sui* ; mores, vivendique rationem ad pietatis, & gratitudinis erga Deum officia, quæ jam perverterant, revocaret. Prima itaque historicorum utilitas studiorum in eo constituta, ut intentissimam Dei curam ac providentiam in Ecclesiæ suæ regimine ab Abel justo ad hæc usque nostra tempora in memoriam revocantes, in gratiarum actione, morumque puritate & sanctitate maneamus (a). Quæ si
alicui

(a) Legi heic omnino meretur eximium opusculum

alicui ceteris fortasse minor utilitas videatur ; maximam ego contra , nec cum quavis alia comparandam existimo . Sic enim animo ex perpetua methodo constitutus sum , ut quæ moribus ad pietatem & sanctitatem componendis sunt maxime aptata , ea ceteris anteponenda censeam . Præsertim quum qui ex animi sinceritate & candore *pius religiosus* fuerit , is & *utilis civis* , & *homo* pariter *honestus* esse oporteat . Quo in loco opportune mentem subit , quod lepide non minus , quam veraciter quidam agebat

lum illustriss. præsulis Benigni Bossuetii , cui titulus : *Discorso sulla Storia universale* , in quo magna , ut solet , eloquentia , doctrina , & eruditione ob oculos ponit , Ecclesiam , licet sæpissime , ac supra modum crudeliter , acerbissimeque vexatam ; sub ipsa nihilominus immanissima tyrannide nedum numquam desisse prorsus ; sed & , protegente Deo , magis magisque floruisse in dies , finesque suos longe lateque prolataste : interea dum regna vicissim , & imperia , quæ amplitudine , majestate , ac stabilitate sua æternum duratura videbantur , fluxu refluxuque continuo interiere omnia , ac fracta prorsus & comminuta cecidere . Quibus sane intelligimus , 1. nihil esse in humanis stabile ac firmum , sed temporanea omnia atque caduca : 2. religionem Deum habere auctorem , ac protectorem : ideoque 3. ad sæculorum consummationem perpetuo fore illam duraturam : tum denique 4. esse veram , sanctam , & quæ sola beatæ hominem potest quum heic , tum multo perfectius , & cumulatius in altera vita .

ajebat; eos scilicet, qui hominis *naturæ animalis* commoda & utilitates utilitatibus & commodis *naturæ ejusdem rationalis* anteponunt, plus *genere* abundare hominis, quam *specie*. Quæ lepida, ut dixi, & vera,

§. XII. Sed & magno quoque incitamento hæc nobis studia sunt ad illustrium virorum virtutes imitandas, atque ad improborum vitia præcavenda, dum ad inexorabile *Historiæ* tribunal hos sempiterna infamia notatos, illos contra summis laudibus ad sydera evectos observamus. Quæ adeo vera sunt, ut ea via nonnulli invicti duces aliorum æmulatione evaserint: alii pastores eximii: alii optimi principes: alii doctores egregii: alii præcellæ sanctitatis viri: alii virtutibus aliis præclari. Atque ut unum vel alterum exemplum adferam, æmulatione Ulyssis apud Homerum, cujus *Iliadem* nocturna manu versabat, quum non posset diurna, ad totius orbis imperium anhelabat Alexander Macedo. Alexandri exemplo, cujus vitam ac res præclare gestas sæpe pervolutabat, romanam remp. ditioni suæ subjecit Julius Cæsar. Hujus *Commentariorum* lectione incensus Solinus turcarum imperator, a majoribus collata sibi regna mirum in modum per Asiam, & Africam prolatavit. Nec optimi principis gloriam adeptus est Carolus V. imperator, nisi lectione assidua vitæ Aloysii XI. quam in deliciis habebat. Ac generatim æmulatione præcedentium Ecclesiæ pastorum, doctorum item, ac sanctorum virorum, qui saluberrimis institutis,

do-

doctrina, ac virtutibus præterita sæcula collustrarunt, alii commissum sibi gregem sanctissime gubernarunt: alii literis incubuere impensius; ac spretis mundi illecebris alii *in novitate vitæ* se Deo consacrarunt. Quorum exemplis *Historia ecclesiastica* plena est universa.

§. XIII. Nec minor utilitas censenda, quam ex eodem studio *Religio* mutuatur. Enimvero quum bona *Historiæ* pars in eo tota occupetur, ut scientias omnes, & artes sua habere commonstret incunabula, eaque multo etiam recentiora, quam *Ægyptii* fabulentur: hinc solius etiam *Historiæ* lectione, ac citra *Philosophiæ* præsidia intelligi potest, mundum hunc adspectabilem haud esse æternum, sed nedum in tempore, verum & satis quoque recenter ex nihilo conditum, ac conditum quidem illum a Mente sapientissima, ac potentissima; quum ob admirabilem illius ordinem, pulcritudinem, & harmoniam esse nequeat nisi *opus summi consilii, ac sapientiæ infinitæ*. Sane quid causæ fuisse dixerimus, ut quæ paucis ab hinc annorum millibus sensim sensimque inventa ac perpolita sunt, latere ea homines potuerint per interminabiles retro æternitates? Qui adeo rudes, stupidi, plumbei que ingenii per infinita sæcula esse illi potuere, ut miserrimam vitam degerent sine *Astronomia*, sine *Nautica*, sine *Medicina*, sine *Jurisprudentia*, ac sine illarum omnium quum liberalium, tum mechanicarum artium præsidio & emolumento, quibus humana societas nunc tan-

tantopere fruitur , & oblectatur ? Sed nedum *atheismi* falsitate , verum & continuo etiam regnorum fluxu ac refluxu , interea dum Religio semper eadem perseverare conspicitur , ejusdem firmitatem , divinamque protectionem Historia commostrarat ; quemadmodum mox diximus in superiori *Adnotatione* (ad §. XI.) .

§. XIV. Mitto historicorum studiorum utilitates alias , animique oblectationes . Atque *delectum* modo quod spectat , illas historias in primis legendas velim , ex quibus hujusmodi emolumenta facilius non minus , quam promptius & uberius capi poterunt . In omni quippe studio ea semper in deligendo prudentia adhibenda , ut breviori , quoad fieri potest , tempore ac labore major utilitas capiatur . Scilicet contendendum semper ad majorem possibilem utilitatem minori possibili tempore ac labore nanciscendam . Deinde inter tot nationum historias ceteris præferenda , quæ propriæ nationis originem , progressum , mores , regimen , leges , religionem , inventa , solum , commercia , scientias , artes , situs , climata , characteres ceteros ob oculos ponit . Nam in aliarum nationum historia annosa impendere studia ; propriæ autem vel negligere prorsus , vel summis tantum labiis delibare ; id & sua non curantis est , & judicantis præpostere . Itaque consulendæ ceterarum notionum historiæ , sed postquam *domesticam* non perlustravimus modo , sed & tenaci memoriæ commisimus , atque digessi-

geffimus. *Turpe est enim, ut aliena sciamus, nostra nescire (a).*

§. XV. Adeamus & *præcautiones* eodem in studio adhibendas. Ac primum cavendum, ne *Ecclesiastica historia* in Deistarum, aut Hæreticorum operibus legatur. Quum enim priores in *revelatam*, posteriores autem in *catholicam religionem* odio æstuent implacabili; nullumque non moveant lapidem, ut fastorum ejus gloriam ac splendorem, si fieri potest, deprimant; deest consequenter illis *indifferentiæ*, sive *impartialis judicii* character, sine quo tamquam improbi ac deceptores nullam fidem promerentur (§. 7.). Horum itaque lectio aut devitanda prorsus, aut cum viri catholici, itemque docti, ac perspicacis *adnotationibus*, & *apologiis* conjungenda. Deinde præferendi semper Historici & cœvi, & oculari,

V &

(a) Simile præjudicium, sive potius phanatissimum per incautam juventutem grassari videmus in studio *linguæ gallicæ*. Nihil umquam se didicisse credunt, nisi *gallice* garriant. Interim in *latino*, & *italico idiomate*, quorum utrumque & patrium, & domesticum, & plusquam quodvis aliud præclarum, nulla interest, si de more *rudes* sint, *inculti*, *barbari*! Incredibilia hæc videri possent, nisi in dies observaremus. Porro culturarum nationum linguas callere, & bonum, & utile, & decorum. Domesticam autem, conveniens præterea, & necessarium. Percolamus aliena: sed postquam nostrâ decenter exculta, perpolita, ac perfecta fuerint. Id enim *judicium*, ea *prudentiâ*: cetera *inconsulta*, & *incogitata*...

& ceteris præterea dotibus præditi, quas præcedenti capite (§. 6. 7.) enarravimus. Nam hi plenissimam fidem faciunt rebus gestis, quas narrant. Ubi autem cœvi, & oculati haberi non possunt, ex supparibus, ac subsequantium ætatum Historicis seligendi semper, qui acriori ingenio, eximiaque doctrina, ac judicio rigidiore cum animi probitate pollentes, originarios ipsi fontes, testesque cœvos & oculos consulere. Nam hi ceteris & cautiore sunt, ne decipiantur ipsi; & multo sinceriores, ne alii in errorem ipsorum causa inducantur.

§. XVI. Superest tandem, ut *media* proponamus, quibus rerum historicarum studia & faciliora reddantur, & utiliora. Ea autem triplici sunt in classe constituta. Principio opus est *adcurata analysi*, sine qua in historia perturbata omnia & confusa, tamquam necessaria partium divisione, ac subdivisione carentia. Quare servandæ heic *divisionis regulæ*, quas priori Libro (§. 94.) tradidimus. Deinde juvat plurimum quum firmandæ memoriæ, tum intelligentiæ collustrandæ, regionis, cujus historiam perlustramus, ob oculos *mappam* habere *geographicam*; ac facta, quæ referuntur, iis locis alligare, in quibus ea olim contigisse narrantur: quæ *memoria localis* vulgo dicta. Rursus idem judicium ferendum de *tabula chronologica*, in qua juxta ordinem temporum eadem facta disponantur. Nam ut per *geographicam mappam* locorum confusio, ita & confusio temporum

porum per *tabulam chronologicam* devitatur. Quæ adeo vera sunt, ut initio *Dissert. chronologicar.* scite scripserit Vossius: *Sunt Geographia, & Chronologia germanæ sorores, imo quasi ocelli duo Historiæ; quorum altero si orbetur, lusa fiat; utroque extincto, cæca sit prorsus.* Nec denique prætereundum, in eo studii genere ingentem prorsus utilitatem adferre *locæ* quædam communia in foliis seorsum distincta & exarata, in quibus 1. illustriora quorundam facinora: 2. dicta pulciora, & argutiora: 3. demum consilia salubriora, quæ in percurrenda historia per vices occurrerint, cum *nota temporis* adnotentur. Nam dum ea postmodum perleguntur, brevi in memoriam revocamus, quidquid pulcrius, quidquid utilius, atque præstantius longo tempore ac labore didicimus (a).

V 2

CA.

(a) Id genus *miscellanea* quamquam nullo plerumque sint inter se ordine, ac nexu colligata; spectari nihilominus debent velut *collectiones* eorum omnium, quæ in genuinis operibus pulcritudinē suā, præstantia, & utilitate primas partes gerunt; & quæ sunt velut *totius operæ pretium, succus, spiritus, & anima*. Quinimmo illud etiam habent commodi, ut, quum seorsum in foliis, in quibus per vices exarata, leguntur, *attractione* quadam, uti superius (Lib. III. §. 17.) dictum, ea in mentem revocent, quibus in autographis operibus adsociata simul erant, & colligata. Quare optandum maxime foret, ut non historici modo, sed & cujusvis Libri sive sacri, & ecclesiastici, sive profani lectio ac studium ab hujusmodi præstantiorum locorum, quæ per vices in illis occurrunt, *collectionibus* numquam esset disjunctum.

CAPUT III.

*De artis critica natura, deque illius necessitate,
ac moderamine in investigatione veritatum
historicarum ope auctoritatis humane.*

§. XVII. **A**RS critica est, quæ docet, quemadmodum de Operibus ingenio partis, deque factis historicis judicia pro merito ferre debeamus. Est itaque in primis *ars critica* velut diligens *exploratrix* accidentium omnium, quæ in quævis Opera sive *historica*, sive *dogmatica* irrepere possunt. Quocirca ad ejus tribunal spectat diligenter primum investigare, tum impartiali incorruptoque judicio sententiam ferre, sint ne ea Opera genuina, an apocrypha: recentia, an vetusta: integra, an mutilata, an aucta, an permutata: ullisne erroribus, an nullis, aut levioribus tantum scædata: confusa, an in ordinem digesta: manca, an redundantia, ac verbosa: cultone, an rudi, an mediocri stylo contexta: selectiori, an vulgari, an etiam importuna eruditione referta: alia id genus plurima quum *historicis*, tum *dogmaticis* Operibus communia.

§. XVIII. Sed in *dogmaticis critica* quoque observatio, eaque fortasse præcipua fuerit, si quæ in illis demonstranda proponuntur, robuste ac nervoso, an vacillanti & infirmo ratione

tiocinio sint demonstrata. Tum quæ in contrarium a viris doctis fuere proposita, solidane, an perfunctoria, aut nulla etiam solutione rejecta. Quo in loco castiganda quorundam Recentiorum opinio est, qui jus, nescio quod, novum, ac imo noxium sibi adrogandum putant, ut, quum aliquid sibi demonstrasse videntur, soluti ab omni onere esse velint quolibet in oppositum graviores difficultates (de cavillis namque, quos refellere sapientum dedecet gravitatem, heic non loquor) evolvendi, ac refutandi. Castiganda, inquam. Nam vel 1. inertium, & imperitorum ea præsumptio est: vel 2. de se nimis alte, de aliis contra nimis abjecte sentientium: vel 3. oppositos etiam tacite soventium errores: vel 4. juvenum saltem indigentias parum, aut nihil omnino curantium.

§. XIX. Principio enim inertes tamquam laboris impatientes; imperiti vero, tamquam necessaria doctrina & ingenio destituti, prætextu *adlatæ demonstrationis*, eas difficultates ultro prætermittunt. Deinde qui de se nimis alte superbeque sentiunt, aliorum cogitata vel memorare solum dedignantur; atque tamquam inepta ac vana, quacumque fulciantur ratione, contemnunt. Quod quum faciunt, minime advertunt, in paralogismos, ac sophismata ipsamet summa non raro ingenia turpiter incidisse, interea dum perspicuas, adcuratasque demonstrationes protulisse se arbitrabantur. Nec raro evenisse, ut quæ demonstrationum habeban-

tur loco, quum ab aliis, tum etiam a semet-
 ipsis, maturiori adhibito postmodum examine,
argumentis mere probabilibus adjecta fuerint.
 Rursus qui oppositos errores aperta fronte pro-
 fiteri, aliosque docere verentur, eo etiam cal-
 lido silentio uti solent. Quinimmo horum non-
 nulli ulterius prætergressi, ac dolum dolo ad-
 jicientes, contraria argumenta refellere quidem
 se videri volunt; ast (proh fraudem, malamque
 fidem!) quum eorum vim ac pondus, quoad
 possunt, in immensum adaugent, solutiones
 contra tantundem deprimunt. Est hæc venena
 propinandi ars impiis, & hypocritis fami-
 liarissima. Postremo in idem damnabilis si-
 lentii vitium ruunt, qui juvenum indigentias
 parum curant. Quippe qui dum in graviores
 hujusmodi difficultates incidunt, valde concu-
 tiuntur: atque inscii, quamant via eo labyrin-
 tho evadere possint, in maximam idearum con-
 fusionem prolabuntur; ac in oppositos peræpe
 errores, præsertim si mores, aut religionem
 spectent, procliviores sunt.

§. XX. Quæ quum ita sint, diligentis, pe-
 riti, humilis, probi, sinceri, atque juvenum
 emolumenta curantis scriptoris dogmatici in-
 violabile munus fuerit, nedum adoptatas a se
 opiniones firmissimis solidare ratiociniis; sed
 & a gravioribus quoque adversariorum objecta-
 mentis acerrime vindicare. Sic enim censco,
 non quum horum alterutrum, sed quum utrum-
 que simul serio, adcurateque expletum fuerit,
 tunc demum veritatem plane, cumulateque fo-

re

re demonstratam. Quid vero, inquiet forte aliquis, si id genus difficultates enodari non possint? Est hæc puerilis, viroque philosopho indigna excusatio. Nam nihil eorum, quibus veritas oppugnatur, indissolubile prorsus fuit umquam, eritque in ævum. Peccet enim, necesse est, vel 1. *in principio*: vel 2. *in adplicatione*: vel 3. *in illatione ipsa*. Veritas namque veritati non contradicit, sed altera alteram firmat, ac omnes amico inter se fœdere copulantur. Adhibenda itaque *meditatio*, eaque seria, pacata, longa, iterata, intenta. Difficillimum quippe fuerit, post longas accuratasque id genus *meditationes* super *principium*, *adplicationem*, ac *illationem* seorsum initas, haud tandem prodire debere locum, ubi obtrusi contra veritatem argumenti vitium cubet, ac delitescat. Ac si ne his quidem mediis falsitatis latibulum detegi aliquando poterit; prudentius, ac laudabilius tunc longe fuerit eam rem calamo non attingere; altoque præterire silentio, quam graviores difficultates insolutas relinquendo, ea detrimenta lectoribus, ac in primis inexpertis juvenibus adferre, quæ memorata fuerent. Minus quippe noxium est reticere verum, quam validissimas de eo hæsitandi causas, & incitamenta præbere.

§. XXI. Sed hæc *parergi* fere loco dicta volo. Quare ad institutum (§. 17.) redeunt, in *factis historicis* criticæ artis quoque munus fuerit investigare diligenter, atque æquo iudicio decernere; sint ne illa possibilia, an im-

possibilia, ac repugnantia : rebus , quibus adscribuntur, congruentia, an minus aptata : vera, an ficta, an fabulosa, an parabolica : integra, an aucta, an mutilata : genuina, an apocrypha : certa, an probabilia, an incerta : continuo sæculorum fluxu ab omnibus probata, an aliquando rejecta : naturalia, an supernaturalia, an superstitiosa : alia hujusmodi. Nec tamen ea tantummodo. Enimvero in historicos, qui ea facta narrant, ad eandem *criticam* inquisitio ac determinatio pertinet, cœvine tantum ii fuerint, an etiam oculati : suppres, factoque viciniore, an recentes, ab eoque remotiores : unus, an plures : probi, an improbi, & mendaces : perspicaces, an socordes : docti, an rudes : in judicando cauti, an facile creduli : alterutri potius, an neutri omnino parti addicti : fide digni, an indigni : similia.

§. XXII. Hinc nedum utilitas, sed & necessitas longe lateque patet *artis criticæ*, si sæpe alias, in veritatum præcipue *historicarum* inquisitione. Quum enim non historici solum, sed & facta quoque ipsa, quæ narrant, ex tam variis, tamque multiplicibus lateribus spectari possint ; atque singulis in casibus variare oporteat judicia ipsa, & quamnam in illis fidem promereantur, determinare : consequens est, diligentem earundem veritatum exploratorem multa *critica* præditum esse oportere, si quidem in judicando errores declinare, atque ipsiusmet *criticæ* severitatem, justamque reprehensionem

eva-

evadere voluerit. Quid quod vel in Scripturis sanctis ea ars commendata omnibus, & inculcata? Sane Ecclesiastic. XIX. tamquam omni prudentia, judicioque defuiti traducuntur ii, qui narrationibus, quas audiunt, sine prævio critico examine statim fidem adhibent. Scilicet, uti superius adnotatum: *Qui credit cito, levis corde est*. Et Apostolus fideles enixe precatur Rom. XII. ut suæmet prædicationi evangelicæ non cœcum ac brutum, sed *rationabile*, ad sanioris nimirum criticæ leges exactum, *obsequium* præbeant. Mitto cetera.

§. XXIII. Jamvero si *ars critica* tantopere necessaria est in studio potissimum *veritatum historicarum*; postulat ea simul in *viro critico* magnum in primis *ingenii acumen*, & perspicacitatem: tum parem *judicii prudentiam*, & æquitatem; ut & versare diligenter ex omni parte, scrutari intimitus, ac plane internoscere quum facta eorumque circumstantias, tum historicorum indolem & characteres possit; atque pro merito justa, impartialia, & ab omni affectu libera judicia ferre. Ex quibus intelligimus, puram, ac germanam *criticæ* præxim magnorum esse virorum annosis studiis, & exercitationibus subactorum. Juvenes enim rigidi, pacatique examinis suapte natura impatientes, ac facile creduli, quaslibet simul, & quorumlibet narrationes pleno gurgite, oculisque clausis ebibunt. Optandum nihilominus, ut *criticis exercitationibus* paullatim hi adsuescant, saltem in *vita civili*: in qua æque, sm potius fortasse
magis

magis, ea ars necessaria. Ac necessaria quidem nedum in iis civium factis, quæ tametsi recentia, tametsi eadem in civitate gesta, tametsi a pluribus etiam simul visa; mille tamen, ac variis modis eadem die enarrantur; sed & multo magis circa obtrectiones, quibus aliorum fama facile, & inique dilaceratur. Ita quippe & ad sublimioris *criticæ habitum* contrahendum promptiores, ac paratiores paulatim fiunt; & fabulorum interea levitatem, ac mordacitatem improborum coarguent modeste simul, ac declinabunt. Sit ipsis in societate familiarissimum pulcherrimum, maximeque argutum illud adversus fabulosas & commentitias novitates omnes, quæ per desides quosdam, garrulos, hominesque nihili in dies prodire solent, *italice* expressum: IN LAZZARETTO IN QUARANTANA ut quadragenaria videlicet mora, ullane falsitatis peste inficiantur, palam fiat.

§. XXIV. Quum autem *criticam artem* tantopere inculcamus, tamquam præstantissimam animi dotem, cum qua in investigando diligentes, & in credendo cauti reddimur; & sine qua propriam socordiam, ac levitatem non sine sapientum mustrationibus indicamus; absit, quis in animum inducat suum, de eo iudicandi genere nobis heic esse sermonem, quo quidam obtrectatores aliena insectantur lingua mordaci, & plena probris. Ea namque non *critica*, innocens nimirum illa recte, prudenterque iudicandi magistra, ingenuorum virorum propria,
ad.

adpellanda est; sed *satyra*, dirus videlicet aliorum mores, ac famam dilacerandi carnifex, qua mordaces oblectantur, & invidi. Quinimo *veram criticam* commendantes ex animo, eos quoque in illa reprobamus excessus, in quos intemperantiores quidam, & effratiores Critici dilabuntur, dum sophisticis quibusdam cavillis aut ea probant, quæ rejicienda forent; aut rejiciunt, quæ forent probanda; aut denique paribus, quin & æsterni quandoque in casibus probatiores criticæ canones nunc complectuntur avidius, nunc ad libidinem deserunt. Et hos, inquam, inordinatos criticæ abusus improbamus: optantes, ut quæ pro opportunitate illius præcepta adhibentur, *recta* in primis *ratio* commendet: tum *sensus* probet optimorum *communis*: ac circumstantiæ postremo exigant, quibus aptantur.

C A P U T IV.

De Criticæ artis usu in secernendis genuinis scriptorum Operibus a spuris, & nothis.

§. XXV. **A**D Criticam spectare examen de librorum quorumcumque genuinitate, & integritate, adnotatum capite præcedenti (§. 17.). Præmittendum quoque idem librorum examen criticæ præceptis, quæ peculiarem historicorum indolem, & narratio-
num

num circumstantias spectant, non est in dubio. Quum enim ex iisdem illæ libris eruendæ sint; necesse proculdubio erit eorum genuinitatem, & integritatem prius perspectam habere: alioquin incerta erunt omnia, narrationes ipsæ, narrationum circumstantiæ, auctorum characteres, cetera.

§. XXVI. *Genuinum* opus adpello, quod ab eodem auctore scriptum fuit, cujus nomen titulus præferat. Contra vero *apocryphum*, quod ab alio scriptum fuit auctore, quam ejusdem titulus præferat. *Genuinum* dicitur etiam *authenticum*, & *autographum*; quemadmodum & *apocryphum*, *spurium*, *supposititium*, *notum*, *adfuturum*, ac ita porro adpellatur. Quorundam impostorum mos olim fuit, estque etiamnum hodie, librorum a se conscriptorum titulis non proprium, sed aliorum illustrium virorum nomina præfigere; ut majorem illis auctoritatem, famam, ac pondus concilient. Quum enim conscientia ipsa propriæ levitatis, aut imperitiæ, vel etiam infamiæ invincibiliter eos revincat, atque coarguat; verentur ob id aperta fronte in publicum prodire: atque magnorum idcirco virorum nominibus abutuntur, ut & distrahere exemplaria facilius possint, & incautis, ac imperitis securius imponere. Id genus est infamis libellus a sceptico homine publicam in lucem editus, cujus titulo *de imbecillitate mentis humanæ* illustre magni præfulis Huetii nomen mendaci calamo præfigendum putavit. Quade re legendus L. A. Muratorius in contratio
opu-

opusculo, cui titulus: *Forze dell' intendimento humano* (a).

§. XXVIII. *Integrum* vocatur opus, cui aliena manu nihil additum umquam fuit, nihil detractum. Contra vero *corruptum*, cui exter-
na

(a) Quum pseudo-huetiani opusculi hujus in superioribus Libris sæpe meminerim, atque magni viri L. A. Muratorii judicio subscribendo velut spurium illud, ac nothum ubique rejecerim; monitos heic tandem volo tirones, animo non satis certo ac firmo, sed nonnihil vacillanti & ancipiti id semper a me factum. Quum enim genuinum, omniumque judicio autographum ipsius opusculum aliud inscriptum: *Censura fustia Philosophia cartesiana*, sæpe perlustraverim attente, atque cum hoc *de imbecillitate mentis humana* diligenter contulerim; idem cavillandi genus (a quo illustris proculdubio Præsul omnino non abhorrebat) visum est mihi utrobique cernere & adnotare. Hinc ea dubitatio oborta, ab se adhuc fortasse juvene, ingenioque, uti fit, luxuriante illud potuisse componi; tum ætate non minus quam studiis marurum, & in *Dem. evangelica*, & in *Quæst. alnetanis*, quæ *Concordia rationis & fidei* simul inscribuntur, tacito saltem calamo rejecisse illud, & improbasse, aut castigasse saltem, & emendasse. Quippe eximiis his in Operibus *humana ratio* primas ubique partes habet in præstabiliendis firmandisque principiis, quibus superstruuntur; ac modo *ancilla*, modoque *pedissequa revelationis*, *divinaque fidei* ab eodem auctore appellatur. Ceterum quum has interuas animi mei suspiciones ex ingenito candore tirones haud latere volui, doctiorum Criticorum judicio lubenter me committo. Nolo enim opinari.

na manu vel additum fuit aliquid, vel ablatum. Mutatio, æque ac additio, siue interpolatio alicujus operis quum fraudulentæ manus externæ indicia esse possunt, tum ab omni fraude, doloque malo alienæ. Ac mutilari quidem ex fraude libri possunt, quum ex illis detrahuntur partes, in quibus proprii errores confodiuntur. Interpolari item ex dolo, in quibus iidem errores inseruntur, ac disseminantur. Sine dolo autem mutatio fit, quum aut ab erroribus quos continent, expurgantur; aut refecantur plura, quæ inutilia, ac supervacanea videntur. Fit etiam interpolatio sine dolo, quum ea illis adduntur, quæ a suis auctoribus omissa, scitu tamen utilia ac necessaria putantur. Ceterum parvæ quandoque mutilationes, unius e. g. aut alterius lineæ, amanuensium, ac typographorum oscitantia & incuria in opera siue MSS. siue typis edita facile etiam inducuntur. Eadem de causa induci leviores quidam, & accidentales mutationes possunt; quæ ubi substantiam ac sensum non variant, nihili faciendæ sunt. In neapolitana Vallemontii editione 1770. plura juvenum commodo, & utilitati aliena manu addita sunt. Plura vicissim ex *Jure nature*, & *gentium* Heinæcii in recenti editione pariter neapolitana detracta ac inutilata; quia & eisdem juvenibus minus utilia ac necessaria, & a *Jure nature* prorsus extranea & aliena visa fuere (Lib. III. §. 78.). Interim optandum, ut id genus mutilationes, & ab erroribus expur-

gationes omnibus in operibus fierent, quæ cum pluribus inutilibus, & falsis, & impiis etiam eximia multa, & præclara completuntur. Ita quippe & communis eorum lectio redderetur; & omnibus maxime utilitati ea forent, & emolumento, ne excepto quidem infami *Dictionario historico-critico* Petri Bayle; in quo bona multa, & egregia tamquam aurum in sterquilinio continentur.

§. XXVIII. Quum igitur librorum inscriptiones ac tituli cum adpositis auctorum nominibus impostorum opera (§. 26.) suspecti jam evaserint; quænam præcepta *ars critica* supeditat, quibus de illorum genuinitate, & autographia certi, tutique reddamur? Scilicet ea ipsa in primis, quibus, ut alibi (*Verit. resurr. J. C.* tom. II. §. 580. in *nota*) a nobis observatum, usus est olim S. Augustinus contra Faustum. *Constans* nimirum *traditio* scriptorum, qui ab ea ætate ad hæc usque nostra tempora floruerunt. Nam dum hi in idem judicium conspiciant omnes, datumque opus uni eidemque auctori omnes adtribuunt; nulla prorsus de illius genuinitate superest ambigendi suspicio. Atque istuc quidem potissimum, fereque unicum medium est, quo Platonis e. g. Tullii, Varronis, Cæsaris item, Terentii, Virgilii, Horatii, aliorum opera ipsorum respective factus esse non dubitamus. Idem quoque posteris futurum medium erit, ut quæ hoc sæculo conscribuntur opera, & in lucem eduntur, propriis eorum auctoribus prudenti, veracique judicio ad-

adtribuant; attestatio scilicet præsentium, aliorumque successione continua per futura sæcula subsequentium scriptorum.

§. XXIX. Alterum mendaces librorum titulos a veracibus, ac genuinos consequenter libros a supposititiis secernendi præceptum fitum in *identitate styli* cum eo, quo cetera ejusdem scriptoris opera, de quorum autographia non ambigitur, scripta sunt. Haud me latet, plura esse in eadem præcipue etate elaborata opera, in quibus magna styli uniformitas observatur; quum nihilominus constet, non unius ejusdemque, sed auctorum ea esse plane diversorum. Verum si paullo adcuratior inter eadem collatio & examen ineatur, pluribus in locis diversitatis indicia plura in oculos incurrent: adeo ut difficillimum prorsus fuerit eandem ubique vocabulorum proprietatem, eundem verborum complexum, eundem ornatum, easdem formulas, eandem dicendi energiam, eandem venustatem, eandem ubique cetera ad amussim invenire. Scilicet si ullibi verum, quod Leibnitianis creditum, *nulla essentia indiscernibilia*, sive inter se simillima; loquendi proculdubio, scribendique stylo id unice aptandum.

§. XXX. Ceterum si *styli identitas* magnum pro identitate scriptoris nobis est argumentum; absit, quis e contrario colligat, *styli diversitatem* indicium quoque esse diversorum scriptorum. Constat namque, in uno eodemque auctore stylum eo evadere cultiorem, & venustio-

stiozem, quo ad provectiorem ætatem, & ad studia maturiora properare solet. Ætas quippe, si studia quidem ac meditationes minime intermittantur, omnia corrigit, omnia perpolit, omnia in meliorem ac præstantiorem formam disponit. Nec argumenta omnia uno eodemque pertractari possunt stylo. Hinc aliter a Cicerone scripta Opera *philosophica*, aliter *oratoria*, aliter *familiaria*. Nec prætereundum, ad animi relaxationem, & lectoris oblectamentum eodem in libro data opera stylum quandoque ab auctore immutari. Quo spectat Gregorii M. illud *Moral.* lib. XI. cap. 1: *Immutationem styli, lector mi, æquanimiter accipe: quia & sepe eosdem cibos edentibus diversitas placet coctionis.*

§. XXXI. Quid si 1. alia auctorum nomina in recentiorum exemplariorum inscriptionibus legantur, alia in vetustiorum? Quid si 2. scriptores selectioris doctrinæ, & eruditionis peritissimos fuisse sciamus; opera interim ipsa, quæ illis tribuntur, exsucca sint, inepta, doctoque viro indigna? Quid si vicissim 3. opera quidem ipsa eximiam doctrinam contineant; illos autem, quibus ea inscribuntur, rudes fuisse constet, & imperitos? Quid si demum 4. a nonnullis vetustis scriptoribus de illorum autographia aliquando fuerit addubitatum?

§. XXXII. Ad singula respondendum. Ad primum. Diligenti, adcuratoque examini ea inscriptionum immutatio subjicienda, atque maturo serioque judicio pervidendum, a quibus, quo tempore, & quibulnam de causis ea acta fuerit. Nam

X

si,

fi, qui auctorum nomina in operibus immutarunt, homines fuerint multa doctrina, & critica, & iudicio exornati; atque gravissimas præterea causas ex stylo, & coævorum monumentis, ex limpidioribus fontibus aliis deductas habuerint; horum emendationibus adquiescendum erit. Sane hac methodo doctissimi PP. Benedictini Congregationis S. Mauri, alique viri doctrina & eruditione conspicui multa opera suis veris auctoribus, quibus sæculis barbaricis, quam severior critica e scholis exularet, detracta fuerant, aliisque tributa, restituerunt.

§. XXXIII. Ad secundum. Si utrumque certo constet; palam, & sine controversia est, opera supposititia esse, ac notha. Ad tertium. Quo egregia id genus opera spuria, & assuta dicamus, certo constare debet, eos, quibus inscribuntur, ad obitum usque rudes fuisse semper, & imperitos. Alioquin si *supernaturalis* aliquid ac *miraculosi* iplis acciderit, quo, expulsis pristinae ignorantiae tenebris, eorum mentes divinitus edoctæ, & collustratæ fuerint; genuina ea tunc maxime reputanda, & autographa. Exemplum habemus in Apostolis, Petro scilicet, Joanne, Jacobo, & Juda; qui tametsi rudes prius essent, & piscatores; ipso nihilominus Penthecostes die sic divinitus afflati fuere, atque in viros doctos ac sapientes commutati, ut ad primam Petri concionem eadem die habitam Christi fidem susceperint *circiter tria millia*, *perseverantes omnes in doctrina Apostolorum*; quemadmodum Cap. II. legitur *Actuum apostolicorum*.

§. XXXIV. Postremo tandem dubio, ut oportet, satisfaciētes, dicimus, diligenti studio per-
 vestigandum, quasnam causas habuerint, qui
 datorum operum autographiam in dubium ver-
 terunt. Nam si satis firmæ ac perspicuæ fue-
 rint; merito laudandi, nec ab eorum iudicio
 recedendum. Sin autem præfractæ, & ad libi-
 dinem ea dubitatio inducta fuerit; minime
 tunc audiendi. Scilicet mos olim hæreticis
 fuit, estque etiamnum hodie, illos divinæ Scri-
 pturæ libros tanquam supposititios, & apocryphos
 repudiare, in quibus ipsorum errores confode-
 rentur. Ea de causa Evangelium Joannæum
 repudiavere olim Alogi, Epistolas Paulinæ
 Cerinthiani, alii libros alios. Eademque de
 causa rejiciunt hodie Novatores libros Macha-
 bæorum, Epistolam Jacobæam, similes; quod
 in illis eorum errores de *purgatorio*, in hac
 vero de *necessitate honorum operum ad salutem*
 perspicue damnentur. Ea igitur impura Chri-
 stianorum, fex generose spernenda, soliusque Ec-
 clesiæ, ac nobilissimorum Patrum omnium tem-
 porum, omniumque sæculorum iudicio, & at-
 testationibus firmiter inhærendum.

§. XXXV. Sed ad integritatis, & corruptio-
 nis Librorum indicia præcipua progrediundum.
 Observatum paullo superius (§. 27.), quum
 dolo ac fraude, tum bona fide, atque ad u-
 beriore[m] lectorum utilitatē & commodum
 mutilari ac interpolari aliorum libros posse,
 ac imo solere. Quibusnam igitur *mediis*, *cri-
 ticaque* præceptis integros a corruptis distin-

xerimus ? Scilicet præcipuum, simulque tutissimum integros, incorruptosque libros agnoscendi medium fuerit, si a cœvis, & continuata serie sibi succedentibus per subsequentiâ sæcula scriptoribus quum partes illorum omnes memorentur, quæ in illis modo leguntur ; tum nulla prorsus desideretur illarum, quarum iidem meminerunt. Ubi enim utrumque simul constat, constabit consequenter, nullam umquam factam in illis fuisse mutilationem, interpolationem nullam ; ideoque esse id genus libros integros, & incorruptos. Contraria ratione differendum de corruptis. Ita quia singuli N. T. versiculi, qui modo in sacris codicibus leguntur, non memorati tantum, sed & commentariis suis a temporibus Apostolorum per subsequentiâ sæcula expositi, & collustrati a Patribus, aliisque viris illustribus fuerunt ; nec unus quidem præterea deest illorum, de quibus hi mentionem fecerunt ; ea de causa hujusmodi codices integros esse & incorruptos plenâ certitudine comprehendimus.

§. XXXVI. Tandem *apocryphia* non minus, quam *interpolationis* librorum promiscua signa esse possunt, si 1. errores in iis referantur, qui post scriptorum, quibus inscribuntur, tempora exorti fuerint. Si 2. dogmata iis prorsus contraria, & opposita contineant, quæ in genuinis eorundem scriptorum operibus aliis constanter edocentur ; nec vero alia emendationes, aut retractationes sint aliorum. Si 3. auctorum nomina in illis memorentur, qui post ipsorum ætatem

ætatem floruerunt . Si 4. vocabula iis immisceantur , quæ ab eorundem ætate aliena fuerent , nec orta ea sint , & in scholas inuenta nisi sequioribus ævis . Si demum 5. in vetustis catalogis , in quibus cetera eorundem auctorum Opera relata sunt , minime inveniuntur . Quæ ceteroquin suppositionis potius , quam corruptionis librorum suspicio censenda . Ac suspicio quidem ; quia ejus silentii causæ potuerunt esse plures ; ut inferius dicam . Mitto cetera leviora .

C A P U T V.

De artis criticæ usu in historicarum veritatum inquisitione , pro varia testium ætate , numero , sagacitate , probitate , doctrina , narrandi modo , silentio , ac rerum , quas narrant , admirabilitate .

§. XXXVII. **C**onstitutis præcedenti capite critica præceptis , quibus genuina & incorrupta auctorum opera dignoscantur ; facillimum nunc fuerit , qui veri historici habendi sint , qui ficti , quique postremo dubii & incerti , internoscere . Veri scilicet censendi , quorum nomina in genuinorum librorum titulis inscribuntur . Ficti , quibus tribuntur in eisdem titulis opera supposititia , & apocrypha . Dubii demum , de quibus non fa-

tis constat; sintne datorum Operum auctores. Ea autem omnino nosse juvat, ac imo oportet, ut *verorum* historicorum characteres, perspectos habeamus; ac ita quantane fides eorum narrationibus adhibenda, intelligamus.

§. XXXVIII. Historici, qui quidpiam narrant, modo multiplici inter se conferri, & comparari possunt, comparatione nedum *simplici*, ut ego quidem adpello, sed & multipliciter *composita*. *Simplex* historicorum aliquid narrantium comparatio fit, quum ceteris characteribus utrinque paribus præsuppositis, in uno tantum inter se conferuntur: puta in ingenii perspicacitate, aut in severitate judicii, aut in præcellentia doctrinæ, in similibus. Fit autem collatio *composita*, quum in pluribus simul characteribus ea instituitur: e. g. in ingenio, doctrina, judicio, probitate conjunctim. Ex singulis porro comparationibus istis sive *simplicibus* sive *compositis* intelligere possumus, in quam inter se ratione sint pondera narrationum ipsorummet historicorum: & cuiusnam proinde ex illis majorem, aut minorem fidem præstare debeamus. Quin si per tempus eam rem evolvere minutatim liceret, singulas collationes possibiles totidem *algebraicis*, atque *arithmeticis* formulis exhibere possemus. Sed odi semper de industria otiari.

§. XXXIX. His generatim præobservatis, rem ipsam propius attingamus, atque ex multis possibilibus Historicorum inter se comparationibus potiores, & quibus facillimum fuerit

fuerit evolvere ceteras, seligamus. Principio igitur ætatem quod spectat (§. 37.), testes coævi majorem, supparem minorem, recentiores minimam, vel etiam nullam fidem in facti narratione promerentur. Coævi namque purius ac distinctius scire illud potuerunt: minus limpide, minusque distincte suppare: recentes autem, nisi per horum monumenta id sciverint, nulla alia ratione in illius intelligentiam devenire potuerunt (§. 4.). Deinde major fides adhibenda testibus oculatis, quam auritis. Rem namque gestam priores propriis ipsi oculis perspexerunt: posteriores autem orali traditione ab aliis acceperunt. Longe nunc facilius fuerit in traditionem aliorum, quam in propriam experimentalem facti cognitionem erroris aliquid, & aberrationis irreplisse. Rursus, ceteris paribus, plus credendum multiplici, quam paucitati historicorum, rem eandem diversimode narrantium. Facilius est enim paucos, quam plures, qui rei gestæ interfuerunt, illudi potuisse. Verum ceteris, inquam, paribus (quæ conditio ubique fere intelligenda). Enimvero si pauciores illi ingenio perspicaciores fuerint, & in judicando severiores, necnon moribus probiores ac veraciores; palam, & sine controversia est, horum narrationem narrationi illorum jure ac merito esse præferendam: quia his in casibus & minus decipi ipsi, & minus nos quoque decipere potuerunt.

§. XL. Ad hæc testes doctiores, sagaciores, ac veraciores testibus anteponendi. semper mi-

nus doctis, minus sagacibus, minusque veracibus. Sunt enim ab errandi periculo, ac decipiendi fraude longe remotiores, ac liberiores. Preterea rem *historice* narranti major, *oratorie* minor, *poetice* omnium minima fides adhibenda. Est horum ratio manifestissima; quia historicus solius veritatis diligens explorator, & enarrator, rem prout gesta est, stylo tradit simplicissimo. Orator autem eloquentiæ floribus aut exaggerat nimium, aut plus æquo imminuit. Poeta demum fabulas, ac phantasiæ ludos, quibus de more oblectatur, per sæpe immiscet. Rursus minus audiendus historiographus, qui in rei gestæ narratione in alterutram partem propendet, quam qui nullo partium studio, sed solius veritatis amore quidpiam scribit. Affectus namque obnubilando rationem, ac voluntatem depravando, historicos ad decipiendum, & illudendum paratissimos reddunt. Quid si demum coævus, aut oculatus testis rem narret, interea dum ceteri omnes illam silent coævi historiographi? Scilicet nihil horum *silentium* faciendum, ac illius attestationi tenaciter inhærendum *positive*. Qui porro rem tacet, illam haud propterea negat: ac multiplici de causa fieri potuit, ut silentio præterierit, puta ignorantia, inertia, timore, obsequio, negligentia, oblivione, rationibus, aut affectibus, causisque aliis, quæ potuerunt esse plurimæ. Itaque *argumentum*, quod ex huiusmodi silentio desumptum *negativum* adpellant, ad probandum æque ac refellendum satis ineptum.

Equi-

Equidem tot circumstantias in Christi passione a Joanne e. g. enarratas quisnam suspectas ; aut omnino falsas jure idcirco putaverit , quod ceteri eas siluerint Evangelistæ ?

§. XLI. Quid si etiam id genus facta historici narrent , quorum circumstantiæ vel pugnant inter se mutuo , vel non satis cohærent ? Scilicet aut illusionis ea indicia sunt , aut fraudis : ut proinde nulla sit illis fides adhibenda . Quemadmodum nec ulla quoque in posterum præstanda illis , quos falsiloquos aliquando experti sumus , atque mendaces . Scilicet *ubi semel quis pejeravit , ei credi postea , etiamsi per plures deos juret , non oportet* : agebat sapienter Tullius *pro C. Rubirio Postumo* . Prudens quippe semper suspicio subest iteratæ fraudis , novæque malæ fidei , ac promptæ ad decipiendum inclinationis . Quin ex Aristotele iusta mendacium hominum pœna est , *ut quum vera loquuntur , ipsis non credatur* . Ceterum , ut ad primum illud redeamus , in narrationibus historicis circumstantiarum uniformitas , ac mutua cohæsiō magni faciendæ sunt , atque velut prima , & *intrinseca* veritatum historicarum indicia , *notæque characteristica* spectandæ (lib. I. §. 120.) . Natura quippe pugnantia non admittit : & quæ secum ipsis non satis congruunt , ratio vix adduci potest , ut credat : ut romanorum classē e. g. speculo ustorio prope Syracusas ab Archimede fuisse incensam ; quod est a Galeno , aliisque enarratum . Quæ namque arte , & quibusnam instrumentis parari tam magna specula po-

poterant , ut tot naves in mari e littore incenderentur ?

§. XLII. Superest jam tandem , ut de prodigiorum , ac miraculorum attestationibus paulo adcuratius differamus . Sunt ea enim momenti gravissimi , ac tantopere cum *Deistis* , ac *Libertinis* hisce nostris temporibus disputata . *Miraculum* , ut ab ipsius definitione initia ducam , est *effectus præter leges naturæ mechanicas productus* ; ac *supra naturalium* proinde causarum vires *constitutus* . Nulla est enim , nec fuit umquam , naturalis causa , quantumvis robusta , efficax , & actiosa , quæ hujusmodi naturæ leges suspendere , immutare , multoque minus delere prorsus , ac evertere possit . Earum namque vires eisdem potius legibus reguntur omnes , & attemperantur : nec alio illis excurrere licet , quam quo eadem leges ferunt . Itaque miracula ab eo tantum induci possunt , qui eas leges fixit , qui servat , qui moderatur : scilicet a solo Deo rerum omnium opifice , conservatore , ac moderatore .

§. XLIII. Verum duplex in miraculis possibilitas distinguenda , *intrinseca* ac *metaphysica* , tum *extrinseca* & *moralis* . Priori sensu possibilia miracula dicuntur , si nil contradictorii , nil repugnantis in se complectantur . Dicuntur autem possibilia sensu posteriore , si *moralibus* Dei perfectionibus , bonitati in primis , veracitati , ac sanctitati minime adversentur . Porro miracula non repugnare intrinsecus , ac fore illa divinitus possibilia , jam mox observatum .

Sane

Sane si Deus hominem e. g. ex nihilo condidit, deditque illi & corpus, & spiritum, & vitam, & omnia; multo facilius poterit ex mortuis, quamquam sit id miraculorum fortasse maximum, suscitare. Quum quavis in re restauratio multo semper facilior sit primæva ipsius formatione (a). Nec etiam repugnare illa *extrinsecus*, iis scilicet in casibus, in quibus a Deo fiunt in confirmationem veræ Religionis, aut in virtutum moralium contestationem & adprobationem, atque in gravissimos ac beneficos fines alios pro hominum utilitate & commodo; non est in dubio. His enim in casibus *morales* Dei perfectiones nedum illa non lædunt, non tangunt, sed & commendant plurimum, ac maiorem ipsæ gloriam, decus, ac splendorem adaugent. Hinc cæco nato visum redditurus Servator aiebat discipulis suis, se eo miraculo *Dei gloriam manifestaturum*. Quin & alia miracula patraturus idem protestatus est sæpiissime in Evangelio. Repugnarent autem *extrinsecus*, si eos fierent in fines, qui easdem perfectiones everterent, aut minimum obnubilarent: puta si fierent ad decipiendum, ad promovendam idololatriam, ad superstitionem protegendam, ad depravandos hominum mores, ad virtutes deprimendas, ad similia, quæ perfectionis

(a) Vide, quæ in intrinsecam miraculorum possibilitatem paullo superius (Lib. III. §. 91.) a nobis adnotata fuere.

fectionibus Dei moralibus, sapientiæ, veracitati, ac sanctitati adversantur.

§. XLIV. Quæ quum ita sint, facillimum nunc fuerit de miraculorum attestationibus juxta severiores *criticæ* leges judicia ferre. Scilicet quum miracula fiant a solo Deo; tum mechanicis naturæ legibus suspensis; ac non nisi gravissimis de causis pro hominum utilitate & commodo: hinc caute admodum procedendum in eorum *realitate* credenda ac stabilienda. Ac historicis facta illa interdum narrantibus numquam fides adhibenda, nisi plenâ certitudine constiterit, nec in eorum cognitione & examine illusos fuisse ipsos, nec in eorundem attestatione nos decipere voluisse. Alioquin aut ipsorummet phantasie illusionibus, aut confictis ad decipiendum fabellis, aut naturæ postremo phænomenis, mirabilioribus tamen illis, nimiumque raris & insolitis accensenda. Equidem constanti naturæ cursui, ac naturali rerum mundanarum nexui, a quo miracula excluduntur, ingens proculdubio pondus inest, quod convelli nullo modo, nec humanæ auctoritati postponi unquam poterit, nisi ab omni prorsus quum illusionis, tum fraudis suspicione immunis, planeque liberrima ea fuerit.

§. XLV. Quemadmodum vicissim impudentis, maximeque pervicacis ac refractarii hominis foret, miracula aut rejicere prorsus, aut in dubium vertere, si fraudis & illusionis nulla prorsus suspicio occurrerét in attestationibus. Propterea

pterea quod scilicet his in casibus historici plenissimam fidem faciant rebus gestis, quas narrant (§. 5. *seqq.*). Alioquin prudens suspicio in illis subesset aut in tradendo fraudis, aut in credendo erroris, & illusionis; vel deceptos nimirum fuisse illos, vel nos decipere voluisse: quod ceteroquin adversatur hypotesi. Verbo, ubi de *miraculis* agitur, æque devianda nimia Libertinorum pervicacia, repudiandique licentia, ac nimia de more credulitas femellarum. Utendum multo *judicio*, multaquo *critica*, ut ne vera *miracula* ex animi levitate credamus, quæ vera non sunt; nec quæ sunt vera, ex damnabili incredulitate falsa putemus. Sed ad postrema properandum.

C A P U T VI.

De critica sacra in veritatibus ad religionem pertinentibus, atque per Scriptores divinitus inspiratos nobis traditis.

§. XLVI. **V**Entum jam tandem ad Libri IV. totiusque operis caput postremum, in quo potiora *critica sacra* tradenda præcepta, quæ divinas Scripturas sive *dogmatice docentes* aliquid, sive *historice narrantes* spectant. Potiora; inquam: uberrimam namque, absolutamque ea de re exhibere tractationem Theologorum criticorum potius est, quam

quam Philosophorum . Ea de causa consulendi L. A. Muratorius de *Moderam. ingen. in religionis negotio* , P. Honoratus a S. Maria in *Animadver. ad regulas critices* , alii . Sacram cam vero *criticam* adpello quum ratione præceptorum , quæ magna ex parte sacra sunt ; tum ipsorummet sacrorum Librorum , qui nedum sacri , sed & cælestes , & divini habendi , ac nuncupandi .

§. XLVII. Ut autem in scrutandis veritatibus ad religionem pertinentibus divinam auctoritatem ad *critices sacre* leges exactam majori cum fructu , ac feliciori cum successu adhibere valeamus , quatuor meo quidem iudicio præire , solidiorique doctrina , & eruditione comprehendendi debent . I. Necessene fuerit , ut Deus hominibus loqueretur ? II. Loquutus ne illis revera sit aliquando ? III. Quo in codice divina ejus eloquia contineantur ? IV. Quibusnam præceptis eorum sensus ex divina mente eruendus , ac determinandus ? Primum necessitatem spectat divinæ revelationis . Secundum existentiam . Tertium inquisitionem , ac determinationem . Postremum intelligentiam . Singula utilitatis , & gravitatis plena , ea potissimum ætate , in qua Deistarum rabies , odiumque in religionem implacabile omnes intendit ingenii nervos , ut ab imis ea fundamentis radicitus , si fieri potest , convellat . Sed illustres christianæ religionis Apologistæ , si sæpe alias , hoc potissimum ævo nostro ora consuere sapius , dentesque contrivere loquentium iniqua . Nos
heic

heic paucis , quoad locus feret , sed sufficientissime .

§. XLVIII. Principio igitur *necessitatem* quod spectat *divinae revelationis* , quæ primo loco proposita , facillimum fuerit in ejus intelligentiam , plenamque persuasionem recta devenire , si hominem *integrum* probe distinxerimus a *corrupto* . Homini *recto* , & *intero* , & *perfecto* , qualem per infinitam Dei creatoris sui potentiam , sapientiam , ac bonitatem primum a se conditum , propriisque manibus conformatum esse oportuit ; cujus scilicet arbitrium robustius , cujus ratio collustratior , cujus affectus sedatissimi , & qui familiari tandem Dei favore jugiter fruebatur ; sufficientissima *naturalis religio* erat , quo finem suum consequi posset . Statim ac vero a Deo rebellavit , atque ratione obtenebratus , fractus arbitrio , affectibus exagitatus , solitoque Dei favore privatus evasit ; adeo ut pravo ipsius exemplo iniquitas totum infecerit genus humanum , ne ipsis quidem summis gentilium Philosophis exceptis , qui , non minus ac ceteri homines , *evanuerunt* , Paulo teste ad Romanos scribente , *in cogitationibus suis . . . & dicentes se esse sapientes , stulti facti sunt* : post eam , inquam , universalem humani generis corruptionem , postque ea prorsus amissa præsidia , insufficientis prorsus evasit *religio naturalis* ad eundem finem consequendum , ac necessaria esse cœpit *revelata* , ut & collustrari denuo *corrupti* hominis ratio obtenebrata posset , & fractum
fo.

solidari arbitrium , & æstuentes coerceri affectus , & Dei per Christum expiari offensa , ejusque favor & amicitia recuperari , & ad bene agendum , ut oportet , vires per nova potentiora auxilia augeri , ac roborari . Eodem prorsus modo quo homini sano ac vegeto sufficientissima sola ipsius crura sunt deambulando . Statim vero egere is baculo incipit , ubi claudus , viribusque confractus evaserit . Quod erat primum (a) .

§. XLIX. Secundum . Loquutus ne autem vera sit Deus , ac promulgata proinde ne sit hominibus *revelata religio* ; quum sit ea *questio facti* , testibus dirimenda est omni exceptione majoribus , de quibus nempe nulla prorsus
nec

(a) Quum eam hominis *integri & corrupti* distinctionem non adverterent Tindal , alique hujus furfuris Deistæ , factum est , ut *revelatam religionem* rejecerint , & oppugnarint tamquam homini , cui sola *naturalis* sufficeret , supervacaneam . Ea autem , ut oportet , admissa ; & *naturalis* insufficiencia , & necessitas *revelate* statim nunc ambæ in oculos incurrunt . Scilicet plantis rore cæli madidis ac refrigeratis supervacanea aquæ effusio ad radices , ut virescere possint : necessaria vicissim , si ros ob aeris siccitatem deerit . Corpori sano ac vegeto medicamenta inutilia pariter & supervacanea : necessaria contra , quum morbis afflicatur , ac debilitatur Jam sæpe dictum , sæpeque pro opportunitate repetendum : magna errorum tatebra fuit semper , eritque in ævum neglecta rerum distinctio inter se maxime diversarum !

nec in tradendo fraudis, nec in credendo illusionis suspicio subfit. Hujusmodi est autem integra Judæorum synagoga : hujusmodi integra Ecclesia Christi, quarum illa per Prophetas, hæc per Apostolos Deum reipsa loquutum testificantur. Utriusque porro attestatio tanto veracior censenda, præterque omnem dubitationem ambabus ulnis excipienda atque probanda, quanto illa Prophetas, hæc Apostolos viros fuisse *publice*, ac longo annorum ductu experta est quum *prophetiæ spiritu*, tum *vi patranda miracula* exornatos; ac doctrinam præterea docuisse illos naturali honestati ubique consentaneam. Attestationes enim duarum nationum integrarum, *testiumque simul oculatarum*, nisi sinceræ, veraces, atque ab omni fraude, & illusione liberæ & immunes habeantur, ecquænam, quæso, aliæ tales esse, haberique poterunt? Porro Deus, qui solus miraculorum patrator (§. 42.), solusque præscius futurorum, neutram illis vim contulisset, neutra vi eorum confirmasset missionem, nisi velut suos ministros, revera illos elegisset, atque ad doctrinam *revelatam* hominibus *sedentibus in tenebris*, & *in umbra mortis* promulgandam destinasset. Pugnat namque cum *moralibus* ipsius perfectionibus, sapientia in primis, veracitate, ac sanctitate sive patratione miraculorum, sive futurorum prædictionibus eventu completis, sive, quod magis est, utrisque simul, falsi quidpiam, atque mendacis ad homines decipiendos confirmare. Deci-

Y

pere

pere namque aut infcii est, aut maligni, aut mendacis. Quæ a mente omniscia, optima, perfectissima longe aliena. Quod erat secundum.

§. L. Tertium. Sed quonam in Codice divina hæc eloquia continentur? Est hæc alia *questio facti* tertio loco (§. 47.) proposita, cujus solutio consequens est præcedentis, ab eaque deducenda & colligenda. Quod fit nulla negotio. Scilicet *revelationis* administri fuere Apostoli, atque Prophetæ (§. præc.). In horum itaque libris divina eloquia continentur, in libris, inquam, veteris ac novi Testamenti. Esse autem hujusmodi libros *genuinos*, & *authenticos*, illa eadem *critices* principia ostendunt, quæ jecimus capite superiori (§. 28.). *Integros* præterea esse illos, & *incorruptos*, principia alia paullo post (§. 35.) tradita probant ad evidentiam usque, Ut proinde de codicibus utr. Test. sive quoad illorum *divinitatem*, sive quoad *autographiam*, sive demum quoad *integritatem*, nulla prorsus subfit errandi suspicio. Equidem divinitatis non minus quam genuinitatis., & integritatis sacrorum codicum magnum proculdubio, & ineluctabile argumentum est, quod integra Hebræorum natio, integra Ecclesia Christianorum eos semper tales habuerit, ac summa religione & cura diligentissime custodierit. Nulla aliorum quorumcumque librorum *genuinitas*, nulla *integritas* tanta testium nube, atque argumento probabitur, quam cum hoc comparando. In firmissimum hunc scopulum Deistarum jacula non illiduntur.

tur modo, sed & franguntur, & in pulverem coneruntur (a). Quod erat tertium.

§. LI. Postremum. Superest jam tandem postrema quaestio quarto loco (§. 47.) proposita, quæ *critices sacrae* canones ac præcepta spectat, quibus in sacris Codicibus verus ac germanus divinatorum eloquiorum sensus ex Dei mente eruendus a nobis sit, ac determinandus. Qui augendis rerum difficultatibus, ac studiose juventuti a quibusdam studiis avocandæ ferre intenti videntur, ea in interpretandis divinis Scripturis scitu necessaria proponunt, quæ magnis tantummodo ingeniis, eximiisque viris

Y 2

per-

(a) Si centum, ac mille etiam mihi linguæ, calamique suppeterent, ultro omnes, & cum gratiarum actione impenderem in contexendis elogiis iis, qui *revelationis necessitatem*, & *existentiam* adversus Incredulorum perfidiam demonstrarunt, acerrimeque propugnarunt. Puto enim, scientificos doctorum virorum labores numquam melius, majorique cunctis laude, & gloria impendi, nisi quum præstantiora Dei beneficia, inter quæ istuc proculdubio præstantissimum, humano generi summa munificentia collata ob oculos ponunt, Illud autem nondum satis intelligo, nec parum mœroris cordi adfert, dum illustres iidem *religionis* Apologistæ, iique catholici, tale tantumque argumentum velut informe, ac dimidiatum relinquunt, nec ad summum perfectionis culmen & apicem, ut oportet, deducunt. Siquidem ubi ad *christianæ religionis veritatem* scribendo, demonstrandoque *generatim* devenire, gradum plerumque sistunt omnes, nec ultra, tamquam si res expleta jam, numerisque omnibus absoluta foret, pro-

perspecta esse possunt. Ac in primis in hebraica, græcaque lingua magnam exigunt peritiam, ad familiaritatem. Deinde antiquitatum Judæicarum, finitimarumque nationum, præsertim Ægyptiorum, atque Persarum plenam intelligentiam. Pestremo veteris philosophiæ perfectissimam comprehensionem. Sine quibus præfidiis oportere, inquiunt, singulis in paginis divinorum Codicum a recto tramite aberrare.

§. LII. Verum postquam laboriosa itinera isthæc pluries iniverunt, eorumque semitas instar *viæ regię* immensa cura ac diligentia latissime

progrediuntur. Quasi quod, inquam, ea in tot sectas, tamque inter se moribus, dogmatibus, ritibusque pugnantes & oppositas scissa atque divisa non sit; vera autem, sancta, & a Deo cælitus immissa *religio* esse non oporteat nisi una! Munus itaque catholici scriptoris, illudque præterea inviolabile fuerit, ut posthac ulterius generose prætergressus simul ostendat, veram Christi religionem in sola catholica, romanaque Ecclesia contineri; sectasque proinde ceteras non esse nisi hæreticorum conventicula, & a vera religione desertorum. Porro has partes paucis, quoad locus feret, supplere mox curabimus subsequentibus §§. 53. & 54: præsertim quum recentium quorundam hæreticorum, in primis Joannis Clerici eo evaserit audacia, ut in immortalis Opusculo H. Grotii *de veritate religionis christiænæ*, quibusdam cum additamentis ab se recuso contendat, demonstrareque adnitatur, religionem christiãnam, quam veram *generatim* ostendit Grotius, aliam non esse nisi *Arminianam*, sive *Anabaptistarum*. Quis crediderit?

tissime jam straverunt viri docti ; quorsum in eundem labyrinthum omnes indiscriminatim injicere velle , atque ab studiis tantopere utilibus ac necessariis retrahere quodammodo , & abstertere ? Dicamus potius , si magna ingenia id genus itinera remeare voluerint , ab hujusmodi præsidiis oportere initia sumere : aliis , qui ad id minus idonei videntur , sat esse , si illustrium virorum laboribus grato animo perfruantur . Enimvero sacrorum Codicum tam exactæ , tamque adcuratæ *latine* jam prostrant *Versiones* , ac tam ditissima , & eximia in eas évulgata *Commentaria* , ut nulla umquam privatorum an-nosa studia exæquare posse illa videantur . Sed pergamus , atque potiora *critices sacræ* præcepta paucis proponamus .

§. LIII. Primum autem *criticæ* , & *hermeneuticæ sacræ* præceptum in divinarum Scripturarum interpretatione nulla umquam oblivione delendum , nobis erit isthuc : consulendum nempe semper catholicæ Ecclesiæ judicium , atque quidnam datis in locis ipsa sentiat , immobili adsensu , plenaque persuasione probandum , ceterisque præferendum . Huic enim concredita sunt eloquia Dei . Hæc *columna* , & *firmamentum veritatis* . Huic perpetua Servatoris ad-sistentia usque ad consummationem sæculi ab eodem sæpe promissa . Huic ab ipsomet Servatore dictum : *Portæ inferi non prævalebant adversus eam* . Ejus demum visibili capiti pollicitatio facta : *Pro te rogavi , Petre , ut numquam deficiat fides tua . Et tu aliquando con-*
V 3
versus,

versus, confirma fratres tuos.

§. LIV. Catholicæ, inquam, idest romanæ Ecclesiæ iudicium ea in re consulendum, eique soli eas infallibilitatis promissiones esse factas; propterea quod ea sola *notas características* præferat *veræ Christi Ecclesiæ*, quæ non est nisi una. Sunt hæ namque triplici potissimum in classe constitutæ, quarum prima est *doctrinæ identitas* cum illa Apostolorum; de qua identitate Paulus ad Galatas I: *Si quis vobis evangelizaverit præter id, quod accepistis, anathema sit*. Secunda *continuata*, nec umquam interrupta *pastorum successio*, de qua Servator apud Joannem capite postremo: *Pasce agnos meos . . . pasce oves meas*: quæ primum D. Petro dicta, successoribus quoque post illius mortem omnibus & singulis inculcata intelliguntur; quousque ad consummationem sæculi Ecclesiæ, quæ sine pastoribus esse non potest, sit duratura. Postrema tandem *communicatio donorum Spiritus Sancti*, de quibus idem Apostolus I. Cor. xii: *Unicuique* (in vera Christi Ecclesiæ) *datur manifestatio spiritus ad utilitatem . . . Alii datur gratia sanctorum . . . Alii operatio virtutum . . . Alii prophetia : Alii discretio spirituum : Alii genera linguarum* (a). Quæ characteristicæ veræ

(a) Sunt apud Theologos, in primis apud Card. Bellarminum, & aliæ veræ Ecclesiæ *notæ*. Sed hæ mihi potiores videntur, & ad rem sine exceptionibus plane evincendam efficaciores.

ræ Christi Ecclesiæ *notæ* ut catholicæ , idest
 romanæ Ecclesiæ insunt , ita frustra eas vicissim
 perquireret in hæreticorum conventiculis , se-
 ctisque quibuscumque . Ac inest illi quidem
 nota prima, *doctrinæ* nimirum *identitas* cum il-
 la Apostolorum . Quippe quum ex constanti
 Conciliorum omnium praxi nihil in ea um-
 quam credendum proponatur , *nisi quod ab om-
 nibus, quod ubique, quod semper creditum* ; ideo-
 que *quod* a Christo , & Apostolis sive ore , sive
 per epistolas *traditum* fuit . Sed inest quoque
 & secunda, *continuata* scilicet , nec umquam
 interrupta in Petri cathedra *pastorum successio* .
 Enimvero in romana sede D. Petro successit
 Linus , Lino Cletus , Cleto Clemens , ac ita
 porro usque ad Pium VI. jam feliciter re-
 gnantem . Qua de re prostrant tabulæ chro-
 nologicæ , in quibus romanorum Pontificum an-
 ni , menses , diesque computantur . Inest postre-
 mo & *nota* tertia , idest *communicatio donorum*
Spiritus Sancti , *vis* in primis *prophetica* , &
miraculorum . Id quod non ascetarum quidem
 libelli , sed ecclesiastici Annales , sed Acta San-
 ctorum , sed Martyrologia , sed publica monu-
 menta alia , a viris non doctrina tantum & pro-
 bitate illustribus , sed & *summa* etiam *critica* , ac
judicio rigidissimo præditis collecta & expurgata,
 demonstrant ad evidentiam usque . Contra vero
 ac in quorumlibet hæreticorum sectis sese res
 habet , quarum dogmata *nova* , & *falsa* : qua-
 rum pastores , idest hæresiarchæ *recentes* : qua-
 rumque cultores *prophetiæ* ac *miraculorum vi*

prorsus destituti . Quibus de rebus post Theologos legendi Historiæ ecclesiasticæ scriptores , atque Chronologi .

§. LV. Est autem & principium alterum magni quoque faciendum . Sectanda nimirum vestigia Patrum , ab eorumque sensu & interpretatione, quum uniformi iudicio in idem conspirant omnes, nusquam recedendum . Sunt enim Patres *doctores* illi , quos teste Paulo , ad erudiendam Ecclesiam suam providentissimus Dominus pro opportunitate in illa excitare solet . Ergo dum in idem omnes consentiunt , communique calculo eundem Scripturarum sensum eruunt , nobisque proponunt , ejus instinctu , & afflatu loqui intelligendi sunt , qui eos in Ecclesia pro opportunitate excitat . *Tales quippe , ac tanti viri , de illis contra Julianum agebat S. Augustinus , secundum catholicam fidem hoc verum esse confirmant ; ut vestra fragilis , & argutula novitas sola auctoritate conteratur illorum . Sane si omni in re consensio omnium gentium lex naturæ putanda est ; quod est sapienter a Cicerone adnotatum ; quanto magis velut lex evangelica putanda erit consensio omnium Patrum , qui ad consummationem sanctorum , in opus ministerii , in ædificationem Corporis Christi , quod est Ecclesia , Pastores , ac Doctores , eodem docente Apostolo Ephes. IV. missi sunt ? Quod si in diversas abeant sententias ; liberum tunc fuerit, cui melius placuerit , subscribere : quia humano tunc sensu loqui jure ac merito reputantur . Quemadmodum & humano quoque sensu loquuntur , quum Philosophorum vices gerunt . Scilicet*
illu

illustris theologi Melchioris Cani illud *de Locis theol.* lib. VII. cap. 3: *Ecclesiæ Patres quum in philosophiæ incidunt quæstiones, aut vulgi, & rethorum opiniones sequuntur; aut etiam quas a platoniciis acceperant, in christiandorum scholas invehunt.* Quocirca his in casibus tantum eorum dicta valebunt apud cordatos viros, subdit opportune Muratorius, *quantum rationibus, & robustissimis, nec fallacibus, argumentis nitentur.*

§. LVI. Tertium. Iis autem in Scripturæ locis, in quibus auctoritatem suam nondum interposuit Ecclesia, nec Patres communi calculo eorum sensum determinavere; ea interpretatio adhibenda, quam *artis hermeneuticæ* leges ferent; quæque cum iis perfecte congruat, vel saltem non adversetur, *quæ ubique, quæ semper, quæ ab omnibus,* quod sapienter monitum Lirinensi, *credita sint.* Quæ namque sunt talia, non nisi a Christo, & Apostolis Ecclesiæ fuere tradita. Ideoque quamdiu adversus *profanas novitates* eadem semper religiose servantur, atque creduntur, eadem semper Christi Ecclesia perpetuari intelligitur. Quemadmodum vicissim humana conventicula a vera Christi Ecclesia disjuncta & avulsa merito reputantur, quæ *novitatis infamiam* præferunt: cujusmodi sectæ omnes hæreticorum sunt, quæ in Ario e. g. in Nestorio, in Eutychete, in Calvino, in Lutero, in Socino, in aliis id genus nebulo-nibus initia habuere. Qua de re legendus illustris præsul Bossuet in *Historia sulla variazione delle*

delle chiese protestanti . Scilicet in Religionis negotio ejusdem Lirinensis illud in *Commonitorio* aureis characteribus exarandum : *Eadem , quæ didicisti , doce : ut QUUM DICAS NOVE , NON DICAS NOVA* . Omnis namque in Religione profectus & incrementum non in *novitate* , aut in *mutatione vetustatis* situm est ; sed in ampliori dumtaxat veterum dogmatum explanatione , & commentatione .

§. LVII. Quartum . Præterea velim , divina Biblia non prius tangantur manibus , non prius legenda aperiuntur , quam ex imo corde , castaque mente precibus antea ad Deum fufis , supernoque lumine humillime implorato . Quum enim nimis profunda , ac myfteriorum plena sint eloquia Domini ; tutior , ac promptior scrutandi , adsequendique via fuerit , si eorum manifestatio , & intelligentia ab ipsomet loquente Deo , luminumque parente efflagitetur . Quo in loco recolenda , quæ superius (Lib. III. §. 90.) a nobis adnotata fuere . Ceterum quum hæc inculcanda putamus , illud iterum , serioque monemus , ut propriam quisque interpretationem ad Ecclesiæ catholicæ dogmata , ad sanctorum Patrum doctrinam , tamquam ad lydium lapidem accurate exigere numquam prætermitat . Ita quippe & *sacra* semper servabitur *vetustas* , & *profana* ubique *novitas* devitabitur . Alioquin si *privatum* quisque *spiritum* pertinacius sectandum contendat , innumeris erroribus , atrocique bello Religio exponetur : ut in Quakeris , in Calvinianis , in aliorum phanaticorum sectis

fectis moerentes observamus, apud quos prætextu *interni afflatus* quot capita, tot dogmata inter se pugnancia & opposita adoptantur. Scilicet imitandum memorabile ipsiusmet Apostoli exemplum, qui tametsi ad Apostolatum ab ipsomet Salvatore vocatus & adsumptus esset; atque doctrinam, quam prædicabat, *per revelationem Jesu Christi* accepisset; conferre nihilominus Jerosolymis voluit illam cum Petro, Joanne, & Jacobo: *Ne forte in vanum curreret, aut cucurrisset*; quemadmodum ipsemet scribit in capite II. epistolæ ad Galatas.

§. LVIII. Postremum. Quum constat, quidquam a Deo nobis revelatum, sive *historiam* spectet illud; sive *doctrinam*, longe infallibilius (si quidem ita loqui fas est) reputandum, quam *primæ* naturalium disciplinarum *veritates*, quam *prima axiomata*, quam *prima scita*. Nititur id quippe suprema Dei ratione, & auctoritate: qui ut infinite sapiens & intelligens, falli nequit; ut infinite bonus ac beneficus, nequit fallere. Quum vicissim humana ratio imbecillitate sua, affectuumque subagitatione magnis sæpe deliquiis subjiciatur. Hinc Apostolorum princeps B. Petrus, licet redemptionis mysteria propriis ipse oculis perspexisset; *prophetias* nihilominus, quæ eadem mysteria spectabant, *firmiores* adpellat propria oculari inspectione: *Habemus*, inquit, *firmiorem propheticum sermonem*, & quæ eadem in Epist. II. cap. I. sequuntur lectu dignissima.

§. LIX. Omnis igitur de veritatibus Religionis

gionis inquisitio, omnis labor, omne studium huc collimare debet, ut certi tutique reddamur, vere illas in divinis eloquiis contineri; vereque proinde esse a Deo revelatas. Ubi id constiterit, nil quærendum erit ultra, non earum rationes, non modi, non fines, non nexus, non comprehensiones, non quidvis simile; sed pacata tunc illis mente, plenaque cordis persuasione adquiescendum, *intellectum captivando in obsequium fidei*. Nam vel ipsamet *humana ratio* nos abunde revincit, menti infinite intelligenti, infiniteque potenti infinita perspecta esse posse, quæ exiguas, & imbecillas humanæ intelligentiæ vires prætergrediantur. Quinimmo in ipsamet *natura* infinita propemodum sunt, de quorum veritate ambigere non possumus; licet nullo modo intelligamus: ut animalium generatio, ut evolutio plantarum, ut motus cordis, ut mentis corporisque commercium, ut millena his similia. Sit itaque adversus impiorum conatus, atque contra subnascentes fortasse in mysteria fidei dubitationes omnes firmissimum propugnaculum istuc in ore semper, & in corde habendum: A DEO, QUI NEC FALLI, NEC FALLERE POTEST, IN SCRIPTURIS SANCTIS HOC MIHI REVELATUM. VERUM IGITUR, FIRMITERQUE CREDENDUM: QUAMQUAM ID NULLATENUS INTELLIGAM. Atque de *arte inquirendi veritates historicas*, deque Opella integra A. M. D. G. hucusque.

F I N I S.

EMINENTISS. SIGNORE

PAolo di Simone pubblico stampatore in questa città di Napoli supplicando espone , come desiderando di stampare un Opera intitolata: *Ars inquirenda veritatis* del P. Vincenzo Fasanelli Minore Osservante , prega l' Eminenza V. commetterne la revisione a chi meglio le parerà ; e lo riceverà a gratia ut Deus &c.

A. R. Dom. D. Cajetanus Giannattasio S. Th. Profess. revideat , & in scriptis referat .

Die 18. Septembris 1786.

ANTON.EPISC.ORTHOSIÆ V.G.

Joseph Roffi Can. Dep.

EMINENTISS. SIGNORE

Questa volta più che in ogni altra ò avuto grandissimo piacere d' eseguire gl' ordini di V. Eminenza , cogli quali mi impuneva di rivedere la dottissima Opera intitolata: *Ars inquirenda veritatis* del P. Vincenzo Fasanelli Minore Osservante uomo pio, e dotto . E poichè in essa non vi ò ritrovata cosa , che sia contraria alla Fede , ed alla Morale evangelica ; anzi vi ò ammirato una sana dottrina , e profonda meditazione ; stimo , se pure altrimenti non piacerà a Vostra Eminenza , possa darli alla pubblica luce delle stampe ; onde i giovani apprendano oltre agli canoni logici chiaramente in essa espolti , i principj benanche di un ottimo

ma Morale sparfi con fomma avvedutezza in tutta la fudetta Opera .

Napoli 2. Decembre 1786.

D. V. Eminenza

Obligatiffimo , favoritiffimo fervo
Gaetano Giannattasio Parroco de' Fiorentini,

Attenta relatione domini Revisoris , imprimatur . Die 3. Januarii 1787.

ANTON. EPISC. ORTHOSIÆ V.G.
Joseph Roffi Can. Dep.

S. R. M.

PAolo di Simone pubblico ftampatore fup-
plicando efpone alla M. V. qualmente defidera
ftampare un Opera intitolata : *Ars inquiren-
dae veritatis di Fr. Vincenzo Fasanelli dell'Or-
dine de' Minori Offervanti* . Pertanto fupplica
la M. V. di commetterne la revifione a chi
meglio le parerà ; e l'averà a gratia ut Deus.

*Rev. P. D. Emmanuel Caputo in hac Regia
Studiorum Univerfitate Profeflor revideat auto-
graphum enunciati operis , cui fe fufcribat ad
finem revidendi ante publicationem , num exem-
plaria imprimenda concordent ad formam Rega-
lium ordinum , & in fcriptis referat , potiffi-
mum an quidquam fit in eo , quod Regiis juri-
bus , bonisque moribus adverfetur , & utilia
ftatui pertractentur . Verum pro executione Re-
galium ordinum diei 20. Maii currentis anni
idem*

*idem Revisor cum sua relatione directè ad nos
transmittat etiam autographum prædictum, ad
finem &c. Neapoli die 9. Septembris 1786.*

J. A. TARSENSIS C. M.

S. R. M.

Mandatis tuis obtemperans diligenter per-
legi opus, cui titulus: *Ars inquirenda verita-
tis in usum studiosæ juventutis*. Et quum in eo
non invenerim, quod juribus Majestatis offi-
ciat, ideo typis edendum censeo. Datum in
Monasterio SS. Severini & Sôsi die 21. De-
cembris anno 1786,

Humillimus servus

E. Caputo P. Professor.

Die 18. Mensis Januarii 1787. Neap.

*Viso Rescripto suæ Regalis Majestatis de die
6, currentis mensis, & anni, ac relatione R.
P. D. Emmanuelis Caputo, de commissione Rev.
Regii Cappellani Majoris, ordine præfatæ Re-
galis Majestatis. Regalis Camera sanctæ Cla-
ræ providet, decernit, atque mandat, quod im-
primatur cum inserta forma præsentis supplicis
libelli, ac approbationis dicti revisoris; verum
non publicetur nisi per ipsum Revisorem facta
iterum revisione affirmetur, quod concordat, serva-
ta forma Regalium ordinum: ac etiam in pu-
blicatione servetur Regia Pragmatica. Hoc suum.*
SALOMONIUS. PATRITIUS. TARGIANO.

Vidit Fiscus Reg. Cam.

Illustri Marchio Citus Præses S. R. C. &
ceteri Ill. Aularum Præfecti tempore subscript.
impediti.

Athanasius.

Errata typographica

Corrigenda

Pag. xv. lin. 26. geratim	generatim
xvi. l. 1. continent	continet
33. l. 4. plurimaque	plurima
62. l. 27. malumque	malumque
93. l. 4. CXVIII.	CXVII.
96. l. 26. CXTIII:	CXVIII.
95. l. 17. iutrinsecas	intrinsecas
133. l. 4. spectaculo	spettacolo
147. l. 2. administra- tione	admiratione
159. l. 24. tandemque	tandemque
171. l. 12. infinitas	in finitas
182. l. 2. destrunt	destruunt
184. l. 6. ut plurimum	ut plurimum
197. l. 25. sumum	sumum
200. l. 7. Peccatum	Peccatum
212. l. 26. gettula	guttula
219. l. 30. rata	rara
227. l. 9. <i>Anacronismis</i>	<i>Anachronismis</i>

ANT 1317460

